

ҲАКИМ САТТОРИЙ
МАҲАҚ
ТОШИЙ

Танланган бадиий публицистика

(2)

«О'ЗБЕКИСТОН»
ТОШКЕНТ
2008

Муҳаррир: Карим БЎРОНОВ

Ўзбекистон Ёзувчилар уюшмасининг аъзоси Ҳаким Сатторийнинг сараланган бадиий публицистикасидан тузилган биринчи мажмуа «Имзоли хатлар» деб номланган эди. Маълумки, имзосиз хатлардан кимларгadir кутилмаган ташвишлар пайдо бўлган, одамларнинг ҳаловати бузилган. Муаллиф китобини ўқиганлар, аксинча, хурсанд бўлсин, кайфияти кўтарилисинг, деб шундай шартли ном кўйган.

«Маҳак тоши» эса ростни ёлғондан, асилини ноасилдан ажратадиган мезонларга ишорадир. Зеро, китобдаги деярли ҳар бир бадиада — у хоҳ тарихий маъзууда бўлсин ёки замонавий мусиқа санъати ёхуд журналистика муаммоларидан баҳс этсин, хоҳ миллий менталитетимизнинг бирор қиррасига диққатни тортсин — аниқ мақсад қўйилган ва долзарб саволларга жавоб изланган. Муаллиф ўзи қаламга олган муаммоларни теран таҳлил этар экан, маҳак тошини топгандек бўлади. Битикларда ҳар бир масалага аниқ муносабат ифодаланган, хуносалар тайин. Шу туфайли улар китобхонларни бепарво қолдирмайди, деб ўйлаймиз.

ISBN 978-9943-01-216-5

© «O'ZBEKISTON» NMIU, 2008

*Қалбимдаги
“Соҳибқирон”
кўшиғи*

ТошДУ (Ўзбекистон Миллий университети) даги жами устозларимга шогирдлик эҳтироми ила.

МУАЛЛИФ

ҚУЁШНИ ЕЛКАЛАГАН ЧҮҚҚИГА БОҚИБ

Eрда жонланиш, тириклик тонг отишидан бошлана ди. Уфқда қуёшнинг кўриниши билан жами ҳаракатларда суръат ва шиддат пайдо бўлади. Қуёш зарралари ўз ҳарорати билан борлиқдаги мавжудотга илҳом бағишлайди.

Ҳаммамиз, эҳтимол, қуёш чиқишини турли нуқталардан турли вазиятларда кузаттандирмиз, бироқ болаликда, онамиз бағрида тонг оттириб, ҳали тафти совимаган тўшакни эринганча тарқ этиб, бўғот остида тиззани кучоқлаган куйи бобо қуёш сайрини кузатган лаҳзалар мурғак вужуднинг катта йўл бошида чуқур ўйга ботиб турган ҳаяжонли дамларига ўхшайди энди.

... Етти боловли уй, ундан даҳлизига чиқиласди. Даҳлиз олди очиқ. Бино қирлиқда жойлашгани учун айвон тизза бўйи тош тахтлаб кўтарилиган. Одатда, ота-онам қўй-эчкини суurviga ҳайдаб кетган бўларди. Хилват ҳовлида ҳали бугунги ўйинларини чўтлаб олмаган, ҳали жўралари ҳам уйқудан уйғонмаган бола мук тушиб, бошини тиззалари орасига бекитиб, офтобнинг Бовурчи чўққиси ортидан чиқиб келишини кузатади. Секин уйғонайтган тоғ тизмалари кўкимтири губор ичидаги жимиirlайди, миллиард чақирилаб наридан ташриф буюраётган ҳарорат баданга хуш ёқади. Бутун ёз, кузнинг аксарият иссиқ кунлари шу ҳолда бошланади, шу тарзда кечади.

Йиллар ўтиб, зеҳним уйғонгач, бу қўл етмас жойларга оёқ етиши мумкинлигини идрок эта бошладим. Қолаверса, бизнинг ва қариндошларимизнинг ёзлик яй-

лови шу томонларда экан. Энди чўққи этагидаги Қияликлар тубида, харсанглар бағрида, зовлар, даралар қаърида қандай сир-синоатлар борлиги билан қизиқ бошладим. Бу жойларнинг номлари ҳам қизиқ эди: Хўжапирпир, Ҳусан-үлди, Чўпонучди, Fўтала, Ёғтўкилди, Ахтабулоқ, Зогчахона ва Қалъаи Шерон. Кичикқалъа деган жой ҳам бор эди. У Бовурчига яқинроқ, анча баландликда, унинг оппоқ тошлари бағридан оқиб чиқувчи жилга қўйига палахмон тошидек интилар ва Fўлмараша орқали Қалъасуви дарёсига кўшиларди. Fўлмараша уч чақирилмлар давом этувчи тор дара бўлиб, икки томондаги тоғлар деярли бир-бирига тегиб тургандек яқин, шунданми, ерга кам қор тушар, пана жойлари қиши бўйи қуп-куруқ бўларди. Fўлмараша орқали Қалъаи Шеронга кириларди. Fўлмараша Кичикқалъа ва Қалъаи Шеронни ўткир бурчак тарзida бир-бирига туташтириларди. Болалик, ўсмирилик йилларим шу жойларда ўтган. Ҳар бир арча, ҳар бир бурум, сакиртма таниш ва қадрдон, бу жойларнинг соғинчи юракни асло тарқ этмайди.

Айниқса, қуёш ҳар кунги сайрини бошловчи чўққининг биз томондан қараганда ўнг тарафидаги Қалъаи Шерон дарасининг қуюқ губор ичидаги элас-элас кўринувчи мавҳум ва сирли манзараси кўз олдимдан кетмайди. Дара сидирға тоғ тизмасини улкан ангинивонадек ўйиб тушган, ундандаи қор сувларидан пайдо булувчи дарё шарқ тарафни банд қилган тоғни тилимлаб, ўзига йўл очган эди. Эрталабки қуёш ёғдусида дара кулранг губорга тўлиб тургандек туюлар, Сарингул тарафдан беш юз метрча тик тушган силлиқ қоялар офтобда ялтилларди. Ўзи билан қори эримайдиган Ҳисор тоғлари бағридаги бу гўша ҳар қандай ошуфта дилни ўз оғушига чорлар, унга суқланиб қараган киши беихтиёр висолига ошиқ бўлиб қоларди. Аслида, инсон ҳам табиатнинг бир бўлаги экан, унинг ижоди табиатга тақлил бўлиб қолаверади, гўзалликнинг, нафосатнинг, ҳатто эзгуликнинг энг нодир тимсолларини фақат табиатдан топиш мумкин. Бу даъвони соҳир гўшаларда юз, минг йиллар билан ўлчанувчи тарих, ўша жойларга инсон зотининг қадам ранжида қилгани, паноҳ ва ором топгани далили ҳам исботлайди. Ана шу дарада,

ялтироқ тик қоянинг қарши тарафида бир ғор борки, у чинакамига гўзал табиат ва боқий тарихнинг муштарак рамзига айланиб улгурган.

... Бола улгайди, уни мактабга бердилар. Эсини танигунча 3—4 синф ўтиб ҳам кетди. Ногаҳон, ёзги таътил бошланган илк кунларда мактаб ҳовлисида катта йифин бўлди ва директор табиатга экспурсия уюштирилишини эълон қилиб қолди. Экскурсия табақали этиб ташкил қилинганди. Энг кичкитойлар қўл етадигандек жойлар — Намозгоҳ, Хишайни ёки Дехвронга, ўрта ёшлилар Қинноқ, Шоғолоғзи ёки Гўриморга, катта болалар (улар энг баҳтли эди) — Қалъаи Шеронга, яъни Амир Темур горига боришадиган бўлди!

Форларни ҳеч ким қўл билан ковламаган, улар Яратганинг ўзи жумлаи жаҳонга тартиб бераётганда пайдо бўлиб қолган. Форлар турли табиий оғатлардан табиий иҳоталанган, бегона кўзлардан йироқ жойлар. Шунданми, одамзод таржимаи ҳолига доир энг нодир ҳужжатлар (ашёлар), инсон қўли ва оёғининг ўчмас ҳароратлари форларда яшириниб қолган. Агар йўлингиз тушиб, Тошқўрғон қишлоғи яқинидаги Амир Темур горига бориб қолсангиз, бу ҳақиқатни дастлабки лаҳзадаёқ ҳис этасиз: одам қадамидан холи, узоқ-узоқларда айқириб ётган дарада, аниқроғи, форнинг кириш қисмидаги тош тахтлаб ясалган улкан супа бор. Баландлиги 7—8 метр, узунлиги 20—25 метр келадиган бу супанинг умри Самарқанддаги Хўжай Хизр масжиди билан тенгдир-ов. Негаки, бу форда VII—VIII асрларда умргузаронлик қилган Ҳошим ибн Ҳаким — Муқанна қадам ранжида қилгани ҳақида тарих китобларида аниқ-тиниқ маълумотлар бор. Бугунги кунда бу фор Муқанна эмас, Амир Темур номини география хариталарида дарж этиб турибди.

Шубҳа йўқки, болаликнинг қизиқишлиарга тўла дунёсида мактаб ҳовлисидаги ўша йигилиш кичиклар қалбига ғалаён олиб киради. Энди тезроқ үлғайиш, тезроқ «Форсафарини азимат қилиш» учун шошади. Менда ҳам шундай ҳис бор эди. Форга бориб келган акаларимта ҳавас билан қарап, уларнинг ҳикояларини тинглар, саволлар

берар эдим. Рости, у пайтда бизни табиат экзотикаси, гор қизиқтирган, бошқа нарса эмас.

Нихоят, кутинган кун келди. VIII—Х синф ўқувчилари бирга экскурсияга чиқадиган бўлдик. Қийқириқ, шовқин-сурон билан йўлга тушилди. Кимлардир эшак миниб олган, кўпчилик пиёда. Болақадам билан секин-секин кетаяпмиз. Қишлоқдан чиқиб, тоққа ўрлагач, йўл қийинлашиб бораверади. Тор, эгри-бугри тошлоқ сўқмоқдан юриш осон эмас, яна нуқул юқорилаб кетиш керак. Бир оз юриб, терлагач, ҳафсала ҳам пир бўла бошлади. Бу орада кимдир сирпаниб, 2—3 йиқилган, бошқаси онаси белбоққа тутиб берган нонни аллақачон еб олган, бирорнинг эшаги тўқимини ташлаган. Ҳуллас, олакуроқ «лашкар» йўлда давом этарди. Кун нишаблаганда аранг Ҳўқизбурунга етдик. Бу ҳолда қоронғу тушганда ҳам форга етиб боролмаслигимиз аниқ. Устозлар маслаҳатлашиб, сафарни шу жойда якунлайдиган бўлишиди. Шовқин-сурон билан ортга қайтилди. Форни кўриш орзузи яна бир йилга ке-чиқадиган бўлди.

Мактаб болалари ҳар йили форга чиқаверишмасди. Баъзи йиллари тоғларга ҳаддан ташқари кўл қор тушар, ларё сувлари баҳор-ёз ойлари шаштидан қайтмас, шундай паллада эҳтиёт шарт, болалар дарага бошлаб борилмасди. Йил бўйи фор иштиёқи жунбушга келганда, кўнглигимизда устозларимиз фикри ўзгармай қолишенин-ю, фор сафари амалга оширилишини илтижо қиласардик. Ўқувчиликда кичикларнинг катта оламида ўқитувчи мутлақ ҳукмдор ҳисобланади. Унинг хоҳиши, азму қарори бола тақдирауда туб ўзгаришлар ясади. Биз ҳам синф раҳбаримизга, география, биология муаллимларимизга чуқур умид билан боқар, уларга зимдан иштиёқ ва файрат тилар эдик.

Ҳар ҳолда, бу йил ҳам орзумиз армонга айланмайдиган бўлди. Устозларимиз қатъиятли ва биз оз қайсарроқ эди — май ойининг охирларида мактаб жамоаси яна сафарга отланди. Назаримда, бу тал ўқувчилар яна ҳам кўл, қизиқиш яна ҳам баланд, шовқин-сурон янада авжида эди. Табиатнинг бетимсол гўзаллиги завқимизни баттар жўштиреди. Атроф тип-тиник, тоза, баҳор гулларининг муаттар ҳиди борлиқни тутган. Бир бора ўтган йўлдан

такрор юрилса, машаққат тенг бўлинар экан, чунки қаерга қадам қўйишингни, қачон бошингни эгиб, қоя ёки дарахт тагидан ўтишингни, олдинда текислик, ўр ёки нишаб келишини биласан, шунга ўзингни тайёрлайсан ва, демак, қувватинг кам исроф бўлади. Бу гал ўтган йилги маррага тез ва барвақт етиб келинди. Форга етиш тайиндек эди. Шундай ҳам бўлди, бироқ қоя бағрида қорайиб турган фор оғзига кўзимиз тушганда қанчалик шодланган бўлсак, унга етиб олгунча шунча кунимизни кўрдик.

Илонизи йўл қияликтан келади-да, кафтдек текис жойдан чиқиб қолади, шу ердан ўн қаватли бинога тикилгандек тепага қаралса, фор кўринади. Унга етиш учун, аввало, кўприкдан ўтиш лозим экан. Кўприк ўрнида ётқизилган 4—5 арча устунлари туар, улар орасидаги шоҳшаббаларни сув ювиб кетган, болдиrlари ҳам омонат эди. У шу кўринишида жуда жулдуру туюлса ҳам, олис йилларга дахли бордек эди. Уни ким қурган, биринчи бўлиб ким ўтган — бундай саволлар устида бош қотириш кишини ўтмиш билан вобаста қилиб қўяди. Ёючлар орасидаги ёриқларга тош, шоҳ ташлаб, кўприк эпақага келтирилди-да, «лашкар» ундан ўтиб, юқорига ўрлади. Энди майда қийирчоқ тошли тик қияликтан деярли ўрмалаб, бир чақиримлар тепага кўтарилиш керак. Ҳар қадамда арчалар, улар қумурсқадек ёпирилиб келган оломоннинг шахдини сокин кузатади. Арчани минг йил умр кўради, дейишади, шу ҳолда у қандай сир-синоатларга гувоҳ, кимларга паноҳ бўлган, кимларни кузатган, афсуски, бу асрорлар на унинг танаси ёки баргларига, на бағрида ёнбошлаб ётган супа тошларга ёзилган. Тарих, гарчи бизни ўраб турса-да, биз уни кечиб юрсак-да, сирлилигича, мавхумлигича қолаверади.

Фор оғзидаги супага етиб олишнинг завқи Эверестни забт этиш қувончидан кам эмас эди. У ердан ҳозир ўтилган йўлга, кўприкка, қояларга, дарага бемалол назар солиш, бу соҳир манзарани қароқларга жойлаш, ўпкани тўлдириб нафас олиш ва ўзингни бир қадар баҳтли ҳис қилиш мумкин эди. Кимки шундай баландликларга кўтарилса, унга бир улуғворлик юқади, ҳар қандай ҳаёт ҳодисасига юксакликдан назар ташлайди, унинг тасавву-

ри, идрок доираси кенг бўлади, таъбир жоиз бўлса, уларга «назари баланд»лик насиб этади. Ҳа, турмуш икир-чикирларидан бир зум силтаниб чиқиб, тоғларга бориш, чўққиларга кўтарилиш керак. Шунда одам излаб юрган нарсасини топар, яшаш ҳикматини англар. Албатта, мен илк дафъя ўша жойда кечирган ҳиссиётларимни тиклашга ожизман, бироқ хотираларга қулоқ тутганимда шу эътирофлар беихтиёр қофозга тушди.

Ростдан, фор саҳнига кўтарилиш гаштли, сурурли эди. Бу ерда тириклик излари шундоқ билиниб турарди: чала ёнган ўтин, сомонли лой, тутундан қорайган шифт. Демак, кимлардир барқарор яшаган, фор уларга бошпана бўлган. Форнинг оғзи маҳобатли эди: супа билан шифтнинг ораси тўрт қаватли уй баландлигича бор. Йўлак кун чиқишига қараб давом этар, фақат эллик қадамлар наридаги улкан тошлар фор давомини бекитиб турар, нигоҳ шу ерда тўхтарди. Супага ҳамма етиб кела олмаган, қолганлар йўлда давом этарди. Вақт ўтиб, эт жунжика бошлади, совуқда тер қотган эди.

«Амир Темур фори» деб аталувчи бу гўша турли тоифадаги қизикучиларни ўзига жалб қилиб келган. Унга узоқ-узоқлардан гоҳ илмий мақсадларда, гоҳ саёҳат илинжида ташриф буюришган. Гувоҳларнинг эсласича, 50—60 йиллар олдин ердан ва шигдан фор жавоҳирлари —сталактик-сталакмитлар етарлича чиқиб-осилиб турган (айни кунларда уларни туморга ҳам тополмайсиз), китоблар топилган. Форнинг биринчи қисми — Отхонада оҳурларнинг ўрни, қозиқлар бўлган. Минг мashaққат билан етиб борган сайёҳлар «арзиурли» совға сифатида бу ашёларни талаб кетаверишган...

Форни шартли равишида икки қисмга бўлишади. Супадан ичкарилаб, 150—200 қадам жилгач, яна очиқ жойга чиқиб қолинади. Шу қисми «Отхона» деб аталади. Бу галги сафаримиз шу жойда якунланган.

Бу сирли масканнинг чинакам жозибаси билан ошно бўлиш учинчи уринишда — Х синфда ўқиб юрган пайтларимизда, аниқроғи — мактабни битириш арафасида насиб этди. Бу гал фақат биз, синфдошлар раҳбар Ўткир Кўчимов ва биология муаллими Жўра Ҳалимов «Қўмон-

дон»лигига йўлга чиққанмиз ва ғорда анча ичкарилаганмиз. Тўрт қаватли уй баландлигига бошланган ғор торай-иб-торайиб, бир киши аранг ўтадиган каваккача ичкалашади (тораяди).

... Отхонадан сўнг асосий қисмга ўтишда тош териб, зиналар қилинган, бир оз юқорига кўтарилиб, ғорга кириб кетилади. Ичкаридаги манзара — чинакам мўъжиза. Зим-зиё қоронғулик, қўл фонари оёқ остини аранг ёритади, нам ҳаво, сирпанчиқ ингичка сўқмоқ, тошлар туртиб чиққан, йўлни тўсган, юқоридан дўлайган. Бирдан ҳаммаси тугаб, боши берк жойга бориб қоласиз. Билмаган киши «Ғор тугали» деб шу жойдан ҳам қайтиши мумкин, билганлар эса бўри уясидек тор кавакни топадилар ва йўлни давом эттирадилар. Биз ҳам кавак яқинида тўпландик. Ким биринчи бўлиб бошлайди? Шунда мен биринчи бўлиб бошлаганман, 10—15 метрлар судралиб боргач, кенг, бепоён жойга чиқиб қолганмиз.

Шундан сўнг ҳам бу гаройиб масканга жуда кўп марта ташриф буюрдим. Гоҳ узоқдан келган ишқибозларга йўл бошловчи бўлиб, гоҳ улфатлар билан «маёвка»га чиқиб. Бу сафарлар давомида қисилмадан бемалол ўтиб, кўлгача етганмиз. Қўл йилнинг бир мавсумида қуриб қолар экан. Сўнгра кўлдан кейин ҳам йўл топганмиз, имкон даражасида ичкарилаб, ғорнинг яна давоми бўлишига ишонганмиз.

Хуллас, муболағасиз айтганда, бир кўринмас куч бу сирли гўшага чорлайверган, қолаверса, қўнгилочар жойлардан мосуво тоғлар орасида иштиёқни қондирадиган, иродани чархлаб олишга кўмаклашадиган, умрингни тасодифлар билан безайдиган бошқа воситалар бўлмагани учун ҳам «тўлишиб кетган» пайтларда истак шу хилват жойларга етаклагандир. Энг кейинги сафарим — 1991 йил 7—8 август кунлари «Амир Темур ўтган йўллар бўйлаб» ёшлар экспедицияси билан қадам ранжида қўлганим. Унчабунча одамнинг қадами тегавермайдиган олис ва кимсасиз бу жойларга жамоатчилик вакилларини бошлаб келишим, умуман, экспедициянинг ташкил этилиш тарихи жуда қизиқ.

Рұхшунослар, педагоглар инсон тарбиясида турли омилларнинг таъсир даражасини роса ўрганғандар. Бирор-бир омил (воқеа, шахс) бир кишининг бутун келажаги-ни белгилаб бериши мүмкінлигини улар эътироф этади-лар. Мабодо, мен туғилиб, улғайтан мұхит бошқачароқ бўлғанда, эҳтимол, мен бутун вужудим билан Темуршу-нос бўлиб кетардим. Фақат ўсмирилигимдаёқ қалбимга ўйилган бу қадрдан мавзуга бироз кейинроқ қайтишимга тўғри келди. Форга сафар, унинг таассуротлари бутун ўсмирилик йилларимни, улғайиш давримни марвариддек безаган. Ота шаҳримиз Шаҳрисабзда Соҳибқирон бобом қурдирган Оқсарой борлигини билгач, умуман, у зоти шариф шу шаҳарда туғилиб, шу атрофларда вояга етга-нидан хабар топгач эса ўзимни бу мўъжизага эшлигим-ни, пайваста эканлигимни сезганман. Бу туйгу қалбимда меҳр бўлиб, ишқ бўлиб парвариш топган.

Орадан йиллар ўтгач, экспедиция уюштириши фикри қачон, қандай вазиятда пайдо бўлганини тиклашга ури-наяпман. Бир ён дафтаримда: «Ният. Амир Темур излари бўйлаб экспедиция. Тошкент—Самарқанд—Шаҳрисабз (Оқсарой) — Хўжаилғор қишлоғи — Тошқўрғон (Амир Темур гори). Бир газета редакцияси, масалан, «Ёш ленин-чи» оталиққа олиши мумкин. 17.08.90» деган ёзувлар бор экан.

Эсласам, айни ўша пайтларда «Қашқадарё ҳақиқати»-дан бўшаб, Тошкентга келаман, деб юрган чоғларим эди. Ўшанда гоҳ иш, гоҳ уй-жой масаласида Қарши — Тош-кент оралиғида ўнлаб марта поездда қатнаганман. Ҳар сафар турли кайфиятда вагон деразасидан атрофни кузатиб кет-ганман ва темир йўл ўтган жойлар қанчалик серкўлам тарихга шоҳидлигини ҳис этганман. Эҳтимол, шундай чоғларда юқоридаги сўзлар қайд этилгандир. Боз устига 90-йилларда, Горбачёвнинг ошкоралик сиёсати туфайли тарихга қизиқиши кучайган, баъзи бирорлар оғзига келга-нини гапириб, кўнглига хуш ёқсан ишни қилиб ётган кунлар эди. Шундай шароитда «Амир Темур» мавзусининг акс садо бериши тасодифий бўлмаган (бошда изоҳладим) ва бу кайфият анча безовта қилганга ўхшайди: 1990 йилнинг 30 июнь — 15 июль кунлари Андижондаги

«Шаҳрихон» санаторийсида дам олганман ва қундалигимда «Амир Темур излари бўйлаб» деб сарлавҳалангандан мақоланинг режаси баён этилган.

Хуллас, «қайта қуриш» жадал кетаётган ўша талотўп кунларнинг бирида — 1990 йил 19 сентябрь куни паспортимга муҳр босилиб, мен ҳам тошкентликлар сафига қўшилдим ва шу куни «Саодат» журналига бўлим муҳаррири сифатида ишга қабул қилиндим. Энди «нима ҳунарим, қандай иқтидорим бўлса, кўрсатишими» мумкин эди. Журнал топшириқларидан вақт ажратиб, ҳали тўла жиҳозланмаган хилват хонада якка-ю ягона «гарнитур» — омонат қўйилган стол-стулга ўтириб, хаёлимда пишиштан режа асосида «Шахсий мулоҳаза: Амир Темур излари бўйлаб ёшлар юриши уюштирилса, йўл оғир бўладими?» деб номланган мақолани қоғозга туширдим. Оддий сарғини машинка қоғозда 7 саҳифада тифиз қилиб ёзилтан бу «асар»да ҳали бу юртларда ҳеч ким тилга олишга журъат этмаган фикрлар, мавзу қаламга олинган эди. У «Биз мустамлака азобларидан қутулиб, ўзлигимизни бир оз англаш сари интиляяпмиз», деб бошланарди. Мақолада Амир Темур талъатини гавдалантироқчи (шу орқали ўқиганларда унга нисбатан меҳр уйғотмоқчи) бўлганман. Жумладан, унда кейинги барча нашрларда тушириб қолдирилган шундай гап бор: «Амир Темур инсониятнинг улуф аллари — Юлий Цезарь, Александр Македонский, Петр I, Наполеон билан тенг турувчи зот». Бундай қиёс фақат тарихдан билимим саёзлигини эмас, ўша пайтларда биз буюк аждодимизни умуман билмаслигимизни кўрсатади. Яна бир мисол. 1992 йил «Наврўз» нашриётида юз минг нусхада чоп этилган «Амир Темур ўғитлари» китобида айтилади: «Амир Темур ҳам Искандар Зулқарнайн ва Кутайба ибн Муслим, Доро ва Маҳмуд Фазнавий, Чингизхон ва Боту, Иван Грозний ва Петр Биринчи, Наполеон ва Михаил Фрунзега ўхшаш одам бўлган». Йирик тарихшунос олимга тегишли бу фикр билан бугун бемалол баҳслashiш мумкин ва, аниқки, тўғри, Амир Темур умуман одам наслига ўхшаш бўлган, бироқ унинг ҳеч кимга ўхшамайдиган ва фақат ўзига хос такрорланмас қирралари бор — моҳият ана шу қирраларни билишда,

идрок этишда. Мен экспедиция ташкил этишни таклиф қилиб мақола ёзганимда, балки эски, титилиб кетган тасаввурларни ўзгаришини, Буюк Темурнинг улуғворлигини табиат гўзаллиги, тоғлар маҳобати ва йўл азоби орқали ҳиссиётларга сингдириш, ҳиссиётлар таъсирида мияни тозалашни кўзда тутгандирман.

Умуман, ўша пайтларда юзага келган вазият нимадир жиддий бир нарса содир бўлишини шивирлаб турарди: марказ жиловни қўлдан чиқариб юборган, қўйида эса турли даражадаги бошбошдоқликлар авж оларди. Ана шундай таҳликали вазиятда фарқ бўлган одамнинг хастга илашгандаги илинжи билан киши интиутиг бир тарзда ўз ўтмишига, қайифи йўл олган соҳилга қарап эканми, менинг Соҳиб-қирон бобомиз тарихига мурожаат этишимда ҳам шундай кайфият бўлгандир. Ҳатто шу мавзудаги кейинги мақолаларимнинг бирида: «Ўзи айтсан ва кўрсатсан, нажот қайда?!» тарзидаги илтижолар қайд қилинган.

Профессионал жиҳатдан қараганда биринчи гап — руҳи, қолганлари сарлавҳа ва тагсарлавҳа қилиб бериладиган узун сарлавҳали мақолани «Ёш ленинчи»га олиб борганимда, бош муҳаррир Жаббор Рассоқов ишонч билан қабул қилди-ю, бир оз иккиланди ҳам чамамда, чунки эртанги кунни ҳеч ким башорат қилолмасди, давлат тепасига бирор золим келиб қолса, мамлакатни қонга ботириб бўлса ҳам совет диктатурасини ўрнатиши мумкин эди. «Ёш ленинчи» газетаси (хозирги «Туркистан») ўша пайтларда ўзбек матбуотининг байроқдорларидан бўлиб, ҳаётта дадил ёндошар, ўз нуқтаи назарига эга нашр эди. У ҳамманинг севимли газетасига айланиб ултурган, айниқса, яқин ва узоқ тарихга доир чиқишилари яхши кутиб олинарди. Шунинг учун мен уни танлаган эдим. Газета таҳририятига келадиган материаллар кўплигидан камина октябрнинг бошларида топширган мақола ноябрда ва декабрда ҳам эълон қилинмади. Бу ҳолдан бўлим муҳаррири, бугунги кунда «Олтин мерос» ҳалқаро хайрия жамғармасининг раҳбари бўлиб ишләётган Амирқул Каримов ҳам ҳайрон. Ниҳоят, бош муҳаррир ҳаммаси кўнгилдагидек эканини, мақола яхши ният билан газетанинг янги — 1991 йилдаги биринчи сонила эълон қилинажа-

гини айтди. Шундай қилиб, бугун тарихимизда олтин ҳарфлар билан ёзилган йилнинг 4 январида «Соҳибқирон ўтган йўллар бўйлаб ёшлар юриши уюштирилса, сафар оғир бўладими?» сарлавҳалани мақола эълон қилинди ва экспедиция тайёргарлигига «старт» берилди.

Тайёргарлик жараёни турлича кечган. Аввало, ўша пайтлари миллатдошларимиз руҳиятида пайдо бўлган уйғонишни тъкидлаш жоиз, газетада эълон қилинган ўша мақолага бирон киши бепарво бўлмаган, дейиш мумкин. Ҳамма қўллаб-қувватлаган, кўмакка шошилган. «Ёш ленинчи» мақолага нисбатан ижобий фикр билдирилган чиқишлиар, экспедицияда иштирок этишни хоҳловчиларнинг хатларини мунтазам эълон қилиб борган. Жумладан, мен ҳам 21 майда «Иккинчи қадам қўйиладими?» сарлавҳали мақола эълон қилиб, тайёргарликнинг боришини шарҳлаганман, юртдошларимизни яна ҳам фаолроқ бўлишга чақириб, ғайратларини жўштирганман. Мақолада шундай фикрлар борки, уларни бугунги кун тасаввури билан ўқисангиз, ўшанда кўнгилга жо бўлган ёруғ туйгулардан ҳаяжонланиб кетасиз. Унда шундай ёзилади: «Ҳозиргача маломатлар остида қолиб келаётган буюк инсон руҳи олдидаги қасам шуки, Уни таниғанларни У асрайди». Яна: «Истак отига қамчи уриб, тоғдан тоққа сакраб юрган ўсмир Темурга бошпана берган муассзам гор осто насидаги табаррук супа устида кутиб олинган тонг яхши замон йўриғидан дарак берса ажаб эмас». Бу — нақ 100 кундан сўнг ташриф буюрадиган 1991 йил 1 сентябрь — Мустақилликнинг хабари эмасмикан?!

Эсимда, биз гор худудига 7 август оқшом пайти етиб бордик. Ҳамма чарчаган, аксарият сафардошлар сайхонликда тонг оттирмоқчи бўлишди. Фақат 5—6 киши айрилиб чиқиб, супага кўтарилган. Ўзимиз билан дарёдан 20 литрлик идишда сув олволганмиз. Супани супуриб-сидириб, ўт ёқдик, идиши билан сувни қайнатдик, унинг тор оғзидан куруқ чой ташлаб чой дамладик. Тун зулмати, бепоён ва номаълум чексизлик бағрида оловда ялтиллаган гор тошларигина кўзга ташланади. Гулхан атрофидағи одамлар ўз дунёсига ғарқ, баъзан таассуротларини юзага чиқаради, хотиралар тилга киради. Мен беҳад ҳаяжондаман, ҳислар шунчалик туғёнга келганки, фақат уларни

ичга ютиб, сукут сақлаб енгиш мумкин. Сұхбатдошларға она қишлоғим — Тошқұрғон ҳақидаги шеъримни ўқиб бермоқчи бўламан:

Турнанинг кузидек оҳанраболи ...

Эҳтирослар жунбушга келиб, сатрлар чалкашиб кетади.

Тун яримлагач, сафар-қопга кириб, уйқуга чўзиламиз. Лекин мен бир зум ҳам ухлай олмайман, ўзимни муаззам бўшлиқда сузиб юргандек ҳис қиласман, атроф сут рангидаги оқлик билан қоғланган. Уйқу ва уйқусизлик орасида тонг отади.

Сафар манзилларини муваффақиятли босиб ўтиб, 18 август куни Самарқандга, Гўримирга ташриф буюрганимиз. Шу қутлуғ даргоҳда ҳар бир иштирокчи ҳисоб берган, ўз муножотини сўзсиз ифодалаган. Худди шу лаҳзаларда Кримдаги Фарос оролида Горбачёв ва Раиса дунёдан ажратилиб, янги одамлар ҳокимият тепасига келган ва шу билан СССРнинг тагига сув кетган экан. Кейинги кун Жиззахда телевизор орқали ГКЧПнинг йиғилишини кўрганимиз. 20 августда Тошкентда, бизни карнай-сурнайлар билан кузатиб қўйган майдончада ҳеч ким кутиб олмаган — мамлакат таҳлика ичилди, эртага нима бўлишини ҳеч ким билмайди. Хайрият, тақдир ёзуғи нурли экан, юртимизга озодлик ташриф буюрди.

Бизнинг 1—20 августдаги сафаримиз жаҳон тарихининг ана шундай кескин бурилиш палласига тўғри келиб қолган. Бу кунларнинг шарҳи неча тилда неча минг варақларда битилмоқда. Мен ҳам сафаримиз ҳақида батағ сил ёздим, ёзганларим «Хотира карвони» деган ном билан китоб ҳам бўлиб чиқди. Шундан бери бу мавзу қалбимнинг тотли ва соғинчли қўшиғига айланган.

Одам боласи ҳар доим ҳам таваккал қилавермайди ва қисқа умрини безайдиган теран мазмунни топавермайди. Ўша автобусда қарийб 2500 км. йўл босиб ўтилган, таасисуротлар 1,5 минг метр кинолента, 9 та видеокассетада муҳрланган 20 кунлик сафарда турли вазият ва манзилларда жами иштирокчиларни, шу жумладан, мени ҳам бир нур йўлимизни, нафақат йўлимизни, балки дилимизни ҳам ёритиб юргани сезилган эди. Биз тонгдаю тунда,

даладаю шаҳарда, булоқ бўйидаю ғор тубида Соҳибқирон бобомизнинг муборак номларини такрорлар, ундан мадад олар эдик. Ана шу ҳис менинг болалик туйғуларим билан вобаста бўлди, Қалъаи Шерон сўқмокларида, зилол даре қирғоғидами, кўл бўйидами учраттан сеҳрга яна дуч келдим ва уни кўнглимга солдим. Бу жуда катта бойлик, олтин ёмби эдики, мендек бир оддий қаламкашга илҳом бериб, муборак мавзуда қоғоз қоралаётганимнинг кучи шунда.

Холисанилило айтганда, Соҳибқирон Амир Темур ҳазратларининг ҳаёти чинакам мўъжиза, бир инсон нималарга қодир эканини кўрсатувчи олтин тарози. Бу мўъжизадан баҳраманд бўлиш, бир-бирилизни баҳраманд қилиш, дунё аҳлига унинг асрорини намоён этиш инсониятга жуда кўп эзгуликлар армуғон этиши мумкин. Афсуски, ғофил одамзод бу мўъжизага юз бурмаяпти. Демак, ҳали маърифат аҳлига кўп эҳтиёж бор. Биз ана шу йўлдамиз.

Бу мавзуда ёзган мақолаларим турли жанрларда бўлиб, энг қувончлиси — барча нашрлар уларни очиқ чехра билан кутиб олган, бажонидил саҳифаларида ёритган. Айнинса, «Ҳалқ сўзи»да ишлаган йилларим бош мұҳаррилар — Аҳмаджон Мухторов (раҳматлик) ва Анвар Жўрабоев кўп илтифотлар кўрсатишган. Жаббор Рассоқов-ку бундай мавзудаги мақолаларимга ўз газетасининг тўрт сахифасини ҳам бўшатиб беришга доим тайёр эди. Улардан жуда миннатдорман.

Тўғри, шу пайтгача кўплаб мақолаларим, эссе-роман ва яна бошқа китобларим нашр этилди. Ношукурлик бўлмасин-у, булар ҳали ҳаммаси эмас. Уларнинг энг саралари дунё ҳалқлари тилларига таржима қилинишини хоҳлайман. Ҳали саккизинчи мўъжиза сифатида тан олинган кино санъатида амалга оширилажак юмушлар етарли. Бу ниятларнинг ҳаммаси вақт-соати ва навбати билан амалга ошади, инниооллоҳ!

Қалб токи борлиқни тийрак ва зийрак акс эттирад экан, унинг оҳанглари, қўшиқлари ҳам муттасил таралаверади.

2007 йил, сентябрь

КҮПРИК

Ўтган бир йилга назар

Эзгуликка ошуфта инсон хуш айёмларини ички бир соғинч ва армон билан эслаб туралди, дейдилар. Ҳар ҳолда дилга таскин бериб соғинтиrolган кунлар ҳақидаги илик гапларни кўлчилик билан баҳам кўриш ҳам мақтанчоқлик бўлмаса керак.

Тарихга «Мустақиллик йили» деб дарж этиладиган 1991 йилнинг 1—20 август кунлари бугуннинг ибораси билан айтганда ҳали «Қизил империя» исканжасида бўлган Ўзбекистон Республикаси ҳудудида бир сарин эпкинде гузар этган «Амир Темур ўтган йўллар бўйлаб» сафарни мухлислар унутиб юборишга ултурган бўлсалар ажаб эмас. Тақдирнинг гўзал ҳазилини қарантки, у августдан бу августгача ўтган кунларда шунчалар буюк (муболагасиз) воқеалар рўй бердики, кўриб туриб баъзан баданингни чимчилаб қўясан: туш эмасми?

Такрор бўлса ҳам уларни яна бир эслайлик: 31 август — Ўзбекистон мустақиллигининг эълон қилиниши, 29 декабрь — Президент сайлови, 2 март — Ўзбекистоннинг БМТга қабул қилиниши. Республикамиз Президенти И.А. Каримовнинг Ҳиндистон, Туркия, Саудия Арабистони, Финляндия, Корея, Малайзия, Индонезия мамлакатларига расмий ташрифи, МДҲ мамлакатлари раҳбарларининг олий даражадаги Тошкент учрашуви, Ўзбекистонни дунёдаги 120 дан ортиқ мамлакат тан олиши, Тошкентда ўнга яқин элчихоналарнинг очилиши... Яна қанчалаб учрашувлар, шартномалар, ташрифлар. Тарихда бундай сермазмун йиллар кам бўлади. Рўйхат тузиб ифтихор қилишга боис эса бой ўтмишга эга бўлган Турон замини Амир Темур замонидан кейин бирлашган ва яхлит ҳолда бундай эътиборни кўрмаган эди. Биз, экспедиция қатнашчиларининг байроғига Соҳибқроннинг муборак исми-шарифи ёзилган ва биз унинг табаррук қадамжоларидан барҳаёт изларини ахтарган эдик. Алҳамдулилаҳ, толган эканмиз.

Сўз аҳли озроқ муболага билан гапиришни хуш кўради. Шу боис қатига бир оз ҳаяжон аралашган эътирофимизни самимий мутойиба сифатида қабул қиласиз. Гапнинг индаллоси эса мустақиллик кунлари насиб этгани учун тақдирга тасанно! Оч бўл, юпун бўл, лекин қарам бўлма. Не саодатки, биз ҳар жиҳатдан баҳти комилликка эришдик.

Рости, улуғ бобокалон қадамжолари бўйлаб юриш кутилмаганда муваффақият қозонди. Сафар тафсилотларини хаёлдан ўтказиб, ният ҳолис, дил пок бўлса, фалакдан мададкор кучлар қўллаб туришини ҳис қилгандек бўласан. Ўшандаги жаҳду жадал, файрат ҳар доим бўлавермайди. Қолаверса, биз ҳали муносабатлар тўла аниқлашмаган бир шароитда йўлга тушган эдик. Севимли рўзнома жамоаси, бизни кузатувчилар қалбида ҳадик бор эди. Жойларда ҳам бизни тўла самимият, очиқкўнгиллик билан кутиб олишмаган ўринлар бўлган. Ҳатто «Булар экстремистлар, иложи борича жамоатчилик билан учраштирумаслик чоралари кўрилсин» деб топшириқ берилганини яқинда эътироф этишди. Бироқ биз, келишиб олганимиздек, сиёсатга аралашмай, фақат ташвиқот мақсадини олдимизга қўйиб тўғри йўл тутдик. Ва ҳаммаси яхши бўлди. Сафарнинг сўнгги куни — 20 августда Тошкентда бесаранжомлик экан. Эртага нима бўлишини ҳеч ким билмайди. Москвада қўл кишанлари тайёрланмоқда. Орадан икки кун ўтгач, вазият кескин ўзгарди. Тарих эврилди, етмиш йиллик истибодод тўкилиб кетди. Бир ҳафтадан кейин эса тарихий воқеа — Мустақиллик! Гарчи булар бир кишининг (жумладан — менинг) иродасига боғлиқ бўлмаса-да, муштариylарни сафарга даъват этиб ёзган мақолаларимдан бирида «Хозиргача маломатлар остида қолиб келаётган буюк инсон руҳи олдидаги қасам шуки, Уни таниғанларни У асрайди. Истак отига қамчи уриб тоғдан тоқقا сакраб юрган ўсмир Темурга бошпанна берган муazzам ғор остонасидаги табаррук супа устида кутиб олинган тонг янги замон йўриғидан дарак берса, ажаб эмас» («Ёш ленинчи». 1991 йил, 21 май) тарзидаги ёзувларимнинг мунаvvар толеидан мамнун бўламан.

Шукроналар бўлсинки, бугун Соҳибқирон Темур ҳақида тортинмасдан гапириш имкони туғилди. Ул зотнинг таваллуд кунлари оммавий нишонланиши, хурматли Убайдулло Уватов таржимасида Ибн Арабшохнинг «Амир Темур тарихи» китобининг нашр этилиши, Қашқадарё вилоят театрида Соҳибқирон ҳаёти акс эттирилган спектаклнинг қўйилиши улкан мъянавий денгиз томон ташланган дастлабки қадамлар бўлди. Энди кўз олдимизда бошқа бир олам — асрлар зулматини парчалаб, ёрқин нур сочиб турган Кўҳинур олмосидек бетимсол хилқат намоён бўлди. Бу — дунёнинг ярмини бир туғ остига бирлаштирган буюк даҳо, Туркистон сарвари Амир Темурдир. Мустақиллик боғининг минглаб totли меваларидан бири шу эмасми? Мабодо, XX асрнинг йирик сиёsatдонларидан бири, Франция Президенти Франсуа Миттеран, муҳтарам Президентимиз И.А. Каримовнинг лутф қилишларича, «буюк Темур авлодини ўз кўзим билан кўришга жуда иштиёқмандман» деган экан, бундан фақат ифтихор қилмоқ лозим. Мустақил бўлмасак, бу гапни бизга ким етказарди?!

Албатта, хайрли ишлар таъма илинжида қилинмайди. Яъни буюклар ёнида туриб олиб бор овозда бақирган билан ҳеч ким унга буюклик либосини ёпиб қўймайди. Бироқ бизнинг кичкина андишамиз шуки, экспедиция давомида яхшигина материал тўпланганди эди. Бу — тўқизта видеокассетага, 1500 метр кинолентага туширилган нодир тасвиirlар. Уларда тарихий шаҳарлар жамоли, гўзал тоғ манзаралари, одамлар кайфияти-ю халқимиз турмуш лавҳалари мухрланган. Ҳисор тизма тоғларидаги Бовурчи чўққиси, унинг этагидаги Амир Темур гори, бетимсол Қалъаи Шерон дараси илк марта тасвирга олинган эди. Ана шулар жамоатчилик назаридан четда қолиб кетмоқда. Улар умумхалқ мулкига айлантирилса, нур устига нур бўларди.

Амир Темур — олмосдек кўп қиррали шахс. Ҳали уни асрлар давомида ўрганадилар, кашф қиласидилар. Фақат қучлар бирлашса ва марказлашсагина салмоқлироқ натижаларга эришиш мумкин. Афсуски, бу борада тарқоқлик, парокандалик кўзга ташланмоқда. Гўё чўққини ҳар ким

ўз сўқмоғи билан кашф қилмоққа уриняпти. Ҳолбуки, ўз фарзандларини, авлодини мудом бирлашишга, тотувликка чорлаб келган зот руҳи поки олдида бу шаккокликдан бошқа нарса эмас. Республикада буюк инсон — Амир Темур билан боғлиқ ишларни мувофиқлаштириб турувчи марказ тузилса, айни муддао бўларди.

«Амир Темур ўтган йўллар бўйлаб» «Туркистон» рўзномаси ташкил этган экспедиция ўз фаолиятини янгича куч-тайрат билан давом эттираяпти. Шунақа ҳаракатларнинг сони кўпайганлиги кувончли ҳол — яқинда Андижондан бошланган сафар Бобур қадамжолари бўйлаб муваффақиятли тугади. Бундай хушёқар амалларнинг ҳаммаси тарихимизда рўй берган улкан саодат туфайли. Биз ҳам «Амир Темур ўтган йўллар бўйлаб» уюштирилган сафаримиз биринчи босқичи савобини жонажон Ўзбекистонимиз мустақиллигининг бир йиллигига бағишлаймиз. Илло, мангу озод бўлгин, она юрт!

1992 йил, август

ҚАДРДОН ЙЎЛЛАР ЧОРЛАЙДИ

10 йил олдинги хайрли тадбир яна тақрорланадими?

Шубҳасиз, ўтган йилларнинг ёқимли хотираларини эслаш кўнгилда қадрдон ҳисларни қўзгайди. Айниқса, хотиралар Ватан, миллат, халқ тақдиди билан ҳамоҳанг бўлса, бу муқаддас аъмолнинг шукуҳини юрагингда туйсанг, руҳинг қувватланиб, ўзингда енгилмас куч сезасан.

Бугунги кунда мустақил онт ва шуур билан бир нарсани баралла таъкидлаш жоизки, ўн йил ичиде эришилган ютуқлар кўп, бироқ уларнинг қаторида ўтмиш меросимизга муносабатнинг тубдан ўзгарганини алоҳида таъкидлаш жоиз. Бу ҳақиқатни бундан 10 йил олдин «Амир Темур ўтган йиллар бўйлаб» ёшлар юришининг ташкилотчиси ва иштирокчиси сифатида бугун баралла тасдиқлашим мумкин. Йигирма кун юртимизни кезиб, минглаб одамлар билан сухбатлашиб, шундай манзараларга гувоҳ

бўлдикки, энди уларни эслаб, ҳам кулгинг, ҳам йиғлагинг келади. Шаҳрисабздан унча узоқ бўлмаган қишлоқларда бу шаҳар Соҳибқироннинг илк парвозларига раҳнамо бўлганлигини ёки Оқсарой ҳозирги кўриниши билан «Оқсарой» эмас, балки 50 минг одам 20 йилда тиклаган муazzзам кошона сифатида дунёни безаб турганини зиёлилар ҳам билмасди. Яшириб нима қилдик, ўзимиз ҳам Мирзо Улуғбек Соҳибқирон Амир Темур ҳазратларининг набираси эканини-ю, бобосининг бевосита раҳнамолигида улғайиб вояга етганидан кейинроқ хабар топдик. Нафсиlamрини айтганда, қуёшга тик қарай олмаган кўршапалак сингари чет-четларда «Амир Темур бизга мансуб эмас» деган қарашлар, кайфиятлар ҳам бор эди. Ахир биз Тошкентдан сафарга жўнаб кетганда шаҳарнинг қоқ марказидаги ҳозирги мағрур ва муҳташам ҳайкал йўқ эди. Бу — тарих, жонли тарих, эслашга ва таҳлил қилишга арзирли тарих!..

... Шундай қилиб, 1991 йил 1 августда йўлга чиққан экспедиция Тошкент, Сирдарё, Жizzах, Самарқанд, Қашқадарё, Бухоро вилоятлари ҳудудларидаги Амир Темур бобомиз билан боғлиқ шаҳар ва қишлоқларда бўлган, жуда бой маълумотлар тўплаган эди. Ўшанда қизил империянинг тагига сув кетган кунлар экан, бир ойдан кейин муборак истиқтол насиб этди. Сафар давомида шўро тузумининг кирдикорларидан зериккан ва бир нурли аъмолга талпинаётган ҳалқнинг кайфиятини сезган эдик. Дастрасида ҳадиксираш ва қўркув билан бошланган сұхбатлар ўтмишимизнинг зафарли айёмлари, боболаримизнинг оламшумул жасоратлари тилга олингач, самимий тус олар, лоқайд чеҳралар ёришиб кетар, кўзларда олов чақнаради. Ҳамма жойда бизни самимий кутиб олишган, керагича ёрдам ва иззат-икром кўрсатишган эди. Юртни кезиб, қалби тийрак, юрагида аждодларнинг енгилмас озод руҳи яшаётган, озодликка, ҳурриятта ташна ҳалқимиз борлигини дилдан ҳис қилиб қайтган эдик Тошкентта.

Кейинги йил яна Туркистон йўналиши бўйлаб сафарга чиқилди ва Ўтроргача бориб келинди. Фарғона водийси, Тошкент, Самарқанд вилоятларида ҳам турли дара-

жада сафарлар уюштирилди. Таассуротлар асосида китоблар, сафарномалар, илмий мақолалар ёзилди.

Катта тўй арафасида, мабодо, биз ўтган таниш манзиллар бўйлаб яна сафар уюштирилса, айни муддао бўларди. Негаки, қадрдон жойларда бўлиш, синашта одамлар билан суҳбатлашиш Мустақилликнинг ўн йилида амалга оширилган ишларни бутун бўй-басти билан тасаввур қилиш имконини беради. «Ҳақиқат қиёсларда билинади» деганларидек, дастлабки маълумотларни бугунги ўзгаришлар билан солишириш тараққиётнинг аниқ манзарасини яратишда аскотади.

2001 йыл, январь

АҚС САДО

Ашраф АҲМЕДОВ, Самарқанддаги Марказий Осиё тадқиқотлари халқаро институти директори, тарих фанлари доктори, профессор. — «Тарихий хотирасиз келажак йўқ» деган гап юртимизнинг ҳар бир фуқароси зиммасига улкан масъулият юклайди. Негаки, биз шу қутлуғ заминда яшар эканмиз, ўтмишимизни ўрганиш ва дунё аҳлига намоён қилишда масъулмиз. Ахир чет элларда бизнинг меросимизни заррабин билан текшириб, таҳлил қилиб, ўзлари учун истеъфода этиб турганларида биз қараб ўтишимиз керакми? Шунингдек, бу бойликни тадқиқ қилишнинг турли усуллари мавжуд. Жумладан, тарихий манзиллар бўйлаб сафар уюштириш ҳам шулардан бири. Бошланган ташаббусни тўла қўллаб-куватлайман. Темур ва Темурийлар, умуман, тарихимизни ўрганиш қанчалик кенг тус олса, шунча кўп натижани қўлга киритиш мумкин. 10 йил олдин бошланган мазкур саъй-ҳаракат натижалари буни тўла тасдиқлаган эди. Сафарлар давомида бирон қўлёзмада ёки жонли гувоҳ қайд этмаган далиллар жамоатчиликка маълум қилинганди. Андижонда фаолият кўрсатаётган Бобур экспедицияси ҳақида ҳам шундай дейиш жоиз. Бу тадбирнинг мустақиллигимизнинг 10 йиллиги арафасида амалга оширилиши ундан кент миқёсли тарғибот-ташвиқот мақсадида фойдаланиш имконини ҳам

беради. Қолаверса, кейинги йилларда қўлга киритилган илмий ютуқларни халқимизга юзма-юз туриб сўзлаб бериш мумкин бўлади. Экспедициянинг илмий-тадқиқот йўналишини кучайтириб, уни бутун Марказий Осиё, кейинчалик дунё миқёсида давом эттириш лозим.

Фарҳод РЎЗИЕВ. Ўзбекистон телерадиокомпанияси раисининг биринчи ўринбосари, иқтисод фанлари номзоди. — Мазкур ғоя билан танишиб, бир фикр хаёлимдан ўтди. Биз ҳақиқатан толеъи баланд халқмиз. Қаранг, бизнинг Ватанимиз қанчалаб буюк даҳоларга бешик бўлган, халқимизнинг таърифи қанчалаб қаҳрамонномаларда куйланган! Бундай ноёб баҳт ўз ўрнида юксак масъулият ҳамдир — биз буюк аждодларимизга муносиб фарзандлар бўлмоғимиз шарт. Ана шу гурурни тарбиялашда бобокалонимиз Амир Темурнинг ҳёти ва фаолиятини ўрганиш жуда асқотади. Шубҳасиз, истиқлол Йилларида бу борада мислсиз ишлар бажарилди ва бобомизнинг номи қалбларимизда абадий муҳрланди.

Экспедицияга келсан, уни юқори даражада уюштириш имкониятлари мавжуд. Ўн йил олдин муаммо бўлиб турган замонавий видеокамера ёки уяли телефон бугун оддий рўзгор ашёсига айланиб қолди. Шунингдек, сафарни қўллаб-кувватлайдиган ва шу воситада ўз маҳсулотини реклама қилишни хоҳдайдиган фирмалар ҳам топилади. Фақат иштирокчилар аниқ мақсадли фидойи кишилар бўлиши лозим. Вилоятларда яшаётганлар ҳам ҳамкору ҳамдаст бўладилар, деб ўйлайман.

Анварбек МУҲАММАДИЕВ. Касби туманидаги 10-ўрта мактабининг тарих фани ўқитувчisi. — Албатта, пойтахтдан келган хушхабар марказдан чет жойларда ўзгача шодхуррамлик билан кутиб олинади. Айниқса, таниқли кишилар ташриф буюрса нур устига аъло нур бўлади. Худди шундай бўлишини бундан ўн йил олдин қишлоғимизга Соҳибқирон бобокалонимиз излари билан юрган экспедиция аъзолари ташриф буюрганда сезган эдим. Мехмонлар кечга яқин етиб келишган, оқшом ёшлар иштирокида учрашув, эрталаб хўжалик аъзолари билан самимий мулоқот бўлганди. Биз болалар, ҳатто катталар ўшандада илк бор шавкатли бобокалонимизнинг оламшумул ишла-

ридан бохабар бўлган эдик. Ўтган йиллар давомида бизнинг юргимизда ҳам кўп ўзгаришлар юз берди. Энди ҳаёт ҳам, одамларнинг дунёқараши ҳам олдингига ўхшамайди. Шубҳасиз, сафар уюштирилади ва қадрдан манзилларда яна қизғин суҳбатлар бўлиб ўтади, дея умид қиласиз.

P.S. Сафар уюштириш мақсадида бошқа сави-ҳаракатлар ҳам бўлган, бироқ у амалга ошмаган. Бу — алоҳида мавзу.

2001 йил, март

МАҲАҚ ТОШИ

Уни Соҳибқирон Темурбек тавсия қилган эдилар, бугун ҳам унга эҳтиёж сезилмоқда.

Соҳибқирон ўзининг «Темур тузуклари» асарида Тангри таоло даргоҳидан мамлакатларни фатҳ этувчи кўплаб баҳтли фарзандлари, авлоди салтанат таҳтига ўтириб, элъортини идора этишини умид қилган жаҳонгир ўзлари яратган бошқариш тизимини батафсил изоҳлар эканлар, энг сўнгти лаҳзада (яъни гуноҳкор одамларни ўлимга буюришлан олдин) ҳам шошмасликни тайинлаб, «... балки аввал хабар берувчиларнинг ўзлари кимлиги, даъволоварининг рост-ёлғонлигини маҳак тошига уриб текшириб кўрсинлар» (73-бет) дея ҳикмат келтирган эканлар. Ал-ҳамдулилаҳ, бугунги сафоли кунларда буюк аждодимизнинг умри-ҳаёти ҳам, маънавияти-ю фаолият тарихи ҳам ҳалқимиз хазинасига қайtdi. Бу холосамизга мазкур йилда жаҳонгирнинг мавлуд кунлари (8—9 апрель) муносабати билан ўлкада чирой кўрсатган умумхалқ кайфияти сабаб бўлди. Амир Темур байрамлари, илмий анжуманлар бўлиб ўtdi. Ҳўжаликлар, жойлар бу улуғ зотнинг исмишарифлари билан қайта номланмоқда, бадиий, илмий, саҳна асарлари кўплаб яратила бошланди.

Албатта, ҳар қандай хайрли ишни бошлашдан олдин унинг кўлами ва мавқеини аниқ белгилаб олиш эзгу амалларга йўл очади. Бинобарин, Темурбек ҳақида айтиладиган энг оддий таъриф-тавсифлардан мукаммал қомусий

асаргача бу зоти шарифнинг асл қиёфасига мос келиши керак. Шунинг учун ҳам Маҳак тоши эсланди. Зоро, бобокалон ҳақидаги жами ёлғонлар (аксарият, ҳозирча ҳукм сурган қарашлар) билан бирга ул киши шахсига тўғри келмайдиган мақтовлар ҳам бу ҳақиқат мезонига тегиб чил-чил бўлғусидир. Қолаверса, миллатимиз ўз қадриятини қайтадан кашф этмоқда, динимиз талабари-ни дил эҳтиёжи сифатида қабул этаяпмиз. Қуръони ша-риф, пайғамбаримиз Мұхаммад саллоллоҳу алайҳи ва-салламнинг муборак ҳадислари маънавий мулкимизга ай-ланди. Уларда шундай қоидалар кашф этилиб, бизга армуғон қилинганды, тафаккурнинг бу дурдоналари биз ҳозиргача амал қилиб келган баъзи соҳта эътиқодларни ғубордек тарқатиб юборали, кўз олдимизда мусаффо яшилликни намоён қиласди. Динимизнинг биз, бандаларга марҳамати шунчалик беқиёски, инсоннинг имкониятла-рини, у интилувчи нур («идеал») чегарасини чексизлик-ка қадар улғайтиради. Яратганинг висолига етиш учун хайрли юмушларга бел боғлаган ҳар бир кимса тириклик лаҳзаларини «Фалончиевга тақлид» қилиб ёки ўrnak олиб эмас, ўз йўли, аъмоли билан ўтказади. «Ҳеч ким Ленин бўла олмайди, бироқ Ленин бўлишга интилиш керак» (Луначарский) сингари сийқа фалсафаларнинг миси чиқ-ди, аслида, бу тарзда фикрлашнинг ўзи Аллоҳга шаккок-лик эди. Яъни, буюк ислом таълимоти инсонни илоҳий-лаштиришга йўл қўймайди! Пайғамбаримизнинг ҳадис-ларida «628. Аллоҳдан бошқага қилинган қасам ширкдир» («Минг бир ҳадис», 1991) деб кўрсатилган. Илоҳийликка фақат Парвардигорнинг Ўзи лойиқдир, қалбда эса Унинг ишқигина ҳукмрон бўлмоғи лозимдир.

Амир Темур, Темурбек, жаҳонгир, соҳибқирон дея улуғланган Амир Темурбек(Темур) Тарагай Баҳодир ўғли ҳам Худонинг бир бандаси, қанчалаб жонзотларга ризқ-рўз, бошпана бўлган курраи заминда ўзига хос умргузаронлик қилган зот. Бир кишини ҳамду санолар билан еттинчи фалаккача чиқариб улуғлаш қанчалар хато бўлса, унга бутун бир даврлар, асрлар юкини ортмоқлаб ёки жами талабларнинг ҳаммаси билан ёндошиб тафтиш қилиш ҳам хато.

Хуллас, Америка, Англия, Франция каби йирик, та-раққий этган мамлакатлар қатори Ўзбекистонда ҳам Амир Темур шахсига қизиқиши кучайди. Дастрлабки тахминлар бу мавзу, фаннинг шу соҳаси «кулок чўзма» бўлиб кетиши мумкинлигини кўрсатмоқда. Бундай ҳол, албатта, қувончили. Дастрлабки қадамлар қўйилса, кейингиларини Аллоҳнинг ўзи кўрсатаверади. Бажарилиши керак бўлган ишлар эса жуда кўп. Олайлик, биттагина Шаҳрисабз шаҳри билан боғлиқ кўпгина муаммолар навбатда турибди. Бу нарса Амир Темур тавалудининг 656 йилинига бағишлаб ўтказилган илмий-амалий анжуман давомида яна бир бор кўзга ташланиб қолди. Шаҳар буюк фарзандига муносиб бўлишини хоҳлар, бироқ танидаги жароҳатлар туфайли тўшакдаги бемор сингари инграрди. Биргина Оқсарой билан боғлиқ қанчалаб сир-синоатлар кечган? Мабодо, ҳозир у ҳақда гувоҳларнинг хотиралари ёзиб олинса ҳам бир неча жилдли «Оқсаройнома» пайдо бўларди ва унинг ҳар бир сатри кўз ёшлари билан ёзиларди. Бу сафар кўплаб милитиқ ўқлари тешиб ўтган «шинаклар» қаторида тўп ўқининг изини ҳам кўрсатишиди. Унга кўп-да парво қилмай, шунчаки ўпирилишдан кейинги кавак деб ўйлаш мумкин. Мабодо, уни қандайдир Бембин («тўпга тутиш» маъракасининг бошида турган лашкарбошининг номини шундай деб атashdi, у ҳамон тирик эмиш) фармони ила узилган замбарак ўқининг ўрни эканини билгач, киши аллақандай бўлиб кетар экан.

Маълумки, машхур обидадан остона — кириш қисми-гина сақланиб қолган. Унинг маҳобати ҳақида эса турли тахминлар юради. Жумладан, эрталаб қуёш чиқаётган пайтда уни Бухородан кўриш мумкин бўлган. Тепасида улкан ҳовуз бўлиб, Тахтиқорача довонидан қувурлар во-ситасида сув олиб келтирилган, пойдевори 38 метр чу-қурликда, беш қиррали юлдуз шаклидаги асосга мустаҳкамланган ва ҳоказо. Жоюли гувоҳ — Клавихо унинг узунлиги 300 қадам деб кўрсатган. Бу жойда узоқ йиллар археологик қазиш ва илмий тадқиқот ишларини олиб борган олим Хайрулло Султоновнинг фаразича, саройнинг узунлиги 120—125 метрдан кам эмас, у ҳатто кўши ҳовлили бўлиши ҳам мумкин. Демак, унинг эни 125, бўйи

250 метрлар атрофидадир. Маҳаллий мусаввир ўз хаёлоти кучи билан Оқсаройни холстда тиклабди, суратни кўрибоқ тенгсиз, маҳобатли кошонани ҳис этасиз. Ҳозирча эса у юпун ҳолда, сўнгги бойликларини ҳам талаб кетишмоқда. Баъзи «ақлли» раҳбарларнинг таклифи билан рангин кошинлари қўпорилиб, Самарқанддаги биноларни таъмирашда ишлатилган. Маҳаллий раҳбарлар азбаройи эзгуликдан Соҳибқиронга ҳайкал ўрнатмоқчи, бироқ танланган жой анжуман қатнашчиларига маъқул тушмади. Уни Оқсаройнинг олд томонида — Самарқанд тарафига қўйиш маслаҳат берилди. Негаки, Худо ёрлақаб, саройни тикилашга киришилса, ҳайкални қўчиришга тўғри келади. Собиқ раис Абдурашид Жамолов ҳозир Мозори шарифда яшаётган бир шаҳрисабзлик фуқарода Оқсаройнинг лойиҳаси сақлананётганини, у терига чизилган, каттагина китоб ҳолида эканини айтиб қолди.

Шаҳрисабзда тарихий ёдгорликлар қаровсиз ҳолда, ҳатто шу соҳага масъул меъмор йўқ экан. Темур даврида ёғин-сочинли кунларда гумбазларга ниқоб кийдириб қўйиларкан, шу туфайли улар кўркини йўқотмаган. Ҳозир эса... Жаҳонгир Мирзо мақбараасига киришда чиройли эшик киши диққатини тортади. Маълум бўлишича, файдидинлардан бири уни печкага ёқиш учун қўпориб олган. Буни сезиб қолган бир муслим анчагина ўтин бериб, эшикни олиб қўйган. Узоқ йиллар ўзида сақлаб, 60-йилларда мачит ташкил бўлгач, келтириб жойига ўрнатишган... Шаҳрисабзга йўлингиз тушса, ҳақиқий санъат дурдонасига тенг шу эшикни атайлаб бориб кўринг, шунда, эҳтимол, бизнинг қанчалаб бойликларимиз кунпаякун қилинганини тасаввур қиласиз. Эшикни асраб қолган номаълум инсонга тасаннолар айтиб, ҳамма ҳам шунчалар ҳиммат кўрсата-вермаганига афсусланиш лозим, холос.

Илмий анжуманда қулфлоглиқ сандиқларда сақланиб келинаётган кўплаб янги маълумотлар илк марта тилга олинди. Тасодиф шунчалар кучли эдикни, нима бўлаётганини тезда илгаб ололмайсан: тўрда улкан сурат, оқ шоҳига қайноқ дил сўзлари ёзилган, нутқлар — жўшқин, овозларда титроқ ва ҳаяжон бор. Ҳамма ўзлари оёқ тираб турган шу тупроққа таъзим қилишади. Бу — юрт эгалари-

нинг ўз юртидаги байрами эди, илло, шодликлар бундан кейин яна ҳам баравж бўлғай.

Шу куни Тошкент вилояти, Чиноз районидаги Амир Темур номли жамоа хўжалигига ҳам тантаналар бўлган. Ўйингоҳда тўғланган минглаб кишилар кўз олдида тулпорини ўйнатиб Соҳибқироннинг пайдо бўлиши (актёр — Толиб Каримов) кишиларда ўзгача кайфият пайдо қилган. Одамлар ҳайқириқлар билан суворини олқишлишган, гўё Турон «урҳо»си яна бир жаранглаган. Ҳамза номли театрда ўюштирилган байрамда эса эсда қоладиган воқеа — ижодкорларнинг тортишуви бўлган.

Дарҳақиқат, тортишувлар ҳақида. Ҳозир шунчалик имкониятга эришилганки, бу келгусида улуғ ишларга парвоз бериши шубҳасиз. Ҳусусан, Темур ва Темурийлар даври маънавияти улкан ҳазина. Ҳозиргача ундан истеъмолчилик кайфиятида фойдаланиб келинди, яъни кимга нима керак бўлса, ўшани олди. Энди бу бойликни чинакам ватанпарварлик туйғуси билан атрофлича, муфассал ўрганиш бошланган экан, турли мунозаралар, бошбошдоқликларга йўл қўймаслик мақсадида жиловни эртароқ қўлга олиш лозим. Шундай бир нуфузли, обрўли илмий марказ тузилсаки, у нафақат муайян давр, балки бутун тарихимизга оид ривоятдан тортиб, ҳайкал лойиҳаси-ю диссертация мавзуси, экспедиция йўналиши-ю китоб нашр этиш — хуллас, барча икир-чикирни мувофиқлаштириб турса. Темур ва Темурийлар даврини комплекс тадқиқ этиш маҳсус илмий текшириш институтигагина эмас, бутун бошли Фанлар академиясига етарли мавзу беради, келажакда, албатта, темуршунослик илмгоҳлари пайдо бўлади. Шундай экан, курилажак иморатнинг биринчи ғиштлари ёқ унинг истиқболига мос келса, бинонинг кўрки бекиёс бўлади. Зоро, уфқлар ортидаги ёрқин келажакни кўра олган, Тангри таолодан барҳаётликни умид қилган улуғ бобомизнинг ўзлари яхшини ёмондан, олтинни мисдан бехато ажратадиган Маҳак тошини — ҳақиқат мезонини тавсия қилганликларини унутмаслик жоиздир. Амир Темур шунчалик буюк шахски, бу улуғликни фақат Рост сўзгина ифодалай олади.

1992 йил, апрель

ҚОРАЧИҚҚА ЖОЙЛАШАР ҚҮЁШ

Ўшанда, сабзалар қўйнидаги шаҳарга мустақиллик баҳори энди кириб келаёттанды, кўл етгудек яқин Ҳисор тизмаларининг бағрида қорлар қиши уйқусида эди. Тошкентдан 507-рейс бўйича учган ҳаво лайнери Соҳибқирон таваллуд топган муборак заминдаги тайёрагоҳга қўнганды, қуёш чиқиши тарафдан эсаётган шабада бадани жунжиктируса-да, бироқ серёғин, инжиқ кўкламнинг шу кунлари кутилганидек чароғон ва очиқ, жануб офтоби чилла захмини енгиб, сахийлик билан нур сочиб турибди. Гарчи бизга пешвоз чиққан мезбонлар меҳмонларнинг озчилигидан бир оз қўнгиллари тўлмаган бўлсада, нуфуз жиҳатдан бу делегация анча салмоқли эди: Шаҳрисабзга Амир Темур туғилган кун — 9 апрель муносабати билан ўзига хос мўъжаз «академия» ташриф буюрган эди. Албатта, жамоатчилик бу тадбирнинг илк марта бўлаёттанини сезиб турарди. Хушёқар хотираларни қоғозга тушира туриб, кейинги қадамларни мушоҳада қиларкансан, хаёл тўзиб кетали. Ҳусусан, йирик олим, академик Аҳмадали Асқаров билан шу мавзуда сұхбатлашгандан кейин ҳали муносабатлар тўла аниқданмаганини (яъни, музурнидан бутунлай кўчмаганини) ҳис қилдим.

Аҳмадали Асқаров йирик археолог-олим, республика Фанлар академиясининг академиги, академия Тарих институтининг директори, халқаро ЮНЕСКО ташкилоти «Ипак йўли» экспедициясининг илмий раҳари ва бош маслаҳатчиси эканлилигини эслатиб ўтмоқчиман. Олим шахсий дарди ва кўплаб ташвишларини бир четга йиғишибди, Шаҳрисабздаги маъракада қатнашишга имкон топди. Мусоҳаба ўша таассуротларни эслашдан бошланди.

А. АСҚАРОВ: — Шаҳрисабз учрашувлари — катта ишнинг бошланиши. Биз 1996 йил, яъни Соҳибқирон Амир Темур дунёга келганига 660 йил тўлиши арафасида турибмиз. Вақт шамол каби бир зумда ўтиб кетади, бироқ бизнинг зиммамизга улкан тоғлар залворидек юк ортилган: Турон фарзанди Темурбек ҳақидаги уйдирмаларни фош қилиш, унинг тўғрисидаги холис, тарихий ҳақиқатга мос гапни жаҳон афкор оммасига (биринчи нафбат-

да — ўз ҳалқимизга) айтиш, шундан кейин барча тұхматлардан фориғ этиш фарзандлик бурчимиздир. Муддат — нисбатан қысқа, юмушлар эса күп. Демак, фурсатни қўлдан бермаслик керак.

Шаҳрисабзда ўтказилган илмий анжуман ҳам ана шу тадбир доирасида ташкил қилинган, унинг дебочаси эди (негадир, матбуот чиқишиларида шу нарса таъкидланмади). Шаҳар ҳокими Ф. Хотамов ҳузуримга келди, анжуман йўналиши ва мавзусини бамаслаҳат ҳал қилдик. Уларнинг бу саъӣ-ҳаракатини табриклиш лозим, бироқ унинг тўлқини бутун республика, ҳатто Мовароуннаҳрни қоплаб олмаяпти. Негаки, яна таъкидлайман, қилиниши керак бўлган ишнинг кўлами ниҳоятда кенг, унга бутун илмий, ижодий жамоатчилик қувватларини сафарбар қилиш, улкан ҳудуд (Темур давлати чегаралари)га ёйиш лозим.

МУХБИР: — Илк қадамлар, дастлабки натижалар кишида умид уйғотади. Инсон табиатан ўз кўнгли истакларини қондириш учун қандайдир илоҳийликка, ҳатто, мавхумликка талпиниб яшар экан. Мен ўз ватандошларимда шундай талпиниш Амир Темур шахсиятига нисбатан жуда кучли эканига қайта-қайта ишонаяпман. Буни энг содда инсоний ҳисга менгзаш мумкин. Маълумки, чанқаган, ташна одамнинг энг биринчи истаги — бир пиёла сув. У ўша мавхумликка илтижо қилиб сўрайди: «Бир пиёла сув бўлсайди...» Ул зотни билганлар (маърифатсизлар бундан йироқ) турмушла турли ноҳақликлар, тенгсизликларга дуч келганда, ўша илоҳий кучга ёлвориб, «Амир Темур бўлсайди» дея сўраса, ажаб эмас. Шундай бўлгач, уни халқ хотирасидан, меросхўр авлод маънавий хазинасидан ўчириб ташлаш мумкин эмас. Ҳалқимизнинг Темур давридан кейинги суронли кечмиши ягона ҳақиқат излаш йўлидаги жангу жадалларга ўхшайдики, олис уфқда бир ёруғ юлдуз нур сочиб турганини, уни кўпда кўравермаганларини тасаввур қиласан. Бугун «Бир түғ остида бирлашайлик» (уни дастлаб қўтос овига чиқсан ярим ёввойи одамлар топган бўлса ажаб эмас) деган шиор қалблардан отилиб чиқаётган экан, ўша түғ аслида бобокалоннинг боқий шавкати эмасмикан, дея ўйлаб кўясан, киши...

Шаҳрисабз анжуманида кўплаб амалий тақлифлар ўртага ташланди. Унда сизнинг «Амир Темур — буюк саркарда ва давлат арбоби», филология фанлари доктори, профессор А. Ҳайитметовнинг «Темурийлар даври адабиёти», Шарқшунослик илмгоҳининг директори, тарих фанлари доктори А. Ўринбоевнинг «Амир Темур ҳақида ёзилган тарихий асарлар ва уларни нашр этиш муаммолари», тарих фанлари доктори А. Аҳмедовнинг «Амир Темур даврида илм-фан равнақи» мавзуидаги маъruzалари тингланди. Шунингдек, фан номзодлари У. Уватов, Х. Султонов, О. Бўриев ҳам янги илмий маълумотларга бой нутқлар сўзлашди. Булар жамланиб, кишида қандайдир но маълум сеҳрли дунё ҳақида ривоятлардек таассурот қолдирди. Ҳолбуки, «Америка қашф қилинмаган», аслида бизнинг зуваламиз олинган шу тупроқ мадҳ этилаётган эди. Ҳозир эҳтиросларга берилиш мавриди эмас, албатта, олимлар билдирган амалий тақлифлар эса инобатга олиниши шарт. Жумладан, саёҳатчилардан тушаётган маблағлар янги ресторон ёки барлар қуришга эмас, таъмирлаш ишларига сарфлансан. Шаҳарда қабр тошлари, турли таърихлар ёзилган лавҳалар сочилиб ётибди, уларни бир жойга тўплаб очиқ музей ташкил қилиш мумкин. Дунё аҳамиятига молик обидалар аҳоли уй-жойлари, маъмурий бинолар қуршовида қолиб кетган. Бу таъмирлаш ва тарғибот-саёҳат ишларини қийинлаштирумoqueда. Келажакда шаҳар маркази музей-қўриқхонага айлантирилиши лозим.

А. АСҚАРОВ: — Темур ва Темурийлар даврида Қурилган бинолар даврнинг мангу тарихлари. Жаҳонгир меъморчиликка жуда катта эътибор берган, ундан ўз сиёсий, ҳарбий мақсадларида ўринли фойдалантган. Пештоқига «Кимки бизнинг қудратимизга ишонмаса, иморатларимизга қарасин», деб ёзилган бино — Оқсарой ҳам Шаҳрисабзда қурилган.

Бу борада Амир Темур жуда беназир бўлган. Пойтахт Самарқандни ер юзининг энг гўзал шаҳрига айлантириш орзуси билан яшаган ва бунга эришган ҳам. Атрофдаги қишлоқларга дунёning катта шаҳрлари — Фориш (Париж), Бағдод, Дамашқ, Султония номларини кўйиш билан Самарқанднинг мавқенини юқори кўтармоқчи бўлган.

Гап номлашга тақалди – биз жаҳонгир шарафини ўзига хос юксак даражада эъзозлашимиз керак. Унинг номини колхозга ёки бир тор кўчага қўйишга қаршиман. Бу тадбир бирор мазмунни ифодаласин, масалан, унинг буюк саркардалиги рамзи сифатида Ҳарбий академияни аташ эътиroz туғдирмайди. Ёки шаҳарнинг энг катта майдони, энг олий иморатига қўйилса, бобомизнинг ободончилик ишларига ишорани ифодалайди. Амир Темур номи билан камида шаҳар (масалан, Темурбек шаҳри) ёки район аталиши мантиққа тўғри бўлади. Хуллас, ҳамма ишлар буюк ватандошимиз шахсиятига мос тушмоғи шарт. Темур Цезар, Искандар ёки Наполеондан ката фарқ қилалиган даҳо, у дунёдан енгилмай, ғолиб кетган. Улкан сулолага асос соглан ягона жаҳонгир. Буюк шахсларнинг тарих саҳнасига келиши тараққиётни юз йиллар олдинга силжитиб юборади.

Амир Темур давлатининг келажагини кўз ўнгига келтириб Ўрта Осиёда яшовчи барча қавмларни бирлаштириб, деҳқончилик, чорвачилик, хунармандчилик хўжаликларининг ривожланишига кенг имкониятлар яратди. У дунёқаралида ўта диндор ҳам, ўта даҳрий ҳам бўлмаган, доим оддий халқдан ажралмаган. Табиатан эса байналмилалчи бўлиб, одамларни миллатига қараб эмас, ҳалоллиги, ботирлиги каби фазилатларига кўра қадрлаган. Энди жаҳонгир Темур ҳақида «хат танимасди», «шахмат ўйнарди» сингари бачкана гапларни йигиштириш керак. У Шаҳрисабз беги Тарагай Баҳодирнинг ўғли бўлган ва болалигидәёқ аслзодаларга хос тарбия кўрган. Дунёдаги камдан-кам ҳукмрон Темурдек ўз салтанати хавфсизлигини таъминлай олган. У қўл остидаги ва атрофидағи воқеалардан хабардор бўлиб турган, яъни разведка ва контрразведкага катта аҳамият берган. Буни оддий подшоплик шарти, деб билган. Бошқа юртларга зўравонлик билан бостириб бора-вермаган. Уруш бошланмасдан олдин уч марта ўз нияти ҳақида турли йўллар билан рақибиға хабар берган. Дастлаб совға-саломлар билан «менинг тасарруфимга ўт, ўғлим бўл» мазмунидаги хат юборган. Агар ижобий жавоб келса, мамлакатни бошқариш, уни мудофаа қилишга маблағ кераклигини эслатиб, бож тўлаб туришни талаб қилган.

Агар таклифи рад этилса, «кечирим сўра» деб мактуб жўнатган. Бунга ҳам жавоб келмаса, учинчи — уруш эълон қилганлиги ҳақидаги хатни юборган...

МУХБИР: — Бундай ҳикоялар жуда мароқли, ҳар сафар улардан эшитганда ёки янги маълумотларни ўқиб қолганда олмоснинг навбатдаги қиррасини кашф қилгандек бўламиз. Афсуски, биз ана шундай ҳазинадан тўла баҳраманд эмасмиз, ҳатто бу соҳадаги маълумотимиз океан ортидаги маърифатли америкаликдан ҳам кам. Хайрият, анча кечикиб бўлса-да, шу йўлга кирдик. Нима бўлганда ҳам ташаббусни бошдан қўлга олиш керакка ўхшайди. Яхши амаллар бошланди, бу табриклишга лойиқ, бироқ ҳалқда «қош қўяман деб қўз чиқаради» деган нақл бор. Темур ва Темурий мавзуси Шаҳризода эртаклари эмас, уни тадқиқ қилиш, ҳатто қисқа таъриф беришда ҳам ўзига хос салоҳият, илмий тайёргарлик керак. Ҳуллас, бу борадаги нуқтаи назар «Маҳак тоши» мақолосида («Ҳалқ сўзи», 23 апрель) қисман ифодаланган. Шунга сизнинг муносабатингиз, келажакда қилиниши керак бўлган ишлар юзасидан йўл-йўриқларингиз, албатта, жамоатчиликни қизқириди.

А. АСҚАРОВ: — Ҳақиқатан, бу теран мавзууни тадқиқ қилишга киришилди. Темур ва Темурийлар даврининг илмий тадқиқи, улуғ сиймоларни бадиий акс эттириш дадил бошланди. Албатта, айтиладиган ҳар бир гап тарих ҳақидаги ҳақиқат мезонларига мос келиши керак. Ҳолбуки, бу борада ҳозиргача кўплаб чалкашликларга йўл қўйилган, маълумотлар бузиб талқин қилинган. Ҳатто ҳар қадамда саналарни хато кўрсатиш ҳоллари учрайди. Сизнинг мақолангизда ҳам Жаҳонгир Мирзонинг ҳаёт йиллари (уни мақбарадаги мармар таҳтадан олдим, деяпсиз) 1380—1404 тарзида хато кўрсатилган. Амир Темурнинг катта ўғли Жаҳонгир 1356 йилда туғилиб, 1376 йилда вафот этган. (*P.S. 1380—1404 — мақбара қурилган ишлар*). Жаҳонгир ўлимидан кейин унинг ўғли Муҳаммад Султонни, яъни бу суюкли набирасини ўзига ворис сифатида танлаган эди, афсуски, у ҳам 1403 йилда дунёдан ўтади ва Самарқандда дағн этилади. Бундай ҳар хилликлар ҳамон давом этаяпти. Шу ўринда барча ишларни мувофиқлаш-

тириб турувчи маҳсус илмий марказ бўлиши ҳақидаги таклиф жуда ўринли. Афсуски, бу юмушни бизнинг Тарих институтимиз зиммасига ололмайди. Бунга бизнинг қонуний, ҳуқуқий имкониятларимиз етишмайди. Республикада эса бундай юмушлар билан шуғулланиш бевосита ва-зифасига кирувчи эътиборли муассасалар анчагина. Улар масъулиятни ўзларига олиб, раҳбарларга аҳволни тўғри тушунтирасалар, бир ишора билан ишлар юришиб кетади.

Кўп нарса жамоатчиликка боғлиқ. Турли тадбирлар ўтказилиб турилса, матбуотда, радио-телевидениеда чиқишилар бўлаверса, муз кўчиб қолса ажаб эмас. Асосийси — ҳалқнинг кўллаб-куватлаши керак. Ҳар ҳолда тарихчи олимлар ҳам қараб туришгани йўқ. Бизнинг институтимизда алломалардан иборат Темур — Улугбек даври тарихини ўрганиш гуруҳи тузилди, улар шу йўналишда тадқиқотлар олиб борадилар, оммабоп рисолалар яратадилар.

* * *

... Демак, хурсанд бўлишга ҳали эрта. Ҳаммасини Самарқанду Бухоро, Хива-ю Шаҳрисабз шуҳратидан мағрурланиб юрган, улкан миноралар соясида улғайган, ўзлигини йўқлаб овоз бераётган ҳалқнинг иродаси ҳалқилади.

Йигирманчи аср сўнгги чораги — тараққиётнинг навбатдаги давомий босқичи. Инсоният бу босқичга мислсиз кашфиётлар билан бирга гегемонлик ёки улуғ давлатчилик васвасаларидан воз кечган ҳолда етиб келди. Чегаралар олиб ташланмоқда, ҳалқлар ва маданиятлар қўшилиб бораяпти. Шундай вазиятда бирор ҳалқ буюк аждодларини тўлароқ билишга қизиқса, бу асло ўтмишни қўмсаш эмас, балки ўз маълумотини бойитиш истаги, тарихни чуқурроқ билишга интилиш, холос. Ўтган кунлар шуҳрати билан мақтаниш эмас, унга муносиб бўлиш кўпроқ фойдалидир.

Умид қиласизки, 1996 йилда Соҳибқирон Амир Темур таваллудининг 660 йиллиги республикада кенг миқёсда нишонланади. Мустақил Ўзбекистон ҳалқи ҳам ўз қадриятларини муносиб тарзда эъзозлашга ҳақли, албатта.

1992 йил, май

КҮЗЛАР КҮП, ҚАРАШЛАР КАМ

*Бу борада Ҳожа Аҳмад Яссавий
беназириу бокарам*

Осмон сингари заминнинг ҳам нурли юлдузлари бўлади. Уларни қиблагоҳ, пир, устоз ва бошқа ардоқли сўзлар билан аташади. Юлдузлар жамоли олислиги билан сирли, фусункор, уларни ер бандалари тўйиб томоша қилишлари, ҳатто имконлари қадар «кашф» этишлари мумкин. Осмон ёритқичлари — барчанинг мулки, эл-улус назаридаги мўъжиза. Афсуски, тафаккур шуълаларини кўз билан кўриб бўлмайди, уларни қалб ила англаш лозим. Нақадар пок ва сезгир бўлиши шарт англайдиган қалб. Шунданми, ҳаммамиз оёқ тираб турган заминда умргузарон қилган, қалб шуъласи билан сонияларнигина эмас, йиллар, асрлар зулматини ёритиб турган «ер юлдузлари» ҳақида кам, жуда кам биламиз. Жавобсиз саволлар — қуруқ риторика ҳам толдирди. Лекин бир сўроқقا рухсат этинг: Аҳмад Яссавийни танийсизми? Умринг ўтирик қирраларида — мақсад чўққиси сари азимат этиб, ғалаба қучганингизда ёки бошингиз тошга тегиб, бурнингиз қонағанда ул ҳазратни бир бора эслаганмисиз? Балки бу ихлосмандлик таомилини буюк бобокалонимиз Амир Темур ҳазратларидан ўрганишимиз керакмикан?! Ҳа, ҳа, ўша биз таний бошлаган ва таниганимиз сари салобати тобора юксалиб, очилиб бораётган зотдан ибрат олсак бўларди. 1894 йилда туркийдан таржима қилиниб, Тошкентда рус тилида нашр этилган «Таржимаи ҳол»да эсланишича, Рум мамлакатининг пойтахтини забт этишга жазм қилган Темур тақдирини олдиндан билиш мақсадида Аҳмад Яссавий мақбарасига бориб, илтижо қиласди. Шунда қулогига тўрт қатор шеър чалинади. Унда хоҳласа қора кечани ёруғ кундузга айлантирадиган, хоҳласа ер юзини гулларга кўмиб ташлайдиган, барча мушкулотларни осон қиласдиган Аллоҳдан олдида турган қийин юмушни енгиллашибтириш сўралган. Соҳибқирон бу тўртликни ёдлаб олади ва Қайсар билан бўлган тенгсиз жангда ичиди 70 марта такрорлайди. «Шундай қилиб ғалабага Эришдим», деб

ёзган эканлар бобокалон. Бу воқеа 1402 йил ёзида бўлган. Ёки ўша пайтда ҳам, ҳозир ҳам эсланадиган Мадинада — Мұҳаммад, Туркистонда — Ҳожа Аҳмад деган ибора ёхуд Мадинага ҳаж қилишга қурби етмаганлар Туркистонни тавоғ қилсалар савоби тент бўлади, деб эътироф этишнинг ўзи ҳам Ҳожа Аҳмад Яссавий даҳосининг улуғворлигини кўрсатиб турибди. Албатта, ялтироқ мақтовлар билан мақсадга эришиб бўлмайди, бироннинг таъриф-тавсифисиз бу беназирликни ҳар ким ўз вужудида, қалбida ҳис қилиши, сезиши керак.

Зоҳирий таассуротлар асирида Туркистон шаҳрига, муборак зиёратгоҳга қадам қўйган «Амир Темур ўтган йўллар бўйлаб» илмий сафарнинг иштирокчилари қарама-қарши туйгуларни бошдан кечирдилар. Ер юзининг ана шу нуқтасида бутун туркийларнинг тақдири туташгандек туюлди бизнинг назаримизда. Бу муштараклик эса буюк бобокалонимиз Аҳмад Яссавий хотираси билан боғлиқ.

Дунё маданияти тарихига тасаввуф шоири ва янги тариқат асосчиси сифатида кирган Аҳмад Яссавийнинг таваллуд санаси баъзи адабиётларда 1103 йил деб кўрсатилган, лекин олимлар бу маълумотни унчалик аниқ эмас, дейдилар. У Сайрамда туғилган, отаси Иброҳим Фотима она авлодидан, онаси Ойша хотун (Қорасоч она) Имоми Аъзам — Абу Ҳанифа ан-Нуъмон ибн Собит зурриётларидан деган фаразлар мавжуд. Тиниқ булоқлар покиза масканларда мавжуд бўлади ёки асиyl мевалар тоза палакларда етилади, деганларидек, насл-насаби улуғ бўлган Аҳмад улғайиб шундай ҳаёт кечирдики, унинг умр лаҳзалари ҳақиқат ва афсоналарга қоришиб кетди. Унинг туғилиши 500 йил олдин аниқ бўлган. Ўшанда 300 ёшли Арслонбобга пайғамбаримиз Мұҳаммад алайҳиссалом бир омонат бериб, уни, албатта, эгасига топширишни тайинлаганлар. Арслонбоб омонатни тилининг остида сақлаб юрган.

Аҳмад Сайрамда Оқота бобо қўлида савод чиқарали. Баъзи манбаларда «ўн бир ёшида» дейилса-да, «Ҳикматлар»да «Етти ёшда Арслон бобо излаб топди» деб ёzádi. Биз Сайрамда бўлганимизда пир ва шогирд учрашган жой — Хонкўприкни кўрсатишди. Шу ерда кетаётган чол-

нинг олдига ёш бола югуриб келади-да, Худо тилига солгандек, «Омонатимни беринг», деб сўрайди. Пайғамбаримиз каромат қилган назаркарда гўдак шу эканлигига ишонган Арслонбоб тили остидаги хурмони олиб, Аҳмаднинг оғзига солади...

Таҳсилни ўша замоннинг илмий марказларидан бўлган Бухорода давом эттирган. Ҳазрат Юсуф Ҳамадоний сулукига киради ва дарвишликни қабул қиласди. Иқтидорли шогирд ҳисобланган Ҳожа Аҳмад устози Юсуф Ҳамадоний вафоти (1140 йил)дан кейин мазкур сулукка ўзи етакчилик қиласди, бироқ орадан кўп ўтмай, Яссига қайтади ва бир умр шу ерда қолиб кетади. Шавгар (Х асргача), Яssi (XVI асргача), Туркистон деб аталган кичкина шахар бу улуғ зот туфайли машҳур бўлиб қолади.

Аҳмад Яссавий дунёга ўз назари билан қарай олган буюк зот. Унинг қаламига мансуб тўрт ярим мингта яқин ҳикматларда ўз нуқтаи назари — дарвишик сулуки асослари ифодаланган. Маълумки, йирик тариқатлардан бири — ҳазрат Баҳоуддин Нақшбанд йўлининг шиори «Дил — ба ёру, даст — ба кор», яъни «Дил — Худода-ю, кўл — ишда» бойлик, ёруғ дунё ҳузур-ҳаловатини рад этмайди. Ундан анча олдин пайдо бўлган ва мислсиз шуҳрат қозонган Яссавий тариқати инсонни зоти шариф даражасида улуғлайди, унинг ҳар қандай мол-дунё, давлат ва бойликтан устун туришини таъкидлайди. Қуръони каримда: «Ким (ўз амали билан) охират экинини (яъни савобини) истар экан, биз унга экини(нинг ҳосилини) мўл, зиёда қилурмиз. Ким дунё экинини истар экан, Биз унга ўшандай (дунё матоларидан) берурмиз ва унинг учун охиратда бирон насиба бўлмас!» («Шўро» сураси, 20-оят) дейилади. Аҳмад Ясавий ҳазратлари бутун умрини, ижодини шу йўлга бағишлади ва жаҳоншумул шуҳрат қозонди.

Ислом оламининг Соҳибқирони, фан ва маданият ҳомийиси Амир Темур ҳазратларининг Аҳмад Яссавийга муносабатлари ҳақида жуда қизиқ маълумотлар мавжуд. Баъзан Олтин Ўрда хонлигини фатҳ этиб қайтаётган жаҳонгир Ясида тўхтаган ва Ҳожа Аҳмад қабри устида мақбара қуришни амр этган дейилса, баъзи ривоятларда ҳарб

юришларида бир кеча тушларига он ҳазрат кириб безовта қиласи, шундан кейин бу жойни обод қилишга киришадилар, тарзида баён этилади. Нима бўлганда ҳам Соҳиб-қирон ўзига пир деб туттган зотнинг руҳини шод қилишга жиддий киришгани аниқ. Шарафиддин Али Яздийнинг «Зафарнома»да ёзишича, мақбара қурилишига девонда ободончилик ишлари билан шугулланувчи вазир Мавлоно Убайдулло Садрнинг шахсан ўзи мутасадди қилиб тайинланади. Тарҳини — кесими — 41 газ, айланаси — 130 газ, мусаммман (саккиз қиррали юлдуз) шаклида бўлишини Соҳибқироннинг ўзи белгилаб берган, деб ёзади тарихчи. Махсус фармон билан вақф ерлар ажратилади, улардан келаётган даромадлардан қандай фойдаланиш белгилаб қўйилади. Тушумлар, асосан, таъмирлаш ишларига ва хизматкорлар маошига сарфланади. Амир Темур имзолаган вақфномада мақбарарада фаолият кўрсатиш учун мутавалли, хатиб, 2 нафар қори (Куръон тиловат қилувчи), мешкоб, фаррош ва 2 нафар боғбон бўлиши белгилаб қўйилган. Мазкур табаррук ҳужжат кираверишда ойна ичиди турибди.

Албатта, иморатнинг ҳар томонлама бетакрор ва гўзал бўлиши мўлжалланган, ғиштларга ишлатиладиган соз тупроқ 40 чақирим наридаги Саврон тепалигидан топилган, ўша жойда тайёрланган кирпичлар қўлма-қўл ташилган. Лойиҳалантган 35 хонанинг ҳар бири ўзига хос безатилган. Дошқозонхона ва мачит деворлари олтин суви билан жилоланган, ёнувчи тошчалар билан нақшланган. Ташки деворга гўзал ва сирли безаклар чизилган. Бир қарашда Куръон оятларини илғаб олиш қийин эмас. Шунингдек, ромб ёки тўртбурчак шаклидаги нақшлар ҳам маълум маънени англатувчи ёзувлар экан. Мутахассислар улардан баъзиларини ўқишига мусассар бўлишган. Жумладан, шимол тарафдаги девор сатҳига «Аллоҳ — Рабби, Мұхаммад — Наби», «Аллоҳу акбар», «Субҳон Аллоҳ» каби сўзлар ёзилган экан. Айни кунларда баъзи манбаларни қайта ўрганиш кўплаб усталарнинг исм-шарифларини аниқлаш имконини берган. Курилишнинг бош меъмори — Хўжа Ҳасан Шерозий, дошқозоннинг устаси — Абдулазиз ибн Шарафиддин Табризий, шамдонлар Изуддин ибн Тожиддин

лойиҳаси асосида қўйилган бўлса, хилхонадаги фил сувяклари ва анъанавий безаклар билан жилоланган эшикларни уста Сафар ясаган.

Афсуски, Яссавий мақбарасининг қурилиши битмай қолган. Кейинчалик ҳам бу иморат бошидан оғир савдо-лар ўтди. 1864 йилги чор босқини даврида унинг пешто-қига II та снаряд тушиб зарапланади. Орадан 6 йил ўтгач, ҳатто бузиб ташлаш ҳақида фармон чиқди. Хайрият, эзгулик тантана қилиб, бу кўргилик рўй бермади. 1872 йилда дастлабки таъмирлаш ишлари олиб борилди. Бу «таъмирлаш» ичкаридаги рангли нақшларни, қимматбаҳо тошчаларни кўчириб ташлаб, сидирға оқлаш ва чиқиндилардан тозалаш бўлди. Хуллас, маҳобатда Оқсаной ва Бибихонимга монанд бу иморат неча сиру синоатларни ўтказиб, бизнинг кунларимизгача етиб келди. Икки хил либос кийган юпун ҳолидаги бу мўъжиза меҳр-шафқатга муҳтоҷ. Уни, азалий миллий қиёфасини сақлаган ҳолда бошдан-охир таъмирлаб, муқаддас зиёратгоҳга айлантириш кечиктириб бўлмайдиган вазифа. Бир вақтлар мавқеи ислом дини пайдо бўлган жойлар билан тенглаштирилган муқаддас масканга муносабатни араблардан ўргансак ёмон бўлмайди. Улар Маккан мукаррама ва Мадинаи мунавварадаги ҳар бир ашёни қандай асрарини миллионлаб сайёҳлар ва ҳаж сафарига борувчилар кўриб келишаяпти.

Аҳмад Яссавий мақбараси икки буюк зот — шоир Ҳожа Аҳмад ва соҳибқирон Амир Темурни руҳан ва жисмонан бирлаштириб турувчи табаррук обида. У шу табарруклиги даражасида эъзозланмоғи шарт.

1993 йил, январь

МАНГУ УСТУВОР ҲАҚИҚАТ

Ҳозирги кунларимизнинг моҳияти нималарда зухур бўлмоқда? Албатта, мазкур саволга тўла жавоб бериш лабдурустдан қийин, бироқ бир нарса аниқ: руҳий уйғониш бошланди. Гарчи бу ибора содда ва сиқиқ бўлса-да, улкан тарихий ўзгаришни ифодалайди. Табиий, уйғониш осон эмас, унинг азблари бор, аммо кўз олдини тўсиб

турган қора парданинг кўтарилиб, онг ва зеҳнларни қамраб турган кўланканинг тарқай бошлагани — катта муваффақият. Ана шундай пайтда чўнг ҳақиқатлар, буюк кўтарилишлар, миллатнинг гуллаган ўтмиши ҳақида бор овоз билан, ҳайқириб гапириш керак, токи тош қотган қулоқлар очилиб, гунг забонлар тилга кирсин.

Минг бир эҳтиром ва ихлос ила яна ҳазрат Соҳиб-қироннинг муборак исмини дарж этарканман, кўз олдимда улкан бир қоя, чўққи гавдаланаверади. Туронзаминдағи қавмларни неча юз йиллар аробаси неча юз чақирилар нарига олиб кетмасин, бу улусни неча афъюнлар билан бошини айлантирмасинлар, тўпларга ем қилиб, лошини узоқ-узоқларга иргитмасинлар, биз ўша қоядан — чўққидан нарига кета олмас эканмиз. Юз бурсак, орқамиздан таъқиб қиласди, тикилсак, бағрига чорлайди. Бу тилсимот — Темурийлар ва мазкур сулоланинг асосчиси улуғ Амир Темурдир. Ҳозирги кунларнинг моҳиятидан келиб чиқиб, бир гапни зўриқмай, кучанмай, балки «Отамни соғиндим» дегандаги юрак дарди, «Бизлар буюкликка даҳлдормиз» дегандаги ички ифтихор билан оҳиста айтсак бўлади: «Амир Темурни ўрганиш керак». Бусиз маърифатли одам бўлиш, бусиз ҳаётни тушуниш мумкин эмас. Буюк Амир Темурсиз бизнинг тарихимиз етим, ўтмишимиз қоронғу, осмонимиз — тунд, заминимиз — шукуҳсиз. Негаки, ўзигача бўлган давр XIV—XV асрларнинг ўша фараҳли кунларида бутун борлиги билан синтезланган (мужассамлашган), кейинги даврнинг шакл-шамойили эса ўша фараҳли кунларда ҳомила бўлган. Амир Темур даҳоси инсониятнинг мазмунисиз ҳаётига жон бахш этган, дунёни сир-синоатга тўлдириб, бетимсол ибрат, сабоқ ва намуна қолдирган, тириклиknинг мақсад-моҳиятини кашф қилган мўъжизалардан бири...

«Чинакам эҳтиросларсиз ҳақиқатга эришиб бўлмайди», дейдилар файласуфлар. Мавзу қамрови қанчалик кенг, ҳаяжонларга исталганча ўрин бўлмасин, фикрни таҳлиллар, қиёслар, далиллар билан исботлашга нима етсин. Зоро, кўпинча Ақлга мурожаат қиласилар. Бу гал йирик тарихчи олим, фидойи инсон Бўрибой АҲМЕДОВни мусоҳабага таклиф қилдик.

— Ҳурматли Бўрибой ака! Сизнинг илмий жасоратинингиз алоҳида бир мавзу. Агар муддаога ўтадиган бўлсак, илдизи теран ва бақувват дарахтнинг кўрки, салобати ҳам шунга мос бўлали, дейишади. Шу маънода олиб қаралса, туркий қавмнинг тарихи ва бугунги борлиғи нуфуз жиҳатдан бетимсол, ўзига хос. Бу эл даҳолари, буюклари сони ва ўрни жиҳатидан дунё мезонида ҳам салмоқли ўрин тутади. Соҳибқирон Амир Темур туфайли эса биз унчабунча ҳалққа насиб этмаган баҳтга сазовор бўлганмиз. Бироқ воқеалар уммонида қалқиб турган дунёда тоғлар бошини баъзан туман қоплаганидек, жаҳонгир бобомиз турли муносабатлар гирдобида умргузаронлик қилиб бизнинг кунларимизгача етиб келди. Амир Темурга турлича муносабатлар тарихи ва унинг сабабларини баён этиш билан суҳбатни бошласак.

— Жаҳондаги бошқа ҳалқлар, масалан, араблар, форслар, ҳиндлар ва хитойлар сингари туркий ҳалқларнинг ҳам катта тарихи, маданияти, дунё силсиласида ўзига яраша тутган ўрни бор. Туркий ҳалқлар жуда катта чегарада — шимолда Олтой, Сибирдан то жанубда Мармар ва Ўрта Ер денгизлари, Ҳиндиқуш тоғларигача, шарқда Хитой ва Мўгулистон ҳудудларидан ғарбда то Қофқоз орти ерларигача бўлган катта музофотда қадим-қадим замонлардан бери истиқомат қилиб келадилар. Ана шу жойларда улар катта-катта шаҳарлар бунёд этдилар, ўзларидан жаҳонга кўз-кўз қилса арзигудек маданий ва маънавий ёдгорликлар қолдирдилар. Мўгулистон, Сибирь, Қирғизистон ва Фарғона ҳудудларидан топилган ёдгорликлар турклар тарихи ҳам асрлар қаърига чуқур томир отганидан гувоҳлик беради. Муҳими шундаки, улар қадимдан мустақил давлат бўлиб келгандар. Масалан, туркларнинг Турк хоқонлиги, Сомонийлар, Қораҳонийлар, Фазнавийлар, Салжуқийлар, Жўжи улуси, Чигатой улуси, Темурийлар, Шайбонийлар каби жаҳонга довруги кетган давлатлари бўлган. Абу Наср Форобий, Хожа Аҳмад Яссавий, Юсуф Хос Ҳожиб, Маҳмуд Кошғарий, Ҳусрав Дехлавий, Амир Темур, Мирзо Улуғбек, Заҳириддин Муҳаммад Бобур, Алишер Навоий ва Шайбонийхон сингари жуда кўп даҳолар шу туркий ҳалқлар орасидан етишиб чиққан.

Лекин туркий халқарнинг тақдирни бир қадар бошқача бўлди. Улар хитойлар, ҳиндлар, инглизлар, французлар, олмонлар ва русларга ўхшаб миллий бирлигини сақлаб қоломмадилар. Тўғри, Кичик Осиёдаги турклар XVI асрда мустақил давлат бўлиб олдилар, миллий мустақиллигини сақлаб қолдилар. Сибирь, Олтой ва Шарқий Туркистондаги турклар эса XVI, XVIII асрларда Русия билан Хитойнинг тасарруфига тушиб қолдилар. Ўрта Осиё билан Қозоғистонда истиқомат қилиб турган туркийзабон халқлар эса ўзаро феодал курашлар оқибатида XVI аср бошида аввал икки давлатга — Бухоро ва Хива хонликларига ажралиб кетдилар. XVIII аср бошида (1709 й.) Фарғона ўлкаси Бухоро хонлиги деб эълон қилди. «Бўлинганинни — бўри ер!» деб бежиз айтишмаган эканлар. XIX асрнинг иккинчи ярмида ҳар учала хонликни Русия империяси босиб олди. Кейинчалик бундан ҳам баттар бўлди. Асримизнинг 20-йиллари ўрталарида большавой ҳукмдорлар Ўрта Осиё билан Қозоғистонни беш бўлак қилиб ташладилар. Бу бўлакларга Қозоғистон, Қирғизистон, Ўзбекистон, Тоҷикистон ва Туркманистон республикаси деб от қўйдилар. Шундай қилингандан уларни идора қилиш осон бўларди-да!

Мустамлакачиликнинг ўзига яраша қонун-қоидаси, сиёсати бўлади. Мустамлакачи давлат деб аталмиш эзиш машинаси фақат милтиқ ва замбаракнинг кучи билан халқни, миллатни итоатда тутиб туролмайди. Бунинг учун ўша халқни дину эътиқодидан, тариху маданиятидан маҳрум қилиш зарур бўлади. Етук зиёлисини миллатчи, халқ душманига чиқариб, маҳв этиб ташлаш керак. Мустамлакачилар Туркистонда шунаقا сиёсат юргиздилар. Оқибати бугун ҳаммага маълум. Биз туркийзабон халқлар тарихимиз, тилимиз, миллий маданиятимиз ва қадриятларимиздан тамоман ажраб қолишимиизга бир баҳя қолди. Яқин-яқинларда ҳам Амир Темурни, Аҳмад Яссавийни, Навоийни, Бобурни ҳар на деб бадном қилиб келдик. Сабаби маълум: охир-оқибат тарихимиз, маданиятимиз, қадриятларимиздан воз кечиб, чор босқинчиларини қабул қилишимиз керак эди.

СССР деган давлат парчалангач, унинг таркибига кирган республикалар, шулар қатори Ўрта Осиё ва Қозоғистон республикалари ҳам миллий мустақиллик ва истиқолол йўлига ўтиб олдилар. Лекин бу ҳали том маъноси билан тўла мустақиллик эмас. Бунинг учун ҳали кўп курашишга тўғри келади. Биринчи галда Ўрта Осиё ва Қозоғистон халқлари бирлашиши керак. Шунинг учун ҳам Ўрта Осиё ва Қозоғистон жумҳуриятлари раҳбарларининг шу йил 3—4 январь кунлари Тошкентда йигилишиб, Марказий Осиё иттифоқини барпо этиш тўғрисида қабул қилган қарори ўз вақтида қилинган муҳим тарихий ҳужжат бўлди. Тарих орқага қайтаришмайди, лекин эски сиёсат тақорланиб қолиши мумкин. Сабаби — гегемон мамлакатларда улуғ давлатчилик кайфияти ҳали йўқолиб кетганича йўқ. Шундай сиёсат юргизмоқчи бўлгандар эса ҳали бор. Уларнинг шарпаси аҳён-аҳёнда эшитилиб турибди.

— Суҳбатимизга қайтиб, чет элларда Амир Темур шахсига муносабатни эслаб ўтсан...

— Амир Темур — буюк тарихий шахс. Йирик давлат арбоби, моҳир саркарда. Шу боисдан ҳам унинг тарихда, ҳусусан Туркистон халқлари тарихида тутган ўрни ва роли бениҳоят катта. Бу бугун кўпчилик олимлар, ҳусусан Фарб тарихчилари эътироф этган ҳақиқат. Фарбдан сўз кетгандан далилларга мурожаат қиласлилар. Маълумки, Амир Темур шу пайтгача ўз юргида қадр-эътибор топмали — замонасозлик туфайли уни тупроқ билан тенг қилиб келдик. Фарбда эса Амир Темурга муносабат тамом бошқача бўлди. Буни, энг аввало, Соҳибқироннинг ҳаёти ва ижтимоий-сиёсий фаолиятига бағишлиланган ва ўша узоқ юртларда нашр этилган китоблардан ҳам билса бўлади. Бундай китоблар Европа мамлакатларида XV асрдан бери мунтазам чиқиб турибди. Форест (1543), Перондино (1553) ва Мексия (1564)нинг «Буюк Темур» деган китоблари, Сильвестр де Саси, Шармуа, Элайес-Фармер, Мигнапелли, Феридунбей ва яна ўнлаб бошқа шарқшинос ва тарихчи олимларнинг Соҳибқиронга аталган асарлари шулар жумласидан. Фақат кейинги беш йил ичida Амир Темур ҳақида Франция, АҚШ ва Олмонияда бешта катта китоб чоп этилди. Мен бу ерда француз олимлари Лусъен

Керэн, Жан Поль Ру, америкалик шарқшунослар Беатрица Форбес, Манз Жон Вудс ва машхур немис олимни Генри Рёмерларнинг китобларини назарда тутаётубман. Яна бир мұхим далил — Европа мамлакатларида XVI асрдаётқ Амир Темур ҳақида сақна асарлари яратилди. Улуғ инглиз драматурги, Шекспирнинг замондоши Кристофор Морлонинг «Буюк Темур» асари ўша пайтдаётқ Қирол театрида сақналаштирилған эди. Франция ҳайкалтарошлари эса Амир Темурнинг олтиндан ҳайкалчасини яратдилар. Бизда-чи?

— Марҳум СССРда бунинг бутунлай тескариси бўлган лигига ҳаммамиз гувоҳ. Сталиннинг ўзи «СССР тарихи» дарслигидан «Темур давлати» деган бўлимни олдириб ташлагани ҳам бор гап. Бир гурунгда шундай латифонома воқеа эсланди: БМТнинг йиғилишларидан бирига борган А. Коғсигиндан (у СССР Министрлар Советининг раиси бўлган) қандайдир воқеа муносабати билан (балки Самарқанднинг 2500 йиллиги арафасида) «Сизларда Темурга муносабат қандай?» деб сўраб қолишибди. Мамлакатимиз (!?) хукуматининг бошлиғи Амир Темурнинг номини ҳам эшитмаган экан(!), довдираф қолиб «яхши» деб юборибди. Кейин Москвага, КПСС МКга телефон қилиб, «қандайдир Темур ҳақида» сўрашганини етказади. У маҳкама СССР Фанлар академиясига Темур ҳақидаги маълумотлар тўплашни топширади. Ўз навбатида бу топшириқ Тошкентга берилади. Буни илтифот деб тушунгган бизнинг раҳбарларимиз: «Биз томонга ҳам илиқ шамоллар эсиб қолибди», деганча қувониб ишга киришиб кетадилар. Қўлёзмалар жамланади, манбалар ўрганила бошланади. Ҳатто академик Иброҳим Мўминов «Амир Темур ва унинг Ўрта Осиё тарихидаги ўрни» деган рисоласини зълон қиласди. Оқибати эса маълум. «Аҳмоқнинг ақли тушдан кейин киради» дегандек, гап нимадалигини билган «юқори» ҳамма нарсани тақиқлади, олимларимизнинг бошига кўплаб шўришлар тушади. Мана шу далилнинг ўзиётқ кўп нарсаларни тушуниб олишга ёрдам беради. Мустамлакачилар бизнинг улуғ бобокалонимизни таниб, туруримиз уйғониб қолишидан ўлгудек қўрқсанлар. Бизни мудом бошимизни эгиб, қулларча меҳнат қилишга маж-

бурлаганлар, шунинг чораларини кўрганлар. Хўш, энди муносабат ўзгардими, бу борада қилинаётган қандай хайрли ишларни таъкидлаб ўтишни истардингиз?

— Яна уч йил ўтгандан кейин 1996 йилда Амир Темурнинг таваллуд топғанлиги (1336 йил 9 апрель)га 660 йил бўлади. Мазкур катта байрамга тайёргарлик бошланганига анча бўлди. Бунга, шубҳасиз, Соҳибқироннинг ҳамюрглари — қашқадарёликлар жиддий тайёргарлик кўраётиди. Соҳибқирон асли шаҳрисабзлиқ. Шу кўхна шаҳарга қарашли Хожа Илғор қишлоғида (бу қишлоқ ҳозир Яккабоғ тумани ҳудудида) таваллуд топғанлар. Ишончли манбаларда, Соҳибқиронга узоқ-яқин замондош бўлган Низомиддин Шомий, Ибн Арабшоҳ ва Фасиҳ Аҳмад Ҳавофийларнинг китобларида шундай деб кўрсатилган.

Албатта, муносабат ҳақида бирор гап айтишдан олдин Ўзбекистонда мустақилликнинг эълон қилинганига жуда оз вақт бўлганини назарда тутиш керак. Икки йил кўхна тарих учун бир сониядек фурсат. Аммо узоқни кўзлаб хайрли ишлар қилингани. Президентимиз Ислом Каримовнинг Вазирлар Маҳкамаси Раиси сифатида Баҳоуддин Нақшбанд тавалтудининг 675 йиллигини нишонлаш ҳақидағи қарорга имзо чекканлари кишида умид уйғотади.

Маълумки, эътиқод юракдан бўлса, уни ҳар қандай таъқибу тазийқ йўқота олмайди. Ўша тоталитар тузум шароитида ҳам Соҳибқироннинг чинакам мухлислари меҳрларини дариг тутгандари, чўчиб, қараб ўтиргандари йўқ. Фикримизнинг исботи — қисқа давр ичиди Амир Темур ҳақида кўплаб китоблар нашр этилди, асарлар ёзилди. Бу 1—2 йилнинг маҳсули эмас, узоқ тайёргарлик самараси. Марҳум профессор Очил Тоғай анча олдин Клавихо ва Вамберининг Амир Темур ҳақидаги мемуарларини илк бор ўзбекчалаштирган эди. Олим ва таржимон Убайдулло Уватов бир неча йил олдин услуби жуда мураккаб, ҳали бирон тилга тўла таржима қилинмаган Ибн Арабшоҳнинг китобини тилимизга ўгириб, изоҳлар билан тайёрлаб нашр қилдирди. «Туркистон» газетаси қошида «Амир Темур ўтган йўллар бўйлаб» илмий экспедиция ташкил бўлиб, фаолият бошлади. Бу фидойи жамоа Шаҳрисабз (1991) ва Туркистон (1992) йўналишларида

сафарда бўлиб, жуда улуг ишларни амалга ошириши. Поён Равшановнинг саъй-ҳаракати билан 1990 йилда мулла Салоҳиддин қори Тошкандийнинг нақл-ривоятлар асосида ёзган ва 1894 йили чоп этилган «Темурнома» асари халқимиз мулкига айланди. 1992 йили ҳазрати Соҳибқироннинг таваллуд кунлари илк марта оммавий равишда нишонланди. «Амир Темур» маърифий жамияти тузилди. Яқинда Амир Темурнинг ўзи тартиб берган таржими ҳоли «Зафар йўли» номи билан китоб қилиб чиқарилди. Матбуотда, радио-телевидениеда кўплаб мақолалар, чиқишилар эълон қилинди. Албатта, булар ҳали жуда кам, катта ишнинг бошланиши, холос. Олдинда жуда улут режалар бор, катта ишлар кутмоқда. Биз ғайрат камарини белга маҳкам боеялаб, тайёр бўлиб туришимиз керак, токи мустақил мамлакатимизда бобокалонимиз етарлича иззат-этибор топсин.

— Жаҳон киноюлдузлари иштирокида кўп серияли фильм ишланади, деб эшитган эдик.

— Эшитганингиз рост, Ҳакимжон Амир Темур ҳақида кўп серияли фильм яратиш ҳаракати бундан тўрт-беш йил муқаддам — 1988-89 йиллари бошланган. Бу мушкул, лекин хайрли ишга кинорежиссёр Али Ҳамроев бел боғлади ва италиялик ҳамкаслари билан ҳамкорликда ишга тушди. Ҳар қандай фильмнинг муваффақияти, авваламбор, сценарийнинг савиасига боғлиқ. Агар уни билган ва тажрибали одам ёзган бўлса, фильм яхши чиқади, уни томошабин қабул қиласи, акс ҳолда ундан фильмнинг умри қисқа бўлади. «Амир Темур» фильмининг сценарийси (уни Али Ҳамроевнинг ўзи олмониялик кинорежиссёр Фридрих Горнштейн ва италиялик Анжело де Жента билан ҳамкорликда ёзган) дастлаб муваффақиятсиз чиқди чамаси, чунки олимлар ва мутахассисларнинг муҳокамасидан ўтмади. Ўшанда мен республика ҳукуматининг қарори билан бош илмий маслаҳатчи этиб тайинландим. Биз Али Ҳамроев ва фильм муҳаррири X. Булгаков билан сценарийни бир неча бор қараб чиқдик ва унга жиддий тузатишлар киритдик. Фильмни суратга олса бўладиган эди. Лекин шундан бери қарийб икки йил вақт ўтди, бироқ ҳали ишга киришилганича йўқ.

— Аҳмад Юғнакий бобомиз «Буюкларга ўзингни ула» деб ёзган эканлар. Бизнинг тарбия усулимизда ҳам улуфлар, пирлар, устозларга қуллуқ қилиш, уларнинг хизматида бўлиш алоҳида таъкидланганки, бу беҳуда гап эмас. Агар ихлос билан яхши одам яшаётган кўчадан ўтса ҳам кишида бирор эзгулик пайдо бўлар экан. Шахсий кечинмаларни баён этсам, Соҳибқирон бобокалонимиз излари бўйлаб икки дафъя ҳам сафарда бўлдим. Орттирганим шуки, мунаvvар бир оламда яшайсиз, руҳ — тоза, фурур — уйғоқ, қалб — сахий. Яна шуниси борки, ўзингни қандайдир илоҳий куч ҳимоясида ҳис қиласан, шу билан бирга улуғ бир тилсимот олдида жавобгарсан, масъулсан. Бундай туйгулар, шубҳасиз, кишини бемисл даражада улфайтиради, куч бағишлайди. «Ҳар бир муслим ўзига ёққан нарсани бошқа муслимга раво кўрсин», дейилади муборак ҳадисларда. Шунга кўра мен бутун миллатдошларимни ана шундай эътиқодга даъват этаман. Бундай эътиқод, албатта, амалий ишларда воқеъ бўлиши лозим. Ҳурматли устоз, энди бу борадаги жами эзгуликларни ўзида жамлашга интилаётган «Амир Темур маърифий жамияти» хусусида фикр юритсангиз.

— Кўриб турибсиз, Темур ва Темурийлар даври тарихи баъзи сабабларга кўра яхши ўрганилмай қолди. Ваҳоланки, бу давр, яъни XV аср Туркистон халқлари тарихида алоҳида ўрин тутади. Бу даврда ҳунармандчилик, савдо-сотиқ, илм-фан ва маданият мисли кўрилмаган даражада ривожланди. Муҳими, бу тарих биргина Темур ва авлодларининггина тарихи эмас, балки биринчи навбатда икки азим дарё — Ўкуз (Амударё) ва Инжу Ўкуз (Сирдарё) оралиғида ва ўша дарёларнинг теварак-атрофига истиқомат қилган халқлар тарихидир. Сирасини айтганда, биз, тарихчи олимлар, Амир Темур, унинг авлоди ва даври тарихини ёзиб беришимиз, ҳеч бўлмаса бир қисмини ўзбек ва рус тилларига таржима қилиб, халқимизга етказишимиз керак. Ундан ташқари, Темур ва Темурийлар даврида яратилган амалий санъат асарлари ва халқ ҳунармандчилик буюмлари (манбаларнинг гувоҳлик беришича, ўтмишида Туркистон заминида ҳунармандчиликнинг 100 га яқин тури мавжуд бўлган)нинг жуда кўп

турлари йўқолиб кетган; кўп меъморчилик ёдгорликлари нураб, йўқ бўлар даражасига етиб қолган. Биз, олимлар ана шу санъат асарлари ва ҳунармандчилик турларини тиклашда мутахассисларга илмий маслаҳатлар бериш, меъморчилик ёдгорликларини таъмиrlашда баҳоли қудрат иштирок этишимиз керак. Шу катта ва савобли ишда фаол иштирок этиш мақсадида бир гурух зиёлилар: олимлар, ёзувчилар, рассомлар, журналистлар ва ўқитувчилар 1992 йилнинг 17 майида «Амир Темур маърифий жамияти»ни туздик. Республика Адлия вазирлиги мазкур жамиятни рўйхатга олди.

Хулласи калом, яхши ният билан катта ишга қўл урганимиз. Амир Темур маърифий жамияти Темур ва Темурийлар даври тарихи ва маданиятини ўрганиш, ҳалқ орасида кенг тарғиб қилиш ишига катта ҳисса қўшиши мумкин.Faқат олийҳиммат одамлар бизни моддий жиҳатдан бир оз қўллаб-қувватлаб юборсалар, бас.

* * *

«Амир Темур маърифий жамияти»нинг тузилиши катта мақсад йўлидаги дастлабки қадамлардан. Соҳибқирон ўтган йўллар бўйлаб ҳаракат қилувчи экспедиция ҳам ўз тадбирларини мазкур жамият билан ҳамкорликда амалга оширмоқда. Шуниси қувончилики, бундай саъӣ-ҳаракатларни қўллаб-қувватловчилар тобора қўпаймоқда.

Ўтмишимиизни безаб, келажагимизга шуъла сочиб турган буюк воқелик олдилда турибмиз. Чўққи сари очилган сўқмоқлар ўчган чироқларни ёқади, қуриган булоқлар кўзини очади. Буюк бобокалонимиз Амир Темур ўз ҳалқига қайтади. У кунлар узоқ эмас.

1993 йил, январь

ҲАЛҚИМИЗ ЮРАГИДАГИ ЁДГОРЛИК

Тарихнинг ўлмас ҳақиқатлари турли хил муносабатлар чиғириғидан ўтиб, яшашга ҳукм қилинганга ўхшайди. Қолаверса, йилларнинг бундай шафқатсиз синови

ёлғондан ростни, яхшидан ёмонни ажратиб олишда маҳак тоши бўлиб хизмат қиларкан. Орадан олти аср ўтгач, Соҳибқирон Амир Темурнинг муборак номи тилларда ўзгача меҳр ва самимият билан зикр қилинаётган экан, бу ҳол тақдирнинг тасодифий инояти эмас, балки қонуний, адолатли муносабат эканини яна бир марта таъкидлашга тўғри келади. Албатта, ўтган 600 йил ўз равиши билан кечган, табиийки, бу даврларда Темур ва Темурийларга қарашлар ҳам турлича бўлган. Узоққа бормай кечаги кунларимизни эсласак кифоя. Шўро замонида юзага келган тақиқларнинг илдизи қаёқда? Шубҳасиз, бу саволга дабдурустдан жавоб бериш қийин. У жиддий таҳлил ва тадқиқотларни талаб этади.

Ўша даврнинг хотираларида қайд қилинишича, 40-йилларнинг бошида Москва Гўримир хилхонаси билан қизиқиб қолади. Албатта, гоянинг муаллифи ким, қандай вазифа кўзда тутилгани ҳақида аниқ тап айтиш қийин, бироқ улар гўрларда қимматбаҳо бойликлар яширган бўлиши мумкинлигини, ҳатто уларда ростдан ҳам жасаллар дафн этилганлигига шубҳа қилиб, аксинча бўлса, дафн қилиш қайси урф-одатга асослангани, марҳумларнинг миллати ва қиёфаларини аниқлашни мақсад қилиб, қабрларни очиб кўришга жаҳд қиласидар. 1941 йил бошларидан Самарқандга маҳсус комиссия келиб, икки ҳафта давомида аҳволни ўрганади. Масала ЎзКП МК бюросида кўрилади ва қабрларни очишга қарор қилинади. Т. Қори-Ниёзий раислигига турли соҳа олимлари — Л. Ошанин, А. Семёнов, М. Герасимов, В. Шишгин, Ҳ. Зариповдан иборат комиссия тузилади. Улар 16 июнда иш бошлашади. Амир Темур, Мироншоҳ, Шоҳруҳ, Муҳаммад Султон, Улуғбекнинг қабрлари очилади. 22 июнда уруш бошланади. Жасад қолдиқларини Москвага олиб кетиш режаси амалта ошмайди. Комиссия 24 июнда Тошкентга қайтиб келади, яшикларга жойланган суюкларни ўша пайтда «Эски ва санъат ёлгорликларини сақлаш комитети» деб юритилган, ҳозирда «Ёлгорлик» жамияти жойлашган бинонинг омборларига топширишади. Олимлар мўлжаллаган ишларини чала-чулпа бажариб, суюқ қолдиқларини

1942 йил августда қайта дағн әтадилар. Бу иш қандай тартибда амалга оширилганини ҳеч ким билмайди.

Қолаверса, ҳар биримизнинг Амир Темурни танишимиз турли зиддиятлар билан кечган. Жумладан, тоталитар тузум шароитида яшаган зиёлилар учун бу жараён яна ҳам мураккаб бўлган. Ўша кунларнинг жонли гувоҳларидан бири — Н.А. Муҳитдинов шундай әслайди:

— Катта бобом маърифатли одам бўлиб, «Зафарнома»ни ўқиган, унинг мазмунини ўғли — бобомга айтиб берган. Қиши кечалари танчада ўтириб, бобом, бувим менга турли-туман эртаклар сўзлаб беришар, эртасига билимимни имтиҳон қилишарди. Ана шунда илк марта ҳазрати Соҳибқирон Амир Темур билан «танишганман». Ке йинчалик бу улуғ зотга у ёки бу маънода дуч келавердим.

1946 йилда фронтдан қайтиб, Марказқўмда лектор бўлиб ишлай бошладим. Хизмат сафари билан Қашқадарёга бордим-да, зиёлилар ҳузурида совет халқининг фашизм устидан қозонган ғалабаси ҳақида эҳтирос билан маъруза ўқидим. Савол-жавоб бошланганда кимдир дабдурустдан «Сиз лашкарбошилар ҳақида яхши маълумотлар бердингиз, аммо Амир Темур деган буюк жаҳонгир ўтганини биласизми?» деб сўраб қолди. Саволга боболаримдан эшитганларим асосида нари-бери жавоб бердим-у, бу ҳақда кўп нарса билмаслигимни сезиб қолдим. Тошкентга қайтгач, «Амир Темурни анча яхши билади», деб эътироф этилган Т. Қори-Ниёзийнинг ҳузурига бориб (у ўшанда республика Фанлар академиясининг президенти эди), анча суҳбатлашдим. Тошмуҳаммад Ниёзович бир нарсадан жуда афсусланди. «Ҳаётимда балки ҳатоларим бўлгандир, — деганди Қори ака, — лекин уларнинг энг каттаси комиссия раиси бўлиб Гўримиридаги қабрларни очишга бош кўшиганим. Руҳим ўзимда йўқ. Тушларимга ҳам кириб чиқади».

Амир Темур ҳақидаги учинчи муаллимим Садриддин Айний бўлган. 1952 йилда Самарқанд обкоми саркотиби телефон қилиб, Айний домла оғриб қолганларини, мени сўраётганларини айтиб қолди. Икки врачни ёнимга олиб бордим. Аҳволлашдим. Суҳбатимиз кўр олиб кетди. Айний

багоят ақли, донишманд одам экан. Мен кейинчалик Курчатов, Королев каби мислсиз ақл ва тафаккур эгалари билан ҳам мулоқотда бўлдим, лекин ўшандада Айний домланинг чуқур мулоҳазалари, теран билими олдида қойил қолганман. Икки-уч соатда қайтаман, деган одам икки кун қолиб кетганман. Шунда Айний Самарқанд тарихи, Темур ва Тумурийлар ҳақида батафсил ҳикоя қилиб берган. У воқеликка фақат оқ ва қора ранг билан баҳо берадиган кипши эмас эди. Аждодларимизнинг бемисл шуҳратлари ҳақида ҳам, империянинг емирилиши сабаблари тўғрисида ҳам андиша билан мулоҳаза юритган.

Шўро тартиблари ҳамма ишни ими-жимида, сопини ўзидан чиқариб ҳал қиласади. Эндиликда колониал тузум шароитида халқларни ўз тарихидан маҳрум қилиш не учун кераклиги очиқ айтилмоқда. Жумладан, Темур ва Темурийлар ҳам қатағонга, ҳатто бошқалардан кўра қаттиқ қатағонга дучор бўлдики, бу ҳолнинг сабаблари маълум. Ҳар ҳолда ҳақиқатни қарор топтириш, одамларга бор гапни айтиш учун ҳаракатлар бўлган.

1957 йилда бу масалани кун тартибига жиiddий қўйишга ҳаракат қилинган. Ўшандада шахсга сифиниши оқибатларини тутгатиш ҳақидаги қарор чиққан, турмушда бир оз рўшнолик бошланган эди. 1956 йили Ўзбекистон зиёлиларининг биринчи қурултойини тайёрлашта киришилди. Унда, жумладан, Сталин қатағонларига муносабат ҳам кўриб чиқиши керак эди. 30-йиллари Ўзбекистондан 40 минг киши таъқибга учраган, шундан бир неча минги отилган эди. Бюро йигилишида Акмал Икромов, Файзулла Хўжаев, Абдула Қодирий, Чўлпон, Фитратни оқлаш масаласи анча тортишувлар билан маъқулланганди. Навбат Амир Темурга келди. Бу жиiddий мунозараларга сабаб бўлди. Бюро аъзоларининг кўпчилиги маъқулламади. Москвадан ташриф буюрган Поликарпов (МК да бўлим мудири) ва Михайлов (министр) ҳам олдин тилга олинган шахслар республика миқёсидаги кишилар эканини, Темурни эса дунё билишини ва унга юқорининг фикрини олиш шартлигини уқтириб, алоҳида кўриб чиқишини таклиф қилишди. Шундай қилиб, Амир Темур ҳақидаги фикр маърузага қўшилмади. Масала очиқ қолди. Сўнг Ҳабиб Абдулаев, Ибро-

ҳим Мўминов, Ҳамил Сулаймон, Шайхзода, Толстов, Ҳ. Турсунов, М. Мусаевлар билан биргаликда ҳар томонлама муҳокама қилиб, Соҳибқиронни таърифлаб, 3,5 бетлик хат тайёрлаб Москвага юборилди. Навбатдаги йиғилишда Никита Хрушчёв мамлакатнинг олий даражали арконларига қаратса: «Мана бу ўзбекларнинг хатини ўқиб чиқдингларми?» — деб мурожаат қилган-да:

— Улар ўз аждоди Темурни оқлаш масаласини қўйяпти? — деб давом этган. Сўнг:

— Уларга шу нимага керак? Ўзи аллақачон ўлиб кетган экан. Балки уларнинг тасаввурлари бўйича жаннатда юргандир? — деб қўшиб қўйган. Шунда Ўзбекистон вақиллари «Одамлар Македонский, Наполеон ёки Пётрни билишади, шулардан хабардор, халқимиз эса Темур ҳақидаги аниқ ҳақиқатни билмайди. Хўш, уни ўрганишнинг нимаси ёмон», қабилида фикр юритиб, даъволари ни исботлашга уринган. Муҳокама жиддий тортишувга айланиб кетиб, охирида Хрушчёв: «Тошкентга бориб яна батафсилроқ маълумотлар тўплаб, жўнатинглар», деб топшириқ берган. Кейинги сафар Президиумдаги муҳокама тинчроқ ўтади. Бироз ён бергандек бўлишиб, «Тадбирларни ўзларингча ўтказаверинглар, яқинда бир шахсга сифи нишдан қутулиб, энди иккинчи жабҳани очмайлик. Ҳозирча Иттифоқ, жаҳон миқёсида бирон нарса дейиш имкони йўқ», деган фикр билдирилади. Иброҳим Мўминов бошлиқ гурӯҳ тузилади, ишлар бошланиб кетади. Улуғ олим Иброҳим Мўминовнинг вафоти ва бошқа сабабларга қўра ишлар яна тўхтаб қолади. Шу билан яна Амир Темур уннутилади.

Одамлар орасида «Эрмитажнинг маҳсус залларида бо-бокалонимиз Амир Темурнинг шахсий буюмлари, унга тегишли нодир жиҳозлар сақланади ёки Испанияда Клавиҳо чизган суратлар бор», деган гап юради. Бу масалада гувоҳларга мурожаат этдик.

— Шу заминда яратилган энг нодир ёдгорликлар, осори-атиқалар тўс-тўполон йиллари олиб чиқиб кетилгани ҳаммага аён. Бундай ашёлар Ватикан, Франция, Англия, Италиядаги музейларда сақланади. Иш шу даражага етганки, миллатнинг маънавий камолотини намойиш эта-

диган, тарихийлик жиҳатдан бебаҳо ашёларнинг сўнгги нусхаси ҳам йўқолган. Яқинда Хоразмда бўлганимизда зиёлиларнинг икки вакили билан сұхбатда ер юзидаги энг қадимги битиклардан ҳисобланмиш 2,5 минг Йиллик тарихга эга бўлган хоразм, суд ёзувларининг намуналари сақланган-сақланмаганлиги билан қизиқдик. Ҳеч ким тайинли гап айтмади, аслида, уларнинг бирор белгиси ҳам қолмаганга ўхшайди. Ҳолбуки, Еревандаги Матеодаран кутубхонасида бу ёзув намуналари имло қоидалари билан ҳамманинг кўзи тушадиган жойда, ойнанинг тагига бостириб кўйилган.

Қозоғистонлик қардошларимиз бир замонлар Туркистон шаҳридаги Аҳмад Яссавий мақбарасидан Амир Темур маҳсус тайёрлатган қирқ қулоқли улкан қозон Ленинградга олиб кетилганини билгач, шу нодир ашёни қайтариб олишга астойдил киришиши. Тўрачилик замонида юқори поғонадаги раҳбарлар билан анча тортишишига тўғри келган. Эрмитажда бўлиб, музей маъмурияти билан алоҳида музокара ўтказилган. Шунда «олтин қутичада сақланётган Соҳибқироннинг киприклари»га дуч келинмаган, бироқ қозон қайтарилиб, маҳсус эшелонда Туркистонга жўнатиб юборилган.

Туркистон шаҳридаги мақбаранинг тепасига чиқиб қаралса, Бойқўнғир космодроми, у ернинг ракеталар учирладиган жойидан эса мақбара кўриниб турар экан. Олимлар ҳам Туркистон — Бойқўнғир — Тўратом учбурчагини ер юзининг алоҳида хислатли жойларидан деб тан олишади. Бу ўринда шу манзилда макон тутган Аҳмад Яссавий ҳам, унинг қабри устига мақбара қурдирган Амир Темур ҳам кўп илмлардан хабардор одам бўлганини таъкидлаб ўтиш жоиз.

Клавихо чизган суратлар ҳақида ҳам қизиқ гаплар бор. Испаниянинг жанубий вилоятлари — Андалузия, Валенсияга сафар қилган кишиларга мезбонлар буқалар жангি — корридони, тарихий жойларни, айниқса, Сервантес ва унинг қаҳрамони Дон Кихот билан боғлиқ манзилларни ифтихор билан кўрсатишади. Маълумки, Испания қиролининг элчиси Руи де Клавихо Гонзалес Темур саройида яшаган, Соҳибқироннинг ва малика Бибихонимнинг ил-

тифотига сазовор бўлган европалик зот. Ўзи олим, дипломат, ҳарбий бўлган бу одам сафари давомида жуда кенг қамровли юмушларни адо этгани шундан ҳам кўринадики, қайтиб боргач, Испаниядан ташқари Франция, Италия, Англия, Голландия ҳукуматларининг олий мукофотларига сазовор бўлган. Бу борада гаплар кўп, асосли далилларсиз бирор нарса дейиш қийин. У умрининг охирида сирли одам бўлиб қолган, ички-ташқили каттакон темир сандиги бўлиб, ундаги жиҳозларни ҳеч кимга кўрсатмаган экан. Уларда ҳақиқатан инсон қиёфаси туширилган расмлар сақланган. Маълумки, ислом одатларида одамнинг расмини чизиш қатъий тақиқданган. Клавихо Самарқандда бўлганида суратлар ҳам чизган бўлиши мумкин. У вафот этаётганда ҳам яқинларига сандиқни очмасликни, бўлмаса ундаги суратлар охиратда ундан ўз жонларини талаб қилишини таъкидлаган экан...

Самарқанддаги Гўримир мақбараси, унга ташриф буюрган чет эллик меҳмонлар (жумладан, Лаъл Баҳодир Шастри) билан боғлиқ тафсилотлар ҳам қизиқарли. Хорижда яшаётган миллатдошларимиз ҳам Соҳибқирон номини қалбларининг тўрида эъзозлашар экан. Ҳақиқатан, Самарқанд Осиёнинг ўзига хос каъбаси ҳисобланади. Мамлакатимизга ташриф буюрган чет эллик меҳмонлару расмий делегация аъзолари бу шаҳарга, албатта, ташриф буюрадилар, бетимсол ёдгорликларни зиёрат қиласидилар. Бу анъана кўпдан буён давом этиб келяпти, унда жуда чуқур маъно яширинган.

Ҳиндистон мустақиллигининг олтинчи йилида Жавоҳарлаъл Неру қизи Индира Ганди билан Самарқандга келган. Ҳинд халқи истиқлонининг меъморларидан бири Ж. Неру Гўримирни ихлос билан зиёрат қиласиди, расадхонани бориб кўради. Афросиёб тепалигига ташриф буюради. Регистонда бир неча минг кишилик шаҳар аҳли иштирок эттан митингда қатнашиб, нутқ сўзлайди. Шундан кейинги суҳбат жараёнида Йирик сиёсий арбоб ва олим Неру Амир Темур ҳақида маҳсус тадқиқотлар олиб бормаган бўлса-да, буюк жаҳонгир ва унинг авлодлари инсоният маънавий ҳазинасига улкан ҳисса қўшгани ҳақиқат эканини эътироф этишини таъкидлаб ўтади. «Бобур ва

унинг фарзандлари Ҳумоюн, Жаҳонгир, Шоҳжаҳон, Ақбар, Аврангзеб Ҳиндистоннинг тараққиётида мислсиз роль ўйнадилар, улар нима яратган, қандай хайрли иш қилган бўлса, ҳинд тупроғида абадий қолди», деди Неру. Айниқса, қарийб 50 йил хукмронлик қилган Акбарнинг хизматлари унугтилмасдир. «Амир Темур ва унинг авлодлари яратувчи, бунёдкор зотлар бўлишган», деган эди ўшанда олий мартабали меҳмон ишонч билан.

— Италияning Пули штатида катта ҳалқаро кўргазмада иштирок этганиман, — деб эслаганди ўша замоннинг таникли арбобларидан бири. — Шу ерда ўзбекча либос кийиб, қўл қовуштириб турган кишиларга дуч келиб қолдим. Улар уч авлод — бобо, ота ва ўғил савдогарлар бўлиб, кўргазмаларда турли гиламлар намойиш этиб, унинг савдоси билан шуғулланишаркан. Идорасининг тепасига «Амир Темур ширкати» деб ўзбекча ёзиб қўйишибди. Албатта, хонадонларига таклиф қилишибди. Одатларида ўзбекчilikning энг кичик унсуригача ҳам сақлашган. Улар ўзларини «Амир Темур авлодлари» деб аташаркан...

Чехославакиядан Венгрия орқали машинада қайтаётганимизда ҳамроҳлар бир қишлоқдан ўта туриб, «Сиз ўзбексиз, ўзбеклар юртига ташриф буюрмайсизми?» деб қолишибди. Бир кўчадан бурилиб ичкарига кирсак, ҳакиқий ўзбекона маҳалла, оқсоқоли тўн, дўлпи кийиб ўтирибди. Улар ҳам Амир Темур авлодларимиз, ота-бобомиз ўша суронли йилларда келиб қолишган, деб айтишибди. Ватандан йироқда яшаб, қалбida миllat руҳини сақлаб келаётган пок ниятили, кўнгли тоза юртдошларимизни ҳам юбилей муносабати билан йўқлаб кўйсак яхши бўларди.

* * *

«Мен агар узокроқни кўраётган бўлсам, бу кимнингдир елкасида турганимдан». Ҳар ҳолда бизда «узокроқни кўриш» имкони бор. Ўтган кунларимиз тарихда беиз кетмаган. Қолаверса, кечаги тоталитар тузум, унинг камситувчи, ҳўрловчи тартибларини босиб ўтиб, бугунги истикмол кунларига эришдик. Ҳар қандай шароитда ҳам миллий руҳнинг бардам яшагани, эртанги кунга умиднинг сўнмагани маънавиятимиз илдизларининг теранли-

гидан бўлса керак. Шубҳасиз, олти аср ўтиб тантана қилган ҳақиқат бугунги кунларимизни мунаввар этиб, қелажакнинг ойдин йўлларида мангу ҳамроҳ бўлиб қолади.

1994 йил, ноябрь

ИСТИҚЛОЛ БАХШ ЭТГАН ИЛҲОМ ТУҲФАСИ

Улуғ саркарда ва буюк давлат ароби, Соҳибқирон Амир Темур таваллудининг 660 йиллигини кенг нишонлаш юзасидан ўлкамизда қизғин тайёргарлик кечеётган бир пайтда академик Бўрибой АҲМЕДОВнинг «Амир Темур» асари босмадан чиқди. Илм аҳлига яхши таниш бўлган олимнинг кўплаб талқиқотлари тарихимизнинг ҳали ўқилмаган саҳифаларини жамоатчиликка маълум қилишда биринчи қадамлардан бўлган. Абдулла Қодирий номидаги халқ мероси нашриётида оммавий нусхада чоп этилган мазкур асар ҳам бу йўналишдаги илк уринишлардандир.

Албатта, ҳар бир йирик асар узоқ тайёргарлик маҳсулси сифатида дунёга келади. Шу жиҳатдан мазкур китобнинг яратилиши ва унинг муаллифи таржимаи ҳолида мантиқий боғланиш мавжуд. Таниқли олим ижодий ва илмий фаолиятининг муҳим маҳсули бўлмиш «Амир Темур» асари юзасидан суҳбатни эътиборингизга ҳавола қиласиз.

— Ҳурматли Бўрибой ака, мана, навбатдаги асарингиз ёруғлик юзини кўрди. Гарчи янги китоб қувончини биринчи марта кечирмаётган бўлсангиз-да, бу йирик асарга сўнгги нуқта қўйгач, қалбингиздан қандай ҳислар кечди?

— «Амир Темур» асарини бошда бадиа деб атаган эдим, чунки роман ёзиш ҳар кимнинг ҳам қўлидан келмаса керак. Ҳусусан, мен бу жанрда тажриба қилиб кўрмаганман. Асар қўлёзмаси билан муфассал танишгандан сўнг атоқли адабимиз Одил Ёкубов асарни тарихий роман деб аташни тавсия қилди. Лекин китоб шу жанр талабларига жавоб бериш-бермаслиги муштариylарга ҳавола. Бу — биринчидан, иккинчидан, «Амир Темур» менинг адабий

жанрда Мирзо Улуғбек ҳақидаги эсседан кейин ёзган иккинчи асарим. Роман Темурдек буюк шахс ҳақида ўзбек тилида ёзилган биринчи китоб. Буюк аждодимиз ҳақидаги асарни бақадри имкон ёзиб, уни нашр эттириш шарафига мұяссар бўлганимдан қувончим чексиз.

Маълумки, Амир Темур мустамлака ва шўролар даврида қаттиқ қатағонга учраган шахс. Сирасини айтганда, тарихимиздаги бошқа сиймолар ҳам қораланган эди. Бой маданий меросимиз, ажойиб анъана ва урф-одатларимиз ҳам йўққа чиқарилганди. Мана, миллий истиқлол шарофати билан тарихимизни, илмий ва маданий меросимизни ўрганишга йўл очилди. Менинг асарим ҳам ана шу имконият натижасидир. Бироқ бу борада ҳали кўп ишлар қилишимизга тўғри келади. 1864 йилдан 1991 йилгача қарийб 130 йиллик тарихимиз ва қадриятларимизга етказилган заرار-зиённи бартараф этиш учун кўп йиллар керак бўлади.

— Бу асарни бутун илмий фаолиятингизнинг йиғма ҳосиласи деб баҳолаш мумкинми? У ҳажман анча катта. Ана шундай йирик асарнинг яратилиши ҳақида тўхтсангиз?

— Саволнинг биринчи қисмiga изоҳ берадиган бўлсам, «Амир Темур» романи менинг фақат Амир Темур ва Темурийлар тарихи ҳамда маданиятини ўрганиш йўналишида кўп йиллардан бери олиб бораётган илмий изланишлариминг бир йўналиши ва дастлабки натижаси, холос. Илмий фаолиятимда бундан бошқа яна уч йирик мавзуда — ўзбек халқининг келиб чиқиши ва этник тарихи, тарихий ва адабий манбаларни ўрганиш ва чоп этиш, Марказий Осиё халқлари тарихи ва маданиятини таҳтил этиш йўналишларида ҳам қалам тебратиб келаман.

«Амир Темур» тарихий романининг яратилиш жараёнига келсак, бу — узундан-узун қисса. Мен 38 йилдан бери Шарқ тилларида битилган тарихий манбалар — қўлёзма асарларни ўрганаман. Улар орасида Темур ва Темурийлар даври тарихига оидлари ҳам бир талай. Низомиддин Шомий ва Шарафиддин Али Яздийларнинг «Заварнома»си, Ибн Арабшоҳнинг «Ажойиб ул-мақдур фи ахбори Темур» («Темур ҳақидаги хабарларда тақдир ажо-

йиботлари»), Ҳофизи Абронинг «Зубдат ут-таворих» («Тарихлар қаймоги»), Абдураззоқ Самарқандийнинг «Матлаъ ус-саъдайн ва мажмаъ ул-баҳрайн» («Икки саодатли юл-дузниңг учрашув ўрни ва икки денгизниңг қуилиш жойи»), Мир Ҳовандшоҳнинг «Равзат ус-сафо» («Поклик боди»), Ҳондамирнинг «Ҳабиб ус-сияр фи ахбор ва афрод ул-башар» («Инсон хабарлари ва фардларида дўстнинг таржимаи ҳоли»), Давлатшоҳ Самарқандийнинг «Тазкират аш-шуаро» («Шоирлар зикри») шулар жумласидан. Ана шу муборак манбалар шарофати туфайли Темур ва Темурийлар даври билан танишиб, бу даврни ўрганишга бел боғладим. Афсуски, айни куч-куватга тўлган пайтларимиз таъқиблар замонига тўғри келиб қолди, бирон китоб ёзиш имконияти бўлмади. Шу ўринда бир муҳим гапни қайд этиб ўтмоқчиман.

1966 йили ёз кунларининг бирида Ўзбекистон Фанлар академияси «Фан» нашриётининг директори Юнус Юсупов чақиририб қолди. Борсам, у ёлғиз эмас экан. Ҳузурида профессор Х.Ш. Иноятов билан академия бош илмий котибининг ўринбосари Кабир Комиловлар бор экан. Юнус ака мендан Амир Темур ҳақида тўрт-беш босма табоқ ҳажмида ўзбек ва рус тилларида китоб ёзиб беришими илтимос қилди. Ҳудо ҳаққи, суюниб кетдим ва бел боғлаб ишга киришдим. Ҳайрият, Темурга ҳам навбат келибди, деб қувондим. Астойдил ишладим ва бир йил деганда унинг ўзбекчасини ёзиб тамомладим. Бироқ 1967 йилнинг куз пайтида бир куни кечқурун «Фан» нашриётининг бош муҳаррири ўринбосари Ҳабибулла Бектемиров бизнигида кириб келди. Бир фурсат у ёқ-бу ёқдан сўзлашиб ўтирганимиздан кейин Ҳабибулла: «Бўрибой ака, сиз «Амир Темур» китобини ёзишдан фориғ бўлдингиз. Бу юмушни катта домланинг ўзи бажарадиган бўлди», — деди. Ростини айтсан, бошила хафа бўлдим. Ҳабибулла кайфиятимни англаб, мени овунтириди: «Шундай бўлгани яхши, ака. Катта домланинг таги мустаҳкам, унга тегишмасалар керак. Сизнинг бўлса ҳеч кимингиз йўқ. Белингизни букиб қўйишлари мумкин». Афсуски, замон носоз экан. Иброҳим Мўминов Темур ҳақида икки босма табоқ ҳажмида бир рисола ёзиб, 1968 йили чоп эттириди. Лекин

марксизм-ленинизм ғоясининг бандалари ул улуғ зотнинг бошига кўп савдолар солишиди.

— Баъзан киши бир ишга каттиқ киришиб кетса, тушларида ҳам ана шу ташвиш билан яшайди, дейишади.

— Гапингиз тўғри. Амир Темур ҳақида ёзиш жараёнида менда ҳам шунаقا кайфият бўлди. Тўғрисини айтсам, асар устида ишлаган Йилларим ётганда ҳам, турганда ҳам, юрганда ҳам шу ташвиш билан яшадим. Темур — улуғ, мурракаб шахс. Давр ҳам анча чигал ва зиддиятли. Буларнинг ҳаммасини қоғозга тушириш, воқеаларга тўғри ёндошиш, уни ҳаққоний акс эттириш осон иш эмас, аслида. Мен кўпроқ шундан чўчишим. Булар қўлимдан келармикин, бундай ишни улдалай олармиканман, деган андиша бир зум хаёлимни тарқ этгани йўқ. Шу саволлар баъзан ўйлантириб қўярди...

— Романда кўзлаган мақсадингизга тўла эришдингизми?

— Йўқ, албатта. Биринчидан, Ватикан ва Европа давлатларининг ташқи сиёсати очитмай қолди. Ваҳоланки, Ватикан ва Европа давлатлари: Венеция, Испания, Франция ва Англия Амир Темур билан Боязид Йилдирим мусносабатларида, хусусан, уларнинг уришиб қолишлирида катта роль ўйнадилар. Улар бу билан икки ютуқни қўлга киритдилар: биринчидан, Европанинг катта қисми қудратли турк армияси томонидан босиб олинишининг олдини олдилар; иккинчидан, Амир Темур билан Боязидни уриштириб қўйиб, икки қудратли турк давлатини кучсизлантиришга эришдилар. Бу икки омил эса Европа давлатларининг Шарқ мамлакатларига кириб олишига йўл очди. Масалани пухта ўрганиш керак эди. Хусусан, Темур билан Венеция, Испания, Франция, Англия подшоҳлари ўртасида олиб борилган ёзишмаларни кўриб чиқиш, ўша вақтларда Европада бу ҳақда битилған асарларнинг асосийлари, ҳеч бўлмаганда Ж. Деловиланинг «Европа давлатларининг Туркияга қарши салб юришлари», Сильвестре де Сасининг «Мироншоҳнинг Франция ва христиан мамлакатлари подшоҳлари билан ёзишмалари» ҳақидаги асари, Марина Санудонинг «Венеция дожларининг ҳаёти», архиепископ Иоаннинг Темурнинг ҳаётига бағишлиланган

муҳим китоблари билан батофсил танишиб чиқиш зарур эди. Иккинчидан, асарда баён этилган ҳамма юқеалар ҳам тўла очиб берилган деб айтолмайман. Кўпгина ҳодисалар, тарихий жараёнлар шунчаки қайд этиб ўтилган, холос.

— Китобхонлар бу муборак мавзуда яна қандай асарларингизни ўқишлари мумкин?

— Темур ва Темурийлар даври тарихи ва маданияти кўп минг йиллик ўтмишимиз шодасида қўёшдек порлаб турган дурдир. Бу дурнинг ҳали бирон қирраси тўла очилганича йўқ. Биз мазкур давр тарихини ўрганишга энди қўл уряпмиз. Тўғри, кейинги йилларда Темур ва Темурийлар ҳақида бир-иккита йирик асар яратилди. Мен бу ўринда изланувчан атоқли ёзувчимиз Пиримқул Қодировнинг Бобур ва шоҳ Акбар ҳақидаги «Юлдузли тунлар», «Ҳумоюн ва Акбар» романини назарда тутаяпман. Ишончим комилки, бу ҳақда катта-катта китоблар, тадқиқотлар энди яратилади. Ўсиб келаётган истеъдоли ёшларимиздан умидим катта.

Ўзимга келсам, «Амир Темур» романининг тўлдирилган нашрини амалга оширсан, дейман. Муштарийларга, айниқса, ёшларга айтадиган битта гапим бор. Ўтмишда буюк мавқедаги давлатларимиз бўлган. Темур тузган буюк салтанат ҳам шулар жумласидандир. Ана шундай қиёфадаги улуғ давлатни, иншоолло, сизлар қурасизлар. Бизлар эса унга ғишт қўйиб кетяпмиз. Бу улуғ мақсадга, аввало, бирлик ва ҳамжихатлик билан эришиш мумкин. Уммондек теран ақл эгаси буюк бобокалонимиз Амир Темур шундай таъкидлаган эди: «Агар сизлар тарқоқ ҳолда бўлсаларингиз, душманларингиз худди ҳовузга шўнғигандек қон дарёларингизда сузадилар». Иттифоқликда гап кўп. «Агар фикрларингиз иттифоққа келиб, орзу-ҳавасингиз бир бўлса, — деб айтган эди бобомиз, — фарзандларингиз улғайиб, душманларингиз мағлуб бўладилар». Сўнгра эса мамлакат фаровонлиги ҳар бир кишининг ўз ўрнида ҳалол ва сидқидилдан тиришиб меҳнат қилишига боғлиқ. «Бирон ишни қилишга қасд қилган бўлсанг, бутун зеҳнинг, вужудинг билан тиришиб, битирмагунча ундан қўл тортма», деб уқтирган ҳазрат Амир Темур. Шунингдек, мутелик, лоқайдлик, ҳасад ва маҳаллийчилик балосидан

кутулишимиз керак. Маҳаллийчилик кайфияти кучайган пайтларда ўзгаларнинг асоратига тушиб қолганимиз. Лоқайдлик эса охир-оқибат кишини иродасиз қилиб қўяди ва қулга айлантиради. Бунинг ўрнига мустақил фикрлашга ўрганишимиз, ўзлигимизни англашимиз зарур. Энг ёмони — ҳасад ёки, бошқача қилиб айтганда, ўзганинг ютуқ-муваффақиятларини кўролмаслик. Бу ёмон иллатдан қанча тез қутулсак, шунча яхши.

Яна бир гап: республикада сизларнинг ўқишларингиз, билим асосларини ўрганишингиз учун барча шароитлар яратиб берилмоқда. Шунга яраша яхши ўқинг, кенг билимили бўлинг, илм-техника асосларини пухта згалланг. Ҳаммамизнинг улуф бобокалонимиз Амир Темур айтганлари-дек: «Билаги зўр — бирни йиқар, билими зўр — мингни».

* * *

Одатда, йирик тарихий сиймолар ҳақида бир эмас, бир неча ўнлаб асарлар яратилди, зоро уларнинг кўп қиррали фаолияти ана шундай эътиборга асос бўлади. Бироқ уларнинг қаторида саноқли намуналаргина муштариylар ёдида сақланади. Худди шунингдек, Соҳибқирон Амир Темур ҳақида ҳам тўла шаҳодат берадиган асарларнинг бири китобхонлар мулкига айланган бўлса, ажаб эмас.

1995 йил, декабрь

ЎЗИНИ ИЗЛАЁТГАН ОҚСАРОЙ

Ҳар сафар Шаҳрисабзга борсам, қайси нуқтадан бўлмасин нигоҳларим билан Оқсаройни излайман. У баъзан дарахтлар, иморатлар панасида кўзга ташланмайди. Шундоқ қаршимда пайдо бўлиб қолганда эса беихтиёр бошим қуий эгилади. Менга унинг ҳозирги ҳолати қароқчилар қўлига тушиб, бор бисотидан айрилган кишини эслатади.

Тарих китобларида эса Оқсаройни тўлиб-тошиб таърифлашган. Соҳибқирон зафарли юришлари билан Чигатой улусини олдинги чегараларида бирлаштиргач, туғил-

ган шаҳрида олий иморат қуришга фармон берди: «Бизнинг мазкур иморатимизда мингта хона бўлсин, уларнинг безатилиши бир-бирига ўхшамасин. Баландлиги эса осмон гумбази билан рақобатлашисин...» Шундан кейин Самарқанду Бухоро, Балху Урганчдан, Бағдоду Шероздан энг яхши меъморлар тўпланди, жой танланиб, қурилиш бошланган. Унга 50 минг киши сафарбар этилди, Бадаҳшондан лаъл, Қобулистондан нефрит, Китобдан мармар келтирилди, саройни тиклаш учун 20 йилдан кўпроқ вақт талаб қилинди. У битгач, кўрганлар ҳали Шарқда бундай гўзал иморат бунёд этилмаганини эътироф этишди. Ҳа, буюк жаҳонгир волидаи муҳтарамалари Тигинабегим Моҳ шарафига тиклаган бино ўз таровати билан ягона эди.

Оқсаройни ўз кўзи билан кўрган испан сайёҳи Руи Гонзалес уни ҳайрат билан таърифлайди. Ифодаларидан ўзи ҳам қониқмай: «Бу сарой шунчалик бетимсолки, уни батафсил акс эттириш учун айланиб қуришга бир ой ҳам етмайди. Оқсарой подшоҳ Темур ҳозиргacha қурдирган биноларнинг энг яхисидир», деб эътироф этади. Ундаги хоналар ва айвонлар бир-бирига ўхшамаганидек, ташки кўриниши ҳам ўзига хос бўлган. Қуръон оятлари жимжимадор нақш этилиб, такрорланмас санъат яратилган, бундан ташқари, «Султон Аллоҳнинг ердаги соясидир» деган гапнинг ҳар бир ҳарфи отдаги чавандознинг бўйича катталиқда олтин суви билан ёзилган. Бу олий иморатнинг пештоқига эса машҳур «Кимки бизнинг қурдатимизга шубҳаланса, иморатларимизга қарасин», деган ишончнома дарж этилган.

Кейинчалик олиб борилган археологик қазишмалар туфайли тагзаминнинг ўрганилиши саройнинг тўрт мажмудан иборат бўлганини кўрсатмоқда: кириш қисми, девон, хосхоналар ва тантаналар зали.

Тепасида ҳовуз бўлган, унга Тахтиқорача довонидан қувурлар билан сув келтирилган, ҳовлида эса фаввора отилиб турган. Унинг ҳовузи ҳозир ҳам сақланиб қолган. Шу парчани кўриб ҳам Оқсаройнинг гўзаллигини тасаввур қилиш мумкин. Шитоб билан тепага отилиб турган фаввора камалак ҳосил қилишдан ташқари қуёш нурида деворлар акси билан қўшилишиб, бетимсол чирой кашф

қилган. Ҳовуз ва фавворанинг сатҳи доим бир ҳил турган.

Ана шу кошона бошидан қанчалар сиру синоатларни ўтказиб, бизгача унинг кичкина бир қисми етиб келди. Уни тўтдан ўққа тутганлари, бузиб, ғиштини олиш учун умумхалқ ҳашарлари уюштирганлари одамларнинг ёдиди. Ҳатто деворларини безаб турган гулдор ғишлар бошқа ёдгорликларни таъмирлаш учун атайлаб қўпориб олинган. Фақат дунёдаги маърифатпарвар кучларнинг саъй-ҳаракатлари билан Амир Темурнинг юрти сифатида Шахрисабз жаҳон сайёҳлик тизимига киритилгач, муносабат бироз ўзгарди.

Шубҳасиз, Оқсаройнинг ҳозирги юпун ҳолати ҳеч кимни бепарво қолдирмайди. Ҳар бир ватанпарвар киши унинг тикланишини, дастлабки ҳолига келтирилишини хоҳлайди. Бу — катта вазифа, келажакда уддаланиши мумкин бўлган юмуш. Ҳозир эса гап бошқа ёқда.

Боболаримиз бу олий иморатни барпо этишди, неча йиллар у дилларни лол қилиб, дунёнинг мўъжизаларидан бири сифатида ўз бунёлкорлари ақлий тафаккурини кўз-кўз қилиб турди. Кейин душманлар уни форат қилишди, одамзод бир гўзалликдан маҳрум бўлди. Биз эса худди ярадор кўшиқни тинглагандек, унинг қолдиқлари олдида мулзам бўлиб, бошимизни эгамиз. Бир-бирининг дийдоридан маҳрум бўлган икки минора нажот кўзларини тикаётгандек, тобора йўқлик қаърига чўкаётгандек туюлади кишига.

Аслида ҳам менинг бу мулоҳазаларим соғинчли кўнгил ифодаси эмас, балки бор гап. Одамзод қўли билан вайрон этилган кошона қолдиқларини табиат ҳам аямай кемирмоқда. Бу ҳақда Халқаро мұхандислик академиясининг мухбир аъзоси, техника фанлари доктори, профессор Қобул Абдурашидов шундай дейди:

— Минг афсуски, биз энди эс-хушимизни таниб, отабоболаримиздан қолган бебаҳо меросни қадрлай бошлага-нимизда, қодир табиатнинг ўзи шафқатсиз ҳукмини аллақачон ўқиб қўйган экан. Табиат устидан қилинаётган ҳар бир тантана инсоният учун қанчалик қимматга тушаётганини ўтмиш меъморий обидаларимиз мисолида ҳам

кўриш мумкин. Бугунги кунда архитектура санъатининг ноёб дурданалари ҳисобланган тарихий ёдгорликлар емирилиш, ёрилиш, қулаш арафасида турибди. Оқсарой аркida геолог ва гидролог мутахассислар томонидан қазиштекшириш ишлари олиб борилганда, бу фикримизни далилловчи яна бир аччиқ ҳақиқатга дуч келдик. Маҳобатли Оқсарой қолдиқлари пойдеворига ер ости суви ниҳоятда яқинлашиб қолибди. Бундан 15 йил бурунги текшириш ишларида эса ер ости сувининг қўтарилиш хавфи ҳақида ҳеч қандай фикрлар юритилмаганди. — Олим келтирган бошқа далиллар ҳам анча ташвишли: — Устига-устак сарой аркининг жанубий пештоқи кун сайин оғиб, нураб боряпти. Бизнинг кузатишларимиз тасдиқладиди, пештоқнинг ёриғи 67 сантиметргача кенгайиб, 74 метр ба-ландликдаги обида чўкиб, ўприлиб, ҳозир 38 метрга тушиб қолган.

— Демак, вазият тезда чоралар кўришни тақозо этади. Шу ўринда бу йилги юбилей муносабати билан олиб борилаётган таъмирлаш ишлари айни муддао бўляптими?

— Бундай ёндашув бир воқеани эсга солади, — дейди Қобул Абдурашилов сўзини давом эттириб, — 70-йилларда Самарқанддаги Тиллакори мадрасасини таъмирлашга киришилди. Унинг гумбазини тиклаш учун катта маблағ, куч сарфланди, лекин кутилган натижага эришмади. Аксинча, мадрасанинг чўкиши тезлашди. Негаки, обиданинг тарҳи, техник ҳолати, тебраниши ва юк қўтарилиши қуявати аниқланмасдан туриб, унинг тепасига қарийб 600 тоннагача темир-бетон ҳамда қурилиш ашёлари чиқарилганди. Бунинг қанчалик қимматга тушганини кўпчилик унумтаган бўлса керак.

Тошкент қурилиш-архитектура институти кафедра мудири, «Курилишларнинг сейсмик бардошлилиги сифати ва уни оширишни ўрганиш» лабораториясининг мудири Қобул Абдурашидовнинг мулоҳазалари илмий изоҳланганилиги билан кишини ишонтиради. Олимнинг ташвиши ҳам бежиз эмас. Маълум бўлишича, республикамиизда иншоотлар конструкцияси ва тарҳини ўрганиш, уларнинг «умрини узайтириш» муаммолари билан шуғулланувчи ўнлаб фан докторлари мавжуд экан. Бироқ уларнинг бошини

қўшиб, илмий изланишларини мувофиқлаштириб турувчи бирон марказ тузилмаган. Ҳолбуки, ҳудудида нодир тарихий обидалар сон-саноқсиз бўлган юртимиизда мутахассис олимларнинг фикри жуда зарур.

Албатта, барча масалаларга янгича ёндашувлар қарор топаётган, тарихимизни ўрганишга жиддий киришилган шароитда баъзи ҳолатлар тўғриланади, мақбул ечимларга келинади. Аммо вақт кутиб турмайди. Зудлик билан кўрилиши керак бўлган чораларни кечиктириш қимматга тушиши мумкин. Шу ўринда сухбатдошимнинг Оқсанойни сақлаб қолиш билан боғлиқ, умуман, тиклаш-таъмирлаш ишларида нималарга эътибор бериш кераклиги ҳақидаги фикрлари билан қизиқдим.

— Аввало, палапартиш иш олиб бораётган таъмирлаш-тиклаш гуруҳлари фаолиятини бир нуқтага бирлаштириш тарафдориман, — дейди Қобул Абдурашидов. — Тўғри, бундай гуруҳлар озми-кўпми иш қиляпти. Уларнинг фидокорликларини ҳар жиҳатдан қадрласа арзийди, лекин масаланинг энг асосий томонига аҳамият беришмаяпти. Ҳар қандай тарихий ёдгорликни қайта таъмирлашдан олдин, албатта, унинг муҳандислик тарҳи, техник ҳолати, ёрилиш-офиш тезлиги, юк кўтариш ва тебраниш кучи чукур ўрганилиши зарур. Ана шундан сўнг қурилиш имкониятларидан келиб чиқиб, конструкцияни яратиш мумкин. Агар шундай қилинса, аминманки, саъй-ҳаракатлар зос кетмайди. Бунинг учун, назаримда, унча кўп маблағ ҳам, ишчи кучи ҳам сарф қилинмайди. Ҳаммаси оддий илмий асосланган, пухта ўйланган режа бўйича силлиқина бажарилади.

Мамлакатимизда ёдгорликларнинг муҳандислик таҳлили, техник ҳолатини аниқлаш ва асбоблар билан кузатиш оқибатида уларни сақлаб қолиш билан бирга олдиндан ички мустаҳкамлиги, иншоотнинг қаерида қандай «касал» борлигини башорат қилиш мумкин. Манбаларни чукур таҳлил қилиш, архив ҳужжатларини ўрганиш ҳамда архитектура ёдгорликларида олиб борилаётган кузатишлардан олинган холоса шундай: ёдгорликларнинг архитектура, археология, тарих, санъатшунослик соҳалари чукур ўрганилган бўлиб, конструктив ва муҳандислик масалалари ўрганилмаган. Ахир асосий юк кўтарувчи иншоот-

нинг мустаҳкамлиги, асрлар оша яшashi конструкциясига боғлиқ-ку!

Қобул Абдурашидов тиклаш-таъмирлаш ишларида ҳар бир ҳаракат чуқур ўйланган, илмий асосланган бўлиши тарафдори. У ҳалқаро анжуманларда фаол иштирок этиб, конструкция соҳасида йирик мутахассис саналган италиялик профессор Л. Кроче, профессор Мустафо Эрдин (Туркия), Алфео Тонеллотто (Франция) сингари ҳамкасларининг фикрлари билан танишиб, ёдгорликларни сақлаб қолиш чораларини изламоқда. Шунингдек, у Оқсаройни ҳозирги ҳолатида таъмирлаш юзасидан ўз дастури мавжудлигини маълум қилди. Бу дастур босқичма-босқич амалга ошириладиган мукаммал режа бўлиб, арк пештоқининг оғишини тўхтатибгина қолмай, унинг мустаҳкамлигини тиклаш чора-тадбирларини ҳам ўз ичига олади. «Оқсарой аркининг ёрилиб, оғиб бораётган 1300 тонналик қисмини тик турган 11000 тонналик асосий бўлагига кўшиб, маҳсус қотишималар орқали беркитиб, пайвандлаб кўйиш, менинг назаримда, кўп куч ва меҳнат талаб қилмайди», дейди Қобул Абдурашидов ишонч билан.

Албатта, бу фикрларга мутахассислар ўз муносабатини билдиради. Нима бўлганда ҳам аждодларимиздан қолган табарук ёдгорлик боқий турса, деймиз. XX аср бошларида Ўзбекистон ҳудудида 40 мингдан ортиқ тарихий-меъморий обидалар бор экан, энди улар 10 мингтага тушиб қолибди. Шулардан атиги 434 таси ЮНЕСКО ҳисобида экан. Оқсарой — буюк бобокалонимиз шавкатининг меъморий ифодаси, шу азиз зот хотираси сингари абадий яшаб қолмоғи лозим.

1996 йил, февраль

МАХСУС ҚОМУСГА ЭҲТИЁЖ БОР

Темур ва Темурийлар даврини ўрганиш юзасидан қилинаётган ишлар кундан-кунга янгича суръат касб этяпти. Албатта, ўтган вақтни қайтариб бўлмаганидек, ўтмишда рўй берган воқеа-ҳодисаларни бор бўй-басти билан тиклашнинг ҳам имкони йўқ. Бунинг бизга боғлиқ ва боғ-

лиқ бўлмаган томонлари кўп. Масалан, Амир Темур ҳақида-ги китобларда воқеаларнинг хилма-хил талқинларига дуч келамизки, бу ҳол Соҳибқироннинг таржимаи ҳоли, унинг авлод-аждодлари, тарихий шахслар, жуғрофий номлар талқинида жуда кўп учрайди. Ҳатто Амир Темур ҳаётидаги муҳим воқеалар изоҳида ҳам турли-туманлик мавжуд. Бу ҳолни табиий деб қараш мумкин. Аммо ҳақиқат мезони фақат битта, тарихий ҳодиса эса ана шу мезонга мос келиши шарт.

Масаланинг худди ана шу томонларини ҳисобга олган ҳолда буюк саркарда, илм-фан ва санъат ҳомийси Амир Темур ҳаётини тўла қамраб олган маълумотларга суюниб битилиши керак бўлган мукаммал қомусий китобга эҳтиёж туғилаётганини таъкидлаш жоиз.

Турли манбаларни кўздан кечиришдан шундай фикрга келиш мумкинки, ҳали Амир Темурнинг тўла таржимаи ҳоли ёзилмаган. Тўгри, бобокалон ҳақида жуда кўп маълумотлар бизгача етиб келган, бироқ улар ҳар хил қўллэзма, босма китобларда сочилиб ётибди. Шунингдек, уларнинг ҳаммасини ҳақиқатга мос ва ишончли деб ҳам бўлмайди. Бу ўринда муаллифнинг шахсий муносабатига кўп нарса боғлиқ экани шак-шубҳасиз. Ўз-ўзидан кўриниб турибдики, ҳар қандай мафкурадан ҳоли туриб, қарийб 70 йиллик ҳаёт мазмунини бир ипга тизиш шарт. Бунда, эҳтимол, битта рақамнинг тўғрилигини тасдиқлаш учун ўнлаб китобларни титиш керакдир.

Соҳибқироннинг авлод-аждоли ва оиласи шажараси юзасидан ҳам баҳсли фикрлар билдирилмоқда. Жумладан, бир муаллиф Темур завжаси сифатида Яккабоғ бегининг қизи Норчучик оғони эсласа, бошқаси бу исмни ҳатто тилга олмайди. Ёки Соҳибқироннинг Музаффарийлар авлодига мансуб бўлган Шоҳ Мансурга муносабати, Тўхтамишхоннинг қисмати ёхуд олим Ибн Халдун билан мусоҳабалари ва бошқа ўринлар турли кўринишларда акс эттирилган. Буларга шунчаки бадиий тўқима деб қараш тўгри эмас, тарихий мавзудаги бадиийлик, ҳаёт ҳақиқатини ўзгартириб акс эттириш ижод одобига зид ҳолат экани хусусида, умуман, тарихий асарда тўқиманинг меъёри тўғрисида олимлар жуда кўп ёзишган. Уларда юқоридаги ўхшаш ҳолатлар инкор этилган.

Қомуснинг ушбу бўлимида Темур ва Темурийлар ша- жараси шу кунгача изчил акс этса, нур устига аъло нур бўларди.

Маълумки, буюк бобокалонимизнинг шавкатли ҳаёти жуда қўплаб тарихий шахслар даврасида кечди. Булар «Тузук»ларда таърифланган 12 тоифа вакиллари — амирлар, баҳодирлар, олимлар, элчилар, сарой аъёнлари, оддий халқ вакиллари эди. Олайлик, амир Ҳожи Сайфиддин ёки шайх Нуриддин, Жоку барлос ёки Бердигек ҳаётининг аччиқ-чучукларини жаҳонгир билан дастлабки дақиқаларданоқ бирга totishi. Улар турли даражада Темурнинг эъзозига сазовор бўлдилар, меҳрини қозондилар, масла- ҳатлар бердилар — улуғ салтанатнинг узоқ йиллар пойдор бўлишига ҳисса кўшилар. Уларнинг ҳар бирининг қаҳра- монлиги алоҳида асарларга мавзу бўлиши мумкин, лекин улуғ тўй муносабати билан исмлари ва қисқача маълу- мотни бугунги авлод билиб қўйса, бу ўтмиш ҳақидаги тасаввурларимизнинг янада бойишига хизмат қиласарди.

Ўша давр ўлчовлари билан баҳолаганда, жаҳонгир Амир Темур қўплаб давлатни бир туғ остига бирлаштириди. Бу улкан салтанат Осиё, Европа, Африка қитъасининг по- ёнсиз ҳудудларида ястаниб ётарди. Гарчи дарёлар, тоғлар ўз жойида сабит турган бўлса-да, давр ўтиши билан жой номлари, чегаралар бир неча марта ўзгарди. Олти асрлик муддат давомида мамлакатлар, шаҳарлар, қалъя-ю қўргон- лар янги-янги тарих билан бойиди. Бу ўзгаришларни бо- бокалоннинг зафарли юришлари билан боғлаб изоҳлани, шарҳ битиш, ўша вақт ва ҳозирги кунлардаги хариталар- ни илова қилиш мавҳум тасаввурни ойдинлаштиради, шу билан бирга бугунги тарихий жараёнларни тушунишга хизмат қиласди. Колаверса, бу тайёр илмнинг ўзи.

Шубҳасиз, Амир Темур ва унинг авлодлари фаолияти шулар билангина чегараланмайди, бу уммоннинг уфқи ни- ҳоятда кенг. Ҳеч бўлмагандан яна асосий тарихий воқеалар (масалан, «Лой жанги», «Мордин қалъасининг олиниши»), ҳарбий юришлар (уч йиллик, беш йиллик, етти йиллик), ўша даврда барпо қилинган боғлар, иншоотлар, олий би- нолар ҳақидаги маълумотлар ҳам ҳаммани қизиқтиради. Ибн Арабшоҳ китобида Темур саройидаги мусиқашунослар,

фиқҳ олимлари, мунажжимлар ҳақида жуда аниқ ва қизиқарли фикрлар билдирилади. Булар ҳам бир ипга тизилиши лозим. Ёки Темур ва Темурийлар ҳақидаги асарлар библиографияси, бу соҳа билан шуғулланган олимлар ҳаётининг ўзи катта бир мавзу. Хуллас, қомусда Амир Темур фаолиятининг барча йўналишлари қамраб олиниши керак.

Албатта, мулоҳаза тариқасидаги бу фикрларни рўёбга чиқариш бирданига бўлмайди. Аслида эса бу юмушни удалаш учун маънавий асосга тамал тоши аллақачон қўйилган. Шуннингдек, етарли илмий, техник, полиграфик ва асқотадиган бошқа салоҳиятлар мавжуд. Қомусни бир жамоага уюшган, забардаст олимлардан тузилган маҳсус таҳририят нашрга тайёрлаши мумкин. Мабодо, бунга эришилса, ҳалқимиз маънавий хазинаси яна бир нодир бойлик билан тўлган бўларди.

* * *

Академик Бўрибояй АҲМЕДОВ фикри:

— Қомус нашр этишнинг ўзига хос нозик ва масъулиятли жиҳатлари қўп. Таңланган соҳа ёки мавзу юзасидан маълумотлар ҳаммага тушунарли тилда, лўнда ва мукаммал баён қилинган бундай китоблар кўпчиликнинг, асосан, олимлар жамоасининг меҳнат маҳсулидир. Қомуслар шартли равишда «Катта», «Кичик» турларга бўлинган, алоҳида йўналишда (масалан, уй-рўзғор ёки бола тарбияси бўйича), шуннингдек, маълум фан соҳалари (табобат, адабиётшунослик), шаҳарлар тарихи юзасидан чоп этилган, қомусчилик фаолиятининг маълум йўналишини ҳам ташкил этган илм аҳлининг шундай вакиллари борки, улар бутун умрини шу соҳага багишилаган. Шу нуқтати назардан олиб қараганда Бракгауз — Эфрол тузган мукаммал луғат фидойиликнинг гувоҳи дейиш мумкин.

Ўзбекистонда ҳам қомус нашр этиш борасида етарлича тажриба тўплланган. 14 жилдан иборат «Ўзбек совет энциклопедияси» ва алоҳида фан соҳалари юзасидан чиқарилган луғатлар ана шу тажриба маҳсулидир. Тўғри, Со-

ҳибқирон Амир Темур ҳазратларининг ҳаёти ва фаолиятини оммавий ўрганиш ва бу маълумотларни халқа етказиш ҳар томонлама ишончли ва мукаммал манба бўлишини тақозо этади. Аслида ҳам Темур ва Темурийлар даври ҳақида салмоқли қомусий асарлар яратиш ҳам фарз, ҳам қарз. Мабодо, мазкур мавзуда маҳсус қомус тартиб берилса, бу маданий ҳаётимиизда улкан воқеа бўларди. Негаки, дунёда бу зоти шарифдек кенг кўламли тарихий шахс ўтмаганидек, ҳозирча алоҳида сиймо фаолияти юзасидан қомус тузиш ҳам кам учрайди. Агар бу юмуш улдаланса ва унинг бошқа тилларга таржимаси ҳам таъминлансанса, халқимизнинг ҳозирги даврдаги салоҳиятининг яна бир намунаси, бой тарихий меросга дахлдорлигининг амалий исботи сифатида эътироф этилиши шубҳасиз.

Бу салмоқли ишга фаннинг барча соҳа мутахассисларини жалб этиш лозим. Олайлик, қарийб беш аср ер юзида барқарор яшаб турган салтанатда таълим қай тартибда йўлга қўйилгани ёки солиқ тизими каби давлатни бошқаришнинг энг кичик унсурлари ҳақида маълумот беришга тўғри келади. Ёхуд нашрнинг ҳаммага бир хил тушунарли бўлиши, фактларнинг ниҳоятда тўғрилиги ва бошқа талаблар ҳам анчагина масъулият юклайди. Албатта, бундай кенг кўламли юмушни тезда охирига етказиш қийин, бироқ бу хайрли иш «Амир Темур йили»да бошлансанса, яқин икки-уч йилда поёнига этиши мумкин.

Олимларимизнинг илмий салоҳияти, тўпланган тажриба, техник жиҳатлар бўйича етарли базамиз мавжудлиги «Амир Темур қомуси»ни тузиб, нашр этиш имконини беради.

1996 йил, май

ЧАҚИНЛИ ЛАҲЗАЛАР

Соҳибқирон Амир Темурнинг инсоният тарихидаги ўрни аллақачон эътироф этилган. Гарчи муҳокаманинг салбий ва ижобий қутблари ўртасидаги мунозараалар давом этаётган бўлса-да (аслида, бу қонуний ҳол), ул зоти шарифнинг одамзод силсиласида такрорланмас ҳодиса экани бор гап.

Айнан мустақил Ўзбекистон давлатининг бўй кўрса-тиши билан фикрлар оламида бу борада мафкуравий инқилоб рўй бергач, ҳазратнинг таржимаи ҳолини ўрганиш учун, биринчидан, имконият юзага келди, иккинчидан, бу юмушга зарурат пайдо бўлди (ахир афкор омма фиръавн Тахмосп ёки хукмдор Калигулани заррасигача билиши керак-у, нега 526 йил тарих саҳифаларида зикр этилган сулола асосчиси билан ҳеч ким қизиқмайди?). Ҳар ҳолда, ана шу оламшумул саволта амалий жавоб бериш учун саъй-ҳаракатлар жадал бошланиб кетди.

Соҳибқироннинг мукаммал таржимаи ҳолини ўрганиш ва ўрганишларни ўзида жамлаган асар(лар)нинг юзага келиши мозий губорлари остида чанг босиб унугилган кўплаб ҳақиқатларнинг юзага чиқишини таъминлаган бўларди. Ҳолбуки, руҳий ва моддий оламлар аро боғланиш бўлганидек, дунёда кечган ва кечаётган жами ўзгаришларда ички мантиқий боғланиш мавжуд (бўлмаса, Нострадамус ёки Ванга қандай «башорат» қиласи?) Аниқ-далил билан гапирадиган бўлсак, 1360 йилда Туниснинг Фас шаҳридаги Каравиййин масжидида мунажжим Абу Али Бадис шимоли-шарқ тарафдаги мамлакатлардан бирида Соҳибқирон туғилганини ва у ҳақда 1380 йиллардан сўнг ер ўзида хабарлар тарқалишини айтган эди!

Ҳа, Амир Темур ҳаётини тўла ўрганиш кўп синоатларга ойдинлик киритади.

Бу даъвонинг тош босадиган томони эса Шахснинг беназирлигидир. Замондошлар, жами алломаларнинг эътироф этишича ҳам, бугунги интеллектуал салоҳият даражасида тафтиш этишлар ҳам шуни тасдиқлайдики, ҳазратнинг ҳар бир сўзи, ҳар бир ишораси теран мантиққа аосланган, истиқболга йўл очган.

Бир мисол.

Анқара жангидан сўнг мағлуб Боязидни Амир Темур ҳузурига олиб кирадилар. Ҳазрат бўлиб ўтган нохуш воқеага ўз муносабатини изҳор этгач, Боязидга шундай дейди:

— Агар мен сенинг қўлингга тушганимда нима қилишинг аниқ эди, лекин мен сенга ва сенга яқин кишиларга ёмонлик қилмайман...

Бу гаплар шунчалик илтифотми ёки унинг замирида бошқа маъно борми? Қолаверса, бу танбехнамо лутфларда сўзловчининг кайфияти акс этганми?

Муқояса учун келтирамиз.

Куръони каримнинг «Тавба» сурасида кўпроқ уруш, жанг, қатл тўғрисида сўз боради. Табук жанги тўғрисида оятлар ўз ифодасини топган. Суранинг 8-оятида шундай дейилади: «(Мушриклар) агар сизларни енгсалар, сизлар учун на аҳдга ва на шартга риоя қиласилар. Оғизларида сизларни рози қиласилар-у, диллари инкор этиб (жиркануб) туради».

Агар бу муборак каломни Амир Темур сўзлари билан таққосласак, Соҳибқирон оятлардан ўзига олган панд-насиҳат асосида гапирмаяптими, яъни «Мен рақибларимга жабр қилмайман — мушрик эмасман», демаяптими? Ал-батта, бу менинг талқиним, саҳв бўлса, узр, бироқ бир гап аниқки, бобомиз, аввало, Куръони каримни дастур-уламал сифатида қабул қилганлар ва Куръони карим лафзида сўзлаганлар (бунинг учун муқаддас китобни бошдан охир ёд билган ҳамда тафаккурда бошдан охир ўзлаштириш талаб этилиши сир эмас).

Мен бу далилни буюк аждодимиз сиймосини яна бир бор тасаввур этиш учун келтирдим. Аслида, ҳазратнинг таржимаи ҳоллари ҳақида фикр юритаётган эдик.

Шу хусусда баъзи мулоҳазалар.

Маълумки, 1361 йиlda Амир Темур Мовароуннаҳрни истило қилиб турган Илёсхўжа ҳокимиятида сипоҳсолор (қўшин бошлиғи) этиб тайинланади. 25 ёшли йигит учун бу яхшигина мавқе эди ва у мўгулларнинг хизматини қилиб, айшини суриб яшайвериши мумкин эди. Бироқ босқинчиларнинг маҳаллий аҳолига нисбатан зугуми тўхтамайди, аксинча, авж олади. Бу ҳолдан азият чеккан Самарқанднинг ашрафу арконлари, уламолари Соҳибқиронга фатво ёзиб бериб, мўгулларга қарши жиҳодга чорлайдилар. Темурбекда айни пайтда ёв билан юзма-юз жанг қиласиган қўшин йўқ эди ва куч тўплаш мақсадида мўгуллар ихтиёридан чиқиб, Аму ортига, Бадахшон тарафларга кетишни мўлжаллайди. «Тузуклар»да ёзилади: «Отланиб, Амир Кулолнинг ҳузурига бордим».

Табиий савол туғилади: «Хўш, Амир Кулол ким? Нега икки ут орасида қоврилиб юрган йигит ул зотнинг ҳузурига борди?»

Таассуфки, бу далил ҳақида «Зафарнома»ларда маълумот учрамайди. «Тузуклар»да берилган изоҳга кўра, Сайид Амир Кулол нақшбандия — хожагон тариқатининг йирик намояндаларидан бўлиб, Бухоро вилоятининг Суҳори қишлоғида туғилган. Кўплаб оммавий истилоҳларда эса бу зотни Шамсиддин Мир Кулол билан чалкаштириш ҳоллари ҳам учрайди.

Агар катта йўл бошида турган, юрт тақдиди учун фатво олган Темурбекнинг нажот истаб, юкиниб бир киши ҳузурига келишини мулоҳаза қилиб кўрсак, бу зотнинг даргоҳи нажотбахиш бўлганини, унинг ўзи ҳам мавқе жиҳатдан теварак-атрофга донг таратған киши эканлигини тасаввур қилиш қийин эмас. Маълумотлар тасдиқлайдики, бу гап тўғри, пайғамбаримиз авлодидан бўлган бу зот ўз даврининг пешқадам машойихи бўлган. Бу ҳақда «Хожагон — нақшбандия машойихлари» рисоласи («Янги аср авлоди», 2003 й.)да эътиборли маълумотлар келтирилган.

Сайид Амир Кулол таҳминан 1281 йилда Суҳори ёки Афшона қишлоғида туғилиб, 1370 йилда Суҳорида вафот этган, қабри ҳозирги Янги ҳаёт қишлоғида. Умри давомида кулолчилик билан шуғулланган. Кураш тушган. Бобо Саммосийга мурид бўлиб, саййидлиги билан бир қаторда шариат, тариқат, маърифат ва ҳақиқат даражаларига юксалган.

Албатта, Темурбекнинг айнан нечун бу даргоҳга келиши сабаблари ҳақида тўхталағидан бўлсак, бир далилни четлаб ўтиш мумкин эмас. Соҳибқироннинг она томонидан бобоси Убайдуллоҳ Маҳбубий Бухорода яшаган, шариат қозиси бўлиб турган. Демак, бобонинг нақшбандия — хожагон шайхлари билан ўзаро яқинлиги бўлгани шубҳасиз. Балки қозининг ўзи илк дафъа ёш набирасининг қўлидан тутиб шайхларнинг ҳузурига олиб боргандирилди.

Хожа Сайид Амир Кулол ўзларидан кейин тариқат ижозатини топширган халифалар сафида кешлик Шамсиддин Кулол ва Баҳоуддин Нақшбанд ҳазратлари ҳам бор

эдики, бу зотлар қайсилир жиҳатлари билан Соҳибқирон таржима ҳолига дахлдордирлар.

Бу жиҳатдан Шамсиддин Кулолнинг ўрни аниқ оиласининг пири, ёш гўдакка «Темур» деб исм қўйган, ёрқин истиқболини башорат қилган мўътабар зот. Рости, Мовароуннаҳр тарихидаги икки буюк зот — Баҳоуддин Нақшбанд ва Амир Темур муносабатлари ҳақида деярли ҳеч нарса маълум эмас. Инсоф билан айтганда эса бир замонда яшаган бу икки йирик шахснинг бир-бирини билмаслиги мумкин эмас. Агар ташқи далилларни муқояса қилалиган бўлсак, Темур тугилганда Баҳоуддин жаноблари 18 ёшда бўлган. Вафот этган (1389)да эса Соҳибқирон ўз давлатини мустаҳкамлаш учун олов кечиб юрган, шарқда эса Мўгулистон тан беришини хоҳламай, интиқом учун қўзғалаётган эди.

Бу икки зотнинг юзма-юз келганини таҳминлайдиган шундай далил ҳам борки, Баҳоуддин Нақшбанд айнан Насафда яшаётган Саййид Амир Кулолга бориб, мурид тушади. Ёш Темурнинг эса ўша пайтда Мовароуннаҳрда мавқеи анча баланд бўлган Насафда таълим олгани ҳақида аниқ маълумотлар мавжуд.

Афсуски, ҳозир истифодада бўлган адабиётларда машойих ва Соҳибқирон мулоқотлари, муносабатлари ҳақида ёрқин далиллар учрамайди, аммо бундай дийдорлашувлар рўй бергани эҳтимол. Уларнинг манбаларда қайд этилмагани ҳақида бирон нарса дейиш қийин. Балки айнан шундай китоблар атайлаб йўқотилгандир. Ҳалқ тилидан эса буни ўчириб бўлмас экан. Биз 1991 йил августда экспедиция билан Баҳоуддин Нақшбанд ҳазратлари зиёратгоҳида бўлганимизда ўша пайтда мажмуадаги масжиднинг имом хатиби Мухтор ҳожи Абдулло (бу киши кейинчалик Ўзбекистон мусулмонлари идорасининг раҳбари ҳам бўлиб ишладилар. Худо раҳмат қилсин) билан узоқ сұхбатлашган, ул зот кўплаб ибратли воқеалар, жумладан, бир ривоят айтиб берган эдилар. Эмишки, Амир Темурнинг элчилари келиб, шайхга хазина тугаб қолганини арз қилишибди. Шунда машойих келганларга мачит деворининг тубидан бир қоп тупроқ олиб кетишини буюрибди-

лар. Хулоса шуки, ихлос қилсанг, тупроқ ҳам олтинга айланади. Ривоят замиридан шундай маъно балқиб турибдики, ҳукмдор ва шайх муносабатлари сарой ҳазинаси-нинг аҳволи ҳақида маълум қиласиган ва қўмак сўрайди-ган даражада яқин бўлган.

Шубҳасиз, буюк зотлар ўртасидаги муносабатларни тахмин (балки башорат) қилишнинг маълум мезон ва меъёрлари мавжуд. Бу борада олимлар, ижодкорларнинг илмий, бадиий салоҳияти ҳали асқотади. Агар маслаҳат илинжида пирнинг ҳузурига келган юрт ҳалоскорининг кейинги тақдирини эста оладиган бўлсак, «Улар менга Ҳоразмга боришга маслаҳат бердилар. Агар ғалаба қозонсам, Самарқанднинг бир йиллик хирожини уларга назр қилишга қарор қилдим. Улар менга зафар тилаб фотиҳа ўқигач, кетишимга ижозат бердилар. Сайид Амир Кулол хизматларидан чиққанимда, менга ҳаммаси бўлиб олтмиш отлиқ ҳамроҳлик қиласди» («Тузуклар»дан).

Эътибор берган бўлсангиз, пир Темурбекнинг йўлини бутунлай бошқа тарафга (у Бадахшонга кетмоқчи эди, пир уни Ҳоразмга даъват этади) буриб юборди. Бу йўл эрк ва озодлик йўли эди, Туронзамиинни 110 йиллик истилодан озод қилиш сари бошланган буюк муҳорабанинг илк қадами шундай қўйилган эди. Бу шонли кураш қарийб ўн йил давом этди ва у Соҳибқирон 1370 йилда Мовароуннаҳр ҳукмдори деб тан олингунча давом этди.

Олтмиш отлиқ... Кейинчалик Самарқанд қўшини бундан юз, минг бора улкан кўлам касб этгани ҳақида муаррихлар ёзиб қолдирган. Суронли кунлардаги ҳар бир кичик унсур ҳам бугун тегишли масштабдаги моҳият касб этмаганми? Этган, энди фақат ўша сирни ошкор қилиш керак бўлади.

2007 йил, марта

«СҮЗИМДАН АНГЛА ЎЗИМНИ»

Соҳибқирон Амир Темур ҳазратлари шахсияти юзасидан мулоҳазалар

Ҳар вақтики кўргасен менинг сўзумни,
Сўзумни ўкуб, соғингайсен ўзумни.

БОБУР

Буюк бобокалонимиз ҳаётини муфассал ўрганган ва мукаммал тарихий-биографик асар — «Зафарнома»ни яратган Шарафиддин Али Яздий бир ўринда ул буюк зот ҳақида шундай ёзган экан: «... ҳазрат Соҳибқирон шундай бир мулк (подшоҳлик, ҳукмдорлик) эгасидирки, у фаришталарнинг Аллоҳга мурожаат этиб, «Бузуқчилик қилувчи ва қонлар тўкувчи кимсани яратасанми?» саволига жавобан Парвардигорнинг «Мен ерда бир халифа (ўринбосар, вакил) яратаман» деган иноятига каромат қилинган сарвар (етакчи, йўлбошчи)дир. Унга ўзининг олдиндан билиш ва кўриш фазилати туфайли баҳри барр (сувлик ва қуруқлик)да эгалик қилишга қурдат берилган».

Менимча, бу эътироф шарафли аждодимиз шаънита айтилган жами сифатларни ўзида қамраб олади. Шунингдек, Соҳибқирон Амир Темур ўз давридаёқ барча доираларда «Сайф ул-Аллоҳ» (Аллоҳнинг қиличи), «Сайф ул-дин» (Диннинг қиличи) леб улуғланган эдилар.

Шубҳасиз, ана шундай муҳташам ва маҳобатли зотнинг шахсияти (ўзига хос бўлган ташқи ва ички олами) замонлар оша афкор оммани қизиқтириб келган. Шу қизиқиш ҳосиласи ўлароқ кўплаб афсоналар, ривоятлар яратилган. Гарчи уларда жиндак ҳақиқат унсурлари бўлса-да, шарқона хаёлот ва уйдирмалар ила пардозланганидан уларни тарихий далил сифатида қабул қилиб бўлмайди. Бу ҳикоятлар бобокалонимиз ҳақида у ёки бу даражада тасаввур бериши мумкин.

Агар масалага аниқ нуқтаи назардан ёндошиладиган бўлса, унинг муаммоли, мураккаб ва чигал томонлари

кўплиги маълум бўлиб қолади. Бу ҳолатни ўша замон тарихчилари ҳам, ҳозирги замон тадқиқотчилари ҳам қайд этганлар. Бу, аввало, Шахс феъл-атворининг фақат ўзига хослиги, бошқа бирор зотга ўхшамаган ички дунёси ва фаолияти (унинг камёблиги ва ягоналиги ҳам шунда), ўз тўпидан баланддалиги ҳамда юксаклиги билан ўлчанадиган нодир хусусиятлари билан белгиланса, иккинчи тарафдан, замондошларнинг Соҳибқироннинг майшати, дидсаъжияси, шахсий турмуш тарзи ва бошқа ички ўзига хос томонлари ҳақида маҳсус ёзиб қолдирмаганлари билан изоҳланади. Балки у даврларда бундай тадқиқотлар яратиш урф бўлмагандир ёки ҳеч ким жазм қилмагандир ёхуд ҳамон ўшандай асарлар асрлар губори ичра кўмилиб ётиб, ҳозиргача топилмагандир. Бу тарих кашфиётiga ҳаддан ташқари қизиқдан шўро тадқиқотчилари ҳам ҳатто қўлга илинадиган далилларга кам дуч келганлар чоғи М. Герасимов 1947 йилда «Биографлар унинг буюк юришларини тасвирлашда жами ранглардан фойдаланганлар-у, ташқи кўриниши юзасидан жуда кам маълумот қолдирганлар. Борлари ҳам зиддиятли ва мавхум», деб ёзғирган экан.

Шахсият билан боғлиқ маълумотлар ўша давр асарларида яхлит ҳолда эмас, сочма тарзда учрайди. Соҳибқирон билан юзма-юз учрашган Ибн Халдун, Клавихо, Ибн Арабшоҳ, Иоан ва бошқалар, шунингдек, бобомизнинг замондошлари ўз хотираларида ул зотнинг ташки кўринишини йўл-йўлакай тасвирлаганлар, саройнинг майший ҳаёти (асосан зиёфатлар баҳонасида) юзасидан далиллар келтирганлар, бирор аниқ воқеа муносабати билан ҳазратнинг руҳий ҳолати (шодлиги, ғам-ғуссаси, ғазаби)ни қайд этганлар. Атрофда кечган буҳронли ҳаёт, кескин вазиятлар инсон ва ҳарбий лашкарбоши, давлат арбоби ва илм-фан, санъат ҳомийси сифатида фахрли аждодимизнинг шахсий фазилатлари ҳақида мулоҳаза юритишига изн беради.

Бир ҳолни истисно қилиш керакки, Амир Темур даврининг буюк воқеаси эди ва, бугунги назар билан айтганимизда, неча юз йиллар тақдирини ҳал қилувчи шиддатли ўзгаришлар ҳаётининг ҳар бир лаҳзасида пайкон ўқларидек унинг теграсида шувиллаб учарди ҳамда, не

саодатки, ўшандай таҳликали дамларда ҳам чақмокдек Ақл тўғри ечимлар топишдан адашмаган эди. Бобомиз шахси-ятидаги жами унсурлар ўша Буюк Ақлга хизмат қилган ва замон сўроқларига асрлар тақдирини белгилаб берган тўғри жавоблар топилган. Бу мавқе шунчалик баландки, унинг моҳиятини «Буюк Темур» деб аталган икки рамзий сўз нисбатан ифодалаши мумкин ва бу чўнг ҳақиқат қарисида Шахсга берилган жами таърифлар нисбий бўлиб қолаверади.

Шу ақидани эътироф этиб, қайд қилиш лозимки, Соҳибқирон васфи ўз даврининг даҳолари қалами или куйланмаслиги мумкин эмас эди. Бу борада, ҳақиқатан, давоми (узлуксиз) занжир мавжуд. «Зафарнома»нинг муаллифи Шарафиддин Али Яздий тўрт ёшли болакай Алишерни манглайидан ўтиб, ёруғ иқбол тилаган чол-да. Алишер Навоий ижодида бу муборак мавзунинг акс этмаслиги ёки хира акс этиши мумкин эмас. Ҳозирча биз даҳо шоиримизнинг Соҳибқирон ҳақида «... агарчи назм айтмоққа илтифот қилмайдурлар...» деб бошланувчи изхорини аксарият такрорлаймиз. Бинобарин, сўз султони нафис абдиётта бағишланган маҳсус асарининг ижодкор Темурий шаҳзодаларга аталган алоҳида фаслини ихлос ва эҳтиром билан Соҳибқирон номи билан бошлайдими, демак, бунинг замирида теран меҳр яширин. Шоир ижодида бу буюк зот тимсолига кўп бора мурожаат қилгани шубҳасиз. Оддий бир қайд. Фарҳод образини кўп тадқиқотчилар Навоийнинг идеали, ҳатто ўзининг тимсоли, деб талқин қиласидилар. Ана шу суюкли қаҳрамон севгилиси Шириннинг юрти Арманистонда тоғ қазиб, ариқ ўтказади. Ободончилик ишларини амалга оширади. Тарихда шундай иш қилган бизнинг бирор қондошимиз борми? Бор. Бу — Амир Темур ҳазратлари. Соҳибқирон Тоғли Қорабоғда бир неча қишини ўтказган. Бу заминда ариқ («Барлос ариғи») қазиб, кўплаб олий иншоотлар барпо этган. (Бу ёғини шарҳлаш муҳтарам адабиётшуносларимизга ҳавола). Ёки Темур Малик, Нажмиддин Кубро, Султон Жалолиддин ва бошқалар бошлаган озодлик курашини ким охирига етказди!? Синд дарёси бўйида шафкатсиз таҳқирланган, лекин иродаси букилмай курашни

давом эттирган ва бу йўлда маҳв булган Султон Жалолиддиннинг орини душмандан ким олди? Албатта, Амир Темур ҳазратлари! Масалага ёндашувда ана шундай кенг миқёс талаб этилади.

Шубҳасиз, Шарқ осмонининг порлоқ юлдузларидан бири, Соҳибқироннинг тўғридан-тўғри зурриёди Заҳирiddин Муҳаммад Бобур ва авлодлари таржимаи ҳолида шавкатли бобокалонларининг шукуҳи акс этмаслиги мумкин эмас эди. «Бобурнома»да муаллиф фахр билан «Темурия салотини дастури била тўшак устида (яъни таҳтда) ўлтурур эдим», деб ёзганди. Ўғли Муҳаммад Ҳумоюнга битган хатида, «Ҳазрат Соҳибқирон Амир Темурнинг иш юритишлари доимо ёдингда бўлсин. Шунда давлатинг маъмур ва пухта бўлади», дея таъкидлаганди. Булардан ташқари ҳам асарда ҳазратнинг муборак номи қўл бора тилга олинади.

* * *

Маълумки, мемуар асар ёзиш анъанасини Амир Темур ҳазратлари бошлаб бердилар. «Темур тузуклари» шавкатли отанинг фарзандларга йўл-йўриғи, ҳаётий дастуридир. «Бобурнома» «Темур тузуклари»нинг мантиқий издоши, давлат арбоби ва саркарда изҳорининг дилбар шоир қалби нафосати билан ороланган, мукаммаллашган шаклидир. Албатта, «Темур тузуклари» Соҳибқирон шахсиятини ўрганишда таянч манба ҳисобланади. «Бобурнома»да эса муаллиф кўплаб замондошлари ҳақида ипга тизилган маржондек аниқ-тиник маълумотлар берган. Бу жиҳатдан Бобур Мирзо танлаган услубни тан олмасдан илож йўқ. Биз ҳам, аввало, тайёр анъаналарни истеъфода этиш, кейин эса авлодларнинг ўзаро меҳрига қуллуқ қилган ҳолда Соҳибқирон ҳазратлари шахси ҳақидаги кўлга киритилган маълумотларни «Бобурнома» услубида баён этишга аҳд қилдик. Беғараз саъӣ-ҳаракатларимиз очиқ кўнгиллик билан қабул қилинади, деб умид қиласиз.

«Бобурнома»да муаллиф ўз тақдирни (ассосан, таҳтни кўлга киритиш ва салтанат юритиш)га бевосита алоқадор бўлган Темурийлардан Султон Аҳмад ва Султон Маҳмуд (отасининг акалари), Бойсунқур Мирзо (Самарқанд таҳтини

ундан олган)лар ҳамда Султон Ҳусайн (Бойқаро) Мирзо-ни ҳар томонлама тавсифлайди. Уларнинг ҳар бирининг 1) валодат ва насаби; 2) шакл ва шамойили; 3) ахлоқ ва атвори; 4) масоф ва урушлари (масофлари); 5) вилоёти; 6) авлоди; 7) хавотин ва сарори; 8) умароси (амирлари); 9) судур (бонилиқлари); 10) вузаро (вазирлари); 11) шуаро (шоирлари)га муфассал таъриф беради (9—11 тоифалар Султон Ҳусайндагина мавжуд. Бой-сунқурда 1—4 тоифа). Изоҳларнинг лўнда, аниқлиги, ифоданинг ёрқинлиги кишини лол қолдиради. Шахсларнинг бўй-басти, кийими, эътиқоди, ҳарбий ҳаёти, оиласи, фарзандлари муҳтасар қайд қилиб ўтилади.

Албатта, Соҳибқирон Амир Темур шахсиятининг кўла-мидан келиб чиқилса, Бобур қўллаган 11 банднинг ҳар бири юзасидан тўла китоб ёзиш мумкин. Қолаверса, ҳаз-ратнинг валодат ва насаби (1), масоф ва урушлари (4), вилоёти (5), авлоди (6), хавотин ва сарори (7) юзасидан шу сатрлар муаллифининг «Ҳазрат Соҳибқирон» (2005 йил) ва «Олтин силсила» (2006 йил) китобларида ва бошқа асарларда имкон даражасида ҳикоя қилинган. Демак, бу гал нисбатан кам эътибор қаратилган жиҳатларга баҳоли қурдат тўхталиб ўтамиз. Бунда қўлимиздаги манбалар бизга ҳамдаст, ҳампоя бўлади.

* * *

Шакл ва шамойил. Ўз замонасида «Араб дунёсининг шайх ур-раиси», «машриқу мағриб тарихининг билимдо-ни» деб улуғланган Валиуддин ибн Халдун Соҳибқиронни 65 ёшлигига кўришга мұяссар бўлган. Унинг таърифи куйидагича: «Темур баланд бўйли, қоматдор, боши катта, кенг пешонали киши эди. Жисмонан ниҳоятда кучли, бадани оқ, юзи қизил, бармоқлари йўғон эди. Соқоли ҳилпиллаб турарди. Бир қўли ногирон, ўнг оёғи калта, нигоҳи чақноқ, овози жарангдор эди. Темур ўлим ваҳи-маси нималигини билмай, маънавий ва жисмоний кучи-ни тўла сақлаган ҳолда етмиш ёшта кирди». («Куръер ЮНЕСКО», 1966 йил, № 6).

Ибн Арабиюҳ (1389—1450) аниқ далилларга, балки ўз кўрганларига асосланиб, Соҳибқироннинг суратини шундай чизади: «Темур баланд қадли, узун бўйли, тик қоматли, у гўё қадимий амолика (паҳлавонлар) авлодидан бўлиб, кент пешонали, катта бошли, ғоятда кучли ва салобатли, ажойиб бўлалик, ранги оқу қизил юзли, лекин доғсиз, буғдой ранг эмас, қўл-оёқлари бақувват, елкалари кенг, бармоқлари йўғон, пойчалари семиз, қадди-қомати камолига етган, серсоқол, ўнг оёқ-қўли ногирон, икки кўзи бамисоли икки шам бўлса-да, шодлиги билинmas, йўғон овозли эди; у ўлимдан қўрқмас, ёши саксонга кетаётган бўлса-да, изтиробсиз, вазмин, бадани тўла ва пишиқ, худди зич тош мисоли қаттиқ эди».

Кўриниб турибдики, иккала шоҳиднинг таъриф-тавсифи бир-бирига яқин, уларни ўқигач, кўз олдимизга бўйи 2 метрдан кам бўлмаган, мукаммал қоматли паҳлавон гавдаланади. Гарчи 26 ёнида олинган жароҳат асари гавданинг ўнг томонида қолган бўлса-да, қўл меъерида ишлаган, фақат ўнг елка бироз паст бўлган. «Темур виқор билан отда ўтирганда бу нуқс асло сезилмас, аксинча, чап елканинг баландлиги унга ўзгача салобат бағишларди», деб ёзади тарихчилар.

* * *

Ахлоқ ва ғтвор. Барча даражадаги муарриҳлар ҳазратнинг эътиқодда комил эканлигини фаҳр билан қайд этганлар. Болаликдан исломий мұхитда улғайтан Соҳибқироннинг устоз ва пирлари жамиси ҳанафия мазҳабида бўлиб, ўзи ҳам шу мазҳабда эди ва барча ҳаракатида ҳанафия талабларига амал қилган. Ўзига маънавий пир сифатида саййидзода Саид Баракани ва хуросонлик Зайниддин Тайободийни танлаган эди. Шайх Шамсиддин Кулол оиланинг яқин кишиси ва пири бўлиб, ҳазратга исм қўйган ҳамда ёруғ камолидан башорат қилган эди.

Бобомиз гарчи фаолиятида сиёsat ва диннинг мавқенини аниқ тайин қилган, уларни аралаштириб ёки қўшиб юбормаган бўлса-да, диндорларга чуқур ҳурмат билан қараган, уларнинг маслаҳатларига қулоқ тутган. Умрлари бўйи диний авлиёлар, уламоларнинг равзаларини обод

қилишга катта эътибор берган (жумладан, Туркистон шахрида Аҳмад Яссавий қабри устига маҳобатли бино қуришни амр этган). Ўзи ҳам диний арконларга тўла амал қилган. Сафарлар асносида ҳар доим ўғрукда кўчма ёғоч масжид олиб юрилган. Соҳибқироннинг бу борадаги таймойилини ўз сўзлари билан бундай ифодалаш мумкин: «Давлат ва салтанатимга боғлаган менинг биринчи тузумим — Тангри таолонинг дини ва Муҳаммад мустафонинг шариатига дунёда ривож бердим. Ҳар ерда ва ҳар вақт ислом динини қувватладим».

Малраса таҳсилини олган, ўз даврининг етакчи олимларини сұхбатдош тутган Соҳибқирон бобомизнинг урфоний салоҳиятлари нақадар эканини тасаввур қилиш қийин эмас. Адабиётдан қанчалик боҳабар эканлигини Алишер Навоийнинг «Мажолис ун-нафоис»да келтирган ҳикояси орқали биламиз. Ўшанда ваҳимага тушиб, Куръон тиловатига жаҳд қилган кишига қаратса айтилган «Абдол зи бийм чанг бар «Мусҳаф» зад» (Гуноҳкор Қўрққанидан Қуръонга чант солди) мисраси 967—1049 йилларда яшаган форс шоири Абусаид Абулхайрнинг рубийсидан экан.

Яна Мирзо Ҳайдар Шабистарий деган озарбайжон шоирининг «Гулшани роз» достонини ёқтириб қолиб, босидан охир ёдлаб олгани, Шабистар қишлоғи аҳлига мукофот инъом этгани ҳақида маълумотлар мавжуд.

Ёки ҳазратнинг Ҳофиз Шерозий билан мулоқоти жуда эсланадиган воқеа.

Ҳалабда (бу шаҳар даврининг илмий маркази сифатида эътироф этилган эди) олимларни тўплаб мунозарага киришган Соҳибқирон уларга турли масалаларда мураккаб саволлар билан мурожаат этади. Жумладан, ҳазратнинг «Жангда икки тарафдан ҳам одамлар қурбон бўлади, уларнинг қай бирлари шаҳид саналадилар?» сингари саволларига жавоб беринида уламолар анча қийналадилар.

Дамашқда муттасил 35 кун мулоқотда бўлган Ибн Халдун билан турли мавзуларда мунозаралар олиб боради. Ҳусусан, Бобил ҳукмдорлари — Навуходонасар II ва Бухтансар ҳақидаги баҳсла Соҳибқирон олимдан устун келади.

Бобокалонимизнинг ёрқин заковатидан дарак берувчи бундай мисолларни кўплаб келтириш мумкин.

Тарихий далиллар ҳазрат Соҳибқироннинг ҳаётсевар инсон бўлғанилигини тасдиқлайди. Гўзалликдан завқланиш, одамларнинг шодлик дамларини қадрлаш ва уни узайтиришга интилиш, хурсанд одамга қўшилиб хурсанд бўла олиш салтанат юритиш давомида кўплаб тадбирлар ташкил қилинганида уйғунаштган. Соҳибқирон фарзандларининг суннат ва уйланиш тўйларини алоҳида тайёргарлик билан юқори кўтаринкиликда ўтказган. Шундай дамларда гуноҳкорлар авф қилинганд, одамларга ҳадялар улашилган. Шунингдек, ҳарбий юришларда қозонилган ғалабалар ҳам муносиб нишонланган, жангларда жасорат кўрсатган лашкарбошилар, баҳодирларни Соҳибқирон ўз дастурхонига тақлиф қилиб, ўз қўли билан илтифот кўрсатган, уларга оталик, устозлик меҳрини намойиш этган. Бундай муносабат уларни ва бошқаларни янги жасоратларга илҳомлантирган. Хуллас, бобокалонимиз ўз феъл-атвори билан бағри кенг, қалби тоза, мард, руҳи бардам, ҳушёр ва тадбиркор инсон тимсолини намоён этган. Ул зот учун бирорларнинг қайғуси, ташвиши бегона бўлмаган. Ўзи ҳам ҳаёт зарбалари, оғир йўқотишлиар қаршисида тушқунликка тушиб, ҳаётдан безиш ҳолатларини кўп бора бошидан кечирган. Айниқса, суюкли қизи Тогайшоҳнинг вафоти (1381) унга ёмон таъсир этган, салтанат ишларида бутунлай совиган эди. Танг вазият эса уни сафга чорларди. Опаси Кутлуг Туркон оқанинг далласи билан яна жанг либосини кийишга, исён кўтарган ҳудудларга юришга мажбур бўлади. Шу тахлит тўнғич ўғли Муҳаммад Жаҳонгир мотамида лахча чўёдек куйди, Умаршайх Мирзо ҳалок бўлганда тоғдек бардош билан чидади, валиаҳд сифатида танлаган набираси Муҳаммад Султоннинг вафоти эса уни бутунлай йиқитиши мумкин эди. Бироқ чекига тушган улкан юқ унинг таслим бўлмаслигини, билъакс, салтанат қуш патидек тўзиб кетишими таъкидлаб турар эди. Шунинг учун миллат, ватан истиқболи учун шахсий дардларини унтишга мажбур эди. Ҳаёт ҳазратни оғир синовларга рўбарў қилган, у ҳаммасини енгиг, ғолиб бўла олган. Ибн Арабшоҳ ёзали: «У ҳазил-мазах ва ёлғонни

ёқтирмас, гарчи (сўзда) ўзига озор етадиган бирон нарса бўлса ҳамки, салоқат унга ёқар эди; у бўлиб ўтган ишга азият чекмас ва ўзига ҳосил бўладиган (ютуқ)дан шодланмас эди».

Ибн Арабшоҳ давом этиб, ёзади: «У (бировдан) бир гап эшигандан далил талаб қиласиган, зимдан қараш ва кўз ишоратларини сезадиган идрокли киши эди, ... ўз фаросати билан ҳақгўй ва ёлғончини ажратар эди. Ўз фикри билан сал бўлмаса учар юлдузни тўғри йўлга бошқара оларди».

Соҳибқироннинг раият (халқ, омма) ва лашкар орасида обрўси жуда юксак бўлган. Бу ҳақда Ибн Арабшоҳ шундай қайд этади: «Агар уларга «Темур — Худо» деса, ҳаммаси ишонарди». Албатта, бундай меҳри юқсанликнинг сабаблари кўп. Уларнинг асоси, бизнингча, жами ҳаракатларнинг замирида «Куч — адолатда!» тамойилининг қўйилгани бўлса керак. Соҳибқирон Адолатидан юқори фақат Аллоҳ бор, Адолат қаршисида шоҳ ҳам, гадо ҳам тенг. Шубҳасиз, бу талабнинг нақадар ҳаётийлиги ҳазратнинг таржимаи ҳоли, турмуш тарзи орқали тасдиқланган. Шунча дабдабаю асъаса билан ўзига бирор имтиёз талаб қиласиган зот сафарларда лашкар билан тенг шароитда яшаган: бир хил шароитда ухлаган, бир қозондан овқатланган. Вазият талаб қилса, ўз фарзандларини одилона жазога мустаҳиқ қилган. Жумладан, ўғли Мироншоҳ, набиралари Ҳусайн, Искандар, Ҳалил Султон намойишкорона жазоланган. Жангда сусткашлиқ қилгани учун лашкарбошилар сазойи этилган, кўрқоқлиги сабаб мол-мулкидан мосуво бўлиб, бадарға қилинган.

Соҳибқироннинг илтифоти ҳам бисёр бўлиб, ўзгаларнинг фикрини ҳурмат қилишга жуда эътибор берган экан. Жумладан, жамоатчилик фикрини қадрлаб «Халқнинг ҳосқисми бу масалага (кўрилаётган бирор тадбир кўзда тутилган — Ҳ.С.) чуқур қараб, бир кун билан бир йил орасидаги ишлар оқибатини кўзлаб галирса, унинг гуноҳи йўқ. Майли, ҳар кимса хатонинг энг қуйисигача йиқилса ҳам ёки савобнинг чўққисига кўтарилса ҳам — фарқи йўқ, ҳеч бир торгинмасдан гапираверсин. Чунки агар хато қилса, бу нуқсон эмас, агар мақсадга мувофиқ бўлса, бу икки

ҳисса мукофот, деярди» (Ибн Арабшоҳ). Агар бу кўчирманинг замиридаги маънога назар солсак, унда аҳоли барча табақаларининг фикрига зътибор билан қараш лозимлиги таъкидланаётганини сезиб олиш қийин эмас. Демак, ана шундай бағрикенгликнинг амалда бўлгани салтанатнинг мустаҳкамлигини таъминлаган омиллардан бири эди.

«Темур тузуклари»да «Салтанатимни ўн икки тоифага бўлиб, уларга таянган ҳолда иш юргаздим. Салтанатим қонун-қоидаларини ҳам шу ўн икки тоифага боғлаб туздим», дейилади. Демак, жами нуфус (аҳоли)ни ўн икки табақага ажратиша Соҳибқироннинг ўз талаблари бўлган. Бу талаблар пирларнинг насиҳатлари, олимларнинг маслаҳатлари, китоблардан ўрганилган илмлар ва, албатта, ҳаётий тажрибалар асосида шакллангани ҳам шубҳасиз. Жамият аъзоларига бундай аниқ муносабат изҳор қилингани дунё ҳукмдорларидан қай бирида учраганми, йўқми билмадик-у, бироқ шундай қатъий тўхтамга келиниб ва мамлакатни бошқариш тизими шу асосда яратилгани — дунёда тентсиз ҳодиса, шахснинг чинакам беназир ва ноёблигини исботловчи ёрқин далилдир. Ана шундай юксак зотнинг феъл-авторини тавсифлашга ҳар қандай бўёқ хира тортиб қолиши, ҳар қандай сўз ожизлиги — рост гап. Албатта, улкан салтанатни бир түғ остида ушлаб туришни таъминлаган қаттиққўллик (шафқатсизлик эмас) ва талабчанлик фазилатларини қайд этиб ўтиш ўринлидир.

* * *

Масоф ва урушлар. Шубҳасиз, жаҳон ҳарбий санъатида Соҳибқирон Амир Темур сингари ҳаётини ҳарбий сафарларда ўтказган, кўп ва хўб жанг қилган бошқа саркардани топиш қийин бўлса керак. Албатта, бу ўринда бобокалонимиз қўмондонлик қилган жанглар миқёслари — қанча жангчи иштирок этганию, қамраб олган масофа-лар, уларда эришилган ғалабаларнинг сирларию аҳамияти ҳақида янги гап айтиш қийин, чунки бу воқелик жуда кенг талқину тафтиш қилинган. Бу ўринда фақат бир оддий унсурга диққатни қаратмоқчи эдик. Келинг, биргаликла Амир Темур ҳазратлари отда босиб ўтган масофа-нинг кўламини тасаввур қилиб кўрайлик. 1360—1405 йиллар

оралиғида Соҳибқироннинг қадами қаерларга тегмади? Агар чегаралар билан санайдиган бўлсак, шарқда — Юлдуз яловлари, Қошғар — умуман, Хитой чегараси, жанубда — Ҳиндистон, Сарандиф оролигача, Афғонистон, Эрон орқали Қизил денизигача, Сурия, Ироқ, Туркия орқали ғарбда Адриатика денизигача, шимолда — Булғор ўрмонларию Литва князлигигача бўлган ҳудудда 45 йил от сурган Соҳибқирон неча километр йўлни босиб ўтди экан? Эътиборлиси — бу манзилларнинг кўпи бир эмас, бир неча марта фатҳ этилган. Амударёнинг ўзидан ўн мартадан кўпроқ ўтилган.

Албатта, бу тарихий далилларни эслаш, уларни ўрганишга даъватда ҳеч қандай лағдаға ёки таҳдид йўқ. Булар — ўтмиш, ўтмиш билан яшаб бўлмайди. Далилларни ўрганиш истаги эса фақат бир зотнинг шахсини тўлароқ тасаввур қилиш, шу орқали инсон фарзанди нималарга қодирлигини бир чамалаб кўриш учун лозим, холос.

* * *

Хусусан, ўша замон кишиларининг лиbosлари, таомлари ва бошиқ маиший ҳаёт унсурларини ўрганиш ҳам қизиқ манзараларни намойиш этиши мумкин. «Бобурнома» муаллифи ўз отасининг лиbosлари ҳақида тўхталиб, «Тўнни бисёр тор кияр эди, дасторини дасторпеч чирмар эди. Ёзлар файри девонда аксар мўгулий бўрк кияр эди», деб ёzádi. Афсуски, Соҳибқирон бобомиз ҳақида бундай аниқликда ёзиш имконидан хорижмиз. Бизнингча, Ўзбекистон «ойнаи жаҳони» орқали намойиш қилинган Алишер Навоий ва Бобур Мирзо ҳақидаги телефильм ижодкорлари XV асрларга хос лиbosларни яратишда муваффакиятга эришганлар.

Албатта, илм-фан, санъат, савдо-сотик ривожланган у даврда ошхона маданиятида ҳам юксак даражага эришган. Хусусан, Самарқандда ташкил этилган олтмиш кунлиқ тўй (1404 йил, ёзи)да қатнашган Луи Гонзалес Клавихо тўкин дастурхонларни ҳайрат билан таъкидлайди: «Дастурхонга тузланган ва қовурилган, бутунлай ёки бўлиб-бўлиб пиширилган от ва қўй гўшти тортилди. Гўштларни доира шаклидаги зарҳал чарм суфralарда суд-

раб олиб келдилар. Гўшт шу қадар кўп эдики, суфрани уч юзтacha одам судраб олиб келди... Гўштхўрлик тугагач, устига дастурхон солинмаган хонтахталар келтирилди, унинг устига тузланган гўшт, гуруч ва бошқа таомлар, шириналлик солиб пиширилган нон қўйилди». Бу асъасалар Темурбек хузурида бўлаётган эди. «Улуғ амир лўлаболишига ёнбошлаган ҳолда шойи кўрпача устида ўтиради. Подшоҳнинг эгнида гулсиз силлиқ шоҳи яктак, бошида узун телпак, телпакнинг тепасида қизил ёқут, жавоҳир ва бошқа қимматбаҳо тошлар қадалган». Яна ёзади: «Дастурхонда қовурилган ва қайнатилган от гўшти, қайнатилган ва дудланган қўй гўшти, ўз удумларига кўра ҳар хил усулларда тайёрланган гуручли овқат кўп бўлди». Сайёҳнинг эсадаликларидан ўша замонда ҳам тандир кабоб («дудланган қўй гўшти») ва паловхонтўра таомилда бўлганини сезиб олиш қийин эмас.

Бу сезимлар эса бизнинг бугунги ҳәётимиз билан ўша фараҳли кунлар — бундан олти юз йиллар олдинги замон ўртасида олтин кўприк мавжудлигини, бу боғланиш бугун ўзлигини қайтадан намойиш қилишга киришган ҳалқ турмушида баралла кўзга ташланаётганини тасдиқлайди. Бир ҳалқда хос урф-одат ва анъаналар — жами қадриятлар йиллар оша бойиб, такомиллашиб боради. Жумладан, бир пайтлар Мовароуннаҳр ҳудудларида кўчманчи мўгуллар жорий этган тартибларни бартараф этиб, бобокалонимиз шаҳарлашган ўтроқ маданиятга асос солган эди. Бу маданият дурдоналари асрлар оша сайқал топиб, бугун ўзбек ҳалқининг менталитетини ташкил этмоқда. Асрий обидаларда муҳрланган санъат, дунёни лол қолдирган тафаккур бугун ўзи ҳақида ўзи сўзламоқда. Бу изҳор ҳали кўплаб саҳифаларда қайта-қайта дарж этилаверади.

2008 йил, март

ҚАЛБ ВА ҚАНОТЛАР

Туронзамин бағридан күплаб буюк зотлар етишиб чиқ-қан. Ҳусусан, Султон Жалолиддин ва Амир Темур ҳақида ўйлаганды, кишининг кўз олдидан ҳаётнинг турли ҳикматлари кинолентадай ўтаверади. Зоро, бу икки инсон таржимаи ҳолида тирикликтин жами синоатлари, одам боласи кечириши мумкин бўлган барча қушойиш ва оройишилар, табиятда мавжуд, илмий тилда *gotosipiens* деб аталувчи энг мукаммал икки оёқли жонзотнинг нималарга чидаши-ю, нималарга қодирлиги, хуллас, ер юлдузининг ноль нуқтасидан чексизликкача бўлган ўлчами мужассамлашган, десак, хато бўлмайди. Шубҳасиз, бундай теран мазмунни, худди таёқнинг икки учини бир қўлда ушлаб бўлмаганидек, ягона қамровда тутиб бўлмайди. Бинобарин, аслида ҳам шундай, бу икки шавкатли аждодимиз ҳақида неча юз йиллардан бўён неча юз саҳифали тарихлар ёзид келинмоқда. Бизнинг бу саъй-ҳаракатимиз эса Турон осмонининг мазкур икки ёруғ юлдузини ёнма-ён тасаввур қилиб, улар ҳаётидаги муштарак жиҳатларни таққослаб, шу орқали зеҳнимизни ёритиш, унутилаёзган ва ҳамон губорлардан тўлиқ покланмаган қадриятларимизни ёдга олиб, бугун дунёга «Мустақил Ўзбекистон» номи билан дадил танилаётган юртнинг ўтмиши ҳам, тарихи ҳам, демак, келажаги ҳам ягоналиги, яхлитлигини яна бир бора эсга солишидир. Озод юртимиз тўғрисида акс этган Ҳумо тимсоли Эртаклардаги афсонавий қушдан олинмаган, балки унинг қалби, ўнг ва чап қанотлари аждодлар тарихининг чиғириқдан ўтган чўнг мазмунини ифодалаб турибди.

Гўдакликдаги номлари Жалолиддин (бобоси Жалолиддин Отсиз шарафига) ва Темур (Қуръони каримдаги Мулк сураси, 16-оятдан) бўлган боболаримизнинг туғилиш санасида 138 йил фарқ бор. Жалолиддин Урганчда дунёга келди, унинг отаси Аловиддин Муҳаммад 1077 йилдан хукмдорлик қилиб келаётган Хоразмшоҳларнинг еттинчи вакили эди. Онаси Ойчечак қайнотаси, ўша пайтда тахт соҳиби (1193—1200) Аловиддин Текиши истагига мос равишда тўнғич набирани ҳадя этганди. Шаҳрисабзда

таваллуд топган Темурнинг отаси Мұхаммад Тарагай улуснинг обрўли бекларидан бўлиб, диндор ва маърифатли киши эди. Онаси Тегинабегим Моҳ Бухоро шариат қозиси Убайдуллоҳ Маҳмуд ал-Маҳбубийнинг қизи эди. Жалолиддиннинг туғилишини табриклаб, шайх Нажмиддин Кубро дуолар қилган бўлса, Темурга шайх Шамсиддин Кулол исм қўйиб, ёруғ иқбол тилаганди.

Даврининг нуфузли, баланд мартабали оиласарида кўз очган шаҳзода ва бекзода болалик ва ўсмирилик йилларини тўқис мұхитда ўтказганлари, замонасининг таниқли кишиларидан сабоқ олиб, ҳарб илмида ҳам, маърифатда ҳам баркамол даражага етганлари тарих китобларida ишончли қайд этилган. Улар тийнатидаги жисмоний устунлик қилич чопиш, найза улоқтириш, мерганлик сингари жанговар машғулотларда тенгсиз бўлишларини таъминлаган, уларнинг зуваласида аввалбошиданоқ буюк саркардалик салоҳияти камол топаётган эди. Ишончли манбаларда Жалолиддин ҳам, Темур ҳам икки қўлда икки қилич билан баравар чопишгани, бундай маҳорат камдан-кам ҳарбийларга насиб этиши таъкидлаб ўтилган.

Улар улғайиб, сафга киргач, замоннинг оғрикли саволларига рўпара келдилар. Бири издиҳом (бу шароитни юмшоққина қилиб «матрака» ҳам деб аташ мумкин)нинг бошида турди ва, ниҳоят, кейингиси босиб келган тун зулматини парчалаб, ватанни озодликка олиб чиқди — Султон Жалолиддин бошлаган оламшумул юмушни Амир Темур охирига етказди.

Султон Жалолиддин тарих саҳнасига чиққанда шарқдан қўзғалган бало чумоли галаларидек Хоразмишоҳлар салтанатини пайҳон қилиб келар, бу буҳронни тўхтатадиган куч майдонда йўқ, шон-шуҳратдан боши айланган ҳукмдорлар жиловни қўлдан қочирган эди. Жалолиддин тақдирнинг барча зарбаларига чидаб, ҳам ички ёв билан, ҳам ташқи душман билан муросасиз курашди. Босқинчиларга қарши муҳорибасининг энг чўққиси ва шафқатсизи — Синд дарёсининг Нилоб кечуви яқинида толеъ унга бир кулиб боққанди. Жасорат билан душманнинг темирдан ҳам мустаҳкам мудофаасини ёриб борди, Чингизхонга қилич сирпаб, белига арқон ташлаб, судраб жўнади. Фақат қис-

мат қиличи арқонни кесиб юборди, Чингизхон омон қолди. Лекин занғар ғолиб бўлгач, шафқатсиз қасос олди...

Амир Темур камолга етган паллада Чингизийлар авлодидан бошлиқлар ўзгарган, бироқ зулм, истибод бурунтидай қолган, балки баттар кучайган эди. Ўша пайтда Мовароуннаҳри идора қилиб турган Туғлуқ Темур Чифатой улусини бошқарган Чингизхоннинг олтинчи авлоди эди. Темур вазиятни чамалаб, фурсат келишини кутиб, унинг хизматига боради. Ҳудди шу йили у Жалолиддин сўнгги бор Чингизхон билан тўқнашган ва дарёдан ўтиб кетган ёшда эди. Тарихдаги эврилишни қарангки, ёвга қарши бир қасоскор ўйиндан чиқди ва орадан 138 йил ўтиб, ўша ёшда яна ўша завол топган мақсадини байроқ қилиб, қасос ўти билан пайдо бўлди. Бу тасодифларда қандайдир ички мантиқ борга ўхшайди ва у ўз ҳақиқати билан Султон Жалолиддин ва Амир Темурнинг ягона воқелик эканини, ягона ҳалқ армонларининг ибтидоси ва интиҳоси — зулмга қарши курашнинг бошланиши ва охирга етказилишидаги икки нуқталигини тасдиқлаб турибди. Ҳақиқатан, Соҳибқирон Амир Темур салтанатининг юзага келиши қоронгулик тугаб, ёруғлик бошлангани аломати эди. Султон Жалолиддин вафот этганига 138 йил тўлгач, Амир Темур унинг орзусини рӯёбга чиқарди. Мовароуннаҳда туркийлар давлатини тиклади (1370 йил).

Соҳибқирон Амир Темур, кейинчалик Темурийлар ҳукмронлиги даври миллатнинг, ватаннинг барча орзулари амалга ошган йиллар бўлганини бугунги ҳолосалар ҳам тасдиқлайди. Шунингдек, бу давр мўфуллар истилоси туфайли узилиб қолган ва яна тикланган (буғунги истилоҳ билан айтганда) ўзбек давлатчилигининг қад ростлаши ва изчил давом этиши даври бўлди. Амир Темур бир пайтлар Хоразмшоҳларнинг ҳам пойтахти бўлган Самарқандни ўз давлатининг маркази сифатида танлади. Соҳибқирон салтанати даврида Хоразм воҳасининг мавқеи юксалди, юрт обод бўлиб, гуллаб яшнади. Амир Темурнинг бу ҳудудга алоҳида эътиборини шундан ҳам билса бўладики, Хоразм тўғридан-тўғри марказий бошқарувга қараган ва хазинадан маблағ ажратилганда пойтахт билан тенг мавқеда турган. Хоразм маликаси Ҳонзодаҳонимнинг тўнғич

келин сифатида танланишида ҳам айрича меҳр уфуриб туриди.

Айни шу ўринда фикрдаги бир стереотипга муносабат билдириб кетишга тўғри келади. Кўпчилик Амир Темур Кухна Урганч қалъасини вайрон қилган, деган фикрга ортиқча урғу берали. Бугунги маълумот даражасида мазкур қарашта батафсил изоҳ бериш мумкин (негаки, тарихимизда оқ доғлар бўлмаслиги лозим)!

Маълумки, Амир Темур Самарқанд таҳтига ўтирганда Хоразмда Сўфийлар авлоди ҳукмронлик қиласарди. Улар мўғулларни Худосидек кўрап, уларга сажда қиласарди. Шу кайфият таъсирида кўп кутқуларни юзага келтирдилар, Амир Темур беш марта Хоразмга келиб, музокаралар олиб борди, лекин улар бузғунчиликларни авж олдиравердилар. Ана шундай шароитда қатъий чора кўрмасликнинг иложи йўқ эди. Қолаверса, Кўхна Урганч қалъасининг бузилиши Соҳибқироннинг суронли юришлари масштабига солиб кўрилса, оддий воқеа бўлиб қолади. 1367 йилда Қарши, 1370 йилда Балх қалъаларига ҳам ҳарбий мақсад нуқтаи назаридан зарба урилган эди. Кўхна Урганч қалъаси орадан ҳеч қанча вақт ўтмай, аҳвол ўнглангач, олдингисидан ҳам баланд ва мустаҳкам қилиб қайта тикланган. Бу воқеага урғу бериб кўпиртирилишининг сабабини қидириб, узоққа бориб ўтириш шарт эмас. Бу иғвони шўро мафкурачилари ўйлаб топган ва халқни бўлиб ташлашнинг бир усули сифатида қўллаган. Аслида ким Сulton Жалолиддинни ҳурмат қилса, Амир Темурни ҳам яхши кўради, негаки, бу икки улуғ зот бир-бирини тўлдиридиган, бир-биридан ажралмайдиган ҳодисадир.

Ҳақиқатан, қарийб бир ярим аср давом этган мўғуллар истилоси ва босқинчиларга қарши эрк кураши тарихини чамалаб кўрсак, йўллар бир неча ўринда кесишиганини, лашкар бир кўприкдан бир неча марта ўтганини ҳис қилиш қийин эмас. Чунки топталган замин најот кутар, унинг шер йигитлари майдонда от суреб, истибоддан қутилиш йўлини излашарди. Гёёки улкан саҳнада ҳарбий ҳаракатлар давом этар, саҳна кўринишлари, томоша иштирокчилари ўзгариб турса-да, моҳият битта эди:

ватан озодлиги! Демак, ўз-ўзидан воқеаларнинг тақрорланиши кузатилади. Султон Жалолиддиннинг изи қолган манзиллардан эрк истагида ёниб Амир Темур ҳам ўтган.

Мана, бир мисол.

Амир Темур Ҳиндистон сафари давомида (1398) Синд дарёси қирғоқларига яқинлашиб боради. Бу ҳақда тарихчи Шарафиддин Али Яздий шундай ёзади: «Соҳибқирон... Бонудин кўчуб, жумъа куни муҳаррам ойининг саккизинда (20.09.) Синд суйига етиб тушди. Ва ўшул ердаким, Султон Жалолиддин Хоразмшоҳ Чингиздин қочиб ўзини сувга ташлаб эрди, Чингизхон сувдин ўтмай қайтди, Соҳибқироннинг чодирини анда тикилар». Бу жой ўша таҳликали 1221 йил 23 ноябрь куни Чингизхон аскарлари Жалолиддинга етиб олган ва муросасиз жанг бўлган Нилоб кечуви эди. Шу жойда уч кун ҳаёт-мамот кураши давом этади, кучлар тенг бўлмаган жангда Жалолиддин қўлга тушмай, дарёдан ўтиб кетади. Бу музaffer тарих, Чингизхондай тошюрак инсонни ҳам ҳайратга соглан жасорат Амир Темурга маълум бўлмаслиги мумкин эмас эди. Узоқ аждоди, қолаверса, салафи (маслаги бир ўтмишдоши)нинг тақдирида ўчмас нуқта бўлиб қолган қирғоққа яқинлашар экан, Соҳибқирон бобомиз қандай кайфиятни кечирган, билмадик, лекин шу ўринда ўз дастхатини қолдиришга аҳд қилганини тарихчи шундай ифодалайди: «Ва ҳукм бўлдиким, «Синд суйига кўфрук боғласунлар!» Бу қарор Жалолиддинга нажот берган сўқмоқдан авлодларга кент йўл очилгани таъминланганига ишора эмасми?! «Ҳукм била Соҳибқироннинг черики икки кунда кўфрук боғладилар». Лашкарга яна икки кун дам берилади, албатта, хотирлаш тадбирлари ўтказилгандир ва Соҳибқирон шу ерда бир қанча элчиларни қабул қиласди. 24 сентябрда янги кўприкдан ўтиб, лашкар чўлга етиб боради. «Ва ул чўл асру йироқ чўл туур ва ани Жалолий чўли дерлар, ул сабабдинким, Султон Жалолиддин Хоразмшоҳ Чингизхондин кутилиб, сувдин кечиб, бу чўлга кириб халос бўлди», деб ёзилади Муҳаммад Али Бухорий таржима қилган «Зафарнома»да. Шунингдек, ҳазрат Соҳибқирон Ҳиндистондан қайтишда

ҳам бу жойда тўхтаб (10 март), ўз хурматини изҳор этади: «Соҳибқирон келиб, кўфрукдин ўтуб, тушгача анда тушиб ўлтурди».

Неча юз йиллар олдин воқе бўлган бу саъй-ҳаракатлар орадаги вақт масофасини енгиб, бизга сассиз-садосиз гўзал тарихни сўзлайди. Табиатида қаҳрамонлик ва жасоратни қадрлаш ҳисси бўлган, ўзи ҳам қаҳрамонлик ва жасоратда тенгсиз зот умрнинг шиддатли лаҳзаларига гувоҳ бўлган заминда туриб, балки ўтган кунларни, озодликнинг машаққатли йўлларини кўз олдидан ўтказгандир, балки ўз аждодининг аянчли қисматини эслаб, умр мазмунини тарозига қўйгандир, бироқ бир нарса аниқки, ўша лаҳзаларда Соҳибқироннинг тафаккурида ва тасаввурнида Жалолиддин тимсоли пайдо бўлган, у билан хаёлан учрашган, балки бу дийдорлашув ўзаро рози-ризолик кайфиятида ўтгандир, балки Султон ўз халафи (ўринбосар авлоди) Амирга Турон заминининг шұхратини янада юксалтириш йўлида ўз истакларини изҳор қилгандир... Нима бўлганда ҳам шундай руҳдаги мулоқот бўлиб ўтганига кишининг ишонгиси келади. Зеро, Амир Темур тузган салтанат теран илдизга асосланган эди, унда Тўмарис, Широқ, Спитамен, Муқанна сингари Туронзаминнинг шерюрак баҳодирлари орзу қилган эрк ва озодлик руҳи мужассам эди. Ана шундай руҳ амалда пароканда бўлиб кетган давлатнинг тимсолига айланган Султон Жалолиддинга ўн йиллар давомида куч бериб турди ва у озодлик йўлида сўнгти нафасигача курашди. У 33 йил умр кўрди. Ўз мақсади йўлида қаттиқ жидду жаҳд қилган бўлса-да, унга толеъ кулиб боқмади. Балки Салжуқийлар билан зиддияти, ўз қондошлари билан тил топиша олмагани уни номурод этгандир. Соҳибқирон Амир Темур эса бу таҳликали кунларга чек қўя олди. Ватанни озод этиб, унда 35 йил музafferона ҳукмронлик қилди, шу даврда 27 мамлакатни бирлаштириб, улкан салтанат яратди. Бобомиз асослаган давлат қарийб олти аср тарих саҳнасида событ турди...

Ҳа, Синд дарёси, ундаги Нилоб кечуви (гузари) икки буюк саркарданинг мангу хотирасига ўхшайди. Кейинчалик бу йўллардан Заҳириддин Муҳаммад Бобур юрди.

Инсон болаларига кўп-да насиб этавермайдиган фазилат эгаси — Эрк ва Озодликка қалби ташна булган Бобур уз истаги йўлида «Ҳинд сари юзланар» экан, бу юртнинг қай бир гўшаларида ёвқур ватандошларининг изи қолганини биларди. Ўзининг машхур асари — «Бобурнома»да турли муносабат билан Синд дарёси (суюи)ни 15 ўринда қайд этиб ўтади: «Синд суйининг уч гузаридан ўтиб, бу йўллар била келурлар. Нилоб гузаридин ўтганлар», «Синд суйини ёқалаб, сув қуига боқа кўчулди», «Қобул суви била Синд сувининг қотилишидин қуйироқ кўҳна Нилобдин юққорроқ...», «Карк... Синд суви жанглларида... қалин бўлур» каби ва бир рубоий:

Юз шукр де, Бобурки, кариму ғаффор
Берди сенга Синду Ҳинду мулки бисёр.
Иссиклигига гар санга йўқтур тоқат,
Совуқ юзини кўрай десанг Ғазни бор.

Ҳам шукронга, ҳам изтироб ифодаланган бу рубоий Бобурнинг Ватан соғинчи ила ёзилган дардли шеърларидан бир намуна, Бобур ўз ижоди, ватанпарварлиги билан халқимизники, озод юртимизницидир. Бу ҳукуқни бизга аждодларимиз минг йиллар оша орзу қилиб келган Мустақиллик хатлаб берди. Истиқлол кўплаб қадриятлар қатори халқимизнинг буюк фарзандлари қадрини жойига кўйди. Агар бир замонлар уларнинг номини тилга олиш ҳам тақиқланган бўлса, мустақил юртда уларга муҳташам ҳайкаллар тикланди. Юртбошимизнинг ташаббуси билан Жалолиддин Мангуберди таваллудининг 800 йиллиги, Амир Темур таваллудининг 660 йиллиги, Бобур Мирзо таваллудининг 510 йиллиги халқаро доирада кенг нишонланди. Ватан озодлигидек буюк ҳикмат кўплаб шарафли аждодларимиз қатори тақдири бир-бирига анча ўхшаб кетадиган бу уч нафар бобомизнинг бошини ҳам бир жойга қовуштириди. Яна уларнинг чамбарчас барҳаёт руҳи озод юртимиз ҳудудларини ҳам ягона жисм сингари бирлаштириб турганга ўхшайди: агар Жалолиддин Мангуберди фарбий ҳудудларимиз рамзи бўлса, Бобур Мирзо шахсида шарқий вилоятларимиз мужассамлашган, Соҳибқи-

рон Амир Темур эса бу яхлит асарнинг қалбини ташкил этади.

Мустақил юртимиз гербидаги Ҳумо қуши акс этган. Бу жуда чукур маънога эга. Агар мен рассом бўлсайдим, шундай бир улкан полотно яратган бўлардим. Унда Ҳумо қуши тасвири узоқдан кўриниб турар, унинг бағрида — бир қанотида Султон Жалолиддин, иккинчи қанотида Заҳириддин Муҳаммад Бобур ва, албатта, ўргада Соҳибқирон Амир Темур жой оларди. Ва, шубҳасиз, бу манзарани мустақил юртимиз — Ўзбекистон харитаси безаб турарди. Эҳтимол, бу сурат тарих, бугун ва келажакнинг энг мукаммал ифодаси бўларди.

2008 йил, март-апрель

Мансубият

МУДРОҚ ҚОЯЛАРНИНГ УЙФОҚ ЮРАГИ

«... Йигирма икки ёшга тұлғанимда...
мадрасада бирта ўқыган йигитлардан
қирқ қишини түплаб маслаҳатлашдим
ва Аррафот тоғига аскар тұпламоқчи-
лигимни айтдым».

Амир ТЕМУР. «Зафар үйүли»

Хисор бошидаги Муқанна гори
Минг йиллик тарихинг сүзлар, әхтимол.

Абдула ОРИПОВ

Бир сафар Тошкентдан Термизга самолётда боришига түгри келган. Бундан роса қувонганман, негаки, ўлкамизнинг жанубий дарвозаси ҳисобланмиш бу шаҳар ҳақида бисёр яхши гаплар эшитган бўлсан ҳам унинг муборак тупроғига қадамим етмаган эди. Тафаккурнинг турли жаб-ҳаларида беназир шуҳрат қозонган, маънавият хазинасида «Термизий» унвони билан дарж этилган ўн икки нафар буюк валломатнинг бешиги шу гўша бўлганлиги ҳақидаги маълумот эса ҳайратнинг ҳар қанақа чегарасини бузиб, ўзга ихлосу зътирофни остин-устун қилиб юборди. Нон-насиба тортса, биринчи навбатда «учинчи халифа» — Ҳаким ат-Термизий мақбарасини зиёрат қилишни кўнглимга туғиб қўйғанман...

Хуллас, бир олам орзу-ҳавасларга тўлиб, янги таассурутлар ишқибозлигига осмонга кўтарилидик. Апрелнинг бошлари, қуёш ҳам чараклаб турибди. Табиатнинг бу илтифотидан кўз ўнгимизда бетимсол манзаралар намоён бўлди: жонажон юрт бағридан қиши зулмати кўтарилаётган, келинчак баҳор майсалар рангида, уйғонаётган куртак оғушида ташриф буюраётган эди. Баланд чўққиларда кумуш қор ялтиллайди, ҳойнаҳой, у жойлар муз ўрами ичиди бўлса керак. Пастроқда эса аллақачон чўлларимизда бошланган бедорлик ҳарорати туфайли эрувгарчилек юзага келган: жилғалар шилдирайди, дарёлар ҳайқиради; бу овозлар самолёт ўкиригини ҳам босиб, иллю-

минатордан ичкарига кираётгандек, йўловчилар қалб гумбазларида акс садо бераётгандек — ҳамма юз очаётган жамолдан лол, бутун вужуди кўз бўлиб ташқарига боқади.

Баъзан қор қўрпасини кўтариб чекинаётган қишининг укувсизлик билан лаш-лушларини сочиб ташлаганига нигоҳ тушади: майнин ғубор учиб юрган бепоён далада тангадек жойларда ғоз тўшидек оппоқ қор қимтиниб турибди. Атроф шунчалар тиник, мунаvvарки, неча минг метр баландликдан ҳам нина тушса кўринадигандек. Ўркач-ўркач қирлар қуршовидаги қўй қўраси қўл етгудек яқин туюлади. Тўлқинлар ичра мўъжаз қайиқни эслатувчи чўпон кулбасидан бурқисиб чиқаётган тутун тухум сиртидаги йўғон чизиқдек аниқ кўзга ташланади... Бу манзара хилват манзилларда умргузаронлик қилувчи одамлар ҳаётини эсга солади Мана, биз қайноқ шаҳарнинг сершовқин идораларида ишлаётган юз чоқли одамлар аср мўъжизаси — темир қанот кумуш қушда олис манзилларга учиб кетяпмиз. Кўнгилда бўлғуси иссиқ дийдорлашувлар иштиёқи. Пастимиздаги бепоён баҳри муҳитнинг қай бир пучмоқларида ҳайҳотдек хонага қамалиб олиб, дайди лашшанинг ташрифини кутиб яшаётгандар ҳам бор-да! Метеорологлар, синоптиклар, чўпонлар. Фикрни чалғитиш учун таниш манзараларни излай бошлайман. Бу пайтда гўзал Самарқанд кузатиб қўяётган, қадрдон Шаҳрисабз кутиб олаётган бўлади.

Чўпон кулбасидан кўтарилган тутун кўнгилдаги қуйқаларни қўзғаб қўйгани бежиз эмас. Ҳув ўша Помир ва Ҳисор тизмалари туташган тоғу тошлар бағрида бир мақон қалин қор қўрпаси остида гафлат уйқусига фарқ бўлганча ухлаб ётиби. Бу ерларда уйғониш майнинг охирларида бошланарди: одамлар ҳўқизга омоч тақиб, бир парча томорқасига чиққанида бирдан ҳамма баҳор келганини сезиб қоларди. Энди бу жойларда сукунат, бўйинтуруққа осилган тиркишдек тиришқоқ тоғликлар юртларини тарқ этиб, чўл қувиб кетганларига йигирма йилча бўлган... Ичдан бир хўрсиниқ келиб, бўғизга тиқилди: қор кетишини зор-интизор кутиб, кейин шу кунга етишгач, оёқяланг ва сарпойчан ирғишлаб, болалик завқига тўлган

Намозгоҳ, Торқул, Чақилда қийқириқлар янграмай қўйганига анча бўлди, энди бу жойлар йил бўйи ҳувиллаб ётади.

Самолётнинг шинам салонида ўтириб, ҳар куни уйқудан туриб ташқарига чиқарканман, кипригим қадаладиган чўқчи — Бовурчини излай бошлайман. Шубҳасиз, уни тоғлар ва даралар уммонидан адашмай топа оламан. Ана, у оломон бошида кўтарилган яловдек шимолдан жанубга ястаниб ётибди. Ажабо, узоқдан қаралганда ма-софалар масштабида у бироз чимирилган қошга ҳам ўхшар экан, ҳа, ўша юртимнинг очиқкўнгил Йигитлари, иболи қизларининг қоп-қора қошларига ўхшар экан. Бовурчининг юқориси (яъни, ялов дастаси тарафи)дан учли чўқцилар пасайиб-пасайиб, бошқа силсилаарга қўшилиб кеттан. Бу худди арранинг тишларини эслатади. Улуғ бобокалонимиз Амир Темур «Ўз аҳвол ва атвори, юруш ва қўнуши, мусолиҳа ва муҳориба юқеъотининг туркий лугот бирлан ёзғон китоби — «Зафар йўли»да (Тошкент, 1992 йил, 39-бет) қайд этилган Аппрафот тоғлари, гарчи китобда ноширлар томонидан, «Қашқадарё воҳасидаги бу тоғ ҳақида маълумотга эга эмасмиз», деб изоҳ берилса-да, худди шу жойлар эканига заррача шубҳам йўқ. Ахир шаҳарларни вайрон қилиш, дарёларни қуритиш мумкин, аммо тоғларни кўчириб кетиб бўлмайдику. Яна рад этиб бўлмас бир далил — ҳалқ орасида ҳам, илмий жамоатчиликда ҳам «Амир Темур ғори» деб юритилган табиат мўъжизаси айнан шу ўрамда, Бовурчининг биқинида...

Мен шу ўринда «ўз ички арз»имни тўхтатаман ва тарихга дахлдор тоғ, ҳувиллаб қолган қишлоқ ҳақида мухтасар ҳикоя қилишга ўтаман.

* * *

Хойнаҳой, Қашқадарёда воҳанинг қўшни Сурхондарё ва бу ёғи Тоҷикистонга тулашиб кетадиган Ҳисор тоғлари бағрида худди денгиз чиғаноғи тубида яширинган марвариддек макон топган Тошқўрғон деган қишлоқ борлигини кўпчилик билади. Йўли тушиб, бу гўшада бир бор қўноқ бўлган киши ҳеч тортинмасдан, «Мен Тошқўрғон-

ни кўрганман», деб мақтаниши ҳам бор гап. Бу ифтихорга боис қишлоқнинг узоқ бир хилват жойда «беркиниб» олгани-ю, унга бориш йўлидаги азоблар бўлса, иккинчидан, бу ерлик аҳолининг бошқа гўшаларда кўп ҳам учрайвермайдиган одатлари, кийиниши ҳатто ўзига хос овқатлари ҳам сабаб бўлган. Қишлоқ азбаройи «кatta ер» дан узоқда жойлашгани, жуғрофий ўрнашувининг ноқулайлиги учун маъмурий жиҳатдан шўро замонида Кўкабулоқ, Қамаши, Фузор, Яккабоғ туманлари ҳудудига киритилган.

Яккабоғ қишлоғининг ўртасидан оқиб ўтувчи Қизилсув (қадимги номи — Сурхоб) дарёсини ташкил қилувчи жилгалар абадий музликлардан бошланади. Мезайғов, Шилхазор, Сартўқай каби турли-туман сирли номлар билан аталувчи даралардан бошланган дарё ўзани Қалъаи Шерон дарасидан оқиб чиқувчи Қалъасуви билан бирлашади ва анча маҳобатли наҳр пайдо қилиб, қуйига йўл олади. Ана шу икки оқим қўшилган нуқтада Тошқўргон қишлоғи жойлашган. Агар уни қиёсан таърифлайдиган бўлсак, сиз тубида гул нақши чекилган жонон пиёлани тасаввур қилинг. Тоғлар атрофини пиёла четларидек баланд ўраб олган ва худди қўлдан ясалгандек, пиёла тубидаги гул — ўша қишлоқ.

Қизилсув дарёси оқимида баланд тоғни тилимлаб ўзига йўл очган. Бу из қишлоқнинг ҳаёт йўли ҳисобланган. Дарё бўйлаб кетган сўқмоқдан роса ярим кун кимсасиз тоғлар ичра тентираб, ниҳоят, одамлар яшайдиган биринчи қишлоқ Тотор («Тоғ тор» бўлиши мумкин)га келишарди. Шу «ҳаёт йўли»нинг ўзи энг мукаммал муҳандислик қурилмасини эслатарди. Дарё ўзига шунчалар тор йўлни очганки, у худбинлик билан иккинчи йўловчи — тириклик илинжила сафарга чиққан тоғликни сиқишиштирмасди. Шу туфайли сув устига шоҳ-шаббалар босиб, кўтармалар қилишга, яланг қояни ўйиб, шоти бойлашта ёки у қирғоқдан бу қирғоққа ўтиб, йўлни давом эттиришга (5—6 чақирим йўлда бир пайтлар 16 та кўприк қурилганини эслашади) тўғри келарди. Йўл азоби қанчалар оғир бўлмасин, матонатли тоғликлар минг йиллар давомида қадрдон юртларини тарқ этмаганлар. Ўзларича бир олам тузиб,

қўшни Вори, Зармас, Қизилтом қишлоқлари билан қуда-андачиликда умр ўтказганлар.

Албатта, бу қишлоқнинг ҳаёти қайсиdir китобларда қайд қилинган бўлиши керак. Афсуски, уларни мутолаа қилиш баҳти ҳали насиб этганича йўқ. Лекин унинг тарихи ҳақида анча гап-сўзлар юради. Кўп нарсаларни қишлоқ номига боғлаб изоҳдашади. Аввало, бундай чекка, хилват жойга одамлар қандай қилиб келиб қолган, деган савол кишини ажаблантиради. Табиий излар эса ҳаёт анча қадимий эканини кўрсатиб турибди: ҳар қадамда мух (тошни эритиб темир олишда пайдо бўлган чиқинди)ларга дуч келиш мумкинки, бу тараққий этган ишлаб чиқариш белгиларидан нишона. Айрим кексалар: «Бизнинг отабоболаримиз асли балхлик бўлган», деб нақл қилса, баъзилари: «Аждодларимиз Афғонистоннинг Тошқўргон шаҳридан бу ерларга келиб қолган», деб ҳам айтишади. Ана шу тахминларда жон борга ўхшайди. Негаки, бу ердаги одамлар туркийларнинг қатағон уруғига мансуб эди.

Очиғи, бу масалада аниқ манбага суюнмай бирор нарса дейиш қийин. Қолгани элишунослар, тарихчиларнинг иши. Ҳар ҳолда Ватанимиз харитасида кичкина нуқтани ташкил этувчи бу жойнинг ўтмиши батафсил ўрганилса, маданий, иқтисодий алоқалар тарихининг янги бир жиҳатига ойдинлик киритилган бўларди.

* * *

Йиллар карвони манзилларда қайсиdir кўринишида белгилар қолдиради. Мабодо, бутунлай сукунат чўмган пайтлари борлиққа кулоқ тутилса, злас-элас овозлар эшитилгандек бўлади. Бу, балки минг-миллион йил олдинги суронларнинг акс-садосимикин? Ёки биз тобора мавҳумлашиб бораётган ўтмиш суратини гавдалантиришда афсона ва ривоятларга ружу қўйиб, уларнинг бугунги ўлчам ва тасаввурларга сифмайдиган «чин-ёлғон»ларига ҳам ўзимизни ишонтирамиз. Аслида, билиш тадрижи, маърифат йўли ҳам шу эмасми?

Маълумки, ер юзининг ҳар бир қаричига ўзига мос ном қўйилган. Тошқўргондан чиқиб Бовурчи томон бориша «Дулдулнинг изи» деган қир бор. Болаларнинг бу

ҳақдаги сўроқларига катталар: «Шу жойда чорёрларимиздан ҳазрат Алиниңг отлари изи қолган», деб жавоб беришарди-ю, масаланиңг бошқа томонлари — ҳазрат Али жаноблари нега бу тарафларга риҳлат этганилар, тошда изи қолган от қанақа жонивор бўлган ва бошқалар «очик» қолаверарди. Аслида, бу маҳаллий одамларнинг фикри ожизи бўлиб, гап бошқа ёқда эди. Қирнинг пастида дарёга қўйилиб тушган текис камар бор. Унда ҳақиқатан катталиги баркашлек келадиган излар муҳрланиб қолган. Улар 23 та бўлиб, излар ораси 1,2—1,5 метр. Тошда панжанинг бўртиқлари, чуқур ботган тирноқ ўринлари аниқ билинади. Бу ростдан ҳам ерда ҳаёт пайдо бўлишининг ўрта даври — Мезозей эрасининг Юра ва Бўр палласида яшаган динозаврлар изи. Фанда аниқланишича, лавалар қотиб тошга айланадиган, сувлик чекинаётган даврда Тетис океани қирғоқлари Ҳисор тоғлари этакларини ювиб турган. Бу ҳолат ўтган асрда эмас, балки бундан 70—100 миллион йил (!) олдин бўлган. Агар сиз миллион йилларни ўз нигоҳларингизда қамраб олмоқчи, дунёнинг қадимлигига «жонли» шаҳодатни ўз кўзингиз билан кўрмоқчи бўлсангиз, марҳамат, виқорли Ҳисор бағрига йўл олинг. Одамзод бу қадим борлиқда нисбатан энг ёш «мехмон». Бунгача ҳам тўтарак жаҳон қанча сиру синоатларни кечирган. Асрлар дунё китобида бир-икки қаторни ташкил қилиши мумкин.

Вақтнинг тошдаги изларини тавоф қилинг-у фақат, илтимос, сафарингизни шу ерда якунламанг. Яна куч тўплаб бир силтаниб, қирдан ошсангиз, буюк бобокалонимиз Амир Темурнинг навқиронлик йиллари кечган маконни кўрасиз.

Ҳақиқатан, Тошқўргоннинг мангуликка дахлдорлиги фақат динозавр излари эмас, унинг энг катта ифтихори — Буюк Темур билан эшлигига, яқинлигига. Дунёда маърифатсизликдан ортиқ жаҳолат йўқ! Карами кенг Аллоҳ тавба-тазарруни кеч бўлса ҳам қабул қиласи мумкин.

Тарихий манбаларда Соҳибқироннинг ўсмирилик, йигитлик даври ҳақида жуда кам маълумот берилган. Муштариylар ул зоти шарифни бирданига яроқланган лашкарларга бosh ҳолда жанг жадаллар саҳнасида кўрадилар.

Табиий савол туғилади: ўз маҳорати ва жасорати билан рақибларини лол этган қўшинга қаерда тартиб берилган? Жавоб ҳам табиий: албатта, душман кўзидан пана, чекка бир жойда. Бу лашкаргоҳ ҳақида бобокалоннинг ўзлари эътироф этган эканлар: Аппафот тоғи, Амир Темур гори ва динозавр изи бор ўрамда.

Аппафот тоғидаги баланд чўққи — Бовурчи. Бу сўзни баъзи луғатларда «ошпаз» деб изоҳлашган. Қизиқ томони шундаки, мазкур чўққининг адогида «Ошхона» деган зиёратгоҳ жой ҳам бор. Ошхона тепаликда жойлашган, тош ўгириб қалоҳ қилинган, яккам-дуккам ёғочлар қадалиб, бирига, табиийки, туғ осилган. Одамлар шу жойда жонлиғ сўйиб қурбонлик қилишар, тунашарди. Айрича томони шундаки, бу ерда одам ўз тақдирни ҳақида фол очиши мумкин. Бунинг учун тош ўюмлари олдига борилади-да, маҳсус кавакдан қўл тиқиб илинган нарса олиб чиқилади. Агар дон-дун чиқса — деҳқон, жун чиқса — чўпон бўласан, қабилида таъбир қилинган. Эзгу одатларни халқ йиллар давомида эъзозлаб келади. «Тузуклар»да ҳаётини тақдир ҳукмига ташлаган жаҳонгир бобомиз турли ҳолатларда фол очганларини қайд этадилар. Ошхонада фол очишдек латиф одат ҳам бобокалондан қолган мерос эмасмикан, деган андиша хаёлдан ўтади.

Табиатнинг бетимсол ижоди бўлган бу жойлар денгиз сатҳидан 3—4 минг метр баландликда. «Тоғ султонлари» — арчаларнинг ҳам нафаси етмай, қўлларини ёзганча қуйида қолиб кетган бундай юксакликларга кўтарилиган киши ўзини нақадар улуғвор сезади, бори олам устидан ҳукмдорлек ҳис қиласи. Қуйидаги барча нарсалар — шаҳарлар, дарёлар ўз мулкига айланиб қолгандек, амрига бўйсуниши шартдек бўлиб қолади. Дунё чопқинидан ҳоримаган, умрини от устида ўтказиб, тинимсиз аъмолини излаган улуғ бобокалонимиз катта ҳаётга қадам қўйиш арафасида юксак тоғлар бағридан қуйига назар ташлаб, шундай ҳисларни қайта-қайта туйгандек бўлгандир, юрак ҳапқириқлари, ўртанишлари билан руҳиятта кўчган сезги, балки бир умр ул зотга енгилмас куч ато этгандир. Ҳар ҳолда «шерлар тўдаси»га етакчилик қилиш, дунёning ярмини бир туғ остида бирлаштириш ва бошқа мислсиз

баҳодирликларнинг манбаси ҳақида ўйлаганингда, ҳар бир унсурдан сир-сеҳр излайверасан.

Агар Бовурчининг энг баланд чўққисига чиқиш истаги бўлса, бўғинларда мадор етарли, юрак панд бермаса, марҳамат. Зиёратга сиз билан борган кексалар оқ йўл тилаб қолишиди, этакни бар уриб, типпа-тиқ қояга дейарли ўрмалаб йўл оласиз. Чўққилар осонликча бўй бермайди. Кўл етгудек туюлган жойга чиққунча 6—7 соат вақт кетади. Илон изи сўқмоқ сақланиб қолган. Атрофда мўъжиза — анвойи ҳидлар, турфа ўсимликлар. Гоҳ каклик чақ-чақлаб қолади, гоҳ инидан чиқиб турган суғурнинг масхараомуз чийиллаши ҳушёrlитингизни оширади. Ниҳоят, керакли баландликка кўтарилигандан кейин ҳам чўққига етгунча яна бир чақириллар йўл босиб, қоянинг орқасига ўтилади. Яна қирлар, чўққилар — дунёning туби кенг экан-да! Бу жойлар — абадий қор салтанати, бу йилгиси эримай, янгиси тушади. Текисликда ҳарорат энг юқори даражага етган пайтда қор орасидан куртлар қимирилаб қолади. Йўлда яна бир қизиқ одатта дуч келасиз: қўл етмас чўққига кўтарилиган киши тошни тикка қилиб, қариндошларига, яқинларига рамзий «қабр» тиклар экан. Одатда, касал ётган, омади чопмаётган ёки энг яхши кўрган кишисига шундай «марҳамат» кўрсатиларкан. Аёвсиз шамоллар илма-тешик қилиб ташлаган тошлоқда сўппайиб турган кўплаб «қабр»ларга кўзингиз тушади. Ниҳоят, энг юқори нуктага етиб келасиз. У жойда атрофи тош билан иҳота қилиб кўйилган зиёратгоҳ — авлиёнинг қабри ўрин олган. Чўққининг энг четидаги тошқалоҳдан нарида бир қадамча ер бор, нарёқи тубсиз жарлик. Агар юрак бетласа, уч марта айланиб, тошларни кўзга суртиб тавоғ қилиш керак экан. Ўшанда мен 17—18 ёшли ўсмир жар лабида туриб, чўчимай атрофни кузатганман... Раҳматли Қарши бобо оят ўқиган, иниси уста Кўчқорга ўғил фарзанд тилаганди. Орадан бир-икки йил ўтиб, уста ростдан ўғилли бўлди.

* * *

Бир ёзувчи: «Таассуротларим сўзга сиғмайди, уни мусиқада ифодалаш керак», деган экан. Юрт манзарала-

рини имкон қадар тасвирлашга ҳаракат қиларканман, унинг бутун латофатини қоғозга тушириш имкони йўқлигига ишониб боряпман. Дарж этилганлар эса зора қалбингида иштиёқ уйготиб, сиз ҳам шу жойларни кўриш фикрига келиб қолсангиз. Агар қадамингиз етса, сиз ҳам бу гўзаликка асир бўлиб қоласиз. Яна ва яна кўришни қўмсайверасиз. Зеро, бу жойларнинг дўстлари қанча кўп бўлса, шунча яхши.

Яна Ошхонага қайтамиз. Тушлик қилиб, костюмингизни елкангизга ташланг-да, хиргойи қилганча жанубга қараб йўл олинг. Нигоҳингиз ёввойи пиёз — ганговуллар қоплаб ётган ўлангзор, жилдираган ирмоқлар, паст бўйли буталар — читир, шувоқ, паритлар аро яна бир мислсиз мўъжизага дуч бўлади. Тўғри, унга эришиш осон эмас, қор кўчкилари ювиб кетган сўқмоқдан эмаклаб, қояга тирмашиб пастга қараб жилишга тўғри келади. Биз Амир Темур горига йўл оламиз. Агар унга Қалъасуви ёқалаб келинса, Қалъаи Шерон дарасидан юқорига қўтарилади. Бовурчидан келинса, пастга тушилади.

Фор энг совуққон одамлар назари билан баҳо берилганда ҳам такрорланмас мўъжиза. Уч қаватли иморат баландлигидаги кириш қисмida 50—60 киши жойлашадиган супа, ичкарисидаги турли белгилар бу ерда узок муддат одам яшаганини тасдиқлаб турибди. Тарих китобларида қайд этилганидек, босқинчиларга қарши ҳаёт-мамот курашига отланган қасоскор — Ҳошим ибн Ҳаким — Муқанна шу ерда паноҳ топган. Таърифи сўзга сиғмайдиган буюк бобомиз Темур мислсиз зафар йўлининг ибтидосини шу макондан бошлаган. Ватан озодлиги, миллат шарафи қалбida машъал бўлиб ёнган боболарга бошпана бўлган тупроқ, сенга таъзим ва тасанно!

Душман кўзидан пана бу жойлар ҳақиқатан табиий ҳарб майдони. Бир кўришдаёқ бу ерларда машқлар ўтказилгани, лашкарлар чиниқтирилганини — забардаст ҳарбий салтанат юзага келтирилганини ҳис қилиш қийин эмас. Кенг майдонлар, лашкарлар ҳайқириғидан гувоҳлик бериб турганга ўхшайди.

Қодир табиат яратган ҳайрат мамлакати, улуғ тарихий воқеалар бешигининг таассуротларидан ситилиб чиқиб, қўйига, одамлар оламига йўл оламиз. Истиқболимизда бўғотнинг тагида тиззасини қулоқлаганча отасининг шаҳардан қайтишини кутаётган хоксор, ёқаси тушган боладай мунғайтан қишлоқ — Тошкўргон пайдо бўлади. «Кўй бир тери ичиди неча марта озиб, неча марта семиради», деган гап бор. Каттагина нуфусни бағрида жойлаган бу гўша ҳам бошидан қанча сиру савдоларни ўтказган.

Шундай қилиб, бу ерга одамлар қандай келиб қолгани ҳақида аниқ маълумотлар йўқ ҳисоби.

Диний илмларнинг зукко билимдони мулла Раҳматулло (Худо раҳмат қилсин) билан сўнгги суҳбатимизда ул зот: «Қишлоғимизнинг урф-одатларини исломдаги турли тариқатларга солиштириб чиқдим. Бизда асл исломий одатлар қарор топган. Бу улуғ диндор алломалар ўтганидан далолат беради», деган эди. Фаразан айтиш мумкинки, тоғлар орасидаги бу жонли нуқтада барқарор, қўйма турмуш тарзи қарор топган, унинг гўзал ўтмиши бўлган.

Кексаларнинг эслалича, қишлоқда шўро тузумини қабул қилиш қийин кечган. Қолаверса, истибододга қарши кўтарилиган ҳалқ исёни — «Қоракалтак» номи билан юритилувчи уруш ҳам шу тоғлардан бошланган. Алоҳида муфассал тадқиқот мавзуи бўлган бу ҳаракат ҳақида муҳтасар гап шуки, у рус босқинига қарши бўлган. Ва кейинчалик ҳам давом этган миллий озодлик ҳаракатлари даврида Тошкўргон қўрбошиларга макон бўлган, кўнгилли йигитлар улар сафида туриб курашган. Хотира-ларнинг гувоҳлик берилича, «кўнгилли»лар қишлоқ аҳлига асло зарар етказмаган, саховатли бойлар ўз хазиналаридан уларга солик тўлар, одамларнинг «қўтири улоги»га ҳеч ким тегинмаган. Шўро аскарларининг қишлоққа кирганини, қайси ҳовлида яшаганини, катта сайхонлик — Кўлдашида ҳарбий машқлар ўтказганларини аниқ хотирлашади. Шевада ҳозир ҳам «атрад» (отряд), «пехут» (пехота) каби сўзлар ўрнашиб қолган. Кейин шовқин-сурон билан колхозлаштириш бошланган. Хусусий мулк: жувоз, тегирмон ва бошқа ишлаб чиқариш воситалари умумлаштирилган.

Каршилик кўрсатганларга катта солиқлар солиниб, «синдирилган». Ҳикоя қилишларича, бир кишининг еттига тегирмони бўлиб, солиқнинг юкини кўтара олмай, олтиласини бузиб ташлашга мажбур бўлган. «Авлод-аждодимдан хотира» деб бирини айлантириб турса ҳам яна солиқ солишаверган. Жуда абгор бўлиб кетганини кўрган ҳам-қишлоқлар бунисини ҳам бузиб ташлашини маслаҳат берришса, ўжарлик билан: «Бузмайман. Ё мен енгаман, ё шу хукуматинг енгади», деган экан. Табиийки, у одам «кулоқ» бўлиб кетган.

Ўз лекчасини баҳоли құдрат қайнатган бу «кичик мамлакат» уруш йиллари ҳам кўп талафот кўрмаган, дейишади. Аксинча, «Тошқўргоннинг тупроғи ҳам буғдои бўлиб кетибди», деган гап тарқалиб, оч-юпун қолганлар тирикчилик илинжида шу ерга чиқиб боргандар...

Бизнинг болалигимиз онамиздан «колхоз» йилларининг бешафқат меҳнати ҳақидаги ҳикояларни тинглаб кечтан. Эҳтимол, бу мўлчилик ҳам қанчалар қиз-жуонларнинг хазон бўлган ёшлиги, қамчи остида қирчанғи бўлиб қилган меҳнати эвазига қўлга киритилгандир. Урушдан кейин катта ўзгаришлар бўлган. Довуд деган уста (у сиёсий маҳбус ёки фронтда қўлга тушган асир бўлган, шу чекка қишлоққа сургун қилинган) бошчилигига электр станцияси қурилган, белкурак ва кетмоналар билан «катта ер»га автомобиль йўли олиб чиқилган, мактаб, шифохона барпо этилган, ҳатто қишлоқ радиолаштирилган. Бу ўзгаришларнинг бошида турган марҳум раис Мамарасул Аҳмедовни ҳамон мамнуният билан ёдга олишади.

Хўш, қишлоқнинг бугунги куни қандай? Афсуски, бир нарса дея олмайман. Тошқўрон бугун жойида йўқ, у кўчирилган.

... Колхозларни совхозларга айлантириш тадбири ўз микросферасига эга бўлган бу жойда ишсизликни келтириб чиқарган. Кейинчалик Қарши чўлинни ялпи ўзлаштиришга киришилгани бекорчилиқдан безор бўлиб юрган одамларни оҳанрабодек ўзига торта бошлаган. 1976 йилда вилоят ижроия қўмитасининг маҳсус қарори билан қадимий қишлоқ ҳозирги Касби туманига кўчирилган. Албатта, минг йилларни кўрган маконни ташлаб кетиш осон

кечмаган. Уч-тўрт ойда қишлоқ бутунлай ҳувиллаб қолган. Бундай оғир йўқотиш мавжудотларга ҳам ёмон таъсир қилиб, қушлар азалий яшаш жойларини тарк этган, йўллар беркилиб, кўприклар бузилган. Кейинчалик эгаларидан айрилган итлар, мушуклар ёввойилашиб, одамларга ҳужум қилгани ҳақида гаплар чиқди.

Арча ёғочидан тикланган баҳаво иморатлар ўз ҳолига ташлаб кетилган. Бу жойни очиқ музей тарзида шу ҳолда сақлаш таклифлари ҳам бўлган. Ҳатто Шароф Рашидовнинг топшириги билан таниқли кинохужжатчи Малик Каюмов қишлоқни тасвирга ҳам олган. Лекин бу саъй-ҳаракатларнинг давомидан бехабармиз.

Нима бўлганда ҳам бу «оммавий қўчиш» бир ёқлама тадбир бўлғанлигини ҳаёт кўрсатаяпти — қишлоқни сақлаб қолиш керак экан. Айнан шу воқеа хусусида Олий Кенгашнинг XI сессияси ҳужжатларида шундай қайдлар бор: «Қашқадарёнинг Шаҳрисабз, Китоб, Яккабоғ зонасида жуда зўр ерлар бор. Ёнида ўзлаштириладиган ерлари бўла туриб, Яккабоғдаги ишсиз юрган одамларни Туркманистон чегарасидаги ерларга кўчириб юрибмиз...» («Ўзбекистон — келажаги буюк давлат», 53-бет).

Гарчи қишлоқ кўчирилган бўлса-да, табиатнинг беназир гўзаллиги ўз ўрнида турибди. «Оқсан дарё оқмай қолмас» деганларидек, бир пайтлар ойлаб тўй-тантаналарга гувоҳ бўлган, ўзига хос файз-баракали масканда яна ҳаёт жонлана бошлишига ишончим қатъий. Бу жойда дунёда тенгсиз оромгоҳлар барпо қилиш мумкин. Ахир мустақил Ўзбекистон давлатининг ўз Крими, Сочиси, Ялтаси бўлиши керак-ку. Ёки ер қаърида яширинган тошкўмир, каолин, вольфрам, кварц қуми, қизил мармар, сочма тарздаги олтин ва бошқа бойликлар ёш мамлакатимиз истиқболига хизмат қилдирилиши лозим. Бу ерда «Қизил китоб»га кирган юзлаб ўсимлик ва ҳайвон турлари сақланган. Тупроқнинг табиий таркиби картошкачиликни йўлга қўйишга имкон беради. Қолаверса, картошкадан ҳозиргача ҳам мўл-кўл ҳосил олиб келинмоқда. Бундай хазиналарни қўлга киритишнинг энг катта ташвиши — қишлоққа доимий қатнайдиган автомобиль йўли олиб бориш. Шунда беихтиёғ хаёлга афсонавий Фарҳод келади.

Қани, у мўъжизакор тешаси билан пайдо бўлиб қолсада, дарё бўйлаб кетган 25—30 чақирикли чўнг тоғни сариёғдек кесиб, йўл очса! Иншооллоҳ, замонамиз Фарҳодларининг ақлу заковати, мўъжизакор меҳнати билан афсоналар ҳақиқатга айланса ажаб эмас.

Ўзликни англаш, бу — ўз юртини, оёғи ерга тегиб турган заминни танишдан бошланмайдими? Узоқ йиллар хукм сурган номақбул тартиблар туфайли ҳатто ўз бешигимиздан ҳам йироқлашиб кетдик. Унинг мунгли ингрокларига қулоқ тутмадик, оғриқларига малҳам бўлиш, шаъни-шавқатини улуғлаш ўрнига узоқлардаги «жаннат»-ларга кўз тикиб яшадик. Тошқўрғон қишлоғи ҳам ана шундай ҳавойиликнинг қурбони бўлди, унинг табиий гўзаллиги, тарихий мавқеи писанд қилинмади. Бугун улуғларимизни бошимизга кўтараётган, уларнинг қадам изларида гуллар ундираётган эканмиз, бобокалонимиз буюк Амир Темурнинг мангубарҳёт шавкати бу хилват гўшада ҳам акс садо беражак, мудроқ тоғларнинг мангубураги абадий уриб туражак!

Мен улуғ ва қудратли мамлакатнинг бир кичик нуқтаси ҳақида жиндай ҳикоя қилдим. Ҳолбуки, унинг ҳар бир қаричи гўзалдан-да гўзал тарихга эга. Айтинг, ана шундай Ватанни севмаслик мумкинми? Йўқ!!!

Ватан! Қучай десам кулочим етмайди.

Ватан! Сени меҳрли нигоҳларим билан кучаман!

1993 йил, ноябрь

АРРАФОТДА ҚУТЛУҒ ИЗ БОР

1992 йил Амир Темур Кўрагоннинг ўзи тартиб берган таржимаи ҳоли — «Зафар йўли» нашр этилганди. Унда, жумладан, шундай сатрлар бор: «Йигирма икки ёшга тўлганимда Ҳожи барлос билан иттифоқлашиб, амир Қазағонга қарши қўзғолон кўтаришга қарор қилдим. Мен билан мадрасада бирга ўқиган қирқ кишини тўплаб маслаҳатлашдим ва Аррафот тоғига аскар тўпламоқчилигими-ни айтдим» (39-бет). Шу саҳифа охирида Аррафот тоғи тўғрисила «Кашқаларё воҳасидаги бу тоғ ҳақида маълу-

мотга эга эмас»лик кўрсатилган. Бу ҳолта ажабланмаса ҳам бўлади. Ҳисор тоғ тизмаларида, қирларида, сой ва текисликларида Темур ва Темурийлар билан боғлиқ ўринилар кўплаб учрайди. Бироқ мен суриштирган турли касбдаги кишилар Аппрафотни изоҳлай олмадилар.

Бир куни таҳририятга кичик жуссали, нуроний чол кириб келди. Суҳбатимиз қовушиб кетди. Ўзбекистонда хизмат кўрсатган фан арбоби Шодмон Камолов 90 ёшни қоралаб қолган, лекин фикри тиниқ киши, кўрган-билганинг анча ҳикоя қилди. Отакон ҳозирги Қашқадарё, Сурхондарё ва Бухоро вилоятлари ҳудудини бирлаштирган Бухоро округи тузилган 1938 йилда ёшлар ташкилотининг саркотиби бўлиб сайланган, хизмат юзасидан Қашқадарё томонларга, жумладан, бизнинг чекка тоғ қишлоғимизга ҳам борган экан. Кейинчалик илм-фан билан шуғулланиб, ТошДУнинг жуғрофия факультетида маъruzалар ўқиганлар. Ҳусусан, жой номларининг келиб чиқиши ва маъноси ҳақида тадқиқотлар олиб борган.

Бирдан хаёлимга «Аппрафот» тушиб қолди.

— Геологлар тилида баъзи атамалар бўлади, — дея гап бошлади суҳбатдошим фикримни илғаб. — Олайлик, текис тоғларни — «садтоғ», тик тушган, қирқилгандек бўлса — «девортօғ», тия ўрқачларига ўхшаса — «уркунжатօғ», учли, қиррали, аррага ўхшаш тоғларни эса «аррафот» (Арафот эмас) деб атайдилар.

Аппрафотнинг Маккай мукаррамадаги Арафот водийсига дахли йўқ экан. Ёдимга «Масҳара» деган чўқчи номи тушиб, унинг мазмунини сўрадим.

— «Масҳара» эмас, «Машҳара», — изоҳ бердилар. — Машҳараларда кузатувчилар турган, душманнинг қайси томондан келаётганини машъал ёқиб хабар берган...

Кўз олдимда ёрқин бир манзара намоён бўлиб, гўё мозийдан хабарлар келаётган, тошга айланган хотиралар жонланаётгандай эди. Машҳара чўққиси Тошқўрон яқинидаги маълум ва машҳур Амир Темур горининг қаршиисида. Агар гор жойлашган Қалъяи Шерон дарасини тортилган камон десак, Машҳара камоннинг ўқига ўшайди. Бу жойдан жанубдаги Чакчак дараси-ю, шимолдаги Тахтиқорачагача кўринади, десам лоғ бўлмас. Ана

шундай қулай жойда кузатувчилар қўйилиши шак-шубҳасиз. Демак, арага ўхаш тоғлар ҳам шу атрофда бўлиши керак.

1991 йил август ойида «Амир Темур ўтган йўллар бўйлаб» сафар қатнашчилари бу жойларда бўлган, шунда бъязи суратлар олинган. Шулардан бири диққатимни тортди. Шимолга томон қиялаб кетган тоғ чўққилари худди арранинг тишларига ўхшайди. Яна бир мұхим маълумот — Амир Темур гори ҳам шу чўққининг жануб тарафида жойлашган. Ҳалқ тилида «Бовурчи» деб аталувчи бу чўққи атрофларида текис майдонлар, ҳувиллаган даралар кўп учрайди.

Мулоҳазаларимни баён қилиб, суратни кўрсатганимда, йирик тарихчи олим Бўрибой Аҳмедов: «Бу — ҳақиқатга жуда яқин маълумот» дедилар. Ростдан ҳам ҳали Амир Темур билан боғлиқ сир-синоатлар кўп. Ўша гор, Аппафот тоғи, унинг атрофлари деярли ўрганилмаган. Ахир мўғул истиблодини синдирган, тарихда буюк давлатга асос солган суола қандай манбалардан куч олди? Шу хилват тоғ бағирларида тошни эритиб, оҳан олишдан қолган чиқиндиларга ҳар қадамда дуч келасиз. Балки Соҳибқироннинг қурол-яроғ ясадиган устахоналари шу овлоқ жойларда бўлгандир?

1993 йил, июль

ТОҒЛАРГА ТИКИЛГАН ЭЪТИҚОД

Ҳисор тиэзма тоғларининг турли дараларидан бошлинувчи Оқсув ва Тамшуш дарёлари неча соҳилларни ювиб, Ҳисорак қишлоғи яқинида «кўришадилар». Дарёлар туашган жойлар хосиятли ҳисобланади, дейишади.

Доим ўйчан, ҳатто бироз хўмрайган камарлар жигаридан сизиб чиққан зилол сувлар қўшиқ айтиб, айқирганча қўшилган нуқта тумшуқдек олдинга туртиб чиққан, унинг манглайида хўжалик идораси — хилват ва қўл етмас тоғлар бағрида яшовчи минглаб одамларнинг тақдирига масъул қароргоҳ жойлашган. Тун қуюқ, шундай бошимизга

осилиб турган қоялардан эса янада қора зулмат уфуради. Кучли чироқлар худди мушукнинг кўзидек йилтиллайди. Саратон офтоби уфуриб турган бўғиқ оқшомлар ҳовузларга чорласа, бу ерда сидирға кийим-бошда ҳам эт жунжикади. Айни пайтда тошларга бош уриб, тўлғаниб оқаётган дарёда чўмилиш эмас, ундан бир ҳовуч сув ичиш амримаҳол: Қирғоқ тик нишаблик, соҳил эса анча пастда.

БУГУННИНГ МАНЗАРАСИ

Шаҳрисабз туманидаги «Оқсув» жамоа ширкат хўжалигининг Кўл, Фиён, Сарчашма сингари 5—6 участкаси бор. Шаҳрисабзнинг бу олис нуқтаси бир томони Китоб туманига ёнлашса, охири қўшни Тожикистоннинг Панҷакент туманига тувашиб кетган. Қирлар ортига сочилиб ётган қишлоқлар ўз турмуш тарзи, қиёфасига эга, гарчи бир қарашда ҳамма нарса ўхшаш, бир хил туюлса-да, худди уларга элтувчи йўллар турлича бўлганидек, фарқланувчи жиҳатлар ҳам кўп. Бирида одамлар мулласифат, иккинчисида чўрткесар, бошқасида эса жанжалкаш ёки сипойи. Бир қишлоқда, олайлик, тўйда кўпкари чопилса, бошқасида ўртада гулхан ёқилиб, базм қилинади. Ёки бунисида тўй ошини наҳорда тортилса, унисида меҳмонлар тушликда чорланади. Бирида күёвнакарларни кўй сўйиб кутиб олишса, бошқасида тош отиб кузатиб қўйишиади. Бундай рангинлик фақат шу жойларгагина хос эмас, дилкаш ва самимий тогликларни кўз олдингга келтирсанг, қаршингда бутун юрт жамоли жилва қилгандек бўлади. Зоро, минг йиллар давомида ота-боболарнинг хоки-пойини азиз тутиб, узоқ манзилларда муқим яшаб келаётгандар қалбida ҳам улуғ юрт — мустақил Ўзбекистон фурури жўш уради, бу кичик гўшаларда ҳам катта уммонларнинг мавжи бор.

Кўл қишлоғи анча ичкарида жойлашган. Унга дарё ёқалаб кетган йўл билан борилади. Эътибор берганмисиз, бизни манзилларга дарёлар бошлаб боради. Унинг ўзани бўйлаб йўл тушади. Кетаверасиз — кетаверасиз, ниҳоят, тириклик, жон асаридан белги бўлади. Кўпинча Мирзо

Бедил айтганларидек: «Кўзингиз қишлоқлардан олдин қабристонларга тушади». Ниҳоят, одамлар манзилгоҳи — қишлоқларга кириб борасиз. Дарё, йўл, қабристон, қишлоқ. Бу тўрт ҳикматнинг тирикликтин тўрт унсури — сув, тупроқ, ҳаво, олов билан нечоқлик уйғуналиги борикин? Ёки хаёлга келиб қолган бу муқояса шунчаки та-содифмикин? Мен атайлаб «қишлоқ»ни энг сўнггида дарж этдим, негаки тириклик мангу тантана қилиши керак.

Юқорига кўтарилишда фикр чақиндек ишлайди. Зоро, ҳар тошда, ҳар гиёҳда олам-олам сир-синоатлар яшириниб ётган бу масканларда зийрак бўлмаслик мумкин эмас. Тириклик ҳам шунга олиб келади. Тасаввур қилинг — эшакка ўтин юклаб, ўнлаб чақирим узоқлиқдан қадамбақадам имиллаб, бир қучоқ шох-шабба келтирилади, қозон қайнатиш ёки уйни иситиш учун. Бу жуда машақ-қатли юмуш. Ахир эшак жонивор ҳам тирик маҳлуқ, у илон изи йўллардан эркин одимлаши, энг асосийси, минг машаққат билан йигилган ўтин сочилиб кетмаслиги шарт. Тоғлиқ буни қойилмақом қилиб уddeлайди. Мана, йўл четида милтиллаган чироқ кўринди, қандайдир бўғиқ овоз ҳам таралмоқда. Юқоридан шитоб билан келаётган сув оқимиға чархпалак ўрнатишибди, у генераторни айлантиради, шундан ток ҳосил бўлади. Олти волътили кичкина лампочка ўн чоғли кишилар даврасини бемалол ёритиб турибди. Бу ҳам ўзига хос зийраклик.

Ўрта ёшли, баланд бўйли Нурулло aka Сафаров қишлоқнинг «қироли», яъни бригадири. Чайир, ҳаракатлари кескин, югуриб кетаётган қўённи тутиб олгудек шашти бор. У қишлоқнинг бугунидан оҳиста сўзлайди. Бригадирнинг одамлар ишончидан боши осмонда. Тўй-маърака — бу жойларда «тарихий» воқеа, улар бошлиқсиз ўтмайди, ҳатто зиёратчиларга бир кўйни пуллаш қерак бўлса ҳам уни чақиришишади, бориб нархлаб беради. Меҳмонга боришли, шаҳарга тушишли, уй қуришли — барча катта-кичик юмушлар унинг аралашуви, маслаҳати билан бўлади. Ўн йилдирки, қишлоқдошлари унинг измидан чиқишмайди, ўзи ҳам бирорни ранжитгани йўқ. Билъакс, тоғликлар ноҳақликка чидай олмайдилар, уларнинг ҳар бири белбоғида пичоқ олиб юради.

Имон-эътиқоднинг бардамлигини қаранг, бир юз ўттиз хонадонли қишлоқда уч масжид бор экан. Беш вақт нағоз жамулжамликда, ёнма-ён ўқиларкан. Тўйларда етарлича хурсандчилик — ўйин, кулги, томоша бўларкан, бироқ ичимлик қўйилмаскан. Қолаверса, муносабатларда шундай беғуборлик, теварак атрофда шунақа покизалик ҳукмронки, кўнгил чароғон бўлиб кетади, фикрга қутку соладиган, бошни оғритадиган баъзи нарсалар ҳақида ўйлашга ҳам истиҳола қиласан, киши. Дастурхонда — арча ўтинида пишган хушбўй, бўрсилдоқ тандир нони, губор қўнмаган ноз-неъматлар, қошиқ тик турадиган қўйқатиқ, зираворларга тўйдирилиб, димлаб пиширилган мол гўшти, даврада гоҳ жиддий, гоҳ ичакузди гурунг — Кўл қишлоғининг, тоғликларнинг меҳмонга армуғони — шу!

— Биласизми, бошимиз устида Ҳазрати Султон ота турибдилар-а, — дейди руҳ ва қалб поклигини жон-дилдан истаб Нурулло ака.

Қишлоқнинг тирикчилик араваси ҳам бир нави филдираб турибди. Арпа, буғдой, нўхат, картошка экилади, чорваси, бояни бор. Ҳар ҳолда одамлар ишсиз, қўли қуруқ бўлиб қараб тургани йўқ. Лекин кун кечириш осон эмас, буни тушуниш учун ўша жойларда бўлиб, одамларнинг бир кунлик ташвишига шерик бўлиш кифоя. Фақат тоғдек чўнг бардош, киндик қони томган тупроққа оташин меҳр, ота-боболар руҳига садоқат уларни шу жойларда ушлаб туради.

Ўзбекистон — улкан мамлакат. Унда қиш ва ёз «бир пўстин ичиди истиқомат» қиладиган ўлкалар, самога қўл чўзган чўқилару қирғоққа тўш уриб ётган наҳрлар беҳисоб. Албатта, ҳар бир ҳудуд ўз ўрнига қараб парвариш ва эътибор талаб қилади. Насиб бўлса, яқин йилларда бошқа ўрамлар қатори тоғ ва тоғолди ҳудудларида иқтисодий ва ижтимоий ҳаётни жонлантириб юбориш тадбирлари кўрилажак.

Ҳозирча эса бригадирнинг битта орзуси бор: Кўлга телефон тортиб келинсайди. Унинг чекка қишлоқ учун аҳамиятини таъкидлаб ўтиш ортиқча. Яқинда зиёрат мақсадида ташриф буюрган вилоят ҳокими қаттиқ ваъда бериди.

— Раҳбарлар Ҳизр назар одамлар, улар алдамайди, — дейди Нурулло ака оққўнгиллик билан.

Кўлдан Фilonга ўтадиган тўғри йўл бор, ўттиз чақиримли масофада гоҳ тик кўтарилишга, гоҳ текисликда физилаб кетишга тўғри келади. Қатнов кам. 5—6 қир ошиб юрилса-да, бирор хонадон ёки қўналға кўринмайди. Ҳозир чўлларнинг чанги чиқиб ётиби, бу ерда эса ўт тиззадан уради. Ҳамроҳларимиз — маҳаллий раҳбарларга шу ерларда кўтонлар қуриб, чорвачиликни йўлга кўйишга шароитлар борлигини айтдик. Сув бор, ҳатто электр тармоғи ҳам ўтган. Жўяли бир гап бўлмади. Ҳар ҳолда четдан келган одам оғзига тўғри келганини сўйлайверади, жойнинг баланд-пасти эталарига маълум. Нима бўлганда ҳам поёнсиз қирларга боқиб, у ерларда қўй-қўзиларнинг яйраб юрганини тасаввур қилиб, ҳали фойдаланилмай ётган чексиз имкониятлар мавжудлигини ўйлайсан.

Ниҳоят, Filon қишлоғи, аниқроғи, бошқа бригада чегараси бошланди. Бу ёқда бутунлай ўзгача ҳолат. Ўртадаги ариқнинг шундоқ лабидан картошка экила бошланган. Йўл нишаблаб кетади. Атрофда бир хил манзара — имкон бўлган жойда — гиламнинг ўрнидекми, 10—15 сотихлик томорқами — картошка қадалган. Биз тушиб бораётган ҳавзанинг икки томонида, тўғридаги қирларда яшил «ямоқ»лар — картошкапоялар кўзга ташланади.

Filon Қашқадарё тугул, ундан ташқарида ҳам маълум ва машҳур қишлоқ. Кўхна тарихга даҳлорлиги, ўзига хос табиати, одамлари доимо эътиборни тортиб келган, кўрганлар эса унтилмас таассуротлар билан кетганлар. Лекин бу ҳаммаси эмас. Filonни атроф-теваракка машҳур қилган — картошкаси. «Filonнинг картошкаси» деган ёрлиқ воҳада жуда баланд қадрланади. Сир нимада — ердами, сувдами, ҳаводами ёки одамларнинг фидокорона меҳнатидами, ҳарҳолда узоқ йиллардан бери бу шуҳратни ҳеч ким синдира олгани йўқ. Яъни бошқа бир ерда Filonдагидек ҳосил ундирилиб, «одамлар шу соҳани касб қилиб олибди», деб эшитмадик. Эҳтимол, бу табиатнинг саҳоватидир. Варганзада бу ерда битадиган анорнинг сири билан қизиққанимда шундай дейишганди: «Бизда ҳам бир жой борки, энг яхши анор шу ерда бўлади». Буни тоғ

чўққиларидан бирининг кемтигидан эсадиган шамол тўғри шу ерга урилар экан, деб изоҳлашганди.

Картошкачиликни ривожлантириш долзарб муаммо бўлиб турган айни пайтда ҳам филонликлар шовқин-суронсиз мўл-кўл ҳосил етиштиряптилар. Буни тан олмаслик мумкин эмас.

Қишлоқ кун чиқиш тарафдаги текислик томон анча кенгайибди. Уйларнинг томи ялтироқ тунука билан ёпилган, пешайвонли, таги баланд кўтарилиб қурилган. Ҳовлиларда ёз нафаси: кимдир даладан келтирилган хашагини жойлаяпти, бирор хирмон совуриб, донни сомондан ажратмоқда. Филоннинг эски қисми қияликда жойлашган. Жин кўчалар ҳовлиларни ажратиб туради, уйлар эса бир-бирининг нақд устига қурилган. Бу қишлоқ меъморчилигини асалари ижодига бутунлай зид қўйиш мумкин. Агар асалари инлари бир-бирига айнан ўхласа, бу ердаги кулбalarнинг ҳар бири тақрорланмас тарзда, ўзига хос шаклда қурилган. Уч-тўрт қават бўлиб кетган иморатлар учрайди — қиялик жуда тик. Шарқираган булоқ бетон ертўла билан ёпилган, усти эса қариялар чойхонаси. У ўймакор устунларда кўтарилган, шип ва деворларга ҳафсала билан нақшлар ишланган. Айвондаги курсида ўтириб ҳордиқ чиқарамиз, таассуротларни баҳам кўрамиз. Филон (тожикча — нишаблик, қиялик) қишлоғи Искандар Зулқарнайн замонидан қолтан хотираларни ўзида сақлаб келади. Шахрисабз маликаси Кенагасхоним билан боғлиқ ривоятларда, мислсиз гўзаллар гўшаси — Париқўнган гузари ҳақидаги ҳикояларда у тилга олинади. Қишлоқ қирағай мерғанлар, орияти баланд йигитлар, мағрур қизларни вояга етказган. Улар билан боғлиқ жуда кўп ҳикоялар тилдан-тилга ўтиб юради. Завқи баланд, диди ўткир одамларнинг ўзи соз ясаб, ижро этади, қўшиқ кўйлаб, рақсга тушади. Бироқ Филон тугун бўлиб турган ташвишлар ичилда яшаяпти. Шу кунлари бригадир истеъфо берган, қишлоқнинг «эга»си йўқ экан. Негаки, аҳоли сонининг ошиб бориши билан (ҳозир тўрт мингдан кўп киши яшайди) тирикчилик ўtkазиш оғирлашиб бораяпти. Кичик корхоналар очиш, янги иш ўринлари яратиш ҳақида ҳеч ким қайғурмаяпти. Бизнинг назаримизда, Филоннинг

олдинги шуҳратига, одамлар ўргасидаги ҳамжиҳатликка бироз губор қўнганга ўхшайди.

Шу қишлоқда мулла Абдусалом домла деган беназир киши яшаб ўтган (жойлари жаннатда бўлсин!) Ажойиб соҳибкаромат, баркамол илм этаси бўлган ул зот яқинатрофда катта шуҳрат қозонган. Тоғларни текислаб ўтказилган йўл, Мунаввар кўприги ва бошқа кўплаб қурилишлар, хайрли ишлар у кишидан хотира бўлиб қолган. Бугунги кунда ҳам ана шундай яхши анъаналар тикланиши лозим.

Филонда уйдан чиқсангиз, бурнингиз қарийб тоғ тўшига тегади. Бизга асрий қорлар қоплаб ётган чўққи пастидан ўтган девор сиртидаги таранг тортилган соч толасига ўхшаш ингичка изни кўрсатиши. У ариқ бўлиб, 3—4 йил олдин сарчашмаликлар сув танқислигини енгизи учун чўқич ва мисранглар билан қазишибди. Чўнг тоғ қатламини қирқиб, ариқ ўтказиш чинакам матонат эмасми? Қалбда юрт меҳри ловиллаб турса, инсон ҳамма ишга қодир.

МОЗИЙ ШУКУҲИ

Тун яна қуюқлашди, жануб осмонида олис юлдузлар барадла ялтиллайди, қиялиқда жойлашган қишлоқ хона-донларининг яккам-дуккамида хира чироқ милтиллайди, улар осмон ёритқичларининг сувдаги аксига ўхшайди. Кўл қишлоғининг бригадири Нурулло Сафаров ҳали ухламаган экан, икки-уч овоз беришдаёқ болахонадан чиқиб келди. «УАЗ»икка базўр жойлашдик, у адир йўллари бўйлаб юқорига — Ҳазрати Султон зиёратгоҳи остонасига томон гувиллаб жўнади.

Йўл тугаб, меваққат чодирлар тикилган қароргоҳга етиб келганимизда соат тунги ўн бир эди. Бошловчиларимиз вақтни ўтказмай, бу ёғига пиёда кетишни, тунда чиқилмаса кундузи чарчаб қолишимизни, бунинг устига күёш нурлари баданни шикастлаши мумкинлигини қайта-қайта уқтиридилар. Чолонга ўраниб, бошимизни танғиб олганмиз, чарчоқдан асар йўқ. Чўққи тун шафағида қўриниб турар, кўл узатса етгудек эди. Худди кеманинг тум-

шуғидан сирт бўйлаб ортга қайтилгандек, йўналишни кунботар томонга олдик.

Баъзан юртимизнинг тупроғи — муқаддас, ҳар бир қаричи тарих дейилса, буни шунчаки йўлида айтилган мақтov, деб тушунилади. Лекин аслида, бу — ҳақиқат. Биз кўзлаган манзил ҳам фақат тор ўрамда эмас, бутун ислом дунёсида эътиборли жой. У пайғамбаримиз Муҳаммад алайҳиссалом авлодлари тарихи билан боғлиқ.

Ўқиганларимиздан маълумки, пайғамбаримизнинг вафотларидан кейин халифалар — Абу Бакр, Умар, Усмон, Ҳазрат Али ул зотнинг ишларини давом эттирадилар. Сўнгги халифа — Ҳазрат Али Куфа шаҳрида шаҳид қилингач, тариқатда ажралиш бошланади. Кўпдан буён мухолафатда бўлган Муовия Дамашқда бош кўтаради. Ислом олами иккига бўлинади. Ҳазрат Алиниң ўрнига кўтарилган унинг тўнғич ўғли имом Ҳасан жангу жадаллар ва сиқувлар туфайли кейинчалик Муовияга бўйсунади. Орадан кўп ўтмай, имом Ҳасан хотинларидан бири — Жийда томонидан Мадинада заҳарланиб ўлдирилади. Ҳукмдорлик Муовиянинг ёлғиз ўзига қолади. Бироқ Ҳазрат Алиниң кичик ўғли Ҳусайн ҳали унга тиз чўқмаган. Маккаю Мадина орасида жон сақлаб, отаси ва акаси учун қасос ўтида ёнарди. Бу орада Муовия вафот этиб, унинг ўғли Язид халифа қилиб кўтарилади. Язид эса Ҳусайн билан орани очиқ қилишга астойдил киришади. Таслим бўлиш ҳақидаги таклифларни қатъий рад этган Ҳусайн кўп сонли қўшинга қарши бориш фойдасиз эканини тушуниб, оиласи — пайғамбаримиз Муҳаммад алайҳиссалом хонадонининг сўнгги вакиллари билан Карбало даштига бош олиб кетади. Душман аёвсиз таъқиб қилади. Ниҳоят, тенгсиз жангда Ҳусайн ва яқинлари маҳв этилади.

Ривоят қилишларича, Язид лашкари ўз муддаосига эришгач, ғалаба белгиси сифатида Ҳусайннинг табаррук бошини кесиб, Дамашқда давру даврон сураётган бошлиқларига тақдим қилишади. Язид қасос истаган, бироқ мағлуб бўлиб, калласи кесилган душманига кучли нафрати ифодаси сифатида бошни оёқлар остида топташни амр этади.

Бу фожиани боболаримиз кўп нақл қилган. Ҳар сафар тинглаганда юрак увшган, бироқ бундай хўрликнинг туб сабабини тушунмаганмиз. Илон изи, сирпанчиқ йўлдан эмаклагудай бўлиб юқорига тирмашар эканимиз, Карбало даҳшати ҳам дунё ўйинларидан бири эканини, бу кўхна олам қанчалаб қонли фожеалар шоҳиди бўлганини чамалаймиз. Шунда кўнгилдан бир истиффор, тавба-тазарру илтижоси кечади: «Аллоҳ, гуноҳларимни Ўзинг кечир!» Йўл азоби, хаёлдан кечган тарих шаҳодати гирибонингдан олгандек бўлади, ундан фақат имон бардамлигига суюниб шафеъ топасан. Одамлар руҳан покланиш учун зиёратгоҳларга келали, деганлари ана шу!

Тун зулмати ичра қаерга кетаёттанингни идрок этолмайсан, фақат борар жойинг аниқ — у уфқда қорайиб турибди. Қадаминг қаерларга тушяпти, оёқ остидаги замин қай ҳолда — билмайсан, йўл сени бошлаб кетаверади ва у ўша манзилга элтади. Манзил эса аниқ. Ўша жойдан шаҳид Ҳусайннинг бошини бағрига босган Ҳазрати Султон фойиб бўлган — ер қаърига кирганми, самога учганми — уни дашти Карбалодан таъқиб қилиб келган душманлар тутиб ололмаганлар.

Бу зот ким эди? Наклда айтиладики, сахрова қиёмат қўпиди, пайғамбарзоданинг боши коғирлар оёқи остида хорланиб ётганда Ироқ султони ҳазрати Хожа Довуд Дамашқийнинг тушига Мұҳаммад алайҳиссалом кириб, зурриётлари — набираларининг жисми оғир хўрликка дучор бўлганини, бу бедодликка у чек қўйиши мумкинлигини эслатадилар ва бутун насл-насабини қўллашини, ўзига эса абадий эҳтиром ва эътибор ҳадя этишни ваъда берадилар. Бу туш яна ва яна такрорланади. Ҳазрати Султон безовта бўлиб, Язид лашкарлари орасидаги ўғлини маслаҳатга чорлайди. Унинг ҳам исми Ҳусайн эди. Ўғли воқеани айтиб бергач, Султон нима қилиш кераклигини идрок этади. Ота фарзандидан:

— Бу йўлда бошингни ҳадя этасанми? — деб сўрайди.

Ўғил эса:

— Ота, амрингизга бир эмас, ўн бошим бўлса ҳам тикаман, — деб жавоб беради.

Султон ўғлини қатл этиб, унинг бошини пайғамбар-зоданини ўрнига қўйиб, ўлжани қутқариш мақсадида најот водийсига — дарё ортига йўл олади.

Язид лашкарлари яна машгулотни давом эттиради. Бири дафъатан сирни англаб қолади: ҳар куни каллани тепганларида ундан нур чиқар эди, бугун эса йўқ. Алмаштирилган бўлмасин. Очиб қарасалар — рост. Ур-ийкит бошланади, излашга тушадилар. Бу пайтда Ҳазрати Султон лашкарлари куршовида Амударёдан ўтган эди...

Карвон йўлда. Мана, неча юз йиллардирки, бу излардан одамлар қадами узилмайди. Ҳар йили бир мавсум — август ойида 20—25 кун тўрт тарафдан минглаб одамлар ташриф буюриб, тавоғ қиласадилар, бу нақлни тинглайдилар...

Қўтарилигандан сари юриш оғирлашади, лекин етиб бораман, деган истак кўнгилни тарқ этмайди. 20—30 метрда уфқ қўринади, гўё шу ерга чиқсанг, у ёғи силлиқ кетаётгандек. Бироқ яна олдингда янги довон пайдо бўлади. Денгиз сатҳидан 4000—4500 метр баландликда тоб бериш ҳам осон эмас. Охири ҳар 50—60 метрни бир нави босиб ўтасан-да, тошга чўкасан ёки заминга бош қўйганча оёғингни бир узатиб оласан. Кўп туриб қолиш мумкин эмас, бел «қотиб» қолса, бутунлай қимирлаб бўлмайди. Чўққига чиқолмаслик эса мақсадга эришолмаслик деган гап.

Язид лашкари ҳам мақсадга етиш учун таъқибни кучайтиради. Ҳал қилувчи тўқнашувлар биз ҳозир турган жойларда бўлади. Душман қўли баланд келади. Ҳазрати Султон Аллоҳдан најот сўраб «Холиқ, дод!» деб наъра тартади (ҳозир шу жойнинг номи «Холикдод»). Аскарлар саф-саф бўлиб чекина бошлайди (тоғ тизмаси «Аскартө» деб юритилади). Довон бошида, Фilon қишлоғи худудида Ҳазрати Султоннинг лашкарбошиларидан бири — Турки Тўғон ҳалок бўлади (қабри ўраб қўйилибди). Ниҳоят, сўнгги 10—15 чоғли аскар билан сарлашкар Муқбил Ҳалабий ҳам маҳв бўлади (бу жой каттагина ҳовли ўрнича келади, тош териб ўралган, туғлар қадалган, чўққининг қуйисида). Фақат Ҳусайннинг муборак бошини жойнамозга ўраб, кўксига босганча, Ҳазрати Султон Ҳожа Довуд Дамашқий тирик қолади. Уни аёвсиз таъқиб эта-

дилар. Ҳазрати Султон омонатни опичлаб, тоғнинг баланд чўққисига чиқади ва шу ердан фанога ғойиб бўлади. Душманга банди бўлмасликнинг ёлғиз йўли шу эди.

Дунёни тутиб турган маънавий устунлардан бири — эътиқод. Бу тожни кийиш учун одам хийла камолга етишган бўлиши лозимга ўхшайди. Ахир атрофимизда қанчалаб турфа одамларни кўрамиз. Эътиқод — орият, виж-дон, садоқат ва бошқа жами фазилатларнинг чўққиси, ундан маҳрум одамларнинг, ҳазрат Амир Темур ибораси билан айтганда, «икки кўзли бир қоп гўшт»дан нима фарқи бор. Биз бутун ана шу эътиқод тимсолини тавоғ этишини азм этгандик.

Атроф ёриша бошлади. 14 август тонги отаётган эди. Биз бу пайтда сўнгги мажолимизни тўплаб, текисликка чиқиб олгандик. Чўққи, яъни намозгоҳ супа аниқ кўрина бошлади. Зиёратчиларнинг олди етиб борибди. Қолганлар ҳам чумолидек қимиirlаб интиляпти. Тирноқларимиз кўкариб кетган, ранглар оқарган, кўз косаси катталашган — кислород чанқоқлиги бошланган. Тезроқ маррага етиш керак, бу зиёратнинг завқи шуки, ҳам бомдод намози ўқилади, ҳам Шарқдан қуёшнинг чиқиб келиши кузатилиади.

Ҳазрати Султон қадамжоси сидирға тоғ тизмасида муштдек ажралиб турибди. У Миср эҳромларига ҳам ўхшаб кетаркан. Пойидаги Кавушпартоб деган жойда таҳорат олинади. Қорайиб кетган офтобалар, ўнг биқинда эса тош қотган асрий қор уюми тоққа тўш босиб ётибди. Ундан кўпориб олинади-да, эритилади. Жадаллаб, қоянинг ярмигача чиқдим. Уфқда бир парча булат осилиб турар, унга ўз сайрини бошлиётган қуёш нурлари қадалган, бу жойлар — булат четлари — олтин рангида эди. Борлиқда бир титроқ бордек, ҳамма нарса ором бешигида тебрабаёт гандек. Бу ҳолатни гўдакнинг уйғониш олдидағи тамшанишига менгзаш мумкин. Паст-баланд тоғлар, чўққилар яқин ва олисликда кетма-кет кўзга ташланади. Энг тўрда олам меҳвари — қуёш борлиқقا ташрифини бошлайяпти, аслида Она ер унга томон ўнгланаяпти. Дастреб оппоқ губор кўтарилиди, у ўқдек текис тарқалди, фақат чўққилар боши нурланди. Ҳали дараларда зулмат ухларди.

Имиллаб ўтаётган вақт қадамлари ила уфқ бутунлай ёришиди, оқлик эса қуйига оқа бошлади. Гүё ёруғлиқ фариштаси ўнгирлардаги қоронғуликни ҳайдаб чиқаришга киришиди. Кўзлар равшанлашиди, қабоқлар очилди. Ниҳоят, шафақ тилиниб, ингичка зарҳал ёғду юз очди. У катталашиб борди: музaffer қуёш ўз сайрини бошлади...

Зиёратчилар тепадан туша бошлашиди. Бир-бирларини муборакбод этишар, диллари равшан эди. Бизга ҳам кучкүвват тилашиди. Охирги силтаниш билан энг юқорига чиқиб олдик. Бу жой кунчиқиши тарафга бир оз қийишган супа эди. Тўрда — тош уюми. Уни айланиб, тавоф қилиш мумкин. Каромат шундаки, икки уй ўрнича келадиган жойда 40 киши ҳам, 400 киши ҳам жойлашиб кетаверар экан. Атроф яққол кўзга ташланади. Бу ер само ва замин ўртасидаги муаллақ жойга ўхшайди. Қирғоқига бориб парвоз қилсанг, осмонга чиқасан, сўқмоғидан юриб, пастга тушсанг, ерга тушасан гўё. Тунда йўлга тушган манзилимиз шундоқ кўриниб турибди. Одамлар аниқ кўзга ташланади, ҳатто товушлар эшитилганлек бўлади. Шу оралиқда тун бўйи азият чекиб йўл босганингга ишонмайсан. Мақсадга этиш бунчалар машаққатли бўлмаса! Тошга чўккаладик-да, жами эзгу тилакларни дилга жойлаб, Қуръон тиловат қилдик. Юксаклик баҳш этган виқорни тарқ этиш осон эмасди, бу жойни яна кўриш насиб этсин, дея қайрилдик...

Яна дарёлар бўйлаб кетган йўллар қаршимизда поёндоз бўлиб тўшалди. Энди ҳаётнинг янги бир ҳикматини кашф этгандек бўлиб, шу буюк юрт шукуҳидан тоғдек юксалиб, одамлар дунёсига қўшиламиз. Ҳаёт эса ўз йўналишида давом этаверади.

1994 йил, сентябрь

ИККИ МИНГ БЕШ ЮЗ ҚАДАМ

йўл босиб, Хива истиқолимизга пешвоз чиқди

I

Ичон қалъага Ота дарвоза тарафдан кириб келишда ҳали мозий билан юзма-юз бўлмай, кўзингиз ўнг қўлдаги муazzам ҳайкалга тушади. Бу шу заминнинг шавқатли фарзандларидан бири Муҳаммад ибн Мусо ал-Хоразмийга яқин ўтмишда қўйилган ёдгорлик. Шундай қилиб, қадимий шаҳар бўйлаб сафарингизда буюк алломанинг жаҳоншумул шуҳрати биринчи ҳамроҳ бўлади, сизни яна мўъжизалар денгизи аро теранроқ етаклайди. Бир-бирига елка тираб турган мангалик обидалар фалак буржидан, ғазал латофатидан, ҳарбу зарб илмидан, қуриш ва яратиш шарофатидан — дунёнинг жами сиру синоатидан сўзлайди. Таассуротлар кўнгилга сингиб бораверади ва сиз ўзингизда ажойиб бир ўзгариш сезасиз. Гарчи оёқларингизни ана шу табаррук заминга тираб атрофга боқаётган бўлсангиз-да, нигоҳларингиз билан ҳув анави осмонга бўйлаб турган миноранинг устидан оламга назар ташлайсиз. Шунда узоқ-узоқлар ҳам кафтдагидек яқин туюлади, дўппидек дунёнгиз кенгайиб, кўз етганча кетган борлик сизнинг мулкингизга айланади.

Агар сизга «Хоразмликлар бошқалардан донишмандроқ бўладилар», дейишса, ҳеч шубҳаланмай ишонаверинг. Тақдир, ана шу заминда туғилиш саодати шундай толеъни раво кўрмишdir дўстларимизга.

Олдинроқ ҳам бир далил эътиборни тортган эди. Мақола ёзиш учун ўтган йил олий ўқув юртларига кириш имтиҳонлари топширган абитуриентлар эришган натижалар билан қизиққанман. Шунда маълум бўлгандики, тарих фани бўйича самарқандликларнинг, химия-биология юзасидан бухороликларнинг, математика, физика фанларидан хоразмликларнинг натижаси республикада энг юқори экан. Бу шунчаки тасодифми ёки Самарқанднинг шонли тарихи, Бухорода Ибн Сино туғилгани, Хоразм Беруний, Хоразмийларга ватан бўлгани

шу вилоятларнинг ёш авлоди ақл-шуурида из қолдиридимкан, деб ўйлаб қолгандим. Ҳар ҳолда макон ва замонлар силсиласи узвий яхлитликни ташкил этиши рост бўлса, бундай мутаносибликларда ҳам ҳақиқат яширган.

Хиванинг 26 гектарлик Ичон қалъасида 54 та ёдгорлик бор. Эътироф этадиларки, дунёning бирор шаҳрида тарихий ва маданий мавқеи жиҳатидан салмоқли осори атиқлар бунчалик зич ва яхлит жойлашмаган. Бой ўтмишга эга бўлган Хива кўп йиллардан буён дунё афкор оммасини қизиқтириб келади. Сабаби — бу шаҳарнинг бағрида жами инсониятга тааллукли бўлган кўплаб маданий хазиналар сақланиб қолган. Ривоятларда уни Нуҳ пайғамбарнинг ўғли Сом бунёд этган, деб нақл қиласидар. «Авесто» (эрэмиздан аввалги биринчи минг йилликнинг биринчи ярмида), Биҳистун ёзувларида (эрэмизгача (V—IV асрлар) Хоразм ҳақида ёзма маълумотлар учрайди. Қадимги грек муаррихлари Гекатей, Геродот ҳам «Хорасмия шаҳри» ҳақида ёзиб кетганлар. Абу Райхон Беруний ўз асарларида эрамиздан олдинги иккинчи минг йилликнинг иккинчи ярмидаги Хоразм дәхқончилик маданияти юзасидан мулоҳаза юритади. Ана шу қадимий юрт ўз бошидан кўплаб иссиқ-совуқ кунларни ўтказди. XVI асрга келиб Дўстжон Бучгахоннинг хонлик таҳтида ўлтириши (1557 й.) билан Хоразм давлатининг янги даври бошланди. Бугун кўпчиликнинг ҳайратини ошириб келаётган тарихий ёдгорликлар мамлакат ҳаётининг ана шу гуллаган даврида бунёд этилди.

II

Россия истилоси (1873) Хоразмдаги азалий турмуш тарзини бутунлай бошқа изга солиб юборди. Мамлакатни идора қилишда ғайритабиий тартиблар тиқиширилди. Босқинчилар турли йўллар билан маданий бойликларни талай бошладилар. Тартиб бўйича эллик еттинчи ҳукмдор Сайид Абдуллахон сўнгги марта 1920 йил 1 февралда таҳтга ўтирди. Қадимий юртни ҳам шўролар истило қилган эди. Шундай қилиб, бутун Ўзбекистон қатори Хо-

разм вилояти ҳам 1991 йил 31 августгача коммунистик тартиблар исканжасида ётади. Бу воқеалар обидаларда турли даражада ўз изини қолдирган. Ота дарвозадан бошланувчи басарини тош йўл заминга чуқур чўккан асрий миноралар куршови аро тобора ичкарига олиб борар экан, аждодлар закоси неча ўн йиллар оша бунёд этган гиштин деворлардан олис тарих унсиз садо бергандек бўлади. Азалдан маърифатга интилган ҳалқ ҳар қадамда бир мадраса бунёд этган — Муҳаммад Аминхон мадрасаси, Муҳаммад Ниёз девонибеги мадрасаси... Гарчи йиллар мазмани сатрма-сатр дарж этилмаган бўлса-да, иморат пештоқидаги оддий ёзув, шунчаки бир ашё ўтмишнинг шарафли кунларини эслашга туртки бўлади. Немис ишбилармони Зингерни ҳамкорликка таклиф қилган Полвон қори бойнинг қароргоҳи, йўқсиллар доҳийси Владимир Ленин билан баҳслашиб (1920 йил 13 сентябрь) уни мулзам қилган Бобоохун Салимовнинг отаси қозикалон Салимохун курдирган бинолар осмонўпар миноралар соясида қолиб кетган бўлса-да, ўз бағрида гўзал хотираларни сақлаб туриди. 50-йилларда америкалик машҳур миллионер Рокфеллер Ичон қалъани сайёҳлик маскани сифатида ижара-га олиш учун шўро раҳбарларига мурожаат қилган экан. Эҳтимол, уни Паҳлавон Маҳмуд мақбарасининг шукуҳи ёки Исломхўжа минорасининг гўзалигида мужассамланган маданиятнинг бебаҳолиги оладиган моддий манфаатидан кўпроқ қизиқтиргандир. Хива Ичон қалъасини 1990 йилда ЮНЕСКО ўз тасарруфига олди ва у жаҳон маданий мероси рўйхатига киритилди.

Хива шаҳрининг умуминсоний маданияти хазинасида тутган ўрни жаҳон афкор оммасига нечоғлиқ маълум бўлмасин, бу ҳақиқатни шўро давлати эътироф этмай келди. Ҳур фикрли археолог олимларнинг илмий излашишларига беписандлик билан қаралди, шаҳарнинг ёши ҳақидаги фаразлар расмий доираларни ҳеч қандай қизиқтирмади. Бу ҳақда Республика Фанлар академияси археология институтининг Ҳоразм минтақавий бўлими бошлиғи Шоҳназар Матрасолов фифони фалакка чиқиб гапиради. Ўттиз йилдан бўён замин бағрида яширинган сир-синоатларни темиртироқ бўлиб излаб келаётган ил-

мий ходимнинг бисотида ёруғлик кўрмаган қизиқарли мълумотлар кўп. Хусусан, 2500 йил санасини аниқ тасдиқлайдиган ашёларни кўз қорачиғидек асраб келмоқда. Ш. Матрасулов бир хатни кўрсатди. У ЮНЕСКО ишлари бўйича СССР комиссияси раиси номига ёзилган бўлиб, (1993 йилда) Хиванинг 2500 йиллик юбилейини нишонлашга розилик бериш сўралган эди. Мазкур илтимос нечоғлиқ қондирилганига ҳаммамиз гувоҳмиз — 1993 йилда ҳеч қандай байрам бўлмади. Қолаверса, бундай муносабат янгилик эмас эди. «Марказ» дунё ҳамжамияти нигоҳида ўзини миллий республикалар маданияти учун қайғураётгандек қилиб кўрсатарди-ю, «ғамхўрлиги» мустаҳкам қарор топган бюрократия машинаси фиддираги остида эзилиб кетар эди. Худди шунингдек, КПСС XXIV съезди директиваларида ҳам Хива ва Суз达尔ъ шаҳарларини очиқ музейларга айлантириш белгилаб қўйилганди. «Шундан кейин Суз达尔ъ бутунлай қайта қурилди, — дейди «Ўзбектизм» Хоразм минтақавий бўлими бошқарувчиши Комил Худойберганов, — ўз кўзим билан кўрганман — ўнлаб кўчалар, хиёбонлар барпо этилди, барча ёдгорликлар тубдан таъмирланди. Теварак-атрофдаги шаҳарлар билан боғловчи олтин ҳалқа ҳосил қилинди. Хивада эса ҳеч нарса ўзгармай қолаверди».

Ҳолбуки, бу ерга келадиган сайёҳларнинг миқдоридан тортиб уларнинг юриш-туришини белгилаб бериш ҳам ўша адолатсиз «марказ» қўлида эди. Ҳайрият, никоблар йиртилди, ҳамма нарсани ўз номи билан аташ имкони туғилди. Мустақиллик қадимиий ва нақирон Хиванинг янги умрбоқий ҳаётини бошлаб берди.

III

Республика Вазирлар Маҳкамасининг «Хива шаҳрининг 2500 йиллик юбилейига тайёргарлик кўриш ва уни ўтказиш тўғрисида» 1996 йил 3 январдаги қарори ўзида бой тарихни мужассамлаштирган, боболаримиз истеъдодининг мангу обидасига айланган масканнинг келажаги учун бурилиш нуқтаси бўлгани шубҳасиз. Бундай тўхтамга келингани, аввало, мустақиллик туфайли тарихий қадрият-

ларга янгича меросхўрлик нуқтаи назаридан билдирилаётган муносабат натижаси бўлса, иккинчидан, бу қарор аҳли фузалонинг неча йиллардан бўён амалга ошмай келаётган орзусининг рёбга чиқиши эди. Қолаверса, Бухоро ва Хива шаҳарларининг юбилейини ЮНЕСКО тадбирлари доирасида нишонлашга эришилгани республикамиз раҳбариятининг қатъий саъй-ҳаракати натижаси. Қадимий шаҳарларимизнинг жаҳон маданияти тарихида туттан алоҳида ўрнини зътироф этган нуфузли халқаро ташкилот — ЮНЕСКО бош конференцияси 1995 йил октябрь-ноябрь ойларидаги 28-сессиясида масалага алоҳида тўхтади, ўз аъзолари зътиборини дунё халқлари маданиятидаги бу муҳим воқеага қаратди.

Очиғини айтганда, ер юзида ёши икки ярим мингдан ошган шаҳарлар бармоқ билан санаарли. Ўзбекистонимиз шараф тожини безаб турган икки ноёб дурдонанинг бирварақайига улуғланиши ҳар қандай мамлакат ҳавас қилса арзийдиган катта воқеадир. Албатта, кўрсатилган ҳурматга муносиб жавоб қайтариш масъулияти ҳам бор эди, ёш давлатимиз имкониятларини чамалаб, бундай юкни озод елкасига олди. Қолаверса, қисқа даврда қадриятларини дунё миёсида шарафлашга ултурган юртимиз Мирзо Улугбекнинг 600 ёшини (1994), Соҳибқирон Амир Темур таваллудининг 660 йиллигини (1996) ЮНЕСКО қароргоҳи Парижда нишонлаб, етарлича тажриба ва обрў қозонган эди.

Айни дамларда Хиванинг сокин кунларига қурилиш ва бунёдкорлик юмушлари уйғунлашиб кетган. Бир қанча обидаларда таъмиrlаш ишлари олиб борилмоқда, шаҳар ўз кўчалари, хиёбонларини ясантириб, қутлуғ тўйга ташриф буюрувчи азиз меҳмонларни кутиб олишга шайланмоқда. «Хивада кўп иш қилинган, яна-да кўп иш навбатда турибди», дейди шаҳар ҳокими куюнчаклик билан. Тантаналар бошлангунга қадар ҳар бир дақиқага юмушлар тақсимланган, агар мўлжалдаги ишлар амалга ошса, тўй кўнгилдагидек ўтади. Бу ерда камчиликлар, етишмовчиликлардан гапириш мавриди эмас, қийинчиликдан қўрқмаган одам иш қиласи. Ёш ҳокимнинг обрўси, раҳбарлик истеъоди ҳамманинг кўнглида чўғ ёқди, одамлар

янгича файрат, иштиёқ билан ишга тушдилар. Юбилей арафасида кўхна Хива тарихида яна бир унutilmas воқеа рўй бериши кутгилмоқда. Урганч билан Хива ўртасида троллейбус қатнови йўлга қўйилади. Ҳозир шунга жиддий тайёргарлик кетмоқда. «Хивада биринчи шифохона очилгани, телефон келгани ёки йўлларда дастлаб автомобил қатнай бошлагани қанчалик янгилик саналган бўлса, троллейбуснинг ташрифи ҳам ана шундай унutilmas воқеадир», — дейишмоқда хиваликлар.

Мўлжалланган ишларнинг кўлами кенг, бажариш учун эса маблағ, хом ашё зарур. Бу нарсаларнинг ҳам йўли топилаяпти. Ҳусусан, маблағ билан таъминланишини тенг миқдорда ички имкониятлар ҳисобига амалга ошириш белгиланган эди. Ҳудди шу ўринда одамларнинг саховати, ўз юрти, ватани шарафи учун фидойилиги қўл келяпти. Бугун «Хива — бизнинг юзимиз» деган чақириқ ҳар бир хоразмликнинг қалбига етиб борган. Шаҳарда бир неча марта хайрия тадбирлари, ҳашарлар ўтказилиди. Уларда алоҳида фуқаролар, корхоналар имкон даражасида ўз ҳимматларини дариф тутишмабди.

— Бундай тадбирларни бутунлай ихтиёрий тарзда ўюштиряпмиз, — дейди шаҳар ҳокими, — баъзан одамларимизнинг саховати олдида лол қоласан киши. Рости, ҳалқимизнинг шу қадар эзгуликка ташна, ҳамияти юксаклигини билмас эканмиз.

Шундан кейин ҳаяжон билан хайрия тадбирининг тафсилотлари сўзланади. Инъом қилинган маблағлар қуттиларга сифмай кетибди. Бу муболага эмас, балки истиқлол туфайли ўзлигини таниган, баҳтли келажагини куришга астойдил киришган юртнинг оддий юмуши эди. Мозийга ҳурмат, азалий анъаналарга эътибор одамлар қалбидаги эзгу амалларга қанот бағишлимоқда, ўз тақдирини шу эл, шу тупроқ билан вобасталикда кўрувчи янги кишилар жамияти шаклланмоқда.

Уч сменада 4,5 мингдан кўпроқ киши меҳнат қиласи «Хива гилами» ҳиссадорлик жамияти аъзолари олинган фойданинг асосий қисмини улуғ тўйга сарфлашга дилдан рози бўлишди. Ҳозирча шу мақсадга 2,5 млн. сўм ажратиш кўзда тутилмоқда. Бундан ташқари, шаҳар обо-

дончилигига ҳисса қўшиш мақсадида ишчилар иш бошланишидан 2 соат олдин келиб, кўчаларни тартибга солишга аҳд қилишди. Одамлар бу юмушга ҳимматни, саҳоватни ўргансин, деб вояга етган фарзандларини ҳам бошлаб келишмоқда.

Бундай олижаноб ҳаракатга астойдил рағбат билдириган «Хива сополи», «Урганчтрансгаз», «Урганч-ёғ» сингари кўплаб ташкилотларни, хусусий корхона эгаларини маълум қилишди. Фуқаролар ойлик маошларини, олаётган фойдаларини табаррук шаҳарнинг катта тўйига инъом қилиштан.

IV

Шаҳарнинг асрий кўчаларида осуда ҳаёт давом этади. Йўловчилар қаторида турли ёшдаги кишиларни, ажнабий фуқароларни учратиш мумкин. Истиқлол йилларида ўтмиш меросга қизиқишининг ортиши баробарида меҳмонлар ҳам тобора кўпайиб бормоқда. Деярли ҳар куни республика-мизнинг қайсиdir вилоятидан сайёҳлар ташриф буюрисини айтиб беришди. Маҳаллий сайру саёҳатни янада жонлантириш борасида ҳаракатлар боряпти. Бир пайт кўчани тўлдириб келаётган ёшлар оқимиға кўзингиз тушади. Ёш келин-куёвлар тўй олдидан Паҳлавон Маҳмуд мақбраси ва бошқа ёдгорликларни зиёрат қилишга одатланишибди. Бу анъана ҳам яқинда пайдо бўлибди. Зиёрат «гул қўйиш» тарзида эмас, балки миллий удумларимизга мос йўриқда — муқаддас даргоҳни зиёрат қилиш, Қуръони карим тиловати йўсинида амалга оширилади.

Ҳар қадамда асл илдизларга қайтиш, мустамлакачилар томонидан камситиб кelingан миллий фуурнинг уйғона-ётганига гувоҳ бўлиш мумкин. Истиқлол шарофати туфайли эсаётган янги ҳаёт шамоллари турли чанг-губорларни қувиб, чинакам ўзликни намоён этмоқда. Шу туфайли Ичон қалъа музей кўриқхонасининг директори олим Абдулла Абдурасулов илм аҳли учун янги кенг жабҳа очилганидан ифтихор қилса, йигирма йилдан бўён бир иморат тубини макон тутиб, попоқ, чўгирма сотиб келган Мадёр Бобоҷонов ўз бисотининг харидоргир бўлиб

Қолганидан хурсанд. Ҳалқ ҳунармандлари учун нафақат санъатларини тиклаш, йўқолишидан сақлаб қолиш баҳти, балки ўз амаллари билан доруломон кунларга хизмат қилиш имкони ҳам яратилди. Кўхна Арк майдонида Улуғбек Машарипов ва Султон Ёкубов бошлиқ мисгарлар ҳамда дурадгорлар ўз ҳунарларини намойиш этиб турибдилар. Меҳмонлар кўзи олдида мис лаган ёки офтобаларга инжа нақшлар чекилмоқда, ёғочга ишлов берилиб, турли буюмлар ясалмоқда. Агар вақтингиз бўлса усталарнинг машғулотларини кузатишингиз, уларнинг маҳоратлари билан танишишингиз мумкин, хоҳиш топилса, тайёр буюмлардан ҳарид ҳам қиласангиз бўлади. Маданият вазирлигининг «Қадрият» корхонаси Хива бўлинмаси бошлиғи Қуронбой Маткаримов ўз ҳамкаслари билан Тошқовли, жума жомеъ-масжиди, Нуруллабой саройи каби кўплаб обидаларнинг таъмирланишида қатнашмоқда. 15 йилдан бери ганч ўймакорлиги, наққошлиқ каби ҳунарларни эъзозлаб келаётган устанинг ота-боболари ҳам мазкур қасбларни санъат даражасига олиб чиқишиган экан. Чунончи, Навоий номли театрнинг Хива залини безаган бобоси Рўзимбой Машариповнинг номи унинг учун қадрли. Аслида ҳам Хоразм ганч ўймакорлиги ва наққошлиги авлодлардан авлодларга мерос тарзида ўтиб, сайқалланиб келаётган бойлик. Мана, Ўзбекистон Балий академиясининг ҳақиқий аъзоси Ботир Болтаев ҳам ўғиллари билан таъмирчи усталар сафида хизмат қўйилмоқда. Бундай фидойи кишиларнинг саъй-ҳаракати туфайли ўлкамизнинг Тошкент, Самарқанд, Бухоро, Шаҳрисабз каби шаҳарларида ги кўплаб қадимий иморатлар янгича жило касб этди. Усталар билан бўлган суҳбатлар жараёнида бир нарсага алоҳида қизиқдик: кўп йиллар тақиқланган ёки номигагина истиъфода этилиб келинган бинокорлик санъатининг барча сир-асрорини эгаллаш мумкинми. Улар қатъий ишонч билан ганчкорликда, девор ҳаттотлигига, наққошлиқда аждодларимиз эришган ютуқларни ўша даражада давом эттириш имкони мавжудлигини таъкидладилар.

Хивадаги Сайдниёз шоликор бой масжидида оддий нағозхон Азимжон Жуманиёзов билан суҳбатимиздан кейин ҳозирги кунларимизнинг қадри кўз олдимизда ўн, юз

чандон юксалгандек бўлди. Ёши 70 ни қоралаб қолган отахон 30 йил бинокорлик касбида ҳалол тер тўкиб яшади. Оиласдаги тарбия туфайли 11—12 ёшларида намоз ўқишига ружу қўйди. «Бу амални ҳаммадан яшириб бажаардим, — дейди отахон, — бироқ айниқса, молия агенти кўриб қолса, бошимизда тегирмон тоши айланарди». Ҳозир гурас-гурас бўлиб масжидларга бораётган, мусулмончилик фарзларини адо этаётган одамларни кўрганимизда бир пайтлар шунаقا таъқиб бўлгани ҳар доим ёдимизга тушавермайди. Гўё азалдан шундай эркинлик бўлган, бўлиб келаяпти. Ҳолбуки, биз шароитга кўникиб, истиқлол неъматларига гафлат кўзи билан боқмаяпмизми? Аслида ўша хўрликлар, таъқиблар бўлган кунларни бир дам ҳам унтишга ҳаққимиз йўқ. Агар ўша кунлар яна қайтиб келмаслитини истасак, унумаслигимиз керак. Отахон маҳзун ҳикоясини давом эттиради: «Бир сафар бобомнинг қабри устида оят ўқиб турганимда фирмалардан бири кўриб қолди. «Қишлоқдан чиқиб кет», деб талаб қилди. Намоз ўқиш учун солиқ тўлардик, қофозини чўнтағимизга солиб юрардик. Кўлга тушиб қолса, 500 сўм жарима соларди. Бир қўйнинг баҳоси 15—20 сўм бўлиб турганда, жаримадан кутилиб бўлибсан». Отахон ҳозирги доруломон кунлардаги хурсандчилигини яшиrolмайди. Шоликор бой масжидига ҳар сафар 5—6 юз киши ибодатга келади. Катта намозларда 3—4 минг одам тўпланади.

V

XIV—XX асрлар Ҳоразм меъморчилик санъатининг ҳақиқий дурданаси ҳисобланган Ичон қалъа ёдгорликлари янгича жамол кўрсатаяпти. Тўй баҳона тарихий биноларда бугунги озод авлод ҳам ўз дастхатини қолдиради. Жумладан, энг кейин қурилган меъморий мажмуя Тошҳовли (1831—41)да кенг ҳажмли таъмирлаш ишлари олиб борилмоқда. Айтиш мумкинки, Тошҳовлини бунёд этишда Марказий Осиё ҳудудида бинокорликда эришилган ютуқлардан самарали фойдаланилган. Имарат болоҳонадор қилиб қурилган бўлиб, юқори қават айвонли ёзги ший-пон шаклида. Деворларига зангор рангли ялтироқ кошин-

лар — маёликалар сидирға қоплаб чиқилган. Ҳосхоналар тақрорланмас шаклда ясатилган. Ўлчамлардаги мутано-сиблик, рангларнинг юқори дид билан уйғунлаштирилганлиги ёрқин гўзаллик кашф этган. Айни пайтда баланд ҳавозалар билан «безанган», усталар иш қуролларининг майин овози таралиб турган обида пардоз учун кўзгу қаршисида ўтирган дилбарни эслатади. Яқинда унинг жамоли яна ташриф буюрувчиларни мафтун эта бошлиди.

* * *

...Хива — фақат экзотика эмас, у мумтоз шаҳар. Йиллар ўтиб, кулбани ёритишида фойдаланилган мойчироққа санъат асари сифатида қаралганидек, туйғуларимизни қанотлантирган миноралар-у, тупроққа тиззасигача ботиб, шаҳарни иҳота қилиб турган қалъа деворлари менга аждодларимизнинг келажакни асрash учун олиб борган ҳаёт-мамот курашларида қатнаштан жангчилар бўлиб туюлди. Ҳар қадамда бетимсол санъатдан қанчалик ҳайратлансам, бошидан бетиним мислсиз довулларни ўтказган, тирикчилигини, ҳаётини, эртасини яратиш, сақлаб қолиш учун ёстигининг остига кетмон ва ўроқ билан бирга ҳимоя қуролини кўйиб ухлаган ватанпарвар тимсоли кўзимга кўриниб кетаверди. Миноралар аслида ёвни кузатиш, деворлар ундан ҳимояланиш учун қурилган. Қалъанинг сиртларида қабрлар ҳамон боқий турибди. Бу заминда яшаш шунчалик завқли, зурриёд қолдириш шунчалар саодатли бўлганки, қунларини зироатчилик ва фарзанд тарбиялаш билан ўтказган ажодимиз ён босса ўз марваридини кўз қорачигидай асрash учун меҳнат тешасини қиличга алмаштириб, ёғийга қарши кўкрак бериб чиқаверган. Отанинг кўлидан қуроли тушса, унга ўғил эгалик қилган. Таланганд, топталган, қурбонлар берган, бироқ келажагини асраб қола олган. Эртанинг порлоқ умиди сифатида қум барханлари ўртасида шаҳар қад ростлайверган. Унинг ҳар битта фишти кўз ёшлари билан ийланган, бўёқларида шаҳидлар қонининг ранги бор. Хива авлодларга буюк курашдан сўзлаб берувчи деворларда

битилган достон. Бу достоннинг номи Эрк, Озодлик бўлмаганми? Икки ярим минг йил йўл босиб етиб келинган манзил, орзу қилинган айём бугунги кунларимиз эмасми? Мустақиллигимизда замонларни қаритган мислсиз интилишларнинг кучи бор.

Юртимиз шарқидаги ёрқин юлдузлардан бири — Хивага ташриф буюринг ва унинг шукуҳи қалбингизда абадий қолсин!

1997 йил, август

ВАТАН ЭГАЛАРИНИКИДИР

1

Ким ўз юртини севмаса,
у ҳеч нимани сева олмайди.

Ж. БАЙРОН

Май ойининг охирлари ҳам серёмғир келди. Шундай кунларнинг бирида пахта саноати ходими Йўлдош Тўхтамишовнинг таклифи билан Яккабоғдан ўтиб, тоғлар сари кетдик. Албатта, Толиқўргонга боролмасдик, ҳозир бу жойларни қаттиқ қўриқлашаяпти. Бироқ қадам етганча ичкарилаб, бирор латиф гўшада бир зум тўхташ, майсалар устига гиламча ёзиб, ўзимизни шу қадрдан макон, азим тоғлар измига топпипириш эди муддаомиз. Бундай жой ҳам топила қолди. Қари тол тагидан сув жилдираб турар, дараҳт шохида булбул чағ-чағ уради.

— Бу нима? — деди умри чўлда ўтган ва биринчи марта бундай гўшаларга қадам қўйган ҳамроҳимиз.

— Бу — булоқ, — дедик ҳаммамиз бир овоздан.

— Мен булоқни кўрмаганман. — Ҳаммамиз баравар ҳайратландик. Бундан ўн икки йил олдин экспедиция уюштириб келганимизда ҳам хоразмлик иштирокчи тоғларга анграйиб боқсан, у ҳам «Мен тоғларни кўрмаганман» деганида шундай ҳайратланганмиз. Ҳа, Ўзбекистон — улкан мамлакат. Унинг чўлларида қум заррасидек ёки тоғларида ушоқ тошдек яшаб, бир умр шундай ўтиб кетиш мумкин.

Тол шохида ҳамон булбул чаг-чаг урарди.

— Табиатнинг бу фаросатли паррандаси узоқдан меҳмон келганини билди. Шунинг учун баланд пардада хониш қиляпти, — дедим завқим ошиб, — кўрасизлар, у хизматта янги мусиқачиларни ҳам чорлайди, базм катта бўлади.

Ростдан ҳам шундай бўлди. Кушча бир зум тинчиб қолди. Биз ҳам дастурхонга хужумни кучайтирган эканмиз, уни эсдан чиқариб улгурибмиз. Бир маҳал яна ўша шодон мусика янгради, унга янгиси қўшилди. Куш ўз жуфтини чорлаган ва иккови шунчалик баланд пардада сайроқилик қилдиларки, борлиқ булбул навосига тўлди. Биз бир-бирилизга сўёзиз жилмайганча, бошимизни тошларга ташлаб, оёғимизни узатиб юбордик ва тубсиз фароғат уммонига ғарқ бўлдик. Бошим устида булутлардан холи осмон айланар, икки томондан тоғ қуюлиб келган ва ўртасида гувиллаб Қизилдарё оқиб турган дара мени кафтида опичлаганча борлиқда сайр эттиради.

Мана шундай пайтда киши бир мамнунлик, розилик ва эркинлик ичидаги қолади. Одам ҳар доим ҳам бундай ҳолга тушавермайди, шундай ҳолга тушганда эса ерда событ эканини, Ватани бор эканини ҳис этади. Ўшанда тоғ манзараси муболагасиз гўзал эди. Адашган булат қир бағрида тентирайди, ёмғирдан тўйинган далаларни қўёш илиқ, аммо ёқимли ҳаракати билан сарафroz қиласи, икки чўққини бирлаштириб, рангинкамон тортилган. Теварак бетимсол тоза, турли гиёҳ бўйларидан тўйинган ҳаво вужудга ажиб фароғат бахш этади. Турли бўйлар аралашмасида қадрдон бир ҳид димоқقا урилгандек бўлади. Мен уфорни эслайман.

«Уфор» сўзи мумтоз адабиётимиздан яхши таниш. Энг тансиқ ҳидлар шу сўз орқали ифодаланган. Табиатда эса уфор деган (уни «жупар» ҳам дейишиади) ўсимлик бўлади. Ўзим ҳозиргача уни кўрмаганман. Бироқ қуритиб олинган уфор бўйини кўп бора ҳидлаганман. Бундай масъум, бундай самимий ҳидни, ишончим комилки, фаранг сатанглари ҳам билмайди. Бироқ шундай ҳид таратувчи майса бизнинг тоғларимизда ўсади.

— Шу жойларда уфор йўқми? — дедим табиат гўзаллигидан бутунлай сархуш ҳамроҳларимга қизғиши тупроқларни ёриб, уйдай камарлар бўртиб турган қияликни кўрсатиб. У қўл етгудек яқин жойда эди.

— Э, уфор бўлади бу жойларда, — дейишди мезбонлар — Маҳмуд ака ва Аҳмад муаллим жонланиб, — Нуриддин бир айланиб келсин.

Нуриддин тошлардан сакраб, қўй-эчки изларидан тирмасиб, ёнала бетди, у энганиб, биринчи гиёҳни узганда, ҳаммамиз қийқириб юбордик:

— Бор экан, топди!

Бир оздан кейин Нуриддин худди сабзи баргини эслатадиган, аммо ундан кичик ва нозик бир тутам майса билан қайтди. Унинг иккинчи қўлида сариқ гуллаган, тукли бошқа гиёҳ бор эди.

— Бу қаҳқўйи, — дейишди таниғанлар ва чангларни қоқиб, оғизга уришиди. Тоғда бундай хушхўр, чайнаганда маза берадиган гиёҳлар кўп. Қолаверса, қимматчилик йилларида норизалам («наврўзи олам» бўлса керак), ҳатта, қоқи, думалоқ, отёл, тирмизак сингари минглаб ўсимликлар нон ўрнида истеъмол қилинганини эшигтанмиз. Кейин уфорни олиб ҳидлаб, томоша қилиб бошладик. Қуритилган уфор тумор қилиб тақилади, нон, патирнинг устига сепилади. Унинг такрорланмас ҳидини бошқа нарсада учратмаганман. Уфор гулга кирган экан, у худди зираға ўшшаб гулларкан. Майнинг бошларида терса, айни ҳидга тўлган пайти бўларкан. Булбул чағ-чағи, тансиқ гўзалиги билан сийлаган табиатнинг яна бир тилагимизга етказганидан кайфиятимиз чандон кўтарилди. Ана шу кўринмас илтифот Ватан сидқидилдан тилаган фарзандларига барча истакларини мустажоб қилажаги ҳақидаги қадим ҳақиқатни яна бир такрорлади.

Ватанинни севайлик, унга Она каби юкинайлик, шунда у барча орзуларимизга мушарраф этади.

П

Ватаннинг бир сиқим тупроғи
ҳам муқаддас.

Халқ ҳикмати

Чилонзор тумани шўро замонидаги битмай қолган чала иморатларга энг бой ҳудуд бўлса керак. Ҳудди шундай бинолардан бири биз яшайдиган уйлар яқинида бўлиб, жуда улкан режа билан қурилиши бошланган, фаяқат гишти терилганча қолиб кетганди. Ўтган йиллар давомида у бутунлай ҳароб ҳолга келди, шамоллатиш қувурлари-ю, бетон зиналарини кимлардир қўпориб ҳам кетди. Шу жойнинг бир бўлагини хорижлик ишбилармон сотиб олди ҷоғи, қора ойналар билан тўсиб, икки қаватли офис қурди, дараҳтлар ўтқазди, кейин қарийб йигирма беш гектарлик майдонни девор билан ўраб олди. Ҳар ҳолда унинг тирикчилиги яхши ўтаётган бўлса керак, дарвозасидан тўхтовсиз машиналар кириб-чиқиб туради, ишга кирмоқчи бўлганлар ҳам бисёр. Ҳар сафар автобус ёки троллейбусда ўтганда, бу ерда пайдо бўлган корхонанинг оёққа туриб бораёттани кўзга ташланиб қолаверди. Унинг катта йўл тарафдаги баланд панжарали деворлари ёнида гулфурушлар танда кўйган, анчагина бўш жой бўлса-да, тарвузчилар ўрнаша олмади. Афтидан, корхона хўжайини уларга изн бермади. Менинг диққатимни тортган, қолаверса, ватанпарварлик туйғумга тегиб кетган нарса — гул бозори билан корхона дарвозаси оралиғида ўттиз метрча жойнинг асфальтланмагани. Аслида катта йўл билан бақамти асфальт йўлакча — тротуар ётқизилган, бино сингари у ҳам чала қолган. Ёғин-сочинли кунларда асфальтдан келсангиз, бирданига лойга дуч бўласиз. Шунда ҳар қандай одамнинг кўнглидан, «Шундай данғиллама корхона шу 30 қадам жойга асфальт ётқизиб қўйса, қашшоқ бўлиб қоладими», деган андиша ўтади. Мен ҳам ана шундай ўй билан бир неча марта шу жойдан лой кечиб ўтдим. 3—4 йилдан бўён ҳеч ўзгариш бўлмагандан кейин масаланинг тагига етишга чинакам қарор қилдим. Ростдан, нима бўляпти, наҳотки хорижликлар ўз корхонаси атрофини басаришта қилиб қўйишни хоҳлашмайди?

Қатор саволларга жавоб олиш мақсадида корхона дарвозасига рўпара бўлдим. Албатта, иш жойимни аниқ айтишимга тўғри келди. Дидбонлар айнан бошлиқни кўришим кераклигини эшитиб, «Сизнинг ишингизни бошлиқ даражасида ҳал қиласидиган мутахассис бор», деб реклама менежерига юзма-юз қилишди. У ҳозиргина олдимдан оқ «Нексия»ни елдириб ўтган жиккактина қиз экан. У билан гаплашадиган мавзулар топилди. Маълум бўлишича, корхона ўз маҳсулотларини реклама қилиш учун йилига 200 милион сўм ажратар, бу сумма шу қизалоқ орқали ОАВга тақсимланаркан. Шунда «Нексия»нинг сири ошкор бўлди, қалам чайнаб, миллат маънавиятига хизмат қиласман, деб ёвғонга ёлчиб-ёлчимай юрган ҳамкасларимга шу қизнинг толеъидан ўндан бири насиб этмаганидан афсусландим. Назаримда, у анча ишбилармон ва уддабурон бўлиб туюлди, ундан ажнабий хўжайинлар савоб нималигини билишадими, кўли очиқми, деб сўрадим.

— Роса сахий, — деди ошкора мамнуният билан, — байрамларда текин ош тарқатишади, мачитларга хайрия қилишади.

— Унақада нега кўча тарафдаги ўттиз қадамча тротуарни асфальт қилиб кўйишмайди. Ундан ўзларингнинг ишчиларинг ҳам қатнашади чоги...

— Кўпорилган дарахт атрофини айтасизми? У ерни текислаб қўйишди-ку.

— Йўқ, ундан юқорироқни, гул бозори олдини.

Реклама менежерига асфальтланмаган йўлак қаердалинини қанча тушунтирмай, бу жойни эслай олмади. Демак, у бирон марта ҳам пиёда ўтмаган, учиб келиб, учиб кетадиганга ўхшайди.

Истагим — ажнабий хўжайинни кўриш эди, муддаомни мутасаддилар орқали етказдим. У мени қабул қиласидиган бўлди. Нимқоронги йўлакда икки нафар тансоқчи кузатувида мени яхши кутиб олди, иш қийин кетаётганини, мўлжалга етмаётганини очиқ эътироф этди. Назаримда, у якка хусусий тадбиркор чоги, шахсий маблағидан юртимизда бизнес қилишта киришган. Гап орасида қанча хайр қиласидиганни ва бошқа савобга дохил ишларини айтиб ўтди. Мавриди келганда мақсадга ўтдим:

— Панжара ташқарисида, катта йўл бўйида 30 қадам-ча жой доим лой, чант бўлиб ётади. Шуни тўғрилаб қўйса бўлмайдими?

— Нега мен тўғрилаб қўярканман? — овозини кўтариброқ кескин жавоб берди хорижий ишбилармон, — у менинг ҳудудим эмас. Мен давлатга 250 миллион сўм солиқ тўлайман. Ўшалар тўғриласин...

Менинг бошқа изоҳларим, тушунтиришларим жавобсиз қолди, у фикрини ўзгартирмади.

Шу суҳбат бўлиб ўтганига роса бир йил тўлди, йўлак ҳамон ўша алпозда турибди.

Бундай муносабатдан кўп нарсани англаш мумкин. Демак, бу заминнинг ишқибозлари, мухлислари кўп бўлар, бироқ унинг дахлизилиги, гуллаб-яшнаши биз билан сизнинг гарданимизда. Негаки, биз учун, шу турроқда туғилганлар, унинг қабристонларида аждодлари мангубакон топганлар учун бошқа борадиган жой ҳам, Ватан ҳам йўқ.

Мана бу гапга нима дейсиз? Яқинда кўрганим бир манзара: шифил пишган олча дарахтининг шохларини кесиб, мевасини теришарди. Маълум бўлишича, уни экиб кўкартирганлар уйини сотиб, бошқа юрга кўчиб кетишаётган экан. Улар кетиш олдидан неча йил нон-туз еган маконга ҳурмат тариқасида ўзларидан бир туп дарахт қолишини ҳам эп кўришмабди.

III

Кимки ўз ватанига дахлдор бўлмаса,
у инсониятга ҳам дахлдор эмас.

В.Г. БЕЛИНСКИЙ

Ўз ватанига доғ тушириш —
уни сотиш детан сўз.

В. ГЮГО

Кейинги Йилларда кўплаб ватандошларимиз тирикчилик қўйида юртни тарқ этдилар. Балки улар муддаоларига эришиб, яхши яшайтгандирлар, бироқ бу муваффақи-

ятни оқлад бўлмайди. Ташнишли кунларда ўзини панага олиш халқимизда азал-азалдан қораланган. Бундай кишиларга мунофиқлардек қаралган. Боболаримиз «Тирик бўлсак — бир тепада, ўлсак — бир чукурга» деган событ ақида билан яшаган. Аслида, Ўзбекистондек жаннатмакон жойни тарқ этиб, ўзга юртлардан жаннат излаш — бориб турган нодонлик. Ахир, тошда ҳам гул унувчи, даласидан 5—6 марта ҳосил олиш мумкин бўлган мамлакат уларга ризқ бера олмасмиди? Бегона юртларда мусофирикда тортган заҳматни ўз уйидаги тортса, ўша муддаосига эришарди улар. Халқда «Ўт пули — ўтга, сув пули — сувга, қолди қатиқнинг пули» деган тап бор. Ҳеч жойда нон кесакнинг устида қолмагандир.

Узоқлардан бахт излаганларнинг бир тоифаси ҳозир дунёда кенг кўлам қасб этган замонавий қулфурушилик ёки ишчи кучларини сотиш билан шуғулланувчилар тузогига илиниб қолганлар бўлса, бошқа тоифаси маҳаллий тўралар билан тортишиб, асаббузарлик қилиб ўтиришни хоҳламаган ёки ҳозирги иқтисодиёт талабини тушунмаган кишилардир. Уларни «Бургага аччиқ қилиб чопонини куйдиргандар» деб атаса бўлади. Ҳолбуки, юртимизнинг табиий имконияти 25—30 миллион аҳолини бемалол бекишига етади. Исбот талаб қилиб узоққа бориш шарт эмас. Хитой, Япония, Истроил, қолаверса, Ҳиндистон мамлакатларидағи аҳволни кўз олдимишга келтирайлик. Бу юртларда бир сиқим тупроқ олтинга тенг, лекин улар ўзини озиқ-овқат билан тўла таъминлаб, ҳатто четга экспорт ҳам қилади. Бизда эса ҳали ишга солинмаётган қанча имкониятлар мавжуд. Оддийгина буғдой пояси — сомонни олиб кўрайлик. Уни қайта ишлаб, юзлаб хил маҳсулот олиш мумкин. Ҳолбуки, у кўп жойларда ёқиб юборилади. Ёки қанчалаб унумдор ерлар бўш ётади, энг қимматли бойлик — сувдан 2—3 баравар кам самарасиз фойдаланилади. Албатта, бу имкониятларни ишга солишда табиатимиздаги салбий жиҳатлар халақит бераяпти. Бу ҳақда ҳатто мамлакат раҳбари қайта-қайта таъкидляяпти: «Шуни ҳам очиқ айтишимиз зарурки, бизга бу борада баъзан шижват етишмаяпти. Етмиш йил давомида қон-қонимизга, суюксуягимизга сингиб кетган одатлар, яъни ҳокимият фа-

лиятига танқидий кўз билан қарашнинг йўқлиги, ҳаётда амалдорларнинг айтгани айттан қабилидаги эскича кўни-малардан холос бўлиш оғир кечмоқда».

Юргимизда иқтисодиётни юксалтириш учун барча шароитлар мавжуд. Фақат гап уларни амалга оширишда. Қолаверса, буюк келажакка элтувчи бошқа йўл ҳам йўқ. Улуғ мақсадлар йўлида ишбилармонлик, тадбиркорлик қанчалик асқотса, ҳар бир фуқаро қалбидаги ватанпарварлик туйгуси шунча зарур бўлади. Биз ҳаммамиз юксак орзуларга етишишимизни Ватанимиз Ўзбекистоннинг гуллаб-яшинаши билан ҳамоҳангликда кўра олмас эканмиз, шахсий манфаатларимизни Ватан манфаатларига бўйсундира олмас эканмиз, барча ниятлар сароб бўлиб қолаверади. Бу инсоният тажрибасида, мамлакатларнинг тиклашибниш ва юксалиш тарихида исботланган ҳақиқатdir.

Одамлар — ўткинчи, Ватанлар эса абадийдир. Ўткинчи лаҳзалар абадийлик айёмларига хизмат қилсин.

2004 йил, июль

ЮРТДОШЛАР (Ҳикоя)

Кечкурун гардлаб турган қор тонггача ковушкўмма бўлибди. У нари-бери ювинди-да, ташқарига йўналди. Бу жойдан тезроқ чиқиб кетиш истаги шунчалар кучли эдики, гўё ҳавоси дим ертўлага тушиб қолган, ҳозиргача нафаси сиқилиб, ҳам бадбўй ҳидлардан кўнгли айниб ўтирган, бирдан эшик очилган-у, қочиб кетиш имкони туғилгандек эди. Ҳа, номард юртдоши, дийдорини кўрай, сұхбатини олай деб соғиниб келган юртдоши уни шу кўйга дучор қилдими? «Ит иззатни билмайди, эшак — тарбиятни», деб шуни айтсалар керак-да! Гарчи тун ўтган бўлса-да, ҳамон ҳовридан тушмаган, кечаги гап-сўзларни унута олмаган эди.

Дарвоза тагида ҳовли эгаси қор кураб туради. Ним-қоронгиликдан чиқсан шарпага разм солиб қаради-да, таниб салом берди.

- Айтиб қўярсиз, мен кетдим.
- Ухлаб ётибдими?
- Хонада йўқ...

«Анов семиз хотиннинг қучогида гашт қилиб ётибди», демоқчи бўлди-ю, тилини тийди. Тонгги совуқ, мусаффо ҳаво анча ҳушига келтирган, қолаверса, кечаги тап-сўзларни бу чол билмайди-ку.

Йўл санаториянинг беш қаватли бош биноси ёнидан ўтиб, кўчага чиқарди. Атроф оқлик қўйнида, ҳеч ким бу мовийликка из туширишга улгурмабди. Таглиги баланд, қўнжли этикларидан қор сирпади, хуш ёққанидан оёқларини судраб босади. Дараҳтлар куршовидаги бинолар мудроқ уйқуда, деразалардан чироқ кўринмайди. «Наҳотки бу жойдаги ҳар бир хонада уятсиз ишлар рўй берадиган бўлса?!»

Мумкин.

У бошини бехосдан деворга уриб олган одам ҳолатида эди, қўлларини узатиб пайпасланар, деворга дуч келиб қолишдан кўрқарди.

Бундай беҳаёликларнинг устини қалин парда билан қоплаш керак, токи уяти очилиб қолмасин.

Кучли қор ёғсайди.

Бекатда ҳеч ким йўқ. Безовта ўйлар тазиикда олдинга юрди, автобус бўлса, кейингисидан чиқар. Ҳамма ишни пухта режа асосида бажариб ўрганган илмий ходим бугунги совуқ тонгни кўчада кутиб оламан, деб асло ўйлаганди. Одатича, ишдан кейин секин «қийшайиб» уйига йўл олганда, ҳозир шавқ билан эртанги меҳнат жабҳасига тайёрланаётган бўларди.

Йигирма кунлар олдин эшикни шартта очиб, Мурод билан Ўроз кириб келган, ўшанда боши осмонга етганди. Мусофирчиликда ҳатто ёмон кўрган одаминг ҳам қўзинга пайғамбардек туюларкан. Буларнинг эса бири — синфдоши, бири — қўшниси. Беихтиёр болалик хотиралари жонланиб, қадрдон қишлоқ ҳавоси юзларни силагандек бўлди.

— Куёш ғарбдан чиқдими, хуш келибсизлар. Ҳар куни сизларни зслайман. Телефон қиласай десам, у томонларга овоз етмади.

Ботир шу пайтда ҳамма қасбдошлар хонасига ёпирилиб кириб келишини, уларга юртдошларини кўрсатиб, «бизни ҳам йўқлаб келадиганлар бор», деб мақтанишни жуда-жуда хоҳларди. Илмий ишида қандайдир чалкашлиқ чиқиб, ҳимояси кечикиб юрган йигит анча дилтанг бўлиб қолган, бир оғиз илиқ сўзга зор бўлиб юрган эди. Унинг кўнгли тогдек кўтарилиб, меҳмонларга боқди. Мурод анча тўлишиби, унинг турмушдан мамнунлиги шундоқ билиниб туар, чехраси йилтиллар, бир пайтлар маъсум бокувчи нигоҳларида қатъийлик балқирди. Унинг яқинда йирик бир хўжаликка директор этиб тайинлаганини Ботир эшитганди, табриклади.

— Ҳа, шундай бўлиб қолди, ўртоқ. Энди бошга тушганини кўз кўради-да.

Бироз кек билан айтилган бу гапга Ботир парво ҳам қилмади.

— Сиз яхшимисиз, раис жаноблари? Энди уйингизни адаштирмағпизми? — маҳалла қўмитаси раиси бўлиб ишлаётган Ўроз бир сафар ширақайф қолда Ботирларникига кириб келган, ўз уйим деб, даҳлизда ухлаб қолган. Ҳаммалари кулишди, яна самимий турунглар эсланди. Негадир ўртада қандайдир парда бордек, у орадан кўтарилимасди. Турли хил кечган йиллар уларни анча узоқлаштириб қўйганди. Меҳмонлар қимтинишар, ниманидир билмоқчи бўлгандек, бир-бирларига жўлайиб қарашарди.

— Бўлмаса, бизга рухсат, — деди чайналиб Мурод қандай кутилмаганда кириб келишган бўлса, шундай кутилмаганда, — борайлик...

— Э, э нима деяпсиз? Уйга борамиз.

— Йўқ, лечение олишимиз керак, ҳам ужиннинг вақти бўляпти, — деди Ўроз ҳам ўрнидан қўзғалиб, негадир «ужин» сўзига ургу берид.

— Бозордаги нархлар гангратиб қўйдими, қўрқманглар, оч қолмайсизлар, — деди ярим ҳазил, ярим чин оҳангда Ботир.

Барибир келтирилган барча далиллар рад этилди, меҳмонлар кетадиган бўлишди. Маълум бўлишича, улар қандайдир курсга келишган. Ҳам таҳсил, ҳам ҳордик, деб қайсилир санаторияда дам олишаётган экан.

— Бир ой шу ердамиз. Ҳали кўп учрашамиз, — далда берди Мурод хайрлашиш олдидан. У ўзига анча бино қўйган, виқор билан гапирав, эҳтимол директорлар шундай бўлиши керак, деб обдон машқ қилганга ўхшарди. «Нимага келишиди-ю, нимага кетишиди? — хонасига қайтиб кирар экан хижил бўлиб ўйлади Ботир, — бу юртдошларни ҳеч тушунмадим-да».

Шу кетишда улардан бирор дарак бўлмади, ҳатто қўнғироқ ҳам қилишмади. Бундан Ботирнинг яна ҳайронлиги ошди, тоҳ жаҳли чиқиб сўкинди, тоҳ «уларда ҳам айб йўқ, қишлоқчилик» деб таскин олди. Бир неча марта излаб бориб топмоқчи, бир танбеҳ бериб қизартирмоқчи ҳам бўлди. «Ўзи, сизлар нима қилганларингиз бу, наҳотки...» Айтмоқчи бўлган бир дунё гаплари бўғзига тиқилиб қоларди. Ҳар гал йўлга тушишга жазм қилса, улар айни шу куни кириб келадигандек туюлар, яна ҳафсаласи пир бўлиб, уйига жўнарди. Йўллар музлаб қолган, кечкурунлари қатнов сусаяр, уйга етгунча бўлгани бўларди-да, ҳаммасини унутарди. Ниҳоят, бугун боришга жаҳд қилди. «Мен мезбонман, мезбон меҳмоннинг эркаликларини кўтариши керак».

Улар хонасида йўқ эди. Сўраб-суринтиришлар ҳам наф бермади. Бир оз кутмоқчи бўлди. Дам олувчилар кечки овқатга тушиб кета бошлишди. Устига чарм қопланган курсига ўтирганча ўтган-қайтганларни кузатиб турди. Лифт ҳар очилганида Мурод ёки Ўроз чиқиб келайтгандек туюлар, яна бегона одамларга кўзи тушиб, ҳафсаласи пир бўларди. Анча кутиб қолди. Жўнаб юбормоқчи бўлди-ю, «бир ҳафсала қилиб келдим, энди кўриб кетай», деб яна ўтирди.

Кутилмаганда қўшни қишлоқлик Ҳамроқул пайдо бўлиб қолди.

— Ҳа, Ботир ака, нима қилиб ўтирибсиз? — деди очик чехра билан. — Улар йўқми? — Институтни сиртдан тутгатяпман, мен ҳам бир ойдан бери шу ердаман, — деди салом-аликдан кейин, — кўчанинг нариги бетида ижара-да яшаяпман.

У бу жойларнинг баланд-пастини яхши биларкан, кимларданdir суринтириб келди ҳам, бироқ аниқ гап топа олмади.

— Иккита опа бор эди, шулар биларди, улар ҳам йўқ, — деди хижолатомуз, — кўпдан бери кутаяпсизми?

— Бир соатларга яқинлашди.

— Юринг, бизникида ўтириб турамиз, келишса, албатта, борадилар, — деди самимий оҳангда, — кеча ҳам бирга эдик.

Ботир кетмоқчи бўлди, Ҳамроқул астойдил осилиб олди.

— Бормасангиз бўлмайди, бугун охирги кун, хайрлашув, эртага ҳаммамиз кетамиз, — ўтиниб сўради. — Ётиб ҳам қолаверасиз, бир ўзимга тўртта кароват.

Иккиланиб турди, яна меҳрми, соғинчми устун келди-да, Ҳамроқулга эргашиб жўнади. Ижара уйнинг ораси анча бор экан, гаплашиб кетишли.

— У опалар ким эди? — қизиқиб сўради Ботир.

— Хўжалик раислари экан, дам олишга келишган. Тунов куни пул бериб мени бозорга юборишиди, қўйишмади. Бизларни меҳмон қилиши. «Доим сизлардан бўлавермасин», дейишли.

Ботирнинг дам олувчиларнинг иноқлигига ҳаваси келди.

— Кейин зўр бўлди, — деди қайфияти қўтарилиб Ҳамроқул очиқкўнгиллик билан, — раис опаларнинг бири ашула айтди, униси ўйнади. Лекин ашулани қийиб қўяр экан.

— Бизнинг синфдош жуда тортинчоқ эди, аралашаяптими?

— У кишини ҳам очиб олдим, — фуур билан гапирди Ҳамроқул муҳим ишни қойил қилгандек. Оддий ижарачининг директорга бунчалик яқинлиги катта гап эди унингча.

Даҳлиз ва бир хонадан иборат ҳужра шинамтина, бунинг устига иссиқ эди.

Ҳамроқул чиқиб кетди-да, баланд бўйли, тўладан келган аёлни бошлаб келди. У соchlарини елкасига ёйиб ташлаган, пахталик тўн кийиб олганди.

— Нарсаларнинг ҳаммасини қозонга солинг, — ўқтам овоз янгради, — эртага кимга қолади? — Кейин қўшиб қўйди: — Имтиҳонни яхшилаб ювайлик.

Ул-бул қўйилган стол атрофига ўрнашиб олишгач, гаплашиб ўтиришди. Аёл ҳам сиртдан ўқирди. Ҳамроқул шу ерда танишиб олибди. Ҳовлида уч-тўрт ҳужра бўлиб, ижародорлар кўп экан. Дарвоза тез-тез очилиб ёпилади. Ҳаво совуқ, қор ёғиши бошлади.

Эшик тақиллади. Даҳлизга телпаклариға қор қўндириганча Мурод ва Ўроз кириб келди. Ботир Муродга разм солиб қаради. Анча жиддий. Ниҳоят, у ҳам Ботирни кўрди. Чарақлаб турган чеҳраси... бир зум тундлашди-ю, яна ёришди. У хонада бошқа бир кишини учратаман, деб ўйлаганди чамаси.

— Э, сизмидингиз? — беписандроқ оҳангда гап қотди-да, Ботирга яқинлашди. Бармоқлар жадал қисишиди-ю, тезда бўшашиб ажралди. Ўроз ёйилиб тураг, юзи тўла кулгу эди.

Мурод Ботирни симкаравотда ёнма-ён ўтиришга таклиф қилди.

— Йўқ, мен ўрнимни бировга бермоқчи эмасман, — леди ярим ҳазил билан Ботир.

— Тақирлаган ёғочда қийналмай, юмшоқроқ жойда ўтиринг, дейман-да, — Муроднинг гапидаги қочириқни Ботир аниқ сезди, ичидан нимадир узилгандек бўлди. Аслида, дўстининг таклифини рад этиб, у гинаси борлигини, бир оз аразлаганини билдириб қўймоқчи эди. Бу Муроднинг иззат нафсига тегди, хомуш бўлиб қолди: «Нега раъйини қайтаради?»

Ўрзининг табассуми-ю, Ҳамроқулнинг муносабати, ошхонадан гап ташлаб турган Турсунойнинг илтифотлари орадаги губорни тарқатиб юборгандай бўлди. Қизғин сухбат бошланиб кетди. Ҳаммалари Турсунойни табриклишди, у бир ҳафтадан бўён ўтолмаган синовини топширган экан. Аёл Ҳамроқулга «ука» деб мурожаат қиласар, пинжига тиқилиб олган, эркаклардан тортинмасди.

— Раис опа қелмадими? — сўради Муродлан.

— Эшик ёпиқ тураверсин, — леди мўралаб турган аёлга Мурод. Бу билан «сир очишнинг ўрни эмас», деб дашном бергандек бўлди.

— Дарёга тушган... — «тошдек» демоқчи эди, яна андиша қилди, — марвариддек йўқ бўлиб кетдингизлар-а, —

деди Ботир тили қичиб. Яна жиққа тегиш учун қўшимча қилди: — Катта шаҳарда одам ўзини йўқотиб қўядиям-да. — У имо-ишоралардан ўзининг бемаврид келганини сеза бошлаганди.

— Лечениедан қўл бўшамайди, — деди Ўроз яйралиб.

— Мен келиб халақит бермадимми?

— Э, у ишлар соат ўндан кейин, — яна ҳам очилиб жавоб берди Ўроз.

Унинг ярим ҳазил ва оққўнгиллик билан айтган бу гапи Муроднинг жаҳлини чиқарди.

— Сизникининг ҳам турми бўшаб қолган-ку. — Афтидан, бу жамоада раҳбарликни Мурод ўз қўлига олган, ҳамма нарса учун жавоб беришни вазифаси, леб биларди.

— Ботир ака ҳам ўзимизнинг одам-ку, — деди Ўроз. Мурод ер остидан ўқрайди, у мулзам бўлди. Ўрознинг оғзи шалақлиги-ю, Ботирнинг эзмалигидан тажанг бўла бошлади. Юраги қисилиб кетди. Бу оқшом бошқа нарсани истаганди. Раис опани эслади. У ... кутаяпти.

— Рости, эртага кирмоқчи эдик, совуқда ҳеч ҳафсала бўлмади. Ўроз раис уйқуга ҳам тўёлгани йўқ, — деди шунчалик сир бермаслик учун.

Муроднинг бу гапларни йўлига айтаётгани сезилиб турарди. «Қалин қозон қайнамас, қайнаса ҳам совимас» деганларидек, унинг бир юмушга жиддий киришиб кетганини, ҳозир ҳам хаёли ўзида бўлмай ўтирганини англаш кийин эмас эди.

Турсуной лаган кўтариб кирди. Қовурилган картошка деярли эзилиб кетганди. Ҳамроқул яримлаб қолган ароқни охиригача пиёлаларга кўйди. Ҳамма ичли, аёл ҳам. Бироқ суҳбат қовушмади.

— Ука, радионгизнинг дурусткроқ қўшиғи борми? — сўз қотди Турсуной Ҳамроқулга. — Бўлмаса, бизникини олиб чиқинг.

— Юринг, бирга бориб келайлик.

Ҳамроқулнинг таклифига опа кўп ноз қилиб ўтиrmай рози бўлди. Улар ҳовли тўридаги хонага чиқиб кетишиди.

Уч хил кайфиятдаги учов қолишиди. Ўроз қўйлагини туртиб чиққан қорнини тинмай силарди. «Заказ» сомсани кўп еб юборибди, ҳамири қалин экан, тиқилиб қолибди.

— Қайси автобусда қатнадингизлар?

Ботирнинг бу саволига Мурод жавоб берди.

— Тўққизда.

— Ў, — деб юборди Ботир шу томонга ўгирилиб, — шунча қатнаб бирров кирмадингизми? Бизнинг ишхона-миз бекатдан бир қадам-а!

Шу пайт юрагидан алами тошди, ўзини камситилган ҳис қилди, улар атайлаб писанд қилмагандек туюлди. «Мен лақиллаб излаб юрибман-а».

— Бунақада, бизнинг эртанги кунимиз йўқ.

Ботир нега бундай, деб юборди, ўзи ҳам билмай қолди. У «Биз» деганида қишлоғидан чиққан «таниқли одам» ларни (ўзини ҳам шулар сафига қўшади). «Эртанги кун»га етишни эса уларнинг қалин бирлашишида, деб тушунарди. Аммо бу гап мўлжалга тегмади. Аксинча, Муроднинг гурури қўзиб кетди. «Бунча эшилади бу нонга тўймаган, ошириб қўйган жойи бордек!» Ўрнидан иргиб турди-да, қўлинини бигиз қилиб, деди:

— Бизнинг эртанги кунимиз-ку йўқ.

Ботир Муроддан бундай дангаг гапни кутмаган эди. Жим бўлиб қолди. Ўроз бепарво ўтирас, зимдан кечётган курашдан хабарсиз, ҳамон қорнини силар, безовта бўларди.

Ботирнинг яна қайсараги тутди. Аслида, у ҳам шу ўринда муроса қилса бўларди. «Ҳазиллашдим, ўртоқ» деган бир гап етарли эди.

— Унақада, ижозатингиз билан рўйхатдан ўчириб ташласак ҳам бўларкан, — деди киноя билан ким кимни «ўчириши»ни ўйлаб ҳам ўтирмай.

— Бемалол ўчириб ташлайверинг! — Муроднинг лаблари титраб кетди. «Бу ким билан пачакилашяпти?» Ботирнинг нигоҳи унга қадалди, семиргандан осилган ҳалқуми, сочини орқага қараб тараганда ялтираб қолган пешонасидан болаликнинг беғубор кунларини излагандек бўлди, лекин улар ... йўқ эди.

Ўроз гап нимадалигини энди тушунди. Шу пайт радиони вант қўйиб мезбонлар кириб келишиди. Ботир ўзини қўлга олди. Ҳеч нарса бўлмагандек, Ҳамроқулга ҳазиллашиди, кейин Турсунойни гапга солди. Ўроз: «Бориб,

қатиқ ичмасам бўлмайди», деди ва қорнини силаганча чиқиб кетди. Мурод онда-сонда суҳбатга қўшилиб турди, столга иягини тираганча ўйланиб ўтириди. Нима воқеа содир бўлганини, унинг оқибатини жуда яхши идрок этар, бироқ орадаги совуқликни кўтаришга виқор йўл қўймасди. Виқор — у мансаб пиллагояларида шуни топган эди. Кейин мудраб кетди. Турсуной талабаликда ўтказган йилларини эслар, Ҳамроқулнинг пинжига яна ҳам тиқилиб олган эди. Ботир унга саволлар берар, мажбуран тинглар, кечираётган аччиқ изтиробини шундай енгмоқчи бўларди.

— Мурод ака, — уни уйғотди Ҳамроқул, — эшикни қулфлаб қўйишади...

Мурод кўзини ишқаб, оғир қўзғолди-да, кийиниб, хайрлашмай чиқиб кетди. Ботир кузатгани турмади.

Яна учовлон қолишиди. Вақт алламаҳал бўлганди. Ҳамроқул Турсунойни кетгани қўймади. Аёл каравотга ўтириди-да, оёқларини узатиб юборди. Кўзларини сувганича Ҳамроқулга ер остидан қараб-қараб қўярди. Ботир бугунги сафари ноўрин бўлганини яна бир марта ҳис қилди ва «ухламоқчиман», деди атайлаб. Аёл кетиш учун қўзғолди.

— Сизни Ҳамроқул кузатиб қўяди, кузатиб қўядигина эмас, бошингиз устида ўтириб чиқса арзиди, ахир сиздай зўлнинг ёлғиз қолиши гуноҳ, — деди Ботир ўсмоқчилаб. У энди бу жуфтликка халақит бермасликни ўйларди.

Турсуной охиригача тинглади-ю, турқини ўзгартирмади. Хайрлашиб чиқиб кетди. Ҳамроқул музтар бўлиб қолди.

— Сиз боринг, — деди Ботир астойдил, — эшигини очадими?

— Ҳа, бизга ҳар доим очиқ бўлган...

Уни елкасидан енгилгина итариб чиқарди-да, эшикни ичкаридан қулфлади. Тушига ҳам кирмаган бегона бир кулбада ёлғиз қолгач, Ботирнинг бўғзига тош тиқилгандек бўлди.

... Кейинги бекат томон жадал юриб борар экан, ўзини тобора енгил ҳис қилар, ичиди фақат бир гапни такрорларди: «Кучли қор ёғсайди».

1994 йил, февраль

НЕГА ХОМУШСАН, ЎЕЛИМ??

Бир дилкаш қўшним бор. Кам кўришамиз, бироқ ҳар учрашувимиз эсда қоладиган бўлади. Ўзи кенгликлар бағрида туғилиб улғайган, учқур орзулар қанотида катта шаҳарга келиб, ўқиган, аввало, куйканаклиги, кейин эса ўзининг эътирофика, «нон-насиба» туфайли шу ерда палак ёзib, умргузаронлик қиласи. Талабчан, эҳтиросга берилмайди, гапнинг дангалини ёқтиради. Ўтмишини унча билмайман, аммо ҳозирги аҳволи нолигулик эмас — бир оила, рўзигор бўлса, шунча бўлар. Баъзан эшилиб кетганда, «битта қошиқдан бошлаб шунчасига эришдим, камини худо тўлдиради, деган умидим бор», дея дил қулфи-ни очади. Беш-олти йил олдин нуқул ўзининг ташвиши билан банд эди: гоҳ чарм куртка, гоҳ видео...га пул тўплайтганини ёзғириб қоларди. Айни пайтда бошқачароқ (бозор иқтисодиёти шароитидан келиб чиқиб деса ҳам бўлади) фикрлайдиган бўлиб қолди. Ўзи ҳамон давлатга қарашли қурилиш ташкилотларидан бирида ишлайди, бўш бўлса, қўшимча юмушларни ҳам бажаради.

Шу қўшним ё ёши улғайди, ё замонга монанд ўзи улғайди, воқеликка теранроқ қарай бошлади. Инчунин, «бизнинг бўладиганимиз бўлди, бўёғимиз синди, энди кейинги авлодни замонабоп қилиб тарбиялайлик» деган гапни бот-бот такрорлайдиган одат чиқарди. Қирқдан энди ўтган одамнинг бундай эътирофи бир чети ҳаётдан совуганликдек туюлса-да, аслида, гапнинг бори ҳам шу.

Ана шу гоясидан келиб чиқиб, дорилфунунда таҳсил олаётган тўнғич ўғлининг тарбиясига бор умидини ҳам, имконини ҳам тиккан.

— Аллоҳимдан айланай, болам яхши, — дер эди шукронасидан бағри тўлиб, — мактабни аълога тутатди, саломатлиги ҳам жойида. Ўз кучи билан дорилфунунга ҳам кирди.

Мўйловлари энди сабза уриб келаётган, худди учишга шайлананаётган сор бургутдек тўлишган Турсунмурод ростдан ҳавас қилгулик ўғлон. Баланд бўйи, пайваста қошлиги, қирра бурнига қараб, ҳали у қанчалаб қизларнинг юратига ғулғула солишини ўйлаб кетасиз. Оққўнгил,

меҳнаткаш ота бутун беғуборлигини унга берган, боланинг ҳалол меҳнат, диёнат қуршовида улғайгани шундоқ билиниб турди.

Яқиндан бошлаб ота — уста Холмирза ана шу ўғлидан кўнгли тўлмай, пана-панада ҳасрат қилиб қоладиган бўлди. Дейдик, ўғлон аста-секин «чўкиб» кетаётган эмиш.

— Кўйсангиз-чи, — дейман мийигимда кулиб, — бинойидек юрибди. Бўйи чўзилиб, анча тўлишиди. Қанақасига «чўқали?»

— Сизга кўп нарса маълум эмас-да, шунинг учун билмайсиз, — дейди чуқур уф тортиб.

«Мен билмайдиган қандай сир бор экан?», — деган андишани кўнгилта тушиб анча юрдим.

Бир кун борсам, Холмирза ёшликтаги альбомларини варақлаб ўтирибди. Кайфияти яхши, хушчақчақ, тетик. Ажабланиб қараб турганимни сезди-да, изоҳ берди:

— Биттаси олти ой олдин қилган ишим учун ҳақини судраб келарди. Бугун ўзи йўқлаб келиб, фоизи билан ташлаб кетди — омади юришиб қолган чоги. Мен ҳам дилим яйраб бозорга тушдим, ул-бул харид қилдим, кўнгил истаб, сизни йўқлатдим.

Бугун қўшним яна ҳам дилкаш эди, талабалик йилларидаги хотиралардан гапирди, бу дунёни тарк этган курсдошларини эслади. Айниқса, пахта теримига чиққандаги ҳангомалари жуда самимий эди.

— Курсдошлар бир-бирини шу пахта ҳашари даврида синааб, билиб оларди, — деди у, — энди менга ўша кунлар ўқищдан ҳам фойдалироқ бўлиб туюлаяпти.

Кейин кўк чойдан хўплаб давом этди:

— Димоғим чоғ бўлса, болалигим, талабалигимни кўп эслайман. Қарангки, кечаси яхши ухласам, албатта, тушимга болалигим, қишлоғим киради. Одамнинг табиати қизиқ-да.

Унинг ёйилиб суҳбатлашиш авзойи бор эди. Мавриди келиб қолганда гапни ўғли Турсунмуродга буриб юбордим. У юрагида тушиб юрган бутун дардини тўкиб солди.

— Ҳасрат қилишни ёқтирумайман. Ўзим тўқиган бир мақол бор: «Битта ҳасратдан битта фишт яхши» — қурувчимиз-да. Фишт билан уй битади, ҳасратдан юрак қонга

тўлади. Шунинг учун ҳасрат қилишдан қочаман. Менинг бу тапларимни ҳасрат эмас, сизларнинг тилларингизда нима дейди, мулоҳаза, ҳа, мулоҳаза, деб қабул қилинг. Негаки, мен ҳаракатдаги одамман, ана шу мулоҳазаларимдан кейин бирор «решение» қабул қиласман...

Кўшнимнинг «мулоҳаза»лари қуидагича эди:

— Умидимни шу икки ўғлимга тикканман. Уларнинг келажагини ўйласам, оддий бир қиёс кўз олдимга кела-веради: мен ким эдим-у, ким бўлдим? Қишлоқдан келганимда трамвай, троллейбусни кўрмаган эдим. Ниятим холис эканми, Аллоҳнинг марҳамати билан ўқишни тутгатиб, ишнинг бошини ушладим, уй-жойли бўлдим, уйландим, рўзгор тутдим. Дўстлар, танишлар орттиридим, энди уларнинг бирор маъракаси менсиз ўтмайди. Менда бирор хизмат туғилса, ҳаммаси «лаббай» деб туради. Кўзимга шу ҳолатим катта давлат бўлиб туюлади. Ростдан-да, катта шаҳарда томир ёзиш осонми? Ана шу дара-жадан туриб, фарзандларимнинг эртасини ўйлайман. Улар мендан ўзиши лозим-ку, улар менинг елкамда турибди-ку. Аммо каттамнинг ҳаракатидан шу интилишни сезмадим. Аксинча, орқага кетаяпти.

Дорилфунунда таҳсилни баланд иштиёқ билан бошлади. Ҳаммаси кўнгилдагидек эди. Саҳармардондан туриб ўзи чой қайнатади, нонушта қиласди, қушдек учиб ўқишга кетади. Шу ҳаракати билан биринчи семестрни «аъло»га топширди. Баъзан аҳён-аҳёнда шикоят қилиб қоларди: бир курсдоши машғулотларга кам қатнашади, сессияни қандай топшираркан ёки фалон домла эски маъruzalari билан дарс ўтади... Иккинчи ярим йилликдан бошлаб оёғи оғирлаша борди. Ойисига «ўқиган ҳам бир экан, ўқимаган ҳам» дебди. Ўша машғулотларга қатнашмаган ўртоғи ҳам ҳамма фандан «беш» олибди. Кейин имтиҳон, синовларда баъзилар очиқчасига пул ишлатибди. Бундай ҳаракатлар мурғак тушунчасида «одам барча орзуларига фақат ҳалол меҳнат билан эришади» деган ақида сингдирилган оққўнгил ўсмирга ёзда қор ёққандек нохуш таассурот уйғотган-да.

Ўғлимнинг ҳафсаласи пир бўлаётганини сезиб, бот-бот тергай бошладим. Мулоҳазалардан сезилиб қолдики, таҳ-

сил ўша биз ўқиган даврдаги услубда экан. На компьютер, на бошқа янгиликлардан дарак бор. Бунинг устига талабчанлик сусайиб кетган, таъмагирлик (ҳар ой стипендиясидан қандайдир баҳоналар билан юлиб қолишаркан, таниш-билишчилик) авж олган.

Шунақа сустлик билан иккинчи семестрда «аъло»га илаша олмади.

Кейинги курснинг бошидан беш нафар болани хориждаги қайсиdir ўқув юртига юборалиган бўлишибди. Тил ўрганишга, икки ойга. Жуда қизиқиб қолди, астойдил боргиси келди. Ўзи ҳам гуруҳида беш яхши талабанинг бири эканига ишонарди чамамда. Биз ҳам қараб ўтирма-дик, пул тўлаб, қўшимча дарс уюштириб бердик. Муаллими — рус аёли ҳам «сен, албатта, борасан» деркан. Ўзи курсдошларига мақтанибди, чет элга кетаман, деб. Бу тап қишлоққа ҳам етиб борибди. Эшитганлар мени табриклиган, менинг эса юрагим така-пука. Ишқилиб, рост бўлсин-да. Йўқ, рост бўлмади, Турсунмурод ўтолмади. Қаттиқ хафа бўлди, бола ҳаётида илк бор зарбага учраган эди. Бир қун ойисига дебди: «Қабул қилишга келгандарни машинасида олиб юрганлар ўтди». Яна айтиблики, уларнинг биронтаси ҳам ўзбек тилини — давлат тилини билмайди.

Шу курснинг охирида бошланғич ҳарбий тайёргарлик — «военка»га танлов бўлди. Биз ўқиган йиллари ўғил болаларнинг ҳаммаси қатнашишга мажбур эди, ҳозир танлаб, бир қисми олинадиган бўлибди. Тањлов компьютерда бўларкан.

— Ўтолмайман, — деди ўғлим.

— Нега?

— Компьютерни яхши билмайман. Бошқалар ҳам билмайди.

— Унақада ким ўтади?

«Ўтиш»нинг шарти бор экан, «кўқ»идан 200 та бериш керак экан.

— Бизда унақаси йўқ, — дедим. — Компьютерни ўрган, ўрганганинг ўзингга қолади. Ўтсанг — омадинг.

Бола бечора компьютерга зўр берди. Бироқ барибир ўтолмади. Шундан кейин ҳафсаласи бутунлай пир бўлди,

аммо дардини айттолмайди. Камгап, ҳафсаласиз бўлиб қолди.

Ўзим ҳам ўқишининг тутуругини тушунмай қолдим. Нима қилиш керак? Бизнинг қўлимиздан фақат ўқиши — меҳнат қилиш келади, ўзим шу йўл билан мақсадимга етдим. Таниш-билишчиликни ҳалиям иқим сўймайди, кам топаман — ўз меҳнатим билан топаман. Бирорларга эшилмайман, шундан бўлса керак, катта жойларда ишлайдиган «акахон»лар ҳам йўқ. Нега энди, ўғлимга келганда талаб ўзгардими?

Бир кун батафсил суҳбатлашдик:

— Факультетларингда ҳар хил тадбирлар, масалан, учрашувлар, «ўткир зеҳнилар» баҳслари бўлиб турадими?

— Йўқ.

— Мана, ҳар хил воқеалар рўй бераяпти. Шуларга муносабат билдириб, йигилишлар, митинглар ўтадими?

— Йўқ.

— Кўп юбилейлар бўлди. Амир Темур бобомиз, Бухоро, Хива... Оила йили, Аёллар йили. Шулар нишонладидими?

— Йўқ.

— Э, нима қиласизлар?

— Маъruzаларни тинглаб, қайтиб келаверамиз. Рейтинг жорий қилинган, синов, имтиҳонлар шу асосда кетаверади...

Ўқишдаги тартибларни қоралашга ҳаққим йўқ, балки мен янгиликни тушунмаётгандирман. Лекин боланинг шахси улғайиб, қизиқиши кучайиб кетмаяпти-да. Бунинг устига бошقا таъсирларни айтмайсизми?

Бир кун, ўқишдан қайтишингда гўшт олиб кел, деб пул бердик. Ойиси қофозга ўралган гўшти очиб қараса, муштдек суяк чиқибди. Бироқ ўғлимиз қасрдан пайдо бўлиб қолганини билмай, нуқул:

— Сотган ёшигина бола эди-я, — дер эмиш такрор-такрор. Бир йилдан кейин яна қассобга юбордик (бозор-ўчарни ўргансин, деймиз-да). Бу сафар кўй гўшти деб, эчки гўштини бериб юборибди.

— Тўхтамурод қассоблар билан яхши чиқишиади, — деб биз қулдик, йигитча эса хафа бўлиб, ғазабланди. Атрофдаги қаллобликлар ҳам унга ёмон таъсир кўрсатаяпти-да.

Холмирза оиласлаги энг оддий гаплардан, уз шахсий ташвишларидан сўзларди. Аслида, жамиятимиз ана шундай оиласлар силсиласидан, жамоасидан ташкил топмаганми? «Қатрада қуёш акс этади», дейишади, қўшнимнинг ҳасрати нечоғлик «шахсий» бўлмасин, унинг сабаблари ҳаммамиз учун хос ҳисобланган мұхитда — ижтимоий ҳаётда пайдо бўлган-ку! Бугун олий ўқув юртидаги ахвол у таърифлагандан афзал эмаслигига барчамиз гувоҳ. Ёки фақат қассоблар эмас, тижоратни касб қилиб олганларнинг ҳам анча-мунчаси аллақачон инсофини пуллаб юборганини рад этолмаймиз. Бундай иллатлар эзгу ният билан фарзандини ҳаётга тарбиялаётган ота қалбida шунча доғ қолдирибди. Аслида, бундай қониқмаслик туйгуси менда ҳам, сизда ҳам бор, балки у бошқачароқ кўринишидадир.

Уста борини тўкиб солганди, унга танбеҳ бериш ёки «мана бу ўринда сиз хато қилгансиз» дейиш ноўрин эди. Барибир (биз бунга ўрганганмиз) айбни ўзимиздан тошишга интилдим:

— Тарбиямиз бир ёқлама-да. Биз болаларимизни мустақил ҳаётга тўла тайёр қилиб тарбиялай олмаймиз. Уларга келажакни теп-текис, силлиқ йўлдан бориладиган ойдин манзил деб таърифлаймиз. Қийинчиликлар ҳақида кам гапирамиз. Шу туфайли улар иродасиз бўлиб ўсади.

— Сизнингча, қийинчиликларни бўрттириб кўрсатсан, болаларимиз дунёни ваҳший ҳайвонлар яшайдиган ўрмон тарзида тасаввур қилиб, ҳаётга қўлида болта билан қадам кўймайдими?

Феъли ҳам яхши, ҳаммага яхшилик тиловчи одам кескин муносабатларни тушунмас ва қабул қила олмас эди. Бу масалала анча баҳслашдик, холоса шу бўлдики, оиласларий тарбия мазмунини ўзгартириш керак. Энди болаларни содда, оқкўнгил қилиб тарбиялаш чинакамига бир ёқламалик ҳисобланади.

Гурунгни тутатиб, ташқарига чиқдим. Вақт алламаҳал бўлиб қолган эди. Қўшнимнинг мулоҳазалари мени ҳам жиддий ўйлантириб қўйди, унинг фифонига қайсиdir даражада ўзимни ҳам сабабчи деб билдим. Ахир биз ўз фуқаролик бурчимизни бажариш учун нима иш қилаяпмиз? Ҳаммамиз воқеаларнинг шунчаки кузатувчисига

айланиб қолмадикми? Кўчадан бирор нарсани топиб олсанг, уни «Топилмалар столи»га элтиб бериш инсоний бурч ҳисобланар экан. Мабодо, унинг эгасини топиб, йўқотган нарсасини қўлига тутқазсанг, фуқаролик бурчини бажартган бўларкансан. Кўз олдимизда қанча нохуш ҳодисалар кечади, аммо биз ўзимизда ўша нарсанинг тагига етиш учун куч топа оламизми? Ҳатто сезиб турсак ҳам ўз норозилигимизни изҳор эта олмаймиз. «Нима қиласман бошимни қотириб», деб мuloҳаза қиласми, ўзимизни қийнагимиз келмайди. Ҳолбуки, кичкина беларвонликдан бошланган иллат газак олиб, даволанмас дардга айланиб кетади.

Баҳор ҳавоси мусаффо эди. Кўп қаватли уйлар орасидан кетдим. Ой булут қуршовидан чиқиб, атрофни ёритди. Оёғим остига дараҳт кўланкаси тўшалди. Уларга разм солдим, бири тик, адл ўсган, иккинчиси эса буқчайиб, шоҳлари тарвақайлаб кетган эди. Бир хил дараҳтнинг икки хил шакли яна менга бир ҳаёт ҳақиқатини тасдиқлаб турарди: бири уйнинг панасида бўлиб, шамол, бўронлар қаддини бука олмаган ва тик ўсган, иккинчиси эса четроқда, табиатнинг барча зарбалари остида бўлган, шоҳларини еллар қайирган, изғирин танасини зир қақшатган, қўёш тифи, сувсизлик эзган, шу туфайли ер бағирлаб, буқри бўлиб қолган. Ҳа, биз ҳам болаларимизни чет таъсирлардан паноҳимизда асрой олмасак, ана шундай пачоқ бўлиб қолишади. Бу манзарани кўриб яна хижолат бўлиб қолдим.

Халқда «Қуш уясида кўрганини қиласди» деган мақол бор. Биз доим «уя» деганда оила муҳитини тушунамиз, бу ўз маъносида тўғридир, лекин бола бутун умр оила даврасида қолиб кетмайди-ку. У катта ҳаётга аралашади, борлиқни ўз идроки билан қабул қиласди. Унинг шахси шу муҳитда шаклланади. Энди устанинг ўғлини тасаввур қилинг. У баҳтли бўлмоқчи ва одамларга баҳт улашмоқчи. Бироқ жамият унинг бу олижаноб ниятига қандай жавоб қайтараояпти? Ўқув юртида ҳақсизликка дуч келса, бозордаги қаллобликдан дили оғриса, унинг дунёқарashi қандай шакл касб этади? У бундай нуқсонлар бизнинг жамиятимизга ёт, биз уларга қарши курашишимиз керак, деган ғояни кўллаб-куватлаш учун ўзида куч топа ола-

дими ёки ўзи ҳам шу оқимга қўшилиб кетадими? Эртанинг кунимизнинг истиқболи учун у шундай куч топа олиши керак, хўп, ўша кучни кимдан, қандай муҳитдан топали? Бундай саволлар мени эрталабгача безовта этди ва уларнинг ечимини кўпчилик бўлиб топишга қарор қилдим.

Таниқли маърифатпарвар Абдулла Авлоний: «Тарбия биз учун ё ҳаёт — ё мамот, ё најот — ё ҳалокат, ё саодат — ё фалокат масаласидир», деган экан. Қушнимнинг ўз фарзанди келажаги учун қайғуриб билдирган фикрларидан кейин шу гапларни яна эсладим. Тарбия — бутун жамият шуғулланадиган машғулотдек туюлди назаримда. Маданий дунёдаги ҳар бир инсон фақат истеъмолчи эмас, албатта, ўз ўрнида тарбиячи ҳам. Биз зарурат туфайли, баъзан мажбуран турли фаолият билан шуғулланамиз. Бу фаолиятимизнинг ўзимизга қанчалик нафи тегиши ҳақида ўйлаймиз-у, унинг атрофимиздагиларга қандай таъсир этишини — тарбиявий томонини ўйламаймиз. Одамлар бир гумбаз остида яшайдилар ва уларнинг феъл-атвори, қилиқлари ҳам бир-бирларининг назарида, зътиборида бўлади. Ана шундай бевоситалиқда «тарбия» пайдо бўлгандир. Бу ҳолни зукко ҳалқимиз жуда чиройли ифодалаган: «Бир болага етти қўшни ота-она». Бу «ота-она» фақат назоратчи эмас, ўзининг яхши қилиқлари билан ибрат ҳам бўлиши лозим...

Холмирза билан суҳбатларимиз давом этиб турибди. Биз энди Тўхтамуроднинг қалбида иштиёқни кучайтириш, уни чинакамига ҳаётга тайёрлаш борасида маслаҳатлар қиласяпмиз.

1999 йил

ЭР ВА ЕР

Албатта, кўпчиликка яхши таниш ҳалқ эртагининг лавҳалари ёдимизда. Подшо зериккан ёки у ҳар бир унсурдан ҳикмат излайди: ўрда ҳовлисидаги дараҳтга қўнган қарғанинг «қағ-қағ» дегани мазмунини билгиси келади. Бироқ жавоб беришдан ожиз тўрт юз уламо, уларнинг

бошини олишга шай ўн тўрт жаллод. Золим подшога бош олиш лайкалдан тарвуз узишдек гап, «офтоб шуъласи ерга етмай» амр вожиб бўлади. Шу чоғ камбағал аёлдан туғилган Ҳуснобод журъат қилиб ўртага чиқади ва қарғанинг «сўз»ини таржима қилиб беради. Ўжар қиз етти йил зин-донга ташланади, лекин доно вазир уни қутқаради ва эртакнинг ёруғ хотимаси, ундан тўқилган гўзал мақол: эрни эр қиласиган ҳам, қаро ер қиласиган ҳам — хотин!

... Бир воқеа сабаб бу мақолни қайта эсладим. Эсладим-у, ўзим яхши билган жами танишларимнинг тақдирини шу тарозида тортиб кўрдим. Во ажаб, халқ донишмандлигининг кучини қарангки, мен ёдга олган барча тақдирларда ўша мақолнинг ниҳоятда тўғрилиги мана-ман, деб турарди. Тўғри, биз бирор одамнинг омади ёки омадсизлиги ҳақида гапирганимизда бошқа омилларни ҳисобга оламиз: иши юришмади; қўли қисқалик қилди; болалари нобоп чиқди ёки ўзида бор, сингари мулоҳаза юритамиз, бироқ ҳаммасидан олдин «Унинг хотини — турмуш ўртоғи ким?» деб савол берсак, кўп нарса ойдинлашиб қолар экан.

Воқеа эса мана бундай эди.

Бир факультетдошимиз ўз қасбida шундай даражага эришдики, унинг бу ютуғини талабаликдаги вазияти билан чоғиширса, «тошдан олов чиқди», деб баҳолаш мумкин. Ҳали университетни битирмай, ҳайкалини ўрнатиш учун жой излаб юрганлар, ўшандаёқ «классик»ка айланганлар бир «лов» этди-да, қолиб кетишиди, у эса ҳеч кимга кўринмай, аста-аста олдинлаб борди, обрўни ҳам, мансабни ҳам, бойликни ҳам кетма-кет, изчил забт этиб олаверди. Ҳар сафар у ҳақдаги бирор хушхабарни эшитсан, талабаликдаги Маҳмуд кўз олдимга келаверади: тортичоқ, камгап эди, аранг «ўрта»га ўқир, машгулотларга ҳам номига келиб кетар, факультетдаги ташкилий ишларда деярли кўринмасди. Пахта териш пайтлари уни бирон марта гулхан атрофига чиқиб шеър ўқиганини ёки «юз килограмчи» бўлиб мукофот олганини билмайман, аксинча, этагини аранг судраб, бурнини тортиб, бир амаллаб юрарди. Ана шу «писмиқ» бирданига соҳанинг дадил вакилига айланиб қолди. Мен унинг муваффақиятлари са-

бабларини кўп таҳлил қилдим, аммо бирор асосли важ топа олмадим. Шунда ҳалқда: «Яхши от кейин чопади» деган нақл бор, у ростдан қам «яхши от» экан-да, деб қўя қолдим.

Навбатдаги сафаримда яна уни излаб бордим. У иш жойида йўқ эди, суриштирасам, «Бугун хотинининг туғилган куни, уйида меҳмон кутишга тайёргарлик кўрапти», дейишди.

— Ў, у шунчалик маданиятта эришганми? — дедим истеҳзо билан.

— Йўқ, сиз билмайсизми? Хотини жуда мўътабар аёлда, — деди сухбатдошим, — бундай аёл учун дунёни ҳадя этсанг арзийди.

— Чинакам гўзал инсон. Бунақаси кам топилади. — Маҳмудни яқиндан билганлар ўз ҳаяжонларини тўкиб солишиди. Маълум бўлишича, келин вилоят кутубхонасида меҳнат қилар, хуснда, муомалада мукаммал экан.

— Одамлар кўпроқ китоб ўқиш учун эмас, шу фариштани кўриш учун кутубхонага келишади, — деб фикрларини якунлашди улар.

Бўлиши мумкин. Дунё ҳикматлардан холи эмас. Мактovлар, эътирофлар ўз йўлига-ю, мен бошқа бир ҳақиқатни кашф этган эдим: демак, танишимнинг ютуқлари сири — шу экан. Маҳмуд бир аёл туфайли ерга эмас, эрга айланган экан. Бу холосага сиз қанчалик қўшиласиз, билмадим, лекин шу оддий ҳақиқат олдида кўп нарсалар сароб бўлиб қолади. Кейинги кузатишларим асосида бу нарсага янада ишонч ҳосил қилдим. Эркакнинг жуфти ўзига мос бўлса, ёшлигига куч-кувватга тўлиб, камолга етиб, юксак парвозларга қанот олади; ўрта ёшда чинакамига яшаб, оламшумул ишларни амалга ошириб, ҳаётнинг барча лаззатларидан етарлича тотади; қариганда умр бўйи эккан ҳосилининг мевасини териб, фарзандлар ардоғида яшаб, дунёдан армонсиз кетади. Бундай баҳти комилликка фақат эркакнинг ўзи эмас, балки унга шу баҳтни ато этган аёл ҳам биргаликда муюссар бўлади. Чинакам эрхотинликнинг, аёлнинг эрга, эрнинг аёлга инсоний хурматининг мазмуни шу!

Тўғри, булар ҳақида жуда кўп ва хўб ёзилган. Бу мавзуда бирор янги гап айтиш ҳам қийин. Афсуски, баъзида ёки ҳар доим ана шу «ҳаммага маълум» ҳақиқатларга амал қилинавермайди, улар билан ҳисоблашилавермайди. Бинобарин, ҳар бир кунимиш янгилик, янги тарих экан, ана шу кўхна ҳақиқатларга бугун нечоғлиқ амал қилинётганини оҳори тўкилмаган мисоллар билан кўриб чиқайлик.

* * *

Кўпчилик эр-хотинлик муносабатларини икки қутбга ажратадилар: тўйгача ва тўйдан кейин. Ҳатто бу қутблар борасида катта жарлик бор, қолаверса, улар бир-бирига зид (худди Арктика ва Антарктидага ўхшаб) деб тушунтиromoқчи бўладилар. Уларнинг даъвоси нақадар ўринли, билмадим, бироқ нега ҳамма Маҳмуджонга ўхшаш омадли эмас, деган савол кишини қийнайди. Ҳар ҳолда на эр, на ер бўла олган, икки музлик орасидаги шиддатли шамоллар билан умри ўтаетган эркаклар ҳам, аёллар ҳам кўп. Уларнинг бъязилари: «Турмуш, бу — мушт, эрнинг нони ичида тоши бор», деб ёзғирса, бири: «Ёлғиз яшаётганим аёллар дунёсига исёнимдир», деб ўз изҳорини баён этади. Бошқаси: «Э, эр ҳам ўз хотинини ҳурмат қиласди-ми?» дея заҳарханда қилса, тўртинчиси, «ўтди-да умр» дегандек, қўлинини лоқайд силтаб қўяди. Табиийки, маҳалланинг ўрни ва мавқеининг кучайиши туфайли оила мустаҳкамлиги ошди, ажралишлар камайди. Шу туфайли Маҳмуджонга ўхшаганлар кўп. Аёл ҳам турмуш ўртоғи, ҳам она сифатида одамзод дунёсининг икки қирғонига ўхшайди. Агар бу қирғоқ эгри-буғри бўлса, дарё ҳам шундай ўзандан оқади, қийшиқ ўзандан оққан дарёда эса хас-хашаклар кўлмак бўлиб қолади, оқим ҳам тез бўлмайди. Қирғонлар теп-текис, силлиқ бўлса, дарё суви мусаффо, оқим шиддатли, ўзан тоза бўлади. Бизнинг тасаввуримиз ана шундай манзарани акс эттириди.

Албатта, тўйдан кейинги турмуш фалсафаси жуда терран. Бу ҳақда Суқрот ўз холосасини шундай баён этган: «Ўйлаб-нетиб ўтирумай шартта уйлан. Хотининг яхши чиқ-

са-ку, хўп-хўп, ёмон чиқса, файласуф бўласан». Сукротдек кишики ажрни тақдирга ҳавола қилган экан, бошқаларга бирор жўяли гап айтишга йўл бўлсин. Демак, бу борада ёзилмаган қонунлар, кашф этилмаган сирлар кўп экан. Албатта, эрнинг, эркакнинг тақдири, бинобарин, келажакнинг тақдири Аёл жаноби олияларининг қўлида экан, фақат ўзига инсоф берсин, дея илтижо қилишдан ўзга чора йўқ.

Аммо вазиятни бутунлай назоратдан четда, деб ҳисоблаш хато бўлар эди. Ҳеч курса тўйгача бўлган даврни кўнгилдагидек уюштириш имкони бор.

Гап бир-бирига муносаб жуфтлик ҳақида кетар экан, масаланинг хусусий ва ижтимоий жиҳатларини фарқлаб олишга тўғри келади. Хусусий (шахсий) томони шундаки, келин ва куёв танлаш ота-она, қариндошларнинг ички иши. Ҳар кимнинг дили ҳар хил. «Шоҳнинг ишқи қурбақага тушибди», дейишади. Бу борада эса икки таомил амал қиласди: севиб уйланиш ёки ота-она розилиги билан уйланиш. Бизнингча, бу икки ҳолат руҳшунослар фикри, турмуш тажрибаси, авлодлар ҳаёти мисолида етарлича тадқиқ қилинган. Ҳулосалар эса, тахминан, қуидагича: севиб уйланганларда: «Ким кимни кўпроқ севали?» деган фикр устун бўларкан. Ота-она розилиги билан турмуш курганларда эса: «Ким кимга кўпроқ ёқади» деган андиша кучли бўларкан. Негаки, биринчи ҳолатда севги изҳор қилган томон (йигит ёки қиз) шу вазифани адо этиш билан у томонни ўзидан олдинги ўринга ўтказади (яъни унинг олдида «паст тушади»), ана шу олдин-кейинлик турмушдаги ҳамма икир-чикирларда акс этади. Гўшангода учрашганлар эса бир-бирини яхши билмаганлигидан тенг муносабат ўрнатади, қолаверса, ўзаро яхши томонларини намойиш этишга интилади. Севишганларда турмуш завқли, ошкора, замонавий кечса, буларда вазмин, сирли, анъанавий тарзда ўтади. Бирида муносабатлар тезда зери-карли тус олиб, поёнига етиб қолса, иккинчисида янги жиҳатлар кашф қилиниб, узок давом этади. Албатта, бу ҳулосалар нисбий бўлиб, уларнинг тўғрилигига ҳеч ким кафолат бермайди, шунинг учун ишонса ҳам, ишонмаса ҳам бўлади. Эндиликла келин ёки куёв танлашнинг то-

монларнинг насл-насабини суриштириш, шифокор кўригидан ўтказиш сингари усуллари жорий бўлаяптики, бу билан яқин орада кўп муаммолар ечилади.

Албатта, эр-хотинлик — оила жамиятнинг ажралмас қисми экан, бу масалаларнинг умумжамият, яъни ижтимоий томонлари ҳам мавжуд. Қолаверса, оиланинг шахсий баҳти ёки баҳтсизлиги жиддий ижтимоий масала: жамиятда баҳтли оилалар кўп бўлса, жамият шунча ривожланган, илғор ҳисобланади ва, аксинча. Демак, келин ёки куёвнинг кимлиги (бу ўринда тарбияси, маълумоти, ҳатто соғлиғи) ҳаммани бепарво қолдирмайди. Зоро, бу бепарволикнинг замирида «Бугунги ёшлар қандай вояга етаяпти?» деган ташвиш мавжудлиги ҳам бор гап.

* * *

«Ҳуррият» газетасининг 2004 йилги сонларидан бирида «Валентин куни» муносабати билан билдирилган мулоҳазалар кишини жиддий ўйлантиради. Бундай ҳолатни қандай баҳолаш лозим: у умуммиллий фожиами ёки рўй бериши шарт бўлган оддий воқеиликми? Шуниси борки, мақолада бу борадаги бугунги аҳвол тўла акс эттирилмаяпти, ундан бир шингил келтириляпти, холос. Лекин шунинг ўзи ҳам жиддий ўйлаб кўриш учун етарли. Майли, бошқа катта гаплар (масалан, ўзбек ҳалқининг буюклиги — бу буюклик бальзан шундай талқин қилинадики, гоҳида ер юзида инсон зоти биздан тарқалганми, деб ўйлаб қоласан — меъёrsиз мақтаниш шунга олиб боради ёки ўзбеклар ҳамма нарсани яратган-у, бошқаларга бериб кўйиб, ўзи куруқ қолган; янги бир ғайримиллий байрамнинг турмушимиизга кириб келгани)ни бир четга кўяйлик-да, бир нарса ҳақида мулоҳаза юритиб кўрайлил: эфирда жар солиб қизлар (ҳа-ҳа, қизлар, қизчалар) йигитларга севги изҳор этаяпти! Йигитлар-чи? Улар жим, улар, умуман, кўринмайди. Демак, ташабbus қизлар тарафида.

Аслида, кимдан гина қиласиз? Ўша қизлар кеча, бутун тўрва-халта кўтариб, шаҳарма-شاҳар, бозорма-бозор изғиб юрган аёлларнинг зурриёди эмасми? Фалак бир

айлангунча улар ҳам она бўлади. Энди уларнинг болалари ким бўлишини ўйлаб кўринг. Одамлар ўзлари сезмаган ҳолда эккан уруғларининг ҳосилини ўриб олаверадилар. Бундан ё ютадилар, ё ютқазадилар. Кўплар бундай ҳолларга беҳаё фільмлар, тунги дискотекалар айбдор, лейишади. Балки ростдир, аммо одамни тўғри йўлга бошқаралиган оила муҳити, оила тарбияси деган омиллар бор-ку... Эҳтимол, ўсмир қизчаларнинг дод солиб ўз севгисини изҳор этиши жуда катта фожиа эмасдир, лекин оила кўргонининг заиф бўлиб қолиши, айниқса, унда эркакнинг ўрни йўқолиши бундан-да катта фожиа эмасми? Юзага бўртиб чиққан дард ҳақида куюнчаклик билан гапирган яхши, аммо унинг илдизларига теранроқ назар солинса, моҳият янада ойдинлашган бўлармиди?

Яқинда бир ҳамкасбимиз кўчадан гап топиб келди: бизнинг ота-боболаримиз момоларимизни ўпишда гулдан ҳам уялган эканлар. Ҳатто бу ҳақда ҳазрат Алишер Навоий ғазал ҳам ёзибди. Ҳақ гап, аждодларимиз ана шундай ҳаёли бўлишган. Улар кўп нарсадан уялишган. Нафақат гулнинг қаршисида ўпишиш, балки ёлғон гапириш, алдаш, мунофиқлик, ҳаромхўрлик сингари барча иллатлардан уялишган. Баъзан манзарани тасаввур қилиш учун бир унсур кифоя қиласи (масалан, янтоқ — чўл аломати). Ижтимоий ҳаёт манзараси алоҳида юлиб олинган бир воқелик орқали тақдим этилса, ҳаммаси чалкашиб кетаркан. Яна ўша эфирдаги қизчаларга қайтайлик. Улардан биз «ят» талаб қиляпмиз, бироқ ўшалар шу ёшга етгунча бу тушунчага дуч келдиларми, ҳаётларида уятдан қизариб, изза бўлган бирор одамни кўрдиларми? Бу саволга жавоб топиш учун бугунги кундаги оила ҳаётидан ташқари кўчакуй, боғча, мактаб, билим юритидаги маънавий муҳитни кўз олдимизга келтирсан кифоя...

Шубҳасиз, бу мулоҳазалар лейтмотивга дахлсиз эмас. Зоро, мавзу мустақил юртимизнинг тарихий юкини елкасига озод кўтара оладиган муносаби кишилар ҳақида эди. Бундай «замонавий қаҳрамонлар»нинг шаклланиши оила муҳитида ҳам, ишлаб чиқариш жойларида ҳам, майший ҳаёт лаҳзаларида ҳам баробар кечади. Ва биз ҳамма жойда эркак — аёл муносабатига дуч келамиз. Ана шу муносаба

батларнинг қай даражада эканлиги бизнинг аслида ким эканлигимиэни белгилаб бераркан, бу юксаклик ҳар доим Аёлларнинг бўйи билан ўлчаниб келган.

Бир ҳаётий мисол:

Чекка қишлоқларнинг бири чўлга кўчирилди. Уларга шароитни, айниқса, пахтачиликни яхши биладиган одам раҳбар этиб тайинланди. Бу ҳол кўчиб келганларга унча ёқмади, улар: «Биз подамизми, чўпонимиз четдан бўлади?» деб норози кайфиятда юришди. Йиллар ўтаверди, ҳар йили 50–60 бола мактабни тугатиб, мустақил ҳаётга йўл олаверди. Орадан 25 йил ўтди. Бу пайтда қишлоқликлардан фан докторлари, таниқли артист ва рассомлар етишиб чиқди, бироқ хўжаликка етакчилик қиласидан раҳбар чиқмади. Ўндан зиёд кишида диплом бўлса-да, қишлоқ хўжалиги машиналари бош муҳандислигини биронтаси эплолмади. Шунда бу одамлардан нега раҳбар (лидер)лар чиқмади, деган савол кўндаланг бўлди. Унга эса жавоб шундай эди (балки нотўғридир): қарийб 30 йилда кўп нарса ўзгарди, асфальт йўл, газ, телевизор, телефон оддий нарса бўлиб қолди, одамлар бойиди, дунё кўрди, бироқ турмуш тарзи, айниқса, аёлларга муносабат ўзгармади. Ҳамон ўша эски биқиқ анъанаалар, бола тарбияси, оила муҳити давом этяпти. Гапнинг дангали эса оналар ҳақиқий эркақларни туғиб, тарбиялаб бера олмаятилар. Шунинг учун ҳамон хўжалик раҳбари ўзларидан чиқмайди.

Бу бир жўн гап, бир шахсий кузатиш. Негадир шу фикрда жон борга ўхшайди, негадир шу фикр одамзод буткул тараққиётининг энг сара хulosаларига ҳамоҳангдек.

Ҳа, одам зоти шу вужудда пайдо бўлади, унга юкинали, ундан најот ва шафқат сўрайди. Аёл салтанати дунёлар, мавжудотлар, донишмандликлар-у тафаккур инқилоблари — ҳамма-ҳамма нарса устидан ўз ҳукмини ўқийди. Бу енгилмас, мағрур ва боқий ҳақиқат қаршиисида қуллуқ қиласиз.

2004 йил

АБАДИЙ ЯШИЛ ЎРМОН

Четдан қараган кишига куп нарса аниқ кўринади. Айниқса, одатий турмуш оқимиға тасодифан (дейлик, меҳмон сифатида) тушиб қолган одам ҳамма кўнишиб бўлган манзаранинг янги қирраларини кашф этиши, барчага таниш ҳолатдан ўзича маъно ажратиши мумкин. Ана шундай «четдан қараган» одам шундай воқеани сўзлаб берган эди:

— Эз кунларининг бирида бегона қишлоқда тушлик туй ошига ташриф буюришга тўғри келиб қолди. Биз томонларда маъракаларда шундоқ ерга тўшакларни сочиб ташлаб, устига кўрпача ёзилади-да, меҳмон чорланаверади. Пастак ишкомлар тагида ясатилган дастурхонларга яқинлашар эканмиз, жам бўлганлар ҳаммаси туриб қўл қовуштириб кутиб олишди. Фақат ўзи ёлғиз ўтирган одам қимирламади, шунчаки дуои хайрга қўшилиб, ҳаммага бир кур бош ирғаб қўйди. Унинг шу алпозда ўтирганига кўп вақт бўлгани билиниб турарди, олдидаги дастурхон йиғишириб олинган, яқинида ҳам ҳеч ким йўқ. Анча басавлат эмасми, бир томонни тўлдириб ўтиради. Устидиа енгил оқ яктақ, кўкрагини очиб олган, қўлидаги сочиқ билан елпинар, тақир қилиб қирилган бошини, тер оқаётган юзларини тинмай артарди. Чордона қуриб олган, олдилда катта қўсқи телпаги (бу томонларда ёзда ҳам телпак кийишади), ёнида телпакдан ҳам катта чойнак. Билмадим, тоғни уриб талқон қилганми, ҳўқизни ботқоқдан суғуриб қўйганми, пиёлани қўлидан қўймас, айлантириб-айлантириб, ҳафсала билан чой хўпларди. Бегона бўлганим учун бошқалар менга эътибор беришмали, мен эса чойхўрни диққат билан кузата бошладим. У чойни шопириб-шопириб қайтарар, дам ейишини кутиб, даврадаги сұҳбатга луқма ташлаб қўяр, кейин ютоқиб иштаҳа билан пиёлана лаб босарди. Менинг ҳисобимда тўртингчими, бешинчи чойнакдан биринчи пиёлани хўплаб, афтини буриштируди-да, ўзича сўкиниб, шундай деди:

— Ҳа, қиёмати, чойнакни ерга қўйиб олибди-я...

Чойхўр мени жуда қизиқтириб қолганди, ҳар бир ҳаракатини кўздан қочирмай, айтган сўзини эсдан чиқармай кузатаётгандим. Бу гапини унча тушунмадим. Ёнимда ўтирганлардан бирига, «Полвон ака нимадан хафа бўлаяптилар?», деб сўз қотдим. Мезбон ҳамюртини обдон яхши билса керак, ишонч ва бироз фурур билан:

— Дастёр бола чойнакни олиб келаётиб, қўли куйганидан ерга қўйиб олган бўлса керак, чойнинг таъмидан шуни билди, — деди.

Гапни мазкур ҳикоядан бопилаётганим бежиз эмас. Ҳозиргача ашалдий чойхўрнинг фаросати, закийлиги ҳақида ўйлайман, ҳалқимиз орасида синчилар, ақли тошлини ёрадиган одамлар кўплигига шафе келтираман. Ниҳоят, истиқлол йиллари манзарасини кўз олдимга келтириб, ўша чойхўр мисолида азамат, чўнг, ер остида илон қимиirlаса биладиган ҳалқимизни зaslадим. Тарихлар ҳам, замонлар ҳам қарита олмайдиган, ўз мезонига, нуқтаи назарига, тошу тарозисига эга бўлган, «мехнат» отлиқ шараф ва заҳмат бирлаштириб турган одамларимизнинг улкан жамоаси — ҳалқнинг кайфияти қандай? Мабодо, савонни шундай кўндаланг қўядиган бўлсак, «ўткинчи» қийинчилликларни метин бардонни билан енгаётган, ўз улдабуронлиги, меҳнатсеварлиги билан бир нави кун кўраётган кўпчиликнинг аҳволи-руҳиятига таъсир қилаётган омиллар ҳақида фикр юритиш айб эмас.

Истиқлоннинг ilk йиллари силкинишларсиз, бир маҳомда кечди. Бу, албатта, ҳаммамизнинг баҳтимиз. Яқин қўшнилар — Афғонистон, Тоҷикистон, Россия, Караказдаги воқеалар яна ҳам босиқ бўлишга, яна ҳам жиловни Қаттиқроқ ушлашга мажбур қилгани ҳам рост. Бундай ташқи таъсирлар фақат иқтисодий алоқаларнинг чигаллашишигагина эмас, юртимиз ички аҳволига — баъзи салбий ҳолатлар воқе бўлганда кескин чоралар кўришдан тийилишга ҳам олиб келди. Оқибатда, тараққиётга тўсқинлик қилаётган унсурлар пайдо бўлди. Ҳолбуки, «Ҳалқлар тараққий этиб, ўса олиши, шон-шарафга бурканиб, муваффақиятли равишда фикрлай ва ишлай олиши учун ҳаётларининг негизида тараққиёт ғоялари ётиши керак»

(Эмелио Кацлерлар, испан сиёсий арбоби), яъни бутун мамлакат ягона мушт бўлиб эртанги истиқбол учун курашиши лозим. Тарихдан мисол, Японияни оёққа турғизиш керак бўлганда, мамлакат аҳолисининг ялпи талаби билан 14 соатлик иш куни белгиланган экан. Кўплаб жамоалар дам олиш кунисиз ва байрам кунларида ҳам ишлаш ташаббуси билан чиққан.

Тараққиёт ўз йўлида зиддиятларни яратади ва шу зиддиятлар курашида яшайди, дейишади. Бу худди айиқ яшаш жараённида жун ташлаб ва ўзи ҳам шу жунига ўраниб ухлапнига ўхшайди. Худди шундай, тараққиёт одамлар жамоасини икки табақага — ишловчилар ва раҳбарлик қилувчиларга бўлиб юборади ҳамда гарчи бу икки томон ягона қобиқда яшаса-да, ўртада баъзи хусусий зиддиятлар пайдо бўлади. Чунончи, раҳбарлар ишловчиларнинг жон-жаҳулари билан тер тўкишларидан манфаатдор ва, иккинчидан, раҳбарлар яратилган бойликлардан ишловчиларга нисбатан кўпроқ улуш олишга интилиб келганлар. Бу — бутун инсоният тарихида тасдиқланган ҳол. Тузумнинг қиёфаси ҳам шу икки томоннинг ўзаро муносабатларига боғлиқ бўлган: илғор жамиятларда раҳбарлар ва ишловчилар ягона мақсад — эртанги фаровон ҳаёт куриш йўлида баробар тер тўкканлар, манфаатлар ҳам, қизиқишлилар ҳам қўшилиб кетган, ўртадаги чегара деярли йўқолган — энг катта раҳбар ҳам оддий меҳнатчи билан бир қозондан овқат еган, бир хил тўшакда ухлаган. Бундай илғор тартиблар ўз навбатида тараққиётда ҳам илғор даражани таъминлаган. Аксинча, раҳбарлар ва ишловчилар ўртасида Хитой девори пайдо бўлиб, манфаатлар тўқнашганда, ички зиддият (ўз-ўзидан тормозланиш) юзага келиб, тараққиёт жойида депсиниб тураверган. Бу ҳол, аввало, раҳбарлар ва ишловчилар ўртасида жарлик пайдо бўлишидан бошланади. Чунончи, раҳбар томонга қўшимча имтиёзлар берилиши, унинг фаолиятини етарли назорат қилмаслик (чунки раҳбарлик руҳиятида кўпроқ юлиш кайфияти бўлади) ва бошқа сабаблар туфайли табақалашибошланади. Раҳбар биргаликда яратилган умумий моддий бойлик (10 деб олсак)ни тенг (5—5) эмас, кўпроқ

(7—3, 8—2 каби) олишга интилади. Ана шунга эришганлар, табиийки, бойиб кетади. Нариги томон ўз-ўзидан қашшоқлашади. Бундай ҳолат паст ҳаёт тараққиёт тартиби саналади ва жамиятни паст тараққиёт даражасига тушириб қўяди.

Юртимиздаги ҳозирги аҳвол таҳлил қилингандан, тарихий мерос сифатида бир ҳолни истисно қилиш мумкин эмас. Социализм оғизда «синфларни тугатган, ижтимоий тенгликни барқарор қилган» бўлса-да, табақаланиш жуда кучли эди. Раҳбарга берилган имтиёзлар, унинг кўринмас қўрғон ҳимоясида, асосан, тайёр кўрсатмалар асосида фаолият юритиши пичогининг ёғ устида бўлишини таъминлаганди. Раҳбарлик масъулият эмас, кўпинча майшат эди ва шу туфайли уни сотиб олишарди, сотишарди. Истиқлолдан кейин умуммиллий манфаат биринчи ўрининг чиқди: бутун мамлакатни, ҳалқни кутқариш, уни умумжаҳон тараққиёти даражасига олиб чиқиш керак эди. Ана шундай шароитда фидойилик талаб қилинарди: ҳар қандай шахсий манфаатдан, ҳоҳиш-истакдан воз кечиш ҳамда имкониятни ягона мақсадга, дейлик, олдин мамлакатни бой қилиб, кейин ҳаммамиз бой бўламиз, деганга ўхшаш порлоқ бир орзуга бўйсундириш керак эди. Афсуски, онглаги, турмушдаги лаънати мерос хуруж қилиб қолди: ҳудди шўро даврида ўрганиб қолинганидек, ким тўғри келган жойидан ўмариш дардидан воз кеча олмади. Балки кимлардадир «Бу бойлик ватанники, мустақил Ўзбекистон келажаги йўлида асқотади», деган тушунча бўлиб, ўзини тишиш кайфияти бўлгандир, бироқ кўпчилик юрагида тоза ва беғубор, инсонни, миллатни улуғлайдиган туйғуларни топа олмади.

Албатта, бундай ҳоллар иситмадек ўтиб кетади, «ўтмаган кун борми?» Синовлардан кимлардир тоза виждан ва покиза имон билан, кимлардир бутун авлод-аждодини бадном қиласиган тавқи-лаънат билан чиқади — ҳаммасига баҳо берадиган, тош қўядиган буюк ҳакам бор. Бу — бўронларни бағрида сифдира оладиган, ҳар қандай хиёнатни кечира оладиган, кўксидан сут бериб улғайтирадиган ва шу кўксига тиғ қадалганда ҳам пинагина бузмай,

одил туриб берадиган, қазои қадар — сўнгги кунда ел-касида кўтариб, барибир кўзда ёш билан ерга топширадиган ва бир сиқим тупроқни оғринмай сўнгти масканига ниёз қиласидиган ҳиммат ва саховат соҳиби — ХАЛҚ-дир. Кўхна дунёда кимлар наъра тортиб ўтмади, кимлар осмонга сакраб, ерни, халқни топтамади. Буларнинг бари ўтаверди ва ундейлар халқнинг хотирасида бир умр кўча супуриб, сув ташиб хокисорлик билан умр кечирган оддий фақирчалик из қолдирмади. Халқнинг баҳоси — олий баҳо, халқнинг мезони — олий мезон!

Буюк китобларда ёзилмишни, раҳбар бўлиб ишлаган одамнинг кўли охиратда боғлиқлик турар эмиш. Агар у хайрли ишлар қилган, кўли тоза бўлса, тугун ечилиб кетармиш. Агар нопок бўлса, шу ҳолда дўзахга тушармиш. (Валлоҳи аълам биссавоб.)

Яна ёзилмишни, салтанатларни устувор қиласидиган, мамлакатларни гуллаб-яшнатадиган фазилатлар — тўғрилик, ҳалоллик, поклик, адолат каби марваридлар халқ денгизида мавжуддир. Инсониятга ёруғ кунлар олиб келган, эзгу орзуларни амалга оширадиган буюк даҳоларнинг волидаси — халқ. Шунинг учун жами замонларда бутун эътирофлар шу хилқатга қаратилган. «Халқим», «халқимга», «халқим учун» деб бошланган қасам сўзлари ҳаёт-мамот ҳайқириғи бўлган. Инчунин, идора ишларида, бошқарувда халқ билан бамаслаҳат иш тутилган, унинг фикрига қулоқ солинган... Қолаверса, ўз сардорини, раҳбарини халқнинг ўзи танласин. Ўн кишилик жамоага етакчилик қилаётган бригадирнинг иши қоғозда милтиқнинг ўқидек бўлиши мумкин — ҳисоб-китоблар тўғри, режалар бажарилган. Бироқ оддий одамлар қалбига қулоқ тутилса, улар бошқача фикр изҳор этишар. Албатта, бундай ҳолда — кўпчилик ҳақ.

Аслида, барча ислоҳотлар ва бошқа ўзгаришлар халқнинг иродаси туфайли ва халқ учун эмасми?! Бинобарин тарихдаги ўтмишнинг бой тажрибаси билан яшаётган, бугуннинг залворли юқини елкасига тутиб турган, кела-жакнинг оппоқ тонгларига доя бўладиган бетимсол теранлик ва буюклик манбаи халқ, одамлар рози бўлган, бе-

каму кўст яшаган жамиятни устувор қилган тузумлар инсоният ҳаётининг ёруғ кунлари бўлиб қолмоқда.

... Мен ҳам илдизига нам етиб улгурмаган бир дилдираган майса каби, нигоҳим тикилган, истиқболимга пешвоз турган яшил ўрмонга интиламан. Абадий яшил ўрмон бардам шовуллаб, иштиёқимни оширади...

1995 йил

БАФРИ ЧЎГЛИ ҚАДРДОН

... Унинг бир ўғли сотқин чикди ва шу туфайли ўзқўли билан ўлдириди. Иккинчи ўғли эса душман билан олиша-олиша кўз олдида маҳв бўлди. Асосий кучларидан ажралган баҳодир қуршовла қолди. Бироқ сўнгги нафасда Аллоҳ мададкор бўлиб, уни чирмаб олаётган тўр ситилиб, нажот йўли очилди. Қирғоқда бекитиб қўйилган қайиққача етиб олса, бас, қутулиб кетади. Душман ҳам изма-из от қўйиб келяпти. Унинг тулпори бақувват — тутқич бермайди. Мана, дарё ҳам кўриниб қолди. Шу пайт шамолдай елиб бораётган одам остидаги отнинг бошини шарт бурди-да, ҳайқириб ўзини ёв тўрига урди:

— Душманга трубкамни ҳам бермайман!

Унинг ёнидан қадрдон буюми — махорка чекадиган «папируска»си тушиб қолганди...

Албатта, Тарас Бульбани польяклар тутиб олишди ва ҳаммага кўринадиган тепаликдаги дарахтга парчинлаб михладилар-да, ёқиб юбордилар. Олов унинг жисмини кул қилди, бироқ мағрут руҳи барҳаёт яшамоқда. Тарас Бульба — миллат фахри, ғууридининг тимсоли бўлиб қолди.

Худди тарёқ ичгандек, гиёҳвандларча яшаган туновги кунни мангу тарасларнинг озод руҳи назаридан ўтказар эканмиз, «менинг унга не ақраболигим бор?», деб тай-саллаймиз-да, ўзимизни кавакка уриб кетгимиз келади. Ўжар нигоҳларни қўлимиз билан ёмоқчи бўлиб, ласти-мизни кўтарсак, бармоқларимизга нимадир илашади.

Фаромуш зеҳнда ибтидоий бир ҳис уйгонади: «Менинг ҳам... мўйловим бор экан». Ва худди тарбиялаганларидек, худбинлик ғулу қиласи: «Ўстирсам, Тарасникича бўлар». «Ё насиб, ҳозирча эса тажант шоирга қўшилиб иҳраймиз: «Эҳ, сиз носқовоқни ташлаб қочганлар!» Ҳа, ниҳояти иҳраймиз, бетобнинг нафасидек лахтак сасимиз эса ҳатто ёнгинамизда турган сур биродаримизгача ҳам етиб бормайди. Бунчалар олис бу яқин масофа. Бунчалар қўзғалмас бу оғир тош! Илтижолар нечун! Нега қон қусмаймиз, нега ўзни ўтга урмаймиз, ёнмаймиз? Ширин туюлмай қолсин-да бу чучмал ҳаёт!

Шафқатсиз реалист Николай Гоголь Ўрта Осиёда бўлмаган ва унга ҳали этилган умр чегараси бизнинг кунларимизгача чўзилмади. Мабодо, шу икки ҳол истисно бўлганди: «Олға! — бу сўзни ҳалқ қалбига етиб борадиган қилиб ким айтади?» дея ҳайқирган ватанпарвар санъаткор, эҳтимол, ҳеч иккиланмай осилишга қўлида арқони билан бораётган қавм тимсолини яратган бўларди.

Балки ҳар нарсани илоҳийлаштиравермаслик, ҳаммаси устида кўз ёш тўқавермаслик лозимдир. Ахир фасллар алмашар, кеча ўрнини кундуз олаверар экан, нималардир четга чиқиб, янгилари майдонга тушиб туриши табиий...

Миллий кутубхонамиизда икки кун чошгоҳгача китоб титиб, илмий изланишларда уқувсизроқ бўлиб қолаётганимни сезишдан ташқари бир ҳақиқатга такрор имон келтирдим: одамийликнинг боши маърифат экан. Билъакс, инсон ҳам сутэмизувчилар оиласига мансуб жонзот-да. Маърифатдан бошланган дарё инсонни Эркинлик водийсига олиб чиқади, бу ерда Озодлик нашъасини сургач, Мустақилликка интилади ва эришади. Мен сандални синдирган, жувозга ўт қўйган, аравани ёқиб, оловида исинган ҳалқа мансубман ва аждодимни фақат маърифатсизликда айблайман. Наҳот ҳаммасидан воз кечиш, мосуво бўлиш шунча осон эди, гўё касалланган тишни туфлаб ташлагандек (ҳолбуки, тиш туфлаб ташланмайди, уни бирор суғуриб олади).

Фатво берган ўшаларми — боболаримизнинг муборак соқолларидан юлқилаган, табаррук саллаларини бўйинларига чирмаб судраганлар!

«Ўзбек тилининг изоҳли луғати»дан кўчирма: «Сандал хонанинг чеккароқ ерига қурилган чуқурча, унга қўйиладиган пастак курси ва устига ёпиладиган кўрпа, маҳаллий иситиш қурилмаси» (2-жилд, 18-бет).

«Ўзбек совет энциклопедияси»дан: «Сандал, танча — маҳаллий иситиш воситаси. Ўтмишда Ўрта Осиёда, шунингдек, Афғонистон, Эрон, Туркия ва бошқа Шарқ мамлакатларида (ўтроқ аҳоли ўртасида) кенг тарқалган. Сандал учун хонанинг бир четига чуқурча қазиб, ичи маҳсус шаклда ишланиб сувалади. Унга курси ўрнатилиб (хонтахта), усти кўрпа билан ёпилади. Кўмир ёки саксовул чўғи билан иситилади. Сандал атрофида оёқ-қўллар узатиб ўтирилади, кўп ҳолларда сандал оёқнинг шамоллашига ва ис тегишига ҳам сабаб бўлган. Ўрта Осиё республикаларида замонавий иситиш туфайли сандалга айтиарли эҳтиёж қолмаётир» (9-жилд, 488-бет).

Мазкур шарҳда сандалга нисбатан салбий муносабат ифодасини сезиб олиш қийин эмас: «у оёқнинг шамоллашига ва ис тегишига ҳам сабаб бўлган». Бундай дардга чалингандар «замонавий иситиш воситалари» Қуршовида яшаб, сариқ билан оғриганлардан кўп-озлигини статистика аниқлар, бир нарса нақд эдики, бизни ўзлигимиздан маҳрум қилмоқчи, ўқ илдиз атрофидаги томирчаларни қирқиб, дараҳтимизни қуритмоқчи бўлган босқинчиларга шунинг ўзи кифоя эди. Сандал ҳам бошқа жуда кўп қадриятларимиз туфайли «эскилик сарқити» леб эълон этилди ва унга қарши юриш бошланди. Ҳозиржавоб болалар шоири «Сандал ва печка» деган шеър ёзди, у дарсликларга киритилди, ўқувчилар ёд олиб, сандалдан фойдаланганларни масхара қилишди.

Во ажаб, шунча маломатга қолган «эскилик» нима экан? Бу сўз тўғри маъносида қўрқинчли эмас, у «янгилик»нинг дояси (ҳар қандай янгилик унutilган эскиликдир). Бироқ унга кишини ғижинтирадиган «сарқит» сўзи кушилгач, рақиб қўлидаги ширин оғуга айланган. Асли-

да, сандални ўтмини мероси, деса ҳам ҳеч кимнинг асанаси кетмасди. Йўқ, унда мақсадга эришиб бўлмайди-да. Инсоф билан тош қўйсак, «эскилик сарқити», «ўтмиш мероси» — бу маданият, яъни авлод-ажлодларимиз яратган ва бизга қолдирган жамики бойлик, бизнинг ўзлигимиз, кеча ва эртамиз.

Кўз олдимда лугат ва қомусда таърифланган ёғоч буюм турибди. Ниҳоятда дилга яқин ва қадрдон. Устига ёпилган кўрпаси билан яна ҳам мўътабар ва азиздек. Унинг тарҳини ким чизди экан, дастлаб қайси моҳир кўл унга сайқал берди? Китоблардан бу ҳақда маълумот излаб бошим айланди. Рости, саволларга жавоб топиш учун бутун инсоният тарихини тит-пит қилиш керак экан. Ахир бир даҳо: «Тошнинг учи силлиқланиб қурол ҳолига келгунча одамзоднинг миллион йиллаб умри ўтган», детанида нақадар ҳақ экан. Бир бармоқ ишораси билан ирғитиб юборилган ўша «эскилик» бир нечта авлоднинг, йиллар ва асрларнинг ижоди эканини тан олайлик. Шунда йўл қўйилган гуноҳнинг азимлиги-ю, савобнинг нақадар ушоқлиги аён бўлар.

Елена Евдокимовна Неразик деган олима «Сельское жилище в Хоразме (I—XIV веков)» номли китоб ёзган экан. Унда сандал маҳсус тадқиқ қилинмаган (бундай маҳсус тадқиқотга кўзим тушмади. Ҳатто Ф.А. Брокгауз ва И.А. Эфролларнинг машҳур «Қомусий лугат»ида Волга бўйидаги Сандал кўргони, ранг берувчи сандал даражатлари ҳақида маълумот бор-у, бизнинг сандалимиз ҳақида ҳеч вақо йўқ). Бироқ китобда сандалга эҳтиёжнинг ва ўзининг пайдо бўлиши билан боғлиқ кўп қизиқ тафсилотлар келтирилган. Улар гувоҳлик берадики, одамнинг шир яланғочлик давридан ҳозирги юксак ривожланган босқичигача тараққиёт йўли қанчалар мураккаб ва узоқ бўлса, иситиш воситаси сифатида сандалнинг турмушга кириб келиши, сингиши, қадрдонлашиб қолиши шундай тарихга эга. Олима эрамизнинг дастлабки асрларига хос Тупроқ қалъа, Говур қалъа, Жанбас қалъа изларини археологик тадқиқ қилиб ёзадики, у пайтда турар жойлар жуда ибтидоий курилган, ҳатто симметрияга эътибор

берилмаган. Бир хонадонда ерда қазилган учта ўчоқ ўрни сақланган. Деворларига чапланган лойда қурум излари бор. Уларнинг иккитаси олдинроқ ва бир вақтда ковлангани сезилиб турибди. Учинчиси кейинроқ ковланган (эҳтимол, ўша аждодимизнинг болалари кўпайиб кетгандир). Хона-нинг шарқий қисмида жойлашган бу ўчоқларни олима уйни иситиш учун ясалган деб изоҳлайди. Ҳовлига чи-киш тарафининг қаршисида овқат тайёрланадиган ўчоқ-лар жойлашган. Хонанинг ғарбий қисмида хумлар қўйи-ладиган чуқурчалар бўлган. Албатта, бу даврдаги ибтидо-ий ақл сандални кашф қила олмасди. Китобда орадан 700—800 йиллар ўтгач, уй-жойлар бироз такомиллашга-ни, Аёз қалъя харобаларида супа излари топилгани ёзил-ган. Буюк Хоразмшоҳлар даври (Х—XIII асрлар)да май-ший ҳаёт анча изга тушган, турар жойлар мукаммаллаш-ган. Олима уй ичида ташноб бўлганини, унга тош плиталар ётқизилганини, плиталар олти қиррали нақшлар билан бе-затилганини ёзади. «Хонанинг ташноб ва идиш (балки юви-нишга мўлжалланган) турган қисми ёғоч ходачалар билан ажратилган», — дейилади китобда. Балки шу даврларда ўчоқда чўғни сақлаш ва унинг устини ёғочдан ишланган буюм билан ёпиш, кўрпа билан ўраш фикри туғилгандир. «Уй ўчоги оила фаровонлигининг рамзи бўлган», дейди олима аждодларимиз эътиқодини шарҳлаб. Ҳуллас, сандал ҳам қадим тарихимизга эш, шак-шубҳасиз ҳалқ мадани-яти обидасидир. Ҳолбуки, маданиятга дахлдор бўлса, от-нинг тақаси ҳам қадрлидир.

Истеъфодаги подполковник, фан номзоди, хизмат кўрсатган врач Зикрилла Эгамбердиев ҳам шу фикрда. 77 баҳорни қаршилаган нуроний отахон 35 йил рентген аппаратида барқарор ишлади, тиббиётнинг турли масалала-ри ҳақида қизлари Замира опа билан ҳаммуаллифликда ва ўзлари кўплаб мақолалар, рисолалар ёзди. Ҳаётнинг баланд-пастини кўрган одам баъзи талатўпилар ҳақида ўксиб гапиради. Ахир авлодлар қалбила ўтмишга нафрат уйго-тиш амалда ўғилни отага қарши хезлаш эмасми? Ғарб ишларидан бўшамайдиган йигитни падари бузруквор қо-шига таклиф қиласида, энг қисқа оятни ўргатади. Бунга

икки кун кетади. Бу ота умрининг шоми, сўнгги кунлари эди. Руҳини шул оят билан йўқлаб туришини, фарзанднинг ибодати ҳаммадан афзал эканини васият қилиб оламдан ўтади. Йиллар хотираси Зикрилла отани ўксинтиради: афсус ва надоматлар бўлсин ўша кунларга. Қишихарини енгган, инсонни бағрида сақлаган танчада нима гуноҳ бор эди? Маълумки, барча асаб тугунлари оёқда жамланган. Оёқ чўғ ҳароратида тобланса, бутун вужудга ҳаловат етади, радикулит, ревматизм, томир кенгайиши, бўғинларда туз йиғилиши каби касалликларни даволайди. У тайёр грелка, сауна. Қор гупиллаб ёғиб турганда ҳам олди очиқ айвонда оёқни танчага тиқиб, bemalol ўтира-веришган, мизгиб ҳам олишган. Ёки дилдираб турган камбағални бола-чақаси билан совуқдан шу сандал асраганда! Демак, сандал саломатлик дастёри, камбағалнинг «дўсти» бўлган.

Аждодларимиз турмушини сандалсиз тасаввур қилиш қийин. У ҳатто муқаддас ашё даражасига кўтарилган. Узун тунлардаги қиссанонниклар, жонон суҳбатлар сандал атрофида бўлган. Келин уйга илк қадам қўйгандан уни сандал тўрига ўтқазганлар. Азиз меҳмонни сандалга таклиф қилганлар. Сандал бор уй энг обод ва гавжум жой бўлган. Қолаверса, сандал атрофида бошланган севги узоқ саргузаштларни бошидан кечириб, синовлардан ўтиб, муродига етгунча бўлган ойлар, кунлар ошиқ қалбларнинг энг гўзал дамлари ҳисобланган. Яъни миллий удумларимизда фотиҳа қилинган йигит билан қиз шартли ажратилганлар, кечагина сандалда ёнма-ён ўтирган бир жуфт ўспирин «бегона» бўлиб қолганлар. Уларнинг яна сандал атрофида учрашишлари эса бошларининг қовушгани рамзи бўлган. Демак, сандал — ошиқлар меҳроби, дилларни боғловчи робита.

Тошкентнинг Лангар маҳалласидаги сомонбозорда дурдгорлар билан узоқ суҳбатлашдим. Сермулозамат, дилкаш усталар ўз қувваи ҳофизаларига суюниб, танчанинг ясалишини майдалаб тушунтириллар. Шавққа тўлиб, чўғ солинадиган чукурчасининг «мусулмон ғишт»дан ишланиши, пастки қисми (оёқ қўйиладиган)га тахта қокилиб,

офтоба, чойдишда чой қўйилиши, ҳаммадан ўрик билан тутнинг чўғи яхши бўлиши, бойлар нукул саксовул чўғида тобланишларини роса гапиришди. Уларнинг ҳикоясидан сандал бир вақтда мураккаб мұхандислик қурилмаси бўлишидан ташқари, ҳалқ турмушининг жуда кўп ҳикматларини ўзида жамлаган хазина деган фикрга келиш шубҳасиз. Яна унинг номи (сандал, танча) манқал сўзи билан қофиядошлиги ва бошқалар ҳам мулоҳаза учун анча дастур беради.

... «Нимани топдим сени йўқотиб?» Худди борлиқ ва йўқлик каби икки қутб — йўқотмоқ ва топмоқ тамойиллари тарозига қуйилса, 70 йилда ҳалқимиз нукул йўқотиб, воз кечиб келган. Биз ўша «эски»ликлардан узоклаша, уларни олис губор ичидаги кўра бошладик. Фозил кишилардан бири араванинг турлари (четан арава, қўқон арава, редавон, абтиқашқа)ни айтиб қолса, биз тингловчилар лол бўлдик. Хайрият, жузъий йўқотишлар изидан келаётган бало бутунлай йўқолиш рўй бермасдан мангубарчаёт руҳ қайтди. Умидларимиз ундан, илтижоларимиз унга. Менинг таъналаримни ҳам маъзур тутсин ва ўзи айтсин, ўргатсин: «Нажот қайда?»

Безовта қалб деворларига эса муқаддас аъмол йўлида бесару сомон кетган аллакимнинг нидоси туртинади: «Халқим, барибир буюксан!»

1991 йил, февраль

ШАҲОДАТ

(Бир мардумнинг ҳикояси)

— Ёш етмишдан ўтгандан кейин одамда кутилмаган ўзгаришлар рўй бераверар экан. Мен ҳам тоҳ-тоҳида хаёлимни йўқотадиган бўлиб қолдим. Қулоғим шанғиллаб, кўз олдим қоронгулашади-да, турган жойимни ҳам, айтган гапимни ҳам билмай қоламан. «Э, воҳ, бу нимаси экан», деб анча вақт бошим қотиб қолди. Кейин ўйлай-ўйлай хуммонлик Мардонқул тоғамга юрак ёрдим;

— Мен шунаقا бир дардга йўлиқдим, ўзимга жуда ноқулай бўлаяпти. Худонинг ўзи шарманда қилмасин-у, иссиқ жон, билиб бўлмайди. Мени бирорта дуохонга олиб боринг, «куф-суф» қилиб қўйсин. «Ихлос-холос» дегандек, зора енгил тортиб кетсам.

Тоғам индамай қўйди. Фақат оқшом ётар олдидан мен томонга ёнбошлади-да:

— Ўзим биладиган ҳамма дуохон эшонни хаёлимдан ўтказиб чиқдим. Шу, дами ўткирликда ҳеч қайсиси се-роблик Маҳмудхонга тўғри келмас экан. Бўлмаса, эртага бирров бориб келармиз, — деди маънодор жилмайиб.

Эрталаб турдик. Тоғам хуржунга бир бўлак қарин ёғи, нўхат, яна ул-бул солаяпти.

— Буларни нима қиласиз?

— Ахир эшонникига қуруқ борамизми?

Йўлга тушдик. Масофа 3—4 тош йўл, тоға-жиян гангур-гунгур билан тушдан кейин Серобга етиб келдик. Келсак, эшонникида худойига тайёргарлик бўлаётган экан. Бизлар ҳам бошқаларга қўшилиб сабзи тўғрадик, қозон жойи қазидик, хуллас, ул-бул юмушларга қарашиб турдик. Кечки овқатдан кейин Эшон бобо ошпазга тайинлади:

— Саҳар келиб, қора қўчкорни сўясиз, ошни дамлайиз, кечикиб қолманг.

Шундан кейин қишлоқликлар тарқалиши. Бизлар, бошқа қўноқлар ҳам бор экан, меҳмонхонада ётиб қолдик.

Кечаси туш кўрибман. Бир бит елкамда ўрмалаб юрибди, буғдойнинг донасидек бўлиб семириб кетган. Тушириб юборай, деб шунча интиламан, қўлим етмайди. Ўрмалаб, қитиқлайди, тишлаб, қонимни сўради, лекин даф қилолмайман. Охири бир бало қилиб қўлимга олдимда, эзғилаб ташладим. Уйғониб кетдим, терлаб ётган эканман.

Ошпаз ҳам келди. Мен чиқиб, қозоннинг тагига олов ёқдим. Шу орада тоғам Эшон бобога мақсадимизни айтибди. Кейин мени чақиртирди-да, бошқа хонага ўтдик. Юзма-юз ўтиргач, Эшон бобо менга тайинлади:

— Тилингизни танглайингизга маҳкам тираб, юракдан «Ё, Аллоҳ» деб ўтиринг. — Шундан кейин дам солишга тутиндиги.

* * *

Шераҳмад тоға бизларга отақадрдон. Падари бузрукворининг яқин дўстларини, узанги йўлдошларини, бирга ишлаган, иссиқ-совуқни бирга тотишган яқинларини бизларда «отақадрдон» дейишиди. Бу қадрдонлик шунчалар мустаҳкам бўладики, баъзи уруғларда икки яқин дўстнинг болалари отасининг дўстини ҳам «Ота» деб атайди. Отақадрдонлик вақтида унча билинмас экан, мабодо, отанг ҳаётдан кетиб, етим бўлиб қолганингда отангни билган, отанг ҳақида икки оғиз хотира айтган одам ҳам кўзингга Хўжайи Хидирдек туюлиб қолар экан. Алалхусус, Шераҳмад тоғани хонадонимда кўриб, отамни қайта топгандек бўлдим, оёғим олти, кўлим саккиз бўлиб хизматига тутиндим. Ўзиям, кўришмаганимизга ўн беш йиллар бўлган экан. Бу орала қанча сувлар оқиб кетди, қоракалла не бир савдоларни ўтказмади. Орқаворотдан тоға ҳақидаги хабарлар ҳам қулоғимга етиб турар эди. Айниқса, у кишининг ҳаж зиёратини амалга ошириб келганларини эшишиб, роса хурсанд бўлганман, суҳбатларига ошиқсанман, бироқ турмуш ташвишларидан вақт ажратиб, шу юмушни ҳам адо этолмаганман. Тоғани оstonамда кўрдим-у, ана шу кунхотирликларим учун қаттиқ изза бўлдим, хизматларига шай турдим.

Мен ҳаж зиёратини жуда ҳам олий маҳомда тасаввур қиласман. Бу амални кўплар дунёга қайта келишига, иккинчи туғилишга қиёслашади. Демак, муқаддас жойларда бўлган дамларни ҳомиланинг она қорнидаги ҳаётига менгзаш мумкин. Фақат фарқи — ҳомила ҳали тўла камолга етмагани учун ҳарир парда ичидаги фурсатни идрок эта олмайди. Ҳожи эса балофатга етган одам сифатида зиёрат асносини бутун вужудида онгли кечиради. Шу туфайли бу сафардан инсон янада мукаммаллашиб, янада тўлишиб қайтадигандек туюлади менинг назаримда. Ҳаж амалини

кечириб қайтган эски қадрдоним Шераҳмад тоға ана шундай мұйжизага дуч келганини фаҳм қилиб, у кишидан таассуротларини әшитишга шошилдим. Овқатдан сүнг аста муддаога ўтиб, у кишини яна бир бор муборак сафар билан қутлагач, «ұша күнларда үзингизда қандай үзгаришлар сездингиз?» деб сўрадим. Суҳбатдошим бажонидил гурунгга киришиб, ҳажга бориш хаёлларида ҳам бўлмагани, аксинча, бу юмушга енгил-елпи қараб юргани, фақат ҳаётларидаги бир воқеа унга туртки бўлганини ёдга олиб, гапни узоқдан бошлади.

* * *

— Дуодан кейин анча енгил тортгандек бўлдим. Худойи ҳам тугади, одамлар келиб-кетди. Энди шаҳарга тушишим керак. Укам тўй қиласиган, шунга парварда қант излайман. Икки-уч бозор келиб, бу ёғи Фузор, бу ёғи Китобгача ҳамма магазинни кўриб чиқдик. Ҳеч жайдан тополмадик. Бу сафар иним: «Пулни белингизга туғиб олинг қани, учраб қолса, олиб қайтарсиз», деб илинж билан қолган.

Кириб, Эшон бободан кетишга рухсат сўрадим. Асфальтгача анча йўл, бу чекка жойларда машина келиши ёзда қор ёққандек гап, пиёда йўл тортмоқчи бўлдим. Сўзимни эшитган мезбон босиқлик билан:

— Шошилманг, машина ҳам келиб қолар, — деди.

Бир пиёла чой ичгунча вақт ўтмаган қам эди, «Ҳамсоянинг ўғли армиядан келибди», деган гап чиқди. Билмадим, домулло бирор овоз эшитган эканми ё аён бўлганими, кўчанинг нариги бетида бир қизил машина турибди, у аскарни миндириб, суюнчига келган экан. Шунга етай деб, хўшлишиб чиқдим. Бир соатга қолмай Яккабоқقا етиб келдим. Келсан, автобус жўнай-жўнай деб турган экан, шартта чиқиб олдим, бир зумда Шаҳрисабзга бориб қолдим. Автобусдан тушиб, тўғридаги магазинга кирсан, пештахтада бир ҳовуч бизлар излаб тополмай юрган қантдан турибди. Шошиб сўрадим:

— Бундан яна борми?

— Қанча лозим эди? Ичкарида уч-тўрт яшик бўлиши керак.

Қаранг, анча вақтдан бери топилмай, қон қилиб юборган нарса шундоқ оёқнинг тагида турибди. Беш яшик бор экан, ҳаммасини олдим. Пулини санаб бердим-да, ўйланиб қолдим: «Бунча нарсани-ку олдим, энди қандай олиб кетаман?» Ўйланиб, магазиндан чиқсан, тариллаб бир киракаш мотоцикл келиб қолди. «Ука, озроқ юким бор эди, шуни Яккабоғнинг бекатига олиб борасанми?» десам, «Э, бажонидил» деди-да, ўзи яшикларни юклаб, олиб жўнади. Шахрисабз—Яккабоғ автобуси одам йигаётган экан, шоффёр билан гаплашиб, яшикларни орқага жойлаштирудим. «Етган жойгача борай-чи», деб ўйляпман. Ишим ўнгидан келаяпти. Яккабоқقا етсан, учтадан бири таниш, ўшаларникига қўяман, кейин Ворига олиб чиқишига гап йўқ. Автобус йўлга туши, манзилга ҳам етиб келдик. Булоқбошида юкларни тушириб, бошимни қашлаб турсам, бирор отимни тутиб чақирди. Қарасам, Мамарайим бўлам, бир грузовойнинг устида турибди, «Кетмайсизми, юринг, машина Калтақўлга чиқали», деди. «Ўзим-ку кетмайман, мана шу яшикларни олиб кетинг», дедим. Машина бўш экан, юкларни ортдик, улар жўнаб кетди.

Ё, тавба, дейман. Бир кунда шунча ишни бажардим. Тўғри келса, ҳеч гап эмас экан, тўғри келмаса, бир ҳафтада ҳам бу юмушларни бажаролмайсан...

Шундан кейин Эшон бобога ихлос қўйдим. Дардан бутунлай фориғ бўлиб кетдим. Ўтган-қайтганда, ҳар йили 3—4 марта хабар олиб, хизматларини қилиб юрдим. Бир сафар ўзлари ҳисоблаб, «Ўн кило яхши қарин ёғидан олиб келиб беринг», деб пул бердилар. Мен айтганларидек қилиб, танлаб, ўн икки кило қарин ёғи олиб келиб бердим. «Мана бу пулингизга, мана буниси мендан совға» деб, қўшиб келдим. «Бекор қилибсиз», дедилар. «Невараларингиз илинишди», дедим.

* * *

Агар одамнинг ҳаёти кўплаб майдо-чуйда тафсилотлардан холи бўлса, ҳаётидаги кичкина ўзгаришни ҳам катта воқеа сифатида қабул қиласи. Бир танишимиз тоғлар орасида кон қидириб юрган геологлардан бирининг уст-

ки кийимларини ечиб, баданини тоблаётгани устидан чиқиб қолган. Бу воқеа қирқ йил олдин рўй берган, у қирқ йилдан бўён шу гапни ҳаяжонланиб гапириб юради: «Шундай келаётсам, бир одам қип-яланғоч ўтирибди...» Тоғлар ҳавосидек соғ, тоза турмуш тарзига эга бўлган Шераҳмад тоғанинг одамнинг ийифини чиқариб юбориши мумкин бўлган юмуш — беш яшик қантни ортиқча заҳматларсиз чекка қишлоғига етказиб олиши мўъжиза туюлган. Таассуфки, шундан сўнг мўъжизаларга йўл очилаверган: тоғанинг ҳаётида янги кунлар бошланган.

Айтмоқчи, у киши совға қилиб олиб келган қарин ёғи ҳам бир мўъжиза. Таърифи бундай: тоғликлар ёзда баланд қорли чўққилар бағрига кўчиб чиқадилар. Муваққат капаларда яшаб, бўлиқ яйловларда ўтлаб тангизган қўй-эчки, сигирларни соғадилар. Айниқса, қўшоқлаб соғилган қўйларнинг сути, сутдан тайёрланган қатиқ бетимсол лаззат. Сут қаймоғи олинмасдан қатиқ қилиб ивтилади. Қатиқ сиздирилиб, чакки (сузма)га айлантирилади. Чакки айрон қилиниб, кувиларда пишилади ва ёғи ажратиб олинади. Қатиги қурт бўлса, ёғи обдон тузланиб, мол қаринларига тиқилади. Қаринлар кичкина улоқники ёки хўқизники бўлиши мумкин. Қаринлар тозаланиб, пудина, гангавул, алқор сингари хушбўй доривор тоғ гиёқлари суви билан ишлов берилгач, ундан идиш тайёрланади. Бир қарингта 3—4 килодан 25, ҳатто 40 килогача ёғ жойлаш мумкин. Имоним комилки, бундай технологияни на Австралиядা, на Голландияда — дунёнинг бирорта мамлакатида билишмайди. У мўъжиза, чинакам мўъжиза. Тоғликлар турмуш тарзида эса бундай бебаҳо унсурлар бисёр.

* * *

— Эшон бобо мени ўзларига яқин олиб муомала қиласидиган бўлдилар. «Эшонман», деб юрганларнинг ҳам ҳар хили бўлар экан, бироқ у кишида кароматгўйлик аломатлари кучли эди. Атроф-теваракдан кўп киши ихлос қилиб келар эди. Бир куни менга шундай дедилар:
— Сиз ҳажта бориб келинг.

Бошида бу гапга унча зътибор бермадим, шунчаки йўлида айтиб қўйдилар-да, деб ўйладим. Ҳажга бориш осонми? Кейинчалик ҳам шу гап қўзғалди. Домулло тўрт марта қайтаргандаридан кейин яқинчларим билан бир маслаҳатлашишга қарор қилдим. Яккабоғда катта күёвим — дўхтирницида маслаҳат бўлди. Ўғлим Раҳматулла ҳам бор.

— Эшон бобо қайта-қайта тайинлаяптилар. У киши хизр назар, кароматли одам, дилларига солганми, нимадир аён бўлганми, айтганларини қилмасам бўлмас. Йўқса, йиқилиб-суриниб йикқан-терганим нимага сарф бўлади — Худо билади? Нима дейсизлар? — дедим.

— Боринг-да, — деди ҳаммаси жовва, — нимадан мухтожлигингиз бор? Бизлар ҳам неччи айтдик.

— Ҳамма ҳужжатларни тўғрилалини менга қўйиб берасиз, — деди дўхтир. — Бошқа юмушларни ҳам бўлиб-бўлиб оламиз.

Қариндошларнинг ҳамжиҳатлигидан дадиллашиб кетдим. Ўз мўлжалларимни айтдим.

— Бўлмаса, отлардан олтитасига харидор топинглар. Бекувда ҳўқизлар бор, уларни сотинглар. Тўртта қўчкорни бўрдоқига томга солинглар. Насиб бўлса, зиёратдан эсономон келсам, тўй қиламиз...

Ҳужжатларни тўғрилаш, дўхтирандан ўтишга ўн беш кунлар кетиб қолди. Жўнашдан олдин Имом Бухорийни зиёрат қиласиган бўлдик. Белгиланган кунда қор ёғиб, йўллар музлади, бориш кейинга қолдирилди. Шунда бир фикр хаёлимга келди. «Тўхта, одамлар ҳаждан олдин ўз зиёратгоҳларини тавоф қиласар экан, менинг тоғларим орасида ҳам қанча муқаддас гўшалар бор-ку: Хўжапанинф, Хўжақоноқди, Хўжапка, Кўхнақишлоқ... Шу жойларнинг сувини ичиб вояга етдим, бугун Маккатуллоҳ сафари пешонамда турибди. Нимага ана шундай улуф ният олдидан ўзимнинг зиёратгоҳларимни кўрмаслигим керак?!»

Туман вакили Собиржонга (у жуда тарбияли, одамохун йигит-да), «Мен тоғдан тушганимга икки ҳафтадан ошди, бир хабарлашиб келай. Имом Бухорийдан кечиксам-да жўнайдиган куни етиб келаман», дедим. У рухсат

берди, Ворига кетдим. Келсам, тошкўрғонлик Бозорбобо-нинг қайтиш бўлганига етти кун тўлган экан. Ҳам таъзия, ҳам зиёрат, деб эртаси куни эрталаб Тошкўрғонга йўл олдим. Фотиҳа қилдим, кейин Кўҳнақишлоққа бо-риб, Турсунхон эшон бобо мозорини тавоғ қилиб, на-моз ўқиб қайтдим. Қор отнинг қорнидан уради, ҳувилла-ган тоғлар орасида зоф ҳам учмайди. Қишлоққа кираве-риша Новариқнинг олдида бир хотин йўлимни тўсди. «Эшиздим, сиз ҳажга бораётган эмишсиз. Мана шу пулни олинг. Олти йилдан бери қизимнинг фарзанди бўлмайди. Улуғ жойларга борсангиз, унга фарзанд тиланг». Қайтиб, пулини олдим, ичимдан бир овоз: «Келиннинг отини сўра», деди. Сўрадим, қизимга отдош экан, ёдимда сақ-лаб қолдим. Калтақўллик бўламнинг бир келини ҳам болани қўлига ололмайди, вақтига етмай чала туғилади. Шуни ҳам эсимга туғиб қўйдим. Ким нимани тайинлаган бўлса, ибодатим давомида ҳаммасини Яратгандан сўрадим.

Жўнаш пайтимда болаларимнинг онаси кўз ёш қилиб қолди.

— Мазам йўқ, ўлиб қолсам нима бўлади?

Рост айтади, иссиқ жон. Магазинга чиқиб, ул-бул харид қилдим, ҳаражатларни кўринарли жойга қўйиб, рози-ризолик тилаб йўлга чиқдим. (Худога шукр, эсон-омон кўришдик).

Ҳаж сафари 24 кун давом этди. Кўрган-эшитганларни ёзib юриш керак экан. Бухоролик бир олим ёзиб юрди, боргандан сўнг менга ҳам бир нусха берасиз, деган эдим, тополмаяпман. Ҳамма нарсани тил билан айтиб беролмайман. Кўрган-билғанларимнинг бари каромат. Илтижола-рим ижобат бўлди, ҳалиги икки келинчак ҳам фарзанд кўрди — бунга эл-юрт гувоҳ...

* * *

Ҳожи бобо, ўзлари таъкидлаганларидек, икки кам саксон ёшда. Азалдан серғайрат, кўшишлик, жўрабоши одам тақдирнинг инояти билан донишманд бир зот ма-қомига етишганлари кўриниб турибди. Бунга деярли тонг-

гача давом этган сұхбатимиз мобайнида қайта-қайта ишондым. Бу даража менга бутун халқимизга хос хислат сифатида намоён бўлди. Умри хилват тоғлар бағрида кечган, на ўрта, на олий маълумот олган инсоннинг табиий зеҳни, идроки билан шунча нарсанни эслаганини одамларимизнинг биологик мукаммалигига менгзадим. Демак, «Бизнинг лойимиз буюклар тупроғидан қорилган», деганлар юз бора ҳақ экан. Ана шу эътироф бир таскин бўлиб, эртанги ёруғ кунларимизга ишончни кучайтириди.

Албатта, бундай кучнинг манбаси ҳақида мулоҳаза юритиб кўрдим, кўп тахминларни топдим: меҳнат, бойлик, ҳаракат, Худонинг ярлақагани ва бошқа кўплаб омилларни келтирдим. Бироқ ҳаммасидан бир унсур мукаммал туюлаверди. Бу — ҳалоллик. Ҳожи бобо шундай эслайди:

— Бир куни ҳожилар ким нима эвазига келгани хусусида гаплашиб қолдик. Бирор, дўконим бор, деди, бошқаси, болаларим топарман-тутарман, деди. Мен: «Ҳамма фарзандимни уйли-жойли қилдим. Кейин чорва билан шуғулландим», деб айтдим. Ҳамма: «Сизники энг ҳалол экан», деб қолишиди.

Балки ана шу ҳикмат хаёлида ҳам бўлмаган одамни муқаддас жойларга етаклаб боргандир.

Ҳожи бобо тонг саҳар уйғондилар, намозни адо этиб, йўлга отландилар. Бир пиёла чой тақлиф қилдим. Шу аснода кечадан бўён журъат этолмаган гапга лаб ёрдим: падари бузрукворимни эсладим. Сұхбатдошим отам ҳақидаги энг тансиқ хотираларни тилга олдилар, мен уларни жон қулоғим билан тингладим. Тинглайман-у, хаёлимда бир гап кезади: кечадан бери қайта-қайта зеҳн солиб қарайпманки, ҳожи бобо отамнинг акалари — амаки бобом Бозор оқсоқолга ўхшаб кетарканлар. Биз раҳматлик оқсоқол бобомизни қариб қолган чоғларида кўрганмиз. Достон ўқитиб тинглар, таъсирили жойларида юмюм йиғлардилар. У кишининг қиличдек ўткир, шамолдек елдирим ёшлиги ҳақида ҳозир ҳам афсоналар юради. Ҳаёлим поёнига етмасдан ҳожи бобо тўхтадилар-да:

— Раҳматлик отангиз менга доим: «Сен менинг Бозор акамга ўхшайсан, у ҳам ўзини ўйламай, нуқул бошқаларнинг ташвиши билан юради», деб кўп айтардилар, — деб қолдилар.

Шераҳмад ҳожи менинг фикримда айланган маънони хатосиз англаган эди. Ёлғонга ўхшаб қолмасин ёки тилёфламалик бўлмасин, деб бу ҳақда ҳеч нарса демадим.

... Аллаберди ака сұхбатини тугатиб, дуторини қўлга олди.

* * *

Биз ҳар куни кўплаб одамлар билан учрашамиз, турили суҳбатларда бўламиз. У гурунгларда нималар ҳақида гап кетмайди? Баъзан дилинг хуфтон бўлади — зулматга чўкасан, баъзан яйрайсан — нурга қориласан. Юқоридаги тафсилотлардан эса кўнгилга бир ёруғлик иниши шубҳасиз.

Машъала учқунлари

САНЪАТ СОХТАЛИКНИ КЕЧИРМАЙДИ

Мутахассислар мусиқанинг ҳаракатдаги вужудга қандай таъсир этишини текшириш мақсадида шундай тажриба ўтказишган. Бир гул кўчати остига карнай ўрнатиб, ундан майин, оромбахш наволарни эшилтиришган. Бошқасида эса шовқинли, жарангдор куйлар таралган. Орадан вакт ўтиб, биринчи гул кўчатининг ривожланиши тезлашиб, очиладиган бўлган, иккинчиси эса заифлашиб, курий бошлаган. Шундай тажриба эмизикли оналарда ҳам ўтказилганда натижа такрорланган. Майин, дилтортар куйлар тинглаган онада сут кўпайиб, сершовқин оҳанглар эса аёлга тескари таъсир этган. Шубҳасиз, ҳақиқий санъат асарининг инсон маънавий дунёсида ўрни бекиёс. Юксак маҳорат билан ижро этилган, туйғу ва кечинмаларимизга ҳамоҳанг дилбар оҳанглар фақат ҳордиқ бериб қолмай, қалбда эзгулик, олижаноблик, меҳр-шафқат сингари фазилатларни уйғотади, уларга қанот бўлади.

Афсуски, кейинги пайтларда замондошларимиз ички кечинмаларини ифодалайдиган, давр руҳини акс эттирадиган мумтоз санъатнинг замонавий намуналари кам яратиласяпти. Аксинча, бу борада асабларни қақшатадиган шовқин-суронга, маъносиз ҳаракатлар-у имо-ишораларга, милийликдан йироқ либосларга зўр берилемоқда. Буларнинг замирида эса кўр-кўrona тақлид ётадики, бир халқ мақолида айтилганидек, «такрор илмнинг онаси бўлса, санъатнинг заволидир».

Ўзбекистон телевидениеси 3-дастури орқали эфирга узатилган «Ноон-стоп шоу» деб номланган томоша кўриб, эстрада санъатимизнинг бугунги ночор ахволидан қаттиқ

ташвишландик. Биз ҳозиргача мусиқа санъатимизнинг соғлиги учун курашиб, уни нимадан асраб, нимани қоралаб келган бўлсак, шу иллатларнинг барчаси жамланган, қарийб икки соат давом этган бу дастур «Алпомиш» концерт зали маъмурияти, «Музгул» ва «Кока-кола» фирмалари, «Тошкент» студиясининг «ҳамкор»лигига тайёрланган.

Гап нимадалигини тасаввур қилишингиз учун дастурнинг баъзи лавҳаларини баён қиласиз.

Одатдагидек, қулоқни батанг қиладиган мусиқа садолари остида парда очилади. «Кока-кола» деган ёзув билан тўлдириб ташланган саҳнада бошловчи пайдо бўлади, у гапира бошлайди. Шовқиндан ва нутқнинг ниҳоятда ғализлигидан бошловчининг гапини англаш қийин, ҳозир урф бўлаётганидек, инглиз тилида нималардир деяётган бўлса керак-да, деб қўя қоласиз. Шунда қулоғингизга таниш сўзлар эшитилади: «кўрсатув ... ҳаммадан ... зўр». Аслида, у ўзбек тилидаги сўзларни қайриб-синдириб, инглизча қолипга солиб гапираётган бўлади. Бу усул нега керак бўлиб қолди? Ахир тилимизнинг ўзига хос оҳангги, жарангги, товланиши бор-ку! Эҳтимол, шу оддий ҳисни тушуниш учун шу юртнинг ватанпарвари бўлиш керакдир. Бошловчи эса ҳазрат Навоий улуғлаган, буюк Бобур бошида тутган, асрлар оша неча даҳоларни сўз сultonлигига кўтарган муқаддас бойликни пайҳон қилиб, саҳна қўйисида жазавага тушиш дақиқаларини бесабр кутаётган тўдага қаратади нутқ «Ирод» этади: «Сиз машхур гуруҳлар билан танишишингиз, йиқилиб қолгунча рақста тушишингиз мумкин...»

Шундан кейин саҳнага ярим яланғоч аёллар, сочини турмаклаган, баъзилари рўмол ёпинглан эркаклар чиқади, ер тепиниб, сакраб, думалаб ўз хунарларини намойиш этишади. Азбаройи кўпроқ жунбушга тушиш учун ҳеч нарсадан тортинишмайди: баданни учириш, қўл ишоралари, ҳатто аёлларнинг ҳарисона овозлари янграб туради.

Бу дастур устида ишлаган «Музгул» кичик корхонаси-нинг директори Марина, унинг муовинлари Ринат, Алишер ўз мақсадларини шундай ифодалайдилар: «ҳаваскор ёшлар ижодини ташвиқ қилиш ва оммалаштириш». Қа-

ранг-а, айни пайтларда бизнинг санъатимиз «жонкуярлари» нимани «ташвиқ қилиш ва оммалаштириш» устида бош қотиришаяпти? Ҳолбуки, мутахассисларнинг фикрича, «қатнашувчиларнинг деярли ҳаммаси санъат билан ҳаваскорлик даражасида шуғулланишади». Шоуда ҳуқуқи бўлган «Музгул» шоу-балет, «А-хаус» синтез-шоу гурӯҳи, «Эй-Би-Юлдузли тун» эстрада гурӯҳи, «Шамс», «Байрам», «Азия-Экзи мюзик», «Эски шаҳар» гурӯҳлари билан бирган ҳеч қаерда рўйхатда бўлмаган «Офариз», «Шум бола», «Оқшом», «Аҳил», «Шайдо», «Тонг садоси», ашулачи Вагиф қатнашганлар. Гарчи томошада сийқаси чиқиб кетган анъанавий йўллардан қочишга, ёшларга хос шиддат, тайратни ифодалашга ҳаракат қилинган бўлса-да, унда чет эл саҳна бойваччаларига кўр-кўrona тақлид кўзга ташланади. Ўз анъаналарига эга бўлган ўзбек санъати, жаҳон саҳнида ладил янграган эстрада сезилмайди. Фақат бошловчи эмас, қўшиқ ижрочилари ҳам ўзбекча сўзларни бузиб талаффуз қиласилар. Кўшиқларнинг ҳаммаси севги ҳақида, бу, эҳтимол, дастур талабидан келиб чиқиб тутилган йўлдир. Ҳеч ким муқаддас ва мангум мавзу — севги ҳақида қўшиқ куйлама, демайди, бироқ у шу олий туйғуга мос равишда ёрқин ва бетимсол бўлиши шарт. Шоуда янграган «севги қўшиқлари»ни тинглаб эса энсанг қотади. Уларда на дил, на ижрочилик маҳорати бор. Уларнинг яратилишига туртки бўлган туйғу эса қуйидагича: кўчадаги тасодифий учрашув ва шундан кейинги чучмал изтироблар. Наҳотки, неча юз йиллардан бўён ижодкорларга илҳом бағишлиб, санъатнинг энг гўзал асарларига мавзу бўлиб келган муҳаббат талқини бугун шунчалар саёз ва рангиз бўлса?! Кўшиқ матнларига эътибор беринг: «Оппоқ гўзал, севганимга сен ишонмадинг, бир кулиб қўймадинг», «Сени эслаб юрагим қонга тўлади, яна кўрсам ҳаётимни бераман. Танишлардай сўрадим, ҳеч ким билмади, қизалоқ»... Ёки «Бир оқшом чоги учраттандим сени», «Шошилма, биламан, вақting йўқ. Ахир сени севаман...». Шеъриятнинг энг оддий талабларидан ҳам паст, алаҳсирашдек туюлувчи бу сўзлар тизими қандай қўшиққа асос бўлиши мумкинлиги аниқ. Хуллас, икки соатлик шоуда «янграган» қўшиқлар, бошқа ижролар ўз

даражаси билан ҳақиқий санъатга бетона, ҳаваскорларга хос тақлидидир. Шунинг учун ҳам томошабинда юксак туйғулар уйғотиши лозим бўлган рақслар ҳаракатларнинг юксак маҳорат билан санъаткорона ижро этилмаганидан бутунлай тескари ҳислар қўзгайди.

Замонавий техника воситалари — овоз кучайтиргичлар, ёритиш ускуналари ва бошқалар қобигида ялтироқ қилиб кўрсатилган бу дастурнинг нечоғлиқ «юксак»лигини бир таққосда ҳам билиб олиш мумкин. Томоша сўнгидага бошловчи саҳнага уч кишини ихтиёрий таклиф этади. Уларнинг бири — лицей талабаси шартга кўра ўзига нотаниш мусиқа оҳангига шундай жазавага тушиб, сакраб, думалаб рақс этадики, демак, ҳеч қандай тайёргарликсиз ҳам «қойил қолдириш» мумкин экан.

Гап, ўз-ўзидан, талабчанлик ҳақида кетаяпти. Мутасадди ташкилотларнинг эътироф этишича, айни пайтда жамоатчилик ҳузурига чиқиб, санъаткорлик даъвосини қилаёттганларни назорат қилиб бўлмаяпти. Хусусан, турли тижорат тизимлари гарчи вазифаси санъатдан йироқ бўлсада, ўз низомларига маданий ва шоу дастурларини ўтказиш мумкинлигини ҳам киритиб тасдиқлатиб олмоқдалар. Оқибатда, санъат ва маданиятнинг оммавий турлари факат даромадни кўзловчилар қўлига ўтиб кетмоқда. Улар «пулинни ким тўласа, мусиқасига ўша буюрта беради» қабилида иш тутиб, билганларини тўқиб, намойиш этајтилар.

Назорат қилишнинг синалган йўли эса йирик шаҳарлар ва вилоят марказларида бадиий кенгашлар тузиш, уларга зарур ҳукуқларни беришдир. Давлат тизимида ишламайдиган ҳар бир бадиий жамоа ўз дастурини мазкур кенгашлар муҳокамасидан ўтказиши шартлиги қоида қилиб қўйилиши лозим.

Кейинги йилларда кўшиқ санъатини ривожлантириш мақсадида қатор тадбирлар ўтказилаяпти, янги номлар кашф этилаяпти. Булар яхши, бироқ бир мулоҳазани айтиб ўтиш жоизга ўхшайди: кўшиқларнинг мавзу доираси ниҳоятда торайиб бораяпти. Ҳатто баъзан бу жанр ошиқнинг маъшуқага арзини ифодалайдиган усулмикан, деб ўйлаб қоласан. Бир куни 70 минут Республика радиоси

биринчи дастури орқали эшиттирилган қўшиқларга эътибор бердик. Уларнинг биринчи калимасиёқ йўналишини айтиб турибди: «Ўйнатиб қалбимни олди ул камолатлик йигит», «Ошиқ бўлибман, эй ёри жоним», «Боғдан садо келарди, бир жонона келарди», «Юлдузим, деб атайми сени», «Жон чекурман жонона», «Мен сени изладим», «Гулмиди ё гунчамиди, ёrim, сенинг бошингдаги», «Куяла, даврим, хур қизи». Ҳолбуки, бугунги қўшиқчиликка арзийдиган мавзулар анча кўп. Ёки ҳар бир қўшиқ матнида, ижрода ҳалқимиз табиатига мос, миллий қиёфани акс эттирадиган ҳаё, ибо, тортинчоқлик каби фазилатларга риоя этилиши лозимлиги кўп-да эътибордан соқит қилинмоқда. Олайлик, «қошингни қаро дейдилар», деб бошланувчи лапарни севиб тинглаймиз. Унда йигит маъшуқасидан қошини, юзини, лабини... бир бора қўрсатишни ўтиниб сўрайди. Бу ҳалқ қўшиғида одоб шартларига қатъий амал қилингани шубҳасиз, бўлмаса, томошага қўйилмасди ҳам. Бизнинг замондош ижрочиларимиз эса ўргадаги ҳаё пардасини бутунлай қўтариб таишлайдилар-да, қиздан ... «белини қўрсатиши»ни ҳам талаб қиласидар.

Умуман, қўшиқ матнининг эротик тасвирлардан, ахлоққа зид иборалардан ҳолос бўлиши маҳсус таҳлил қилиниши лозим.

Ёшларнинг бўш вақтини мазмунли ва кўнгилли ўтказиши ташкил қилиш ҳар доим кун тартибida туриши зарур. Башарти бу юмуш кейинги ўринга суриб Қўйилса, маънавий бўшлиқ юзага келиши, турли зарапли оқимлар, файритабии қараашлар авж олиши турган гап. Айни кунларда, эътироф этиш керакки, ёшлар ҳаёти, меҳнати, дам олиши, қизиқишилари билан яқиндан ва жиддий шуғулланилаётпи, деб бўлмайди. Бу вазифани зиммасига олган Ёшлар Иттифоқи, унинг жойлардаги ташкилотлари фаолиятида ташаббускорлик сезилмайди, ёшлар бундай ташкилот борлигини кўп-да ҳис қилмайдилар. Оқибатда, турли тижорат ва савдо корхоналари ўз манфаатлари йўлида ёшларни кенгроқ жалб қилмоқда, улар ҳаётидаги маънавий бўшлиқни тўлдиришга ўз нуқтаи назаридан ёндошмоқда. «Ноон-стоп шоу» дастури «Юлдузлар аро» деган ном билан икки кун «Алпомиш» спорт саройи саҳнасида на-

мойиш этилган, 1449 та билет сотилган. Демак, бизнинг азалий удумларимизга тўғри келмайдиган ажабтовур томошага шунча ёш гувоҳ бўлган. Хўш, улар шу нарсанинг моҳиятига тўғри тушунадиларми? «Алпомиш» саройи пойтахтнинг ёшлар энг гавжум қисмида жойлашган. Бундай енгил-елли томошаларни муттасил кўравергач, келажагимиз эталарининг дунёқарани ўтмаслашиб қолмаслигига ким кафолат беради?!

1991 йил, октябрь

ДАВР САДОСИ

Оҳанг, агар сен бўлмаганингда одамзоднинг куни қандай кечарди?

Абу Наср ФОРОБИЙ

Дунёни тўрт унсур — сув, ҳаво, тупроқ, олов асосида бунёд бўлган, дейишади. Сўнгра эса шу борлиққа оро бериш, нураганларни тиклаш, бузилганларни куриш — ер юзида ҳаётнинг абадийлигини таъминлаш учун одам яратилган. Ана шу мукаммал ижод маҳсули ўз туйғуларини ҳам тўрт хил воситада изҳор қиласди: сўз, ҳаракат, тасвир, овоз. Албатта, бу воситаларнинг одамзод томонидан ўзлаштирилиши, сайқалланиши, теранлашиши ҳар хил даврларда кечган бўлиши мумкин, шунингдек, уларнинг ифода имкониятлари ҳам турли даражада. Тараққиёт босқичлари давомида санъатнинг ўзида сўз қудрати-ю ҳаракат шиддатини, тасвир имконияти-ю овоз сеҳрини сингидирган қоришиқ тури ҳам юзага келди ва унда қалб манзараларининг бутун жозибасини ифодалаш имкони мужассамлашган. Гап, маълум бўладики, қўшиқ санъатига бориб тақаляпти. Ҳақиқатан, қўшиқда инсон ботиний (ички) оламини ифодалашнинг жами тилсимотлари пайваста бўлиб кетган. Унда шоирнинг эҳтиросли сўзи, ижрочининг нафис имо-ишораси ёки рақс этувчининг хироми оҳант қанотида ташриф буюрувчи далалар бепоёнлиги-ю уммонлар теранлиги, шодлик-у қайғуни, дарду

кувончни бутун қўлами, мазмуни, таъсири билан тўла ифодалайди. Шунинг учун на қаламкашнинг истеъдоди, на раққосанинг маҳорати, на рассомнинг санъати кашф эта олган инжা гўзаликлар фақат куй орқали, қўшиқ орқали намоён бўлали, юракларга етиб боради, дейишади. Бу мулоҳазаларимиз бежиз эмас. Аввало, қўшиқ бетимсол мўъжизавий санъат, иккинчидан, у даврнинг, шу давр кишилари руҳиятининг ифодасидир.

Мен мустақил юртимиз қўшиқ санъатига муносабатда, энг аввало, тарихий-тадрижий эътиборнинг ёрқин намунасини кўраман. Миллий қўшиқчилигимизга раҳнамолик фақат шу билан кифояланиб қолгани йўқ. Маънавиятимизнинг, маданиятимизнинг бу қиррасини ривожлантиришга илгари тарихий саналар муносабати билан йўлига қилинган эътибордан ўн-юз чандон ортиқ ғамхўрлик кўрсатилмоқда. Бу борадаги олий назар умумдавлат миёсидаги аҳамият касб этмоқда. Фикрга аниқлик киритиш учун йиллик анъанавий дастурлар қаторидан ўрин олган, ҳукуматимиз қарори билан белгилаб қўйилган икки мусиқа байрамини эслаш кифоя: ҳар йили август ойининг охирги ҳафтасида «Ўзбекистон — Ватаним маним» қўшиқ танловининг яқунловчи босқичи бўлиб ўтади. 1996 йилдан бошлаб эса Самарқанд шаҳрида ҳар икки йилда «Шарқ тароналари» халқаро мусиқа фестивали мунтазам ўтказилади. Яна миллий мусиқа санъатимизга қанот бағишлиовчи анжуманлар қаторига халқимизнинг беназир санъаткорлари номи билан боғлиқ танловларни, ҳар йилги турли беллашувларни, байрам кўрикларини, соҳалар бўйича бадиий ҳаваскорлик мусобақаларини ва яна бошқа кўплаб беллашувларни қайд этиш мумкин.

Азалдан навозанда ва навобаҳаш бўлган халқимизнинг мусиқий салоҳияти бир нарсага изн беради: энди масала-га юксак талабчанлик билан ёндашиш асл истеъдолларнигина яратилаётган имкониятлардан баҳраманд этиш, худди шу нуқтаи назардан келиб чиқиб, баъзи ғайримиллий ва сохта ҳаракатларга кескин чек қўйиш вақти етди. Шу ўринда бир далилни эслаш мавриди келди. Муаллифнинг «Халқ сўзи» газетасида 1994 йил, 11 ноябрда «Санъат соҳталикни кечирмайди» сарлавҳали мақоласи эълон қи-

линган эди. Бу чиқишнинг тақдиди бир жиҳати билан эсда қолганди: мақола жойларда фавқулодда кўп акс садога сабаб бўлганди. Жамоатчилик фикри газетада қарийб йил бўйи зълон қилиб борилди, уларда бир сўз билан айтганда, миллий мусиқамиз келажагидан ташвиш изҳор қилинганди. Таассуфки, фикрлар газета саҳифаларида қолиб кетди. Мақолада қаламга олинган ва газетхонлар ҳам қўллаб-кувватлаган чет эл эстрадасига тақлид, унинг яхши-ёмон томонлари ёки шу нарсага муқкасидан берилган ҳаваскорлик дасталарига муносабат ҳамон очиқ қолмоқда. Ҳолбуки, бундай бепарволик янги-янги нуқсоnlарга йўл очиши, ҳатто соғ миллий санъат ривожида жиддий ғовларни юзага келтириши мумкин.

Шундай қилиб, янгича йўналишдаги эстрадага (биз замонавий кучли электр ҷолғу асбоблари жўрлигида ижро этиладиган, оҳанглари ғарбу шарқ мусиқаларидан ўзлаштирилган қурама ашуаларни шартли равища шундай деб атадик) очиқ муносабат билдириш вақти аллақачон етган экан, ўз фикрларимизни изҳор этишга журъат этамиз.

Аввало, «янгича эстрада»нинг ўзи ҳақида. Миллий қўшиқ санъатимизнинг анъанавий ижрочилик усусларидан фарқ қилувчи, ҳатто Ботир Зокиров ёки «Ялла» ансамблига ўхшамаган «санъаткорлар»нинг пайдо бўлганига кўп бўлгани йўқ. Улар қўшиқчилик оламига қулоқни батанг қиладиган беватан, бетайин оҳанглар, унга мослашган (ёки мослаштирилган) поинтар-сойинтар сўзлари, ҳеч бир қолипга сиғмайдиган жазавалари, гўзаллик меъёрларига тўғри келмайдиган либослари билан кириб келдилар. Бунақасини кўрмаган, маънавияти ва дунёқарashi ҳам шулар даражасида бўлган ёшлиар эса уларнинг тошошаларини «мириқиб» кўра бошладилар. Бинобарин, икки томон учун ҳам бир умумийлик мавжуд: «санъаткорлар» ҳам, муҳлислар ҳам «тақлид» деган иллатга чалингтанлар. Нима бўлганда ҳам уларга концерт саройларининг эшиклари очиб қўйилган, « зангори экран» ўз марҳаматини аямай келди, овоз ёзиш студияларида бундай «асар»лар чекланмаган нусхада кўпайтирилиб сотиляпти. Далага оқизилган сув ўз ишини қилганидек, бу оқим ҳам бор-

тан сари ёшларни кўпроқ домига тортяпти, янги-янги кўринишлари пайдо бўляпти.

Истисно тариқасида оддий бир ҳақиқатни таъкидлаш жоиз: ҳар доим янгиликни тан олиш қийин кечади. Бу инсоннинг табиий хусусиятлари инъикосига ўхшайди. Ҳатто янги кийимга мослашишнинг ҳам қийинчилиги бўлади-ку. Мабодо, масалага шундай ёндашилса, «янгича эстрада»нинг янгилиги нимада? Бу саволга жавоб беришдан олдин қачон янгиликка эҳтиёж пайдо бўлишини мантиқан фикрлаб олиш керак бўлади.

Одатда, янгиликка шакл ва мазмун ўртасида номутаносиблик юзага келганда эҳтиёж туғилади, яъни эски шакллар янги мазмунни сифдира олмай қолганда ёки мазмун (моҳият) эскириб, уни янги шакллар рад эттанди ноанъанавий, ўзгача ечим изланади. Энди бизнинг теран томирга эга бўлган қўшиқ санъатимизнинг икки қаноти — мусиқа созлари (шакл) ва асрлар оша куйлаб келинган ғоялар (мазмун)ни бир-бирига муқоясса қилиб кўрганимизда, худди шу кунларда ўргада ҳеч қандай зиддият юзага келмаганини ва, демак, бу мумтоз ҳази-нага четдан бирор янгича усулни киритишга зарурат се-зилмаёттанини тушуниш қийин эмас. Дунё тан берган миллий чолгуларимиз бугунги истиқлолимизнинг бутун кўрку мазмунини, ҳалқимиз тақдиридаги тарихий ўрни-ни оҳангларда ифодалашга бемалол қодир ёки бугун биз куйлаётган ғоялар минг йиллардан буён ҳалқимизнинг севимли қўшиқлари бўлиб келган. Энди янгича эстрада-нинг асарларини шу мезон билан ўлчаб кўрайлик. Май-ли, шакл (мусиқа асбоблари)нинг янгилигини эътироф этайлик, бироқ улар нималар ҳақида куйлаяпти? Асосан, эротик майллар — йигит қизни бир кўришда ошиқ бўлиб қолади, кейин қиз учрашувга келмайди, бу ёғи — изти-роб. Бизнинг маънавиятимизда шундай шилимшиқ, чуч-мал қараашларга ўрин бўлганми? Ахир бизнинг азалий удумларимизда келинчак ҳатто күёвнинг қариндошлари номини тилга олишдан уяладиган даражада назокатли бўлишган, куёв эса биринчи фарзанди туғилмагунча қай-нотаси билан бир дастурхонда чой ичишдан истиҳола

қилган. Ана шундай халқнинг бугунги вакиллари мудда-осига ета олмаган болакайнинг беҳаё ингроқларини мусиқа жўрлигида эрта-ю кеч тингласа, оқибатда нима бўлади?

Умуман, санъатга қўйиладиган битта талаб бор: у инсонни комиллик сари етаклаши шарт! Чунончи, эшитилган мусиқа киши қалбидаги меҳр-шафқат, эзгулик, саҳоват, соғинч сингари туйғуларни кучайтириши, уларга қанот бериши керак. Энди қўрқинчли садолар остида қийналган одамнинг фарёдига ўхшаган овозда аламзадалик мазмунидаги қўшиқни тинглаган киши қандай кайфиятда кўчага чиқади? Бунинг устига у дунёқараши мўрт ўспирин бўлса? Шубҳасиз, ўсиб турган ниҳолни синдиради ёки сайраётган қушга тош отади. Ҳозир ёшларнинг сур, меҳрсиз бўлиб ўсаётгани ҳақида шикоятлар кўп эшитилади. Эҳтимол, бунда ҳам шундай омилларнинг таъсири бордир: уйда шунақа қўшиқ, машинада шунақа қўшиқ.

Мана, илк мулоҳазаларимизданоқ бунақа янгича эстрада бизнинг руҳиятимизга тўғри келмаслиги маълум бўлиб қолди. Яна мулоҳазаларимизни давом эттириб, «барибир бу янгиликни қабул қилишга қийналаяпмиз» деган фикрда собит турайлик-да, унга қарши далилларга мурожаат этайлик. Одатда, янгиликнинг яна бир шарти у «Эскилик», яъни ўзигача бўлган натижалар бағрида улгаяди ва янги босқични бошлаб беради. Шунга кўра «янгича эстрада» ҳам бизнинг азалий мумтоз санъатимиз бағрида туғилган, унинг энг яхши анъаналарини ўзига сингдирган бўлиши керак эди. Ҳолбуки, уларда бундай фазилатларнинг урвоғи ҳам йўқ. Шахсан мен шундай санъаткорларнинг бирор мақом шўйбасини ёки катта ашулани меъёрига етказиб ижро эта олишига ишонмайман.

Тўғри, барча соҳада изланишлар бўлиши табиий ва ундан қўрқмаслик ҳам керак. Бироқ бундай изланишларнинг замини бўлиши лозим-да. Демак, бизнинг эстрада қўшиқчиларимиз ҳам ўзбек миллий санъати анъаналарига таяниши шарт. Аммо бизнинг аждодларимиз саҳнага кийимини тескари кийиб ёки соз ўрнига белкурак «чалиб»

чиқмаган, ерга ағанаб жазавага тушмаган. Ҳатто бундан ўн ҳисса кечиримли ҳолларни ҳам санъаткор шаънига доғ деб билишган.

Балки замонавий санъат шундай қиёфада бўлар? Асло! Қушиқ санъатининг замонавийлиги дейилганда, аввало, кўз олдимиизга шакл (мусиқа асбоблари, оранжировка, ёруғлик ва бошқалар) келади. Энг яхши қўшиқларда ана шу воситалар мазмунни кучайтиришга хизмат қиласди. Бирор чет эл хонандаси соғинч ҳақида кўйлаётган бўлса, сўзларини тушунмасак-да, саҳнадаги ҳолат орқали шу кайфиятни сезамиз, ўзимизнинг соғинчли дамларимизни эслаймиз. Демак, замонавий техника мазмунни тўла ифодалаш, уни тушунишни кучайтиришга хизмат қиласди. Шунингдек, энг замонавий қўшиқларда интеллектуал олами ниҳоятда бой, XX аср кишисининг мураккаб ички дунёси жуда таъсирли акс эттирилади, юксак инсоний ғоялар, жами одамзодни тўлқинлантирадиган мавзулар кўйга солинади. Бизнинг янгича санъаткорларимиз репертуарларида эса бундай юксак талабларга жавоб берадиган қўшиқлар учрамайди. Қолаверса, шу даражада фикр юритиш, мавзу излаш, олам яратиш иқтидори ҳам кўзга ташланмайди. Ахир қуруқ тақлииддан иборат, миллийликдан холи уринишлардан бирор натижага эришиб бўлмаслиги оддий ҳақиқатдир. Бутун дунё саҳнасида Ўлмас Саиджонов, Муножот Йўлчиева, Муяссар Рассоқова, Турғун Алиматов сингари ўнлаб санъаткорлар олқишлиарга сазовор бўлишаётган экан, бу фақат миллий маданиятимиз эътирофи, дунё ҳалқлари қўшиқ гулчамбарида янги гулдаста пайдо бўлганининг ифодасидир. Демак, эстрада санъатида ҳам дунёга чиқиш йўли — миллий ўзига хослик, ўзбекона санъат йўлидир.

Биз янгича усулларда изланишлар олиб бораётган, бироқ ўзлигини топа олмаётган, баъзан енгил муваффақият, оддий қарсак учун ижод қилаётган ёшларни истеъдодсиз, санъат оламига бегона, лейиш фикридан йироқмиз. Фақат улар мўлжални тўғри олиб, ҳалқимизнинг бой маънавий меросига ҳурмат билан қараб, ўқиш-ўрганишдан чарчамай, устозлар кўмагида ижод қилсаларгина бирор муваффақиятга эришишлари аниқлигини таъкидла-

моқчимиз. Зеро, минг йиллик санъат тарихи буюк санъаткорларнинг ҳәёти ана шу ҳақиқатни тасдиқлаб турибди. Эҳтимол, халқимиз интизорлик билан кутаётган юлдузлар туманли хаёллар гирдобида йўл топа олмаётгандир.

Руҳиятимизга мос келмайдиган, халқимиз табиатидан йироқ санъат ҳақида куйинчаклик билан мулоҳаза юритаётганимизнинг жиддий сабаблари бор. Аввало, гарбда ёки океан ортида пайдо бўлган, бугун бизнинг ёшларимиз тақлид қилаётган айрим ансамблар, асосан, қўшиқларида зўравонлик, қонхўрлик, фаҳш, зулм сингари мавзуларни куйлаб чиқди. Кейин эса бундай санъаткорларнинг турмуш тарзи ҳам қизиқ: бирлари уйланмаслик ёки турмушга чиқмасликни тарғиб этса, бошқалари бир жинслагилар никоҳи тарафдори. Кўплари наркобизнес оламига хизмат қилишади... Ана шундай ўта хавфли оқимнинг шарпалари сезилаётган экан, уни тезда жиловлаш лозим. Олайлик, тарёқ, май, тамаки сингариларга киши фикрига кутқу соловчи ашёлар сифатида қаралади. Худди шуннингдек, мусиқа ёрдамида ҳам одамнинг хаёлига турли ярамас юяларни сингдириш мумкин (ахир соз чалса илон ҳам ўйнайди-ку). Келажак авлодимизнинг ҳар томонлама етук ва соғлом бўлиб вояга этиши ҳаммамизнинг муддомиз экан, баъзи зарарли таъсиirlар тезроқ бартараф этилиши лозим. Зеро, бугунги бепарволик эртага қимматта тушиши мумкин.

Юртимиз дунё ҳамжамиятига дадил кираётган экан, турли жабҳада таъсиirlар сезилиши тайин. Биз эса азалий ва боқий санъатимизнинг соғ ва улуғвор бўлиб қолишини дилдан истаймиз.

1996 йил, сентябрь

ҚЎШИҚ БИЛАН ЎЙНАШМАНГ

Баъзан кўнгил ёлғизлик тилайди. Эшикни ёпасан-да, хона тубига чўкасан. Бошинг ёстиқقا тегиши билан борлиқни унутасан. Жисминг тушкун ҳислар залвори остида қолади. Бўғилган ёргулик, увадаси чиққан ташвишлар кур-

шовида йўқликка сингиб бораверасан. Фикратингдаги тириклигингни тасдиқлаб турган ҳаёт шаъми ҳам сўниб бораверади... Шу пайт мўъжиза рўй беради: ҳорғин рух оламига иғнанинг тешигидек тирқишидан сизиб куй-наво кириб келади. Наво ўз пардаларида яшаш завқини олиб киради, у хилват гўшани қоплаб ола бошлайди. Сени ўраб-чирмаб ётган бадбин туйғулар билан кураш бошлайди. Хона ёришиб кетади. Сен бошингни кўтарасан. Бу — тирикликнинг тантанаси, таслим бўлган жонинг рақибини енгиб, ҳаётга қайтиши эди. Бу — мусиқанинг ташрифи эди.

Ана шундай илоҳий жозибага эга бўлган санъат турига ҳеч вақт бепарво муносабатда бўлиш мумкин эмас. Жумладан, юртимизда миллий маданият асосларига қайтилаётган пайтда алоҳида эътибор лозим бўлади.

АҚЛСИЗЛИК «БАЛО»СИ

Айни пайтда замонавий мусиқамиз атрофига баҳс-мунозаралар бўлаётгани кишини хурсанд қиласади. Айниқса, бундай чиқишлар бу борада изланишлар олиб борилаётган ва саъй-ҳаракатлар ҳукumat томонидан қўллаб-куватланаётган пайтда бўлаётгани эртанги кун ўзбек миллий қўшиқчилиги ривожига сезиларли таъсир этиши шубҳасиз. Бизнинг ҳам мавзуни давом эттириб, аҳвол билан чуқурроқ танишишимиз асносида замонавий ижрочиларнинг кўплаб қўшиқларини эшлиб кўришга, соҳанинг раҳбарлари, мутахассислари билан суҳбатлашишимизга тўғри келди. Шундай қилиб, шахсий таассуротлар ва суҳбатдошларнинг фикр-мулоҳазаларидан аниқ холосага келдикки, айни пайтда кўп асрлик анъана ва тарихга эга бўлган ўзбек мусиқа маданиятида янги тўлқин пайдо бўляяпти. Албатта, бу ҳолни қизғин табриклаган ҳолда, эътироф этиш керак: тараққиётнинг ҳозирги босқичида, радио-телевидение, аудио, видео техника ривожланган шароитда ёшларимизни, умуман, миллий маданиятимизни дунёда эришилган ютуқлардан бебаҳра қолдириш мумкин эмас, ана шу ҳолат эса масаланинг иккинчи жиҳатини кўндаланг қўяди: демак, миллий руҳдати замонавий

Қўшиқчиликни яратиш кун тартибида турибди. Шу нуқтати назардан ўз ташабуси билан ижодий гуруҳлар тузиб, бу йўлда изланишлар олиб бораётган ёшларга беписанд муносабатда бўлиш ҳам инсофдан эмас.

«Байрам», «Болалар», «Ал-вакил», «Шофайз», «Тошкент» ва «Нола» сингари гуруҳларнинг энг кейинги қўшиқларини тинглаб, оҳангнинг сеҳрига яна бир бор берилган ҳолда бу ижодкорларнинг барчасига хос камчиликлар нимадалиги устида ўйлаб қолдик. Албатта, маҳорати, ижро усули ранг-баранг бу гуруҳларга ягона қолипдан келиб чиқиб баҳо бериш қийин, бироқ умумий бир манзара дикқатни торталди. Бу қўшиқлар тингловчига завқ бағишлиайди, жунбушга келтириб, сакраттиради, қийқиртиради, бироқ Ақлта ҳеч нарса бермайди! Тўғри, санъат туйгу-ҳислар орқали бизга таъсир этади, унга «ақлли» бўлиш талабини қўйиш ҳам эриш туюлиши мумкин, бироқ инсон нега санъатга интилади ёки нега қўшиқ-кўй тинглайди? Ахир бу интилиш фақат мушакларни яйратиш учун эмас-да. Мақсад — фикрга қанот бағишлаш, тафаккурни илҳомлантириш эмасми? Зоро, «қаерда ақл етишмаса, у ерда ҳамма нарса етишмайди» (Ж. Галифакс) демишлар. Демак, ақл макон қурган ботиний манзилларга — қалб туби ва миянинг хилват бурчакларига етиб бормаган мусиқа чолғуларнинг бир оҳангга солинган тарақ-туруғи бўлиб қолаверади.

Шу ўринда ақл (тафаккур) ва ҳис (ҳаракат) ҳақида оддий мулоҳазалар билан ўртоқлашишга тўғри келади. Гапни энг оддий қиёсдан бошламоқчимиз: ҳис (масалан, қўркув ҳисси) жами тирик мавжудот учун хос. Ақл (тасассуротни муҳокама қилиб, чора топа олиши) эса фақат одамга хос хусусият. Айиқ ёки бўри ҳам олов ёки сув тошқинини кўрганида сўзсиз таъсирланади, бироқ унинг учун какликнинг сайраши, шамолнинг гувиллаши аҳамиятга эга эмас. Бинобарин, санъатдаги «ақллилик»ни қабул этиш инсонга хос экан, шак-шубҳасиз, санъатда «ақл» бўлиши шарт.

Ёш ижрочиларда ана шу талабнинг оқсанши нималарда кўринади? Аввало, мавзу доираси жуда тор. Қўшиқларнинг аксарияти «тошибағир» қизлар ҳақида, Ватан, она

ҳақида айтилган қўшиқлар ҳам шу йўлда бўлиб, тингловчида ёрқин кайфият уйғотмайди.

Санъатга хос узрли усуллар ҳисобланувчи нақоратлар, тақрорлар, бўрттиришлар билан «безантган» қўшиқ матнларини кўриб эса ижрочиларнинг дидига қойил қолмайсиз. Баъзи қўшиқ матнларидан мисоллар:

«Офтоб нур сочади боғларга, гулларга, болалар юришар кулишиб, эртадан кечгача тинимсиз куйлаймиз боғлар соясида, қайларда кўрганмиз, эслаймиз».

«Ёш қиз энди келинчак, оқ либосда келажак, энди уйнинг тўрида бу шаҳло кўзли келинчак. Келин келди, куёвнинг бағри тўлди, бугун бахтдан уй тўри нурга тўлди» («Байрам»).

«Гўзалина, гўзалина, тентингни топа қолгина, мени унуга қолгина» («Ал-вакиль»).

«Ёғсин ёмғир тонггача, жала қўйсин эртагача, хоҳлаганча, тонг отганда севгилим менини бўлиб уйғонсин ёнимда» («Болалар»).

«Қиз бола, ой юзгина, кўзлари юлдузгина, чиройи кирмизгина, ўзинг ёлғиз юрма, қизгина» («Шофайз»).

«Ўзбегим, гўзалим, ўргиламан ўзингдан, ҳаёли, иболи, қоп-қора кўзингдан» («Тошкент»).

«Йўлим топдим мен ниҳоят, бутун бўлди туз-ноним, Ёлборгум сенга, «сев мени» дедим, жоним» («Нола»).

Албатта, шеърларнинг нечоғлик саёзлиги кўриниб турибди, бу ўринда ижродаги тақлидчиликни таъкидлаш шарт бўлмаса керак. Хуллас, атак-чечак бўлиб ҳаётга йўлланма олаётган замонавий қўшиқчиликнинг қиёфасида ана шундай чизгилар мавжуд.

КОМПОЗИТОР КЎП, ҚЎШИҚ КАМ

Шубҳасиз, миллий санъатимизнинг бор бўй-басти шу эмас. Бизнинг ижодкорларимиз истиқлолдан илҳомланиб, бой ўтмиш анъаналарига таянган ҳолда шавқ билан янги янги асарлар яратяптилар. Улар илҳомининг маҳсуллари турли тадбирлар муносабати билан дунёнинг энг юксак маданиятли шаҳарларида янграяпти. Давлат консерваторијаси, 3—4 олий ўқув юртида санъатнинг бу тури сир-ас-

рорлари ўргатилади, ҳар йили юзлаб маълумотли мута-хассислар тайёрланади. Республикаизда замонавий ижодкорларни бирлаштирган Композиторлар уюшмаси, анъ-навий ижодкорларни жамлаган Бастакорлар уюшмаси фаолият кўрсатади. Хўш, ана шундай теран яратувчилик муҳитида енгил-елпи қўшиқлар қайси йўллар билан ёруғлик юзини кўраяпти? Наҳотки, шундай бой мусиқий салоҳиятнинг маҳсуллари шунчалик арzon «асар»лар бўлса?

Ижоднинг табиати шундайки, худди «даладагиси эмас, хирмондагиси ҳисоб», деганларидек, хаёлда чарх уриб юрган ёки қофозга тушиб, бир четда чанг босиб ётган эмас, ижро этилган, бунинг устига муҳлислар қабул қилган асарларгина муаллифнинг бўй-бастини намойиш этиб туради. Шу нуқтаи назардан бугун қўшиқсевар ёшлардан «фalon симфонияси билан Европани қойил қилган композиторимизни биласанми?» деб сўралса, елка қисиши мумкин, бироқ «Эски шаҳар» гуруҳининг янги кассетаси чиқибди деса, шаҳарни зир айланиб ахтариши эҳтимол. Бу ҳам ўзига хос ҳолат. Худди шундай оммалашиб кетган турли гуруҳлар билан композитор ёки бастакорларимизнинг ижодий ҳамкорлигига қизиқдим. Маълум бўладики, биз тақлидми, кўчирмачими, деб айтиётган, бироқ ёшларни тобора ўзига кўпроқ жалб этаётган ҳаваскорлар билан шу соҳанинг «пир»лари ўртасида ҳеч қандай муносабат йўқ экан. Мусиқа илмининг сир-асрорларини ўрганиб ёзилган, «эстетик таъсир кучи юқори бўлган» асарларни оммабоп гуруҳлар ижро учун қабул қилмайди. Балки тўғри қилади, чунки уларга тингловчи керак. Шу ўринда номутаносиб бир ҳол кўзга ташланади: таниқли композитор қўшиғини яратиб, токчага тахтлаб қўяди, у ижро этиш навбатини кутиб ётади, томошабин ҳузурига шошиб йўл олаётган ижрочилар эса ҳатто охирига етказилмаган хомхатала асарларини саҳнадаёқ «қиёмига етказиб» тингловчига ҳадя этадилар. Хуллас, турли гуруҳлар бизнинг профессионал бастакорларимизни тан олишмас, улар билан ҳамкорлик қилишни хоҳлашмас экан. Буни профессионалларимиз хоҳлашадими-йўқми, билмадиму, бироқ бизнинг барқарор мусиқа йўлимизда четдан турли оқимлар пайдо бўлиб, ўз муҳлисларини топиб бораётгани бир ажаблантири-

са, асарларининг умри қоғозда ўтаётган ва бу жараёнга томошабин бўлиб турган композитору бастакорларимизнинг бепарволиклари яна бир ажаблантиради. Маълумки, боғда гулзор пайҳон бўлса, ўрнида тиканаклар ўсиб чиқади. Демак, миллий мусиқамизнинг байроқдорлари ташаббусни қўлдан бериб қўйганлари туфайли қўшиқчилик санъатида ана шундай дидсизлик юзага келган экан-да.

Суҳбатдошларимизнинг айримлари бу ҳолни бозор муносабатининг таъсири билан изоҳламоқчи бўлишиди. Эҳтимол, бу гапда жон бордир. Қайси гурӯҳ тадбиркор бўлса, ўзини моддий томондан эплаб, кун кўрган, эплолмаганлари саҳнадан тушиб кетаверган.

Кейинги пайтда бу соҳага муносабат кескин ўзгарди. Ҳақиқий истеъдодларни излаб топиш ва уларни қўллаб-кувватлаш чоралари кўрилаяпти. «Ўзбекнаво» гастрол бирлашмаси ва унинг вилоятлардаги бўлимлари тузилди. Хуллас, ишлаш учун кенг имкониятлар яратилди. Аслида, қалбидаги ҳалқ, миллат маданиятига сидқидилдан хизмат қилиш туйғуси жўш урган фидойи кишилар учун имконият ҳеч вақт чекланмаган.

ИЗЛANIШ ИЗТИРОБЛАРИ

Тўғриси, қўлига соз тутиб саҳнага чиқсан, ўзини ҳар қўйга солиб, ҳар ёққа уриб йўлини излаётган ёшларни мўмай даромад топиш учун шу йўлни танлаганликда айблаш бирмунча хато эмасмикан? Аввало, кишининг қалбига бир чўғ ёниб турмаса ёки туғма истеъод бўлмаса, санъат даргоҳига қадам қўймайди. Мабодо, уларнинг муддаоси бойиб кетиш бўлганда ҳам бошқа ўнғайроқ усулни танлаган бўлишарди. Бинобарин, уларнинг бу йўлни танлаши эътиқоддан, фидойиликдан эмасмикан? Тақлидчилик, маҳоратнинг етишмаслиги — кейинги масала, нафсиларни айтганда, кўплаб ёшларни бирлаштирган гуруҳларнинг мусиқа чаманзорида пайдо бўлиши табиий ҳол. Ахир замонавий ўзбек қўшиқчилиги саҳнадан ҳам, зангори экрандан ҳам тушмайдиган 4—5 ижроидан иборат бўлмаслиги керак-ку.

«Ўзбекнаво» бирлашмаси эстрада жамоалари дирекциясидан маълум қилишларича, ижрочи ёшлар гурухларида маҳсус маълумотта эга бўлган, иқтидорли ёшлар кўплаб топилади. Қолаевса, гуруҳлар кўр-кўёна тақлиддан воз кечиб, ўз йўлларини излаш учун интиляптилар.

«Байрам» гуруҳини Сарвар Қозиев, Равшан Намозов сингари иқтидорли ижрочилар ташкил этган эди. Маълумки, Равшан 1992 йилда Олмаотада ўтказилган «Осиё доуси» кўрик-танловининг бош совринини қўлга киритган, ҳалқ йўлида изланишлар олиб бораётган санъаткор. Гуруҳ фольклор-поп йўналишидан бориб, тез тилга тушди, бироқ муваффақиятни изчил давом эттира олмади.

Диско йўналишидаги «Болалар» гуруҳига яккахон хонанда Тоҳир Содиқов етакчилик қиласиди. Замонавий мусиқадаги қийин усуслардан рэп йўлини танлаган «Алвакил» гуруҳи «Ўзбекцирк» қошида фаолият кўрсатаяпти. Анъанавий мусиқаларни твист оҳангига ижро этишга асосланган ретро йўлини танлаган «Шофайз» гуруҳида моҳир мусиқачилар, хушваз хонандалар етарли. «Тошкент» гуруҳига таникли хонанда Шариф Султоновнинг ўели Бахтиёр Султонов раҳбар. «Нола» гуруҳининг «Тошкентим» қўшиғи «Ўзбекистон — Ватаним маним» кўрик танловининг якунловчи босқичига танлаб олинди.

Мана шу қисқа маълумотларнинг ўзиёқ ижодий жамоаларнинг маълум имкониятлари мавжудлигини кўрсатиб турибди. Шубҳасиз, ҳайротомуз муваффақиятларга бирдай эришиб бўлмайди ёки истеъоддининг ўзини кўрсатиши ҳам осон кечмайди. Битта буюк санъаткорни етиштириб бериш учун минглаб кишиларнинг меҳнати талаб қилинади. Шундай экан, кўнгил майли билан ўзини кўрсатган, санъат йўлига кирган ёшларнинг ҳаракатлари бежиз кетмаслиги лозим. Бунинг учун, айниқса, уларнинг бошини қовуштирадиган ягона марказ бўлиши сув билан ҳаводек зарур. Ҳолбуки, уларнинг ҳаёти айни пайтда эътибордан четда кечмоқда. Репетиция қиласидиган, маҳоратларини ошириш устида ишлайдиган жойнинг тайини йўқ. Ҳаваскорларнинг шоир ёки бастакорлар билан ижодий ҳамкорлигини таъминлаш устида ҳеч ким қайғурмаяп-

ти. Бу борада, шубҳасиз, «Ўзбекнаво» ёки «Камолот» ёшлар жамғармасининг қатъий йўл тутиши лозим бўлади.

«СОҚҚА» УЧУН – ЧҮҚҚА

Шубҳасиз, қўшиқнинг ҳаётимиздаги ўрни беқиёс. Азалдан созпарвар ва навозанда бўлиб келган халқимиз санъатнинг бу турига чукур ҳурмат билан қараб келган, унинг соҳибларини астойдил эъзозлаган. Муғанний ва хонандалар ҳам шунга жавобан ўз қадрларини сақлаб, обрўларини юксак тутганлар. Улар ким билан қай йўсинда муомала қилиш, қачон қандай қўшиқ куйлаш каби одоб шартларига қатъий амал қилганлар. Бундай зариф санъаткорлар ҳозир ҳам орамизда бор.

Бироқ айни кунларда бир нарсадан жиддий ташвиш билдириляпти. Яна санъат номидан чайқовчилик қиласидан, ҳунарини пулга сотадиган, муддаоси бойлик тўплаш бўлган сохта «санъаткор»лар кўпайиб кетаяпти. Улар ўзларининг ўтмишдошларидан фарқ қилиб, янги-янги ҳурмача қиликлар ўйлаб топишяпти, халқимизнинг кўли очиқлиги, сахийлитини сунистеъмол қилиб, ҳатто баъзи азалий тартибларимизни оёқ ости қилишяпти.

Бир танишим ҳикоя қиласиди:

«Тошкентда чорлар, бешик тўйи, қиз базми сингари тўйчалар кўпайиб кетди. Бундай йигинларга яқин йилларда санъаткорлар таклиф қилинганини кўпчилик эслай олмайди, бироқ эндиликда бу ҳол «кимўзарга» тусини олди. Бунинг устига «санъаткор» отлиқ нусхаларнинг қиликларига ўласанми? Улар нималар деб куйламайди, нималарни талаб қилмайди? Муддаоси — тўй эгасини шилиш, ўз чўнтагини тўлдириш. Никоҳ тўйлари-ку ҳар қандай меъёрдан чиқиб кетди. Аввало, уларга фақат ёшлар таклиф қилинади. Нима, улар осмондан тушганми, ота-онадан бунёд бўлмаганми? Бунинг устига, наҳотки, ўша баҳт кечаси турмуш қурган тажрибали кишиларнинг икки оғиз панд-насиҳатига ўрин бўлмаса? Даврада ҳалигига олди-қочди қўшиқ янграйди. Ҳамма ер тепиб рақсга тушади. Мана буниси эса ҳаммасидан ошиб тушади. Келин-куёвни кузатиш пайтида олдин ота-оналар, кейин келин ва

куёв ўйинга тушиши керак. Бу хурмача қилиқни «санъаткор»лар қашф қилишган: шу пайтда тинимсиз пул қистирилиши, сочилиши лозим.

Келин-куёвнинг ўйинга тушиши. Бизнинг қадими одатларимизда бундай ҳол учраганмикин? Наҳотки? Келин тушириш билан боғлиқ «юз очар» деган одатимиз бор. Унақада бу чиройли маросимнинг моҳияти қаерда қолади? Янги уйга қадам қўйган келинчак жамолининг илк марта намоён этишини алоҳида кутлаган ҳалқимиз маънавияти учун ҳоялида келин-куёвнинг рақсга тушиши — ҳақорат эмасми? Бу ҳақда жиддий ўйлаб кўриш лозим».

Суҳбатдошимнинг бу куйинчак мулоҳазаларига қўшилмаслик мумкин эмас.

АМАЛИЙ ЧОРАЛАР ЗАРУР

Оддий бир савол: отарчи даромадидан солиқ тўлайдими? Энди бундай муносабат ҳеч кимни ажаблантирмаслиги керак, ахир жамиятда жорий қилингандар тартиблар ҳамма учун умумий, бу тартибларга барча баробар амал қиласа, унинг обрўси юқори бўлади. Ҳали турмушимизга «Маҳаллада ўрнатилган тартибни бузгани учун» деган талаб жорий қилинмади, ҳолбуки, ана шундай мазмундаги меъёрномаларга ҳам эҳтиёж сезилмоқда. Ахир биз тараққиётнинг юқори босқичига эришишни мақсад қилиб қўйган эканмиз, бу юксалишнинг ҳар бир жабҳаси зътиборда бўлиши, яшаш тарзини тартибга солиб турадиган ҳукуқий ҳужжатлар яратилиши талаб қилинади. Шундай бўлганда тўйга ташриф буюрган санъаткор ҳам солиқ идораси олдидаги масъулиятини ҳис этиб, бошқачароқ ҳаракат қиласиди?

Умуман, санъаткорларнинг тўйларга иштирок этиши табиий ҳолга айланди. Шўро давридаги тақиқлардан фарқ қилиб, бундай ташрифлар қувончли куннинг оддий манзараси бўлиб қолди. Ҳалқимиз руҳияти, турмуш тарзимиз буни тасдиқлади. Энди ҳеч ким бу борада янгилик очмоқчи ёки эски усулларни қўмсамоқчи эмас, бироқ шу ҳолатнинг ўз одоби, белгиланган меъёри бўлиши лозимку? Бунинг учун балки олдин маданият муассасалари қошидаги «Тўй бюролари» ишига янгича мазмун бағиш-

лаб, унинг фаолиятини тиклаш керакдир. Хуллас, ҳалқимиз турмушининг бу муҳим жабҳаси ҳам бошқарилмайдиган сув тошқинидек тус олмаслиги, унда боқий анъ-аналаримизга амал қилиниши тарафдоримиз.

Бир пайтлар овоз ёзиш студиялари Маҳаллий саноат вазирлиги тасарруфида бўлиб, шу идора олдида жавобгарлик ҳис этган экан. Айни пайтда эса бундай устахоналар деярли назорат қилинмаяпти, уларнинг кўпи хусусийлаштирилган, имкони нимага етса шуни бажаряпти. Шубҳасиз, савдо корхонаси учун қўшиқларнинг савияси, миллийлиги ҳал қилувчи омил эмас.

Эҳтимол, кўпдан бүён гап бўлаётган, бироқ фаолиятга киришиши қийин кечәётган бадиий кенгашнинг ишлашига тезроқ амалий тус бериш керакдир. Аслида, савијаси паст, дидсиз қўшиқларнинг йўлига тўсиқ қўйиш қийин эмас, бироқ ҳозирча шундай юмушни бажарадиган тузilmанинг ўзи яратилмаган. Жумладан, етук санъаткорлар ва шоир-ёзувчилардан тузилган бадиий кенгашнинг хулосаси ҳал қилувчи овозга эга бўлиши, шу асосда мусиқий гуруҳларнинг репертуарлари шаклланиши лозим. Ҳозиргача эса осон туюлган ана шу вазифани эплаш имкони бўлмаяпти. Бизнингча, энди кутиб ўтириш мавриди эмас. Зоро, ҳозирги кунларимиз бевосита амалий фаолиятни талаб этаяпти.

* * *

Одатда, эҳтиёtsиз муносабат нохуш асоратлар қолдириши мумкин бўлган нарсалар ҳақида жиддий огоҳлантирадилар: «Олов билан ўйнашманг», «Курол билан ўйнашманг»... Кўшиқ ҳам катта куч, бу эътирофни қўшиқка нисбатан ҳам bemalol ишлатиш мумкин.

1997 йил, август

ҲАЁТСЕВАРЛИК

Биз баъзан ҳаётда теран бир мантиқа дуч келганимизда кўп нарсаларни қайтадан кашф қилгандек бўламиз. Бу атрофдаги ҳамма нарсани одатдаги мезонлар билан

ўлчашга ўрганиб қолган зеҳнимизнинг ёришишидан бўлса керак. Аждодларимизнинг азалий кўниумаси — қорин очганда овқатланиш, қоронги тушганда ухлаш сингари табиий уйғунлик бутун ҳаракатларимизни, ҳатто ташқи таъсиротларга жавобимизни ҳам ўз измига бўйсундиради. Яъни «кучли ёруеликка дуч келсанг — кўзингни юм» каби. Ана шундай одатдаги тартиблар билан яшаш қанчалар осон. Олайлик, иш жойингда қилифинг раҳбарлардан бирига ёқмай, у ҳадеб зуғум қиласверса, ариза ёз-да, бўшаб кет. Кўпинча, худди шундай бўлади. Ходим ариза ёзиш билан ҳам ўз жонини қутқаради, ҳам «жамоа манфаатини ўйловчи бошлиқ»қа жойни кенг қилиб кетади.

Бироқ бу кўхна дунёда мўъжизалар ҳам рўй бериб туради. Ҳамма босиб ўтувчи кўпприк бир кун бош кўтарадида, қирғоқни иккига бўлиб ташлайди. Ходимнинг ҳам тазийқлардан гарчи силласи қуриган бўлса-да, у шундай ҳаётни севиб қолади. Бутун қийноқларига бир кун малҳам топади ва уни шундай ифодалайди: «Курашаман!» Шунда унинг лоқайдланган зеҳнида тоғда бир кўрган манзараси — чўнг тошларни ёриб чиқсан арча ва унинг тоққа ботиб турган темирлек томирлари журъат уйғотган бўлади. Ахир яшаш деган буюк ҳикматнинг мазмуни ҳам худди шу эмасми? — «Кураш!»

Мен Яккабоғда арчалар ўсмайдиган текисликдаги қишлоқда бошқа бир мўъжизага дуч келдим. Имомёкуб қишлоғида худди навниҳол арчадек бир қиз теран томирларини заминга, одамлар дунёсига чуқур ботириб, ҳаёт-севарлик билан яшаяпти. Тақдирнинг унга инъоми чўнг тоғдан юмшоқ эмас, лекин у ана шундай жойда гуркираб, теварак-атрофга бўй кўрсатиб яшаяпти.

... Ҳамроҳим Мехриҳон менинг шубҳаларимга чек кўйди: «Кириб бораверамиз, меҳмондўст ўзбек хонадонику». Ҳовли хийла кенг ва басаришта. Дарвоза олдида бир уй, боғ тўрида яна бир уй. Радиокарнайдан шоирнинг овози эшитилади: «Ўлдирса ўлдирсинг муҳаббат». Тўрдаги одмитина даргоҳга қадам кўямиз. Олди айвонли уйнинг даҳлизида мезбонлар пешвоз чиқади. Чап тарафдаги уйнинг эшиги очик. Ичкаридан фақат оқ чойшаб ташлаб қўйилган каравот кўзга ташланади. Тавозеъ ва илтифотлар кур-

шовида уйга кирамиз. Киришда чап тарафда, остоңага яқин жойда сандал кўйилган. Муборак шу ерда бизни кутиб олди. Мехрихон унинг пинжига тиқилиб, иссиққина сандалга ўтиреди. Албатта, умрида биринчى марта дуч келган одамларда бўлганидек, орадаги бегонасираш кўп чўзилмади, гап шеъриятга келиб тақалганда эса суҳбат авж олиб кетди.

Шундай қилиб, қишлоқдаги юзлаб хонадонлардан фарқ қилмайдиган ана шу гўшада орзулари бир олам, қалби ҳаёт ишқига тўла, шеъриятга ошуфта бир қиз яшаяпти. Унинг кимлигини қўпчилик ҳали билмайди, лекин у кўплаб машҳур кишилардан ҳам азиэроқдир.

Жасоратнинг ифодаси жуда содда бўлади. Масалан: «У кўкрагини амбразурага кўйди» каби. Лекин бир лаҳзалик шу ҳаракатнинг моҳиятини тушунтириб бериш учун қанчалар сўз керак. Муборак Мўминованинг кечинмаларини ҳам на онаси Хадича холанинг ҳикоялари, на бизнинг шарҳларимиз тўла ифодалай олади. Негаки, у ўтказган ҳар бир кун — жасоратта тўла, унинг ўзи — жасорат тимсоли.

Муборакнинг З ёшли пайтида қайнот сув тўкилиб кетиб, ўтирган жойлари куяди. Бир неча марта шифохоналарда даволанади, бироқ муолажаларнинг фойдаси бўлмайди. У юролмайдиган бўлиб қолади. Мана, 20 йилдирки, тўшакда кунни кузатиб қўйиб, тунни кутиб олади. Бўлган гап — шу, лекин ўтган кунларнинг мазмуни жуда теран, эҳтимол, бу теранлик уни баъзи қора нуқталарга муқояса қиласа яна ҳам ойдинлашар.

Унга мактаб кўриш насиб этмади, бироқ ўзида куч ва ҳавас топиб, мустақил савод чиқарди, имлони ўрганди, бадиий адабиёт билан дўст тутинди. Ҳатто бу борада чўққига кўтарилди: ички кечинмаларини шеърда ифодалай бошлади. Мана, қўлимизда унинг бир даста шеърлари, улар чиройли ҳусниҳатда, жуда саводхонлик билан ёзилган. На имлода, на тиниш белгиларни ишлатишда бирон хато бор. Шунда кўз олдимишга ўн йиллик узун йўл келди. Ахир бир одамнинг мактаб йўли билан савод чиқариши учун худди шунча вақт сарфланади. Бироқ ўрта мактабнинг ҳар бир битирувчиси саводхонликда бир хил эмаслиги сир

эмас. Касаллик исканжасида бўлган, жисми оғриқ-у бе-зовталиқдан бир зум холи бўлмаган қиз учун яшашга таш-налиқ, соғайиб кетишга умид олға чорловчи маёқ бўлади ва у мустақил равишда ўқиб, мукаммал савод чиқаради.

— Қўшнимиз Адолат менга кўп нарсада ёрдамлашди, — дейди Муборак, — у Шаҳрисабз педагогика билим юртини тутатиб, мактабда ўқитувчилик қилмоқда.

Шеър оғриқдан туғилади, дейдилар. Одам бутун борлиқдан юқори кўтарила олгандагина шеър ёзади. Шеър — ўз пайтида нажот манзили, бир қалбнинг қўл етмас ерга бекитиб қўйган хазинаси. Одам кучли таъсирланганда ўша манзилга қочиб боради, ўша хазинани очиб, термулади.

— Ниманидир айтишга мажбур бўлганимдан шеър ёзаман, — дейди Муборак, — айта олмасам бўлмайдиган гапларим борлигидан шеър ёзаман.

Шундай дея унинг интичка ўсма тортилган қошлари чимрилиб, юзи ёришади. Ичдан бир шижаот уйғонади. У күш мисол учишга талпинади, узоқ-узоқларга интилади. Афсуски, дераза ҳозирча ёпиқ. Ундаги бардамлик сұхбатдошларга ҳам ўтади. Энди ҳамма нарса ҳақида тортинмай гапланиш мумкин. Сұхбат қўр олади, адабиёт, ёшлиқ, нафосат ҳақида мунозара бошланади. Биз бир оз қалтисроқ туюлган саволларни ўртага ташлашга ҳам журъат этамиз.

— Тушкунликка тушган пайтларингиз ҳам бўлганми?

— Асло. Мен эркин тарбияланганман. Эркин ўсган одам тушкунликка тушмайди.

Унинг бу гаплари хонада ўзгача жаранглайди, сұхбатдошларнинг унга рағбатини уйғотади.

— Нимадан кучли таъсирланасиз?

— Ҳақсизликдан. Матбуотдан, радио-телевидениедан дунёда ҳали ҳақсизлик жуда кўплигини биламан... Энди ахвол ўзгаряпти-ку.

— Одамлардан гинангиз борми?

— Нега гинам бўлар экан?! Мен одамлардан жуда кўп яхшилик кўрганман. Мен гина деган нарсадан жуда узоқдаман.

Муборакнинг жавоблари одатдаги тасаввурларга зид эди. Дейлик, хотин-қизларнинг ўз жонига қасд қилиши қанчалик ташвиш тугдиради? Сўнгги чора сифатида ўзига олов

Қўйишга қасд қилган аёл хатти-ҳаракатининг оқибатини ўйлаб кўрмайди. Қолаверса, бундай йўл тутиш ўта енгилтаклик бўлиб, ҳар қандай ҳолда ҳам уни оқлаш мумкин эмас. Арзимас сабаб — оиласдаги келишмовчиликлар, ўткинчи ҳою ҳавас туфайли ўзини қурбон қилмоқчи бўлганлар наҳотки Муборак сингари ҳаётни севишга куч топа олмайдилар? Ахир яшаш хуқуқи инсонга Аллоҳ томонидан берилган энг олий имтиёз-ку! Ёки биз қанчалаб ноҳақликка беларво қарорчи, баъзан манфаат туфайли уни қўл кўтариб ёқловчи одамларни биламиз. Ҳаммани ўзига эгилиб сажда қилишни истайдиган худбинлар бор. Муборак эса бундай кимсалардан бутунлай йироқда, у ҳаммага яхшилик тилайди, эзга умидлар билан эртани соғиниб яшайди.

Гўдакдек ардоқлаб ҳар битта сўзни —
Бораман, кўксимда тинмас бу юрак.
«Вақт ўтди, тўхтамоқ...»
Йўқ. Фақат ўзни —
Денгизга отдимми, сузишим керак.

Хадича хола меҳмонлар ташрифидан ўзида йўқ шод, у икки гапнинг бирида, «Боламни йўқлаб келган қадамларингизга ўлай», деб парвона бўлади, оналарга хос меҳр ва маҳзунлик билан қизининг тақдирини сўзлайди.

— Муборакни дурустроқ даволата олмадим, қўли қискалик қилдик. Отаси вафот этиб кетди, aka-опалари ўзи билан ўзи. Кенжам ўтган йил армиядан келиб, ҳунар билим юртида ўқияпти. Муборакка ҳеч бўлмаганда алоҳида хона қуриб берганимизда эди.

У охирги марта даволанганидан буён 13 йил ўтибди. Албатта, Муборакка тиббиётнинг бугунги ютуқлари дараҷасида ёрдам кўрсатилса, саломатлиги ўнгланиб кетиши мумкин. Бунинг учун эса унга одамларнинг кўмаги зарур.

Гапнинг очиғи, Павел Корчагинга хос иродада билан яшаб, юксакликка интилган, шеърият билан бемалол тиллаша олишдек баҳт эгаси Муборак Мўминова ҳақида туманда ҳам, хўжаликда ҳам кам билишар экан. Ҳолбу-

ки, унинг шेърлари «Гулистон», «Саодат» журналларида босилганига анча бўлган, аҳвол эса қишлоқдошларга маълум. Муборак газета, журналлар билан танишиб боришни, янги китобларни мутолаа қилишни жуда-жуда хоҳлайди. Бунинг эса ҳар доим иложи бўлавермайди. Ўйлаймизки, эзгуликка ташна одамлар унинг саъй-ҳаракатларини қадрлайдилар. Муборакни безътибор қолдирмайдилар.

Бу хонадон билан ажиб ҳислар оғушида хайрлашдик. Яна хаёлимда жонига қасд қилган аёлларнинг мудҳиш қисмати гавдаланди. Шунда юксакликдан, нурли манзилда жилмайиб турган Муборакнинг қаршисида ундейлар тубанликларда ивирсив юрган ожиз бандалардек туюлди. Қалбларнинг тубидан эса бир ниле акс садо берарди: «Ҳаётда фақат кучлиларгина яшашга қодир!»

1987 йил, Қарши

ҚИШЛОҚНИНГ НАЗМИЙ НАФАСИ

Шоир Турсунбой Очиловнинг «Бир яхшилик истайман сизга» (Ўзбекистон миллий кутубхонаси нашриёти, 2006 йил) шеърий китобини ўқиб чиққач, муаллифни таниганим, таржимаи ҳолидан бироз хабардорлигим туфайли кўнглимдан, «Инсон бир ишга астойдил киришса, албатта, муроди ҳосил бўлар экан», деган эътироф кечди.

Турсунбой Очилов ушбу китобини 60 ёшни қаршилаётган паллада мухлисларга тортиқ қилди. Шунгача у бир тирқишига кўз тикиб, ундан бир тола нур кутиб яшади. У кўз тиккан аъмол Шеърият эди, хайрият, у боқий висолини умидвор мухибидан дариф тутмади. Албатта, ҳар бир қиёсда қай даражададир нисбийлик бўлади. Синчи одамлар кафтдаги бир дона донни кўриб, хирмонни тасаввур қила олганларицек, тўпламдаги шеърларни ўқиганда, менда Буюк сўзният шукуҳини эслатадиган кайфият пайдо бўлди.

Нафсиамрини айтганда, кўпинча Шеър ҳақидаги тасаввурлар унинг шакли даражасида бўлади, яъни маълум

ўлчовга солинган, сатр охирида оҳангдош сўз (қофия)лар бўлган ёзма нутқ шакли — шеър. Рости, ҳозиргача шеър устозлари ана шу талабларни ишқибозларга (яъни ҳаваскор шоирларга) ўргатиш билан банд бўлиб келишди. Бундан 20—30 йил олдин ҳам манаман деган шоирнинг шеърларида туроқ ёки қофияланиш тартиби бузилган, қофия мисрага «сваркалаб» ёпиширилган бўларди. Бугунга келиб ўзбек шеърияти ана шу босқичдан юқорига кўтарила олди. Энди таҳририятга «шеър» кўтариб келган «шоир»га унинг техникасидан сабоқ бериш керак эмас. Қолаверса, қофия мақсадга тўла хизмат қиляпти, мисрадаги энг салмоқли, оҳангдор, етук сўз бўлиб қоляпти. Бу жиҳатдан «Бир яхшилик истайман сизга» тўпламидаги 7—8 минг мисра атрофидаги шеърларда деярли бирорта ҳам техник нуқсон учрамайди.

Шоир «Тошкент йўлида» шеърида ёзали:

«Икарус» тортади йўлнинг танобин,
Кўпчилик ухлайди бамайлихотир.
Ҳадеб пул санаса савдогар хотин,
Ким чўнтак пайпаслар олиб ҳавотир.

Салонда шу хилдаги биқиқ ҳолат: жувонлар нарх-наводан қизишиб баҳслашади, кимлардир пул тикиб «жанг»-га киришади, тамаки дуди...

Дунё ташвишларин қўйиб бир четга,
Икки улфат тинмай сипқарар ароқ.
Кўп ўтмай ёт каби ушбу муҳитга,
Хуррак ота бошлар кайфлари тароқ.

Лекин дунёлаги бор гап шу эмас. Ташқарилда музaffer ҳаёт ўз қўшиғини куйламоқда:

Чексиз далаларда гайрати жўшиб,
Ерга ризқ-рўз сочар бобо дехқоним.
Кўклам қуёшидан гарқ терга тушиб,
Мехнатга кўмилган Ўзбекистоним.

Автобусдаги ҳолат таъсирчан қалбни жунбушга келтириди, мабодо, ҳалқнинг бори шулар бўлса-чи?

Бирдан тижимланар инфаркт юрагим,
Ҳолим оғирлашар — етишмас ҳаво.
Бундайлар бор экан, пучдир тилагим,
Бундайлар яшаркан, йўқ менга даво.

Шеърнинг пировардида улгаяётган умид тимсоли, мудом ёруғ кунларга чорлаб турувчи қадрият тилга киради:

Набирам Ситора менга термулиб,
Дейди, англагандай бобосин ҳолин:
— Яхши бўласиз-а, Тошкентда кўриб
Темур бобомизнинг отлиқ ҳайкалин?..

Ана шундай фаол гражданлик позицияси, воқеликка танқидий назар, ёмонликлардан изтироб ва эзгулик тантанасига ишонч тўпламдаги ҳар бир шеър зуваласига қоришиб кетган.

Турсунбой Очилов бир шеърида бироз афсус билан ёзади:

Айбим шуки, бир умрта Яккабоғдан жилолмадим...

Умид билан яшаган инсон орзусига етиш учун баъзан дунёқарашини, эътиқодини ўзгартиради, бир қарасанг бўри, бир қарасанг тулки қиёфасига киради. Бир аъмолни қисмат леб, унинг этагидан тутиш бир фидойилик бўлса, ҳатто қасбни ҳам, қолаверса, яшаш жойини ҳам ўзгартирмай умрини барқарор бир нуқтага тикиш икки карра фидойилик бўлса керак. Биламизки, Турсунбой Очилов «қофия сеҳри»га берилгач, туман босмахонасида ишлаб, шеърлар ёзди. Сўроқларига қишлоғидан, одамларнинг ҳаётидан жавоб излади. Қишлоқда яшаб, шоир бўлиш осонми? Бу жойда ҳамма нарсани — орзу, интилиш, қобилият, истеъдод деган тушунчаларни Тирикчилик номли қонуният белгилайди. Бир халта буғдой топсанг, уни тетирмонга олиб бориб ун қилиб келишнинг ўзи тутгал бир даҳмаза. Ана шундай ташвишлар ичida ўтиб кетади қишлоқ одамининг умри. Бир қарашда шундан

бошқа ҳеч вақоси йўқ, аслида, замирида тарихийлик, ҳалоллик, диёнат яширинган турмуш тарзидан ёруғ нуқтадарни топа олиш, лойқалар, гирдблар ичидаги бокира, пок туйгуларни заха едирмай сақлаб юриш осон эмас. Яна кечинмаларни шеър ҳолида қоғозга тушириш учун нақадар ирова керак. Турсунбой Очилов ана шу муҳитнинг шоири.

Унинг тўпламидаги шеърларнинг энг кўпи — ҳасадгўйлар, ҳасад ҳақида десак муболага бўлмас. Бу ҳол кишини ажаблантиради ҳам: Турсунбой акада бойлик, мансаб бўлмаса, одамлар нега унга ҳасад қилишади экан? Бу ҳолнинг сирини эса шундай англадик: у бошқаларга ўхшамаган турмуш тарзини танлаган, вазифасидан фойдаланиб, ўғирламаган, данғиллама уй қурмаган, билъакс, шеър ёзган. Ҳаммани ўз зайлига буйсундирган даҳмазалардан баланд туриб, бундай манзараларни қофияга солган одам бошқалар устидан кулаётгандек туюлгандир. «Сомон йигиштирас шоир далада» шеърида маълум ҳолатни ҳазилга югуриб тасвирлар экан, фикрини шундай якунлайди:

Хуллас, у баҳтдан шод, меҳнат маҳсули
Кўрингай сомонмас, балки шеър бўлиб.
Насиб этса энди шоир сигири
Қишини ўтказади «шеърхонлик» қилиб...

Аслида, Турсунбой Очиловнинг қишлоқда яшашидан орттирган баҳти ҳам, бойлиги ҳам шу — бехабар кишилар тасаввур ҳам қила олмайдиган воқеликдан шеър яратиш! Шоир бу мақсадга бутун восил бўлган. Энди унинг шеърларини бир пайтлар унга писандада қилган қишлоқдошлари ҳам ўқимоқда, бу фидойи, хокисор инсонга сидқидилдан эътирофларини изҳор этишмоқда. Зоро, шу ўринда адабиёт, шеърият дилларни, к ўнгилларни боғловчи робита сифатида яна бир бор намоён бўлаётир.

Катта йўлга чиқиб олган одамнинг қадам олиши тезлашганидек, Турсунбой Очилов ҳам энди жадал янги шеърлар, тўпламлар устидаги ишламоқда. Бу борадаги саъй-ҳаракатларига ривож тилаймиз.

2007 йил, май

ТҮРТИНЧИ ФИЛДИРАК

Оммавий ахборот воситаларида чинакам меҳнат қилаётган журналистнинг фаолияти жамият аъзоларини бепарво қолдирмайди. Зеро, бу касб эгасининг маҳорати, дунёқараши, маслаги воқеаларни шарҳлаш орқали маълум ижтимоий кайфият туғдириши ва у одамларга юқиши бор гап. Шу маънода ҳар қандай қонун лойиҳасининг муҳокамаси қизғин баҳс-мунозараларга сабаб бўлиши шубҳасиз.

Аслида, матбуотни (бугун радио ва телевидениени ҳам) азалдан тузумни ҳаракатга келтирувчи дастаклардан бири сифатида баҳолашган. Жумладан, дунё бадиий маданиятидинг йирик вакилларидан бири Лев Толстой мамлакат тараққиётида матбуотнинг ўрнини темир йўл ва алоқа тармоқлари (почта, телеграф, телефон) билан тенг қўйган эди. Улуғ мутафаккирнинг бу баҳосини тўла қувватлаган ҳолда ҳозирги тезкор даврда бундай камарбасталик яна ҳам кучайганини таъкидлаш ўринли. Толстой бобонинг қиёси моҳиятни жуда аниқ ифодалайди. Айни пайтда матбуот атрофида бўлаётган муносабатларни шу нисбат орқали таҳлил қилсақ, темирийўл қурилиши — тепловоз машинисти ёки почта хизмати — хат ташувчини иш билан таъминлаш учун пайдо бўлмаганидек, матбуот ҳам шу касб кишилари тирикчилиги учунгина яратилмаган, балки бу соҳаларнинг тараққиётидан бутун жамият, унинг ҳар бир аъзоси манфаатдор. Шунинг учун қабул қилинажак қонунлар фақат журналистнинг самарали фаолият кўрсатишига хизмат қилиши лозим. Зеро, ҳалқаро доирада журналистнинг ҳақ-хуқуқлари белгилаб қўйилган (шу ўринда Ҳалқаро журналистик ташкилот мавжудлигини, унинг ҳам қатор институтлари борлигини таъкидлаб ўтмоқчимиз). Бу борадаги қонунлар бизнинг тарихий, миллий ўзлигимиздан келиб чиқсан ҳолда бой ва сермазмун бўлади, деб ўйлаймиз. Шу билан бирга, бу ҳужжатлар баъзи чалкашликлар, муаммоларни бартараф этиб, ўзига хос янги муносабатларни қарор топтиришга хизмат қиласи.

Матбуотга доир қонунлар лойиҳаларидан бирининг З-моддаси «Журналист» деб аталади. «Журналист — Ўзбе-

кистон Республикасининг ёки хорижий давлатнинг оммавий ахборот воситаларида хизмат қиласидиган ёки уларда шартнома асосида ишлайдиган ва хабарлар, ахборотлар ҳамда материаллар тўплаш, уларни таҳлил қилиш ва тарқатиш билан шугуулланувчи жисмоний шахсдир».

Таърифнинг қанчалик мукаммаллигини баҳолашдан олдин бальзи мулоҳазаларимиз билан ўртоқлашмоқчимиз. Аввало, «журналист» нисбаси кимга берилади? Маълумки, ҳозиргача ТошДУда шу касбга ихтисослашган факультет бор ва уни муваффақиятли битирғанларга «журналист» деган диплом берилади. Шунингдек, асли ихтисоси ўқитувчи, агроном, қурувчи ва ҳоказо бўлган кишилар ҳам матбуотда қатнашиб юрса, «журналист» деб аталади. Қўриниб турибдики, бу ўринда бир ҳақиқатни инкор этувчи икки жиҳат бор: ё университет дипломига эга бўлган ва матбуотда ишлаётган ходим «журналист» деб аталиши лозим (ахир давлат ҳужжати (сертификати)-да шундай ёзилган), ё исталган ихтисосликка эга, бироқ табиий қобилияти (бошқа қандай асос бор?) туфайли матбуотда ишлаётганлар «журналист» деб аталади. (Бунда журналист бўлиш учун университетнинг шу факультетини тугаллаш шарт бўлмай қолади). Ҳаётда ҳам шундайку: ветврач ҳеч қачон врач деб ёки зоотехник фельдшер деб юритилмайди. Бу мулоҳазалар майдага гапдек туюлади, бироқ унинг замирида катта ҳақиқатлар мавжуд. Аввало, журналист касбининг обрўсини сақлаш учун бу нисбани, қолаверса, шундай ихтисослик ёзилгаң дипломни ҳар қандай шахсга беравермаслик лозим. Агар «журналист» атамаси, олайлик, сайлаб қўйиладиган вазифалар — раис, бошлиқ, котиб сингари тушунчаларни ёки ёзувчи, шоир, рассом, хонанда сингари табиий қобилият турларини ифодаласа, дипломда бошқачароқ (олайлик, «оммавий ахборот воситалари ходими») тарзида қайд этишга тўғри келади.

Бу — масаланинг юза томони. Ички моҳият шундаки, журналистлар тайёрлаш тизими қатъий ислоҳотга муҳтоҷ. Фикримни аниқ мисол билан давом эттираман: журналистика факультетини 54 киши битирған эдик, шулардан 5—6 киши матбуотда ишляяпти. Бу ёғини ҳар ким ўзича

мулоҳаза қилиб кўрсин. Шу ўринда баъзи чет эллардаги тажриба эсга тушади. Уларда бундай ўқишига фақат олий маълумотли, ўзини журналистикада кўрсата олганлар қабул қилинар ва 2 йил ўқитилар эди.

Бизда ҳозирги тартибни шундай ўзгартириш мумкин: журфак талабасининг қобилияти учинчи курсгача маълум бўлиб қолади. Шу вақт мобайнида улар сараланиб, муносиблари кейинги босқичга ўтказилса, қолганлар филология, тарих, география... сингари мутахассисликларни танлаши мумкин. Шунингдек, 4-курсга ўзининг ижодкорлигини намойиш эта олган бошқа факультет талабаларини ҳам қабул қиласа бўлади. Негаки, журналистика ёзувчилик ҳам, шоирлик ҳам, ҳатто ноширлик ҳам эмас, унинг ўзига хос қиёфаси бор.

Журналистика соҳасида қонун қабул қилишга киришилар экан, бу тармоқда «чақилмаган ёнғоқ» бўлиб турган бир масалага ойдинлик киритиш лозим, деб ўйлаймиз. Бу — журналист меҳнатига ҳақ тўлаш. Ҳозиргача амал қилиб келинган тартибларга кўра, ойлик маош белгилашда ходимнинг маълумоти, иш стажи, маҳорати ҳисобга олинмайди (эълон қилинган мақолалари учун алоҳида қалам ҳақи тўланади). Бўлим муҳаррири, катта муҳбир, муҳбир тарзида белгиланган вазифалар ўртасида маошдаги фарқ жуда оз. Яъни, кечагина мактабдан келган, улбул қоралаб юрган ҳаваскор ишга келса, унинг вазифаси университетни тугатган, 20 йилча ишлаб қўйган, кўплаб совринлар эгаси бўлган ходим билан тенг бўлса, бир хил маош олаверади. Бошқа соҳалар (масалан, ўқитувчилар, шифокорлар) учун тоифалар жорий қилинди, улар мутасил аттестациядан ўтказиб туриладиган бўлди. Ходимнинг ўз маҳоратини ошириб боришига ундейдиган, шунингдек, ижтимоий адолат мезонларига мос келалиган ҳақ тўлаш тартиблари журналистлар учун ҳам жорий қилинса, айни муддао бўларди.

Лойиҳаларда журналистнинг ўз фаолиятини амалга ошириш чоғида қонунлар ҳимоясида бўлиши кафолатлаши қатор моддаларда таъкидланади, бироқ бундай кафолатларнинг механизми аниқ эмас. Эҳтимол, бу ҳолатлар қонун мақомига тўғри келмас, нима бўлганда ҳам

ижтимоий муҳофазанинг амал қилиши аниқ акс этса яхши бўларди. Кўриниб турибдики, қонунларнинг самарали ишлашини таъминлаш учун яна қатор қўшимча хуқуқий меъёрларни яратишга тўғри келади. Ёки бир лойиҳа ичидаги мантиқан бир-бирини инкор этувчи, журналистнинг «... башарти, аҳборот манбаи ёки муаллиф эътиroz билдиrsa, аудио ва видео ёзиш воситаларидан фойдаланиши мумкин эмас», «... зарур техника воситаларидан фойдаланиши хуқуқи чекланиши мумкин эмас» тарзидаги ҳолатлар қандай шароитларда татбиқ этилиши тўлароқ ифодаланиши керакка ўхшайди.

Албатта, бундай масалаларнинг ечими қонун қабул қилиш орқали кўзда тутилган мақсадларга нечолик хизмат қилиши ҳақида олдиндан бирор нарса дейиш қийин, бироқ мустақил Ўзбекистон журналистикасининг пойдевори биринчи фиштларданоқ мустаҳкам бўлишини истаймиз. Зоро, маданиятимизда нисбатан ёш соҳа (жаҳон талаблари даражасидаги журналистика унсурлари бизда ўтган аср бошларида пайдо бўлган, дейиш мумкин) ҳисобланмиш матбуотимиз гоявий тазииклар остида бўлган шўро замонида ўзбекона андиша, илтифот, қолаверса, чўчиш туйғуси билан қўшилиб, чинакам қиёфадан маҳрум бўлди. Ана шундай даражадаги меросга ворислик қилаётган бугунги матбуотимизга «Тўртинчи ҳокимият бўла оладими?» тарзida қўйилаётган талабнинг эриш туюлаётгани ҳам табиий. Аслида эса маънавиятнинг бу жабҳаси жамият аъзоларини улуғвор мақсадларга руҳлантирувчи, шу йўлда камарбаста бўлиб хизмат қилувчи, ҳалқимиз обрўси, бўй-бастига мос баркамоллик касб этган собит кучга айланиши лозим. Зиёлилар орасида умуман оммавий аҳборот воситаларига нисбатан ишлатилувчи «тўртинчи ҳокимият» ибораси шунчаки маънавий «инъом» бўлиб, аслида, бу соҳа қўлида ҳеч қандай ҳокимият йўқ. Унинг «ҳокимияти» — тўғри, адолатли сўзи, беғубор, холис хизмати. Шу жиҳатдан буюк орзулар билан яшаётган юртимизнинг ёруғ манзилларни кўзлаб борувчи карвонида матбуотимиз (радио, телевидение) ҳозирча салмоқли юкни елкасига олган «тўртинчи» («бешинчи» эмас!) «ғилдирак» бўлиб хизмат қилиши тайин. Бундай

шарафли масъулиятга қабул қилинадиган қонунларнинг
ҳаётийлиги аниқ кафолат яратади.

1996 йил

МАТБУОТ «ҚИРОЛИ» КИМ?

Маърифатли хонадонларда бир таомил шаклланган: ҳар куни азиз меҳмоннинг йўлига кўз тиккандек, қундалик матбуот нашрлари интиқлик билан кутилади. Бу «меҳмон» латифа айтиб, асқия қилиб турмаса-да, ўзи билан бутун жумлаи жаҳон нафасини хонадонга олиб келади. Унинг саҳифалари орқали кўз илғамас, хаёл етмас муҳитларда содир бўлаётган янгиликлар, ақдий тафаккурнинг жами жабҳаларига доир мавзуулар билан ошно бўлиш мумкин. Қандай мўъжизакор кучга эта бу газета-журналлар! Шунинг учун ҳам одамлар уларни яхши кўради, оила бюджетидан тежаб бўлса ҳам уларга обуна бўлади.

Айни пайтда матбуотнинг мазмуни янада бойиди: бозор иқтисодиёти шароитида у олди-сотди иқлимини шакллантиришга ҳам хизмат қила бошлади. Бугун газета-журналлар саҳифаларида дид билан тайёрланган рекламаларга ҳар қадамда дуч келиш мумкин. Бу, албатта, ижобий ҳол, жаҳон тажрибасида мавжуд ҳодиса. Демак, бу ҳолга қатъий эътиroz билдириб бўлмайди.

Шу ҳолдан келиб чиқиб, бугун матбуотни (умуман, оммавий аҳборот воситаларини) шартли равишда уч йўналишга ажратишаяпти: давлат тасарруфидаги; хусусий; тижорат нашрлари. Агар бу шартли бўлинишнинг заминига қарайдиган бўлсак, кейинги икки йўналиш биринчисидан ажралиб чиққанини сезиб олиш қийин эмас. Бинобарин, ҳар қандай шароитда ҳам улар мавжуд тартиблардан, ўрнатилган қоида-ю амалдаги қонунлардан чиқиб кетолмайди. Қолаверса, бундай нашрлар ҳам матбуотнинг энг муҳим мафкуравий курол эканини инкор этолмайди.

Ҳа, матбуот ҳозиргача асосий мафкуравий минбар бўлиб келди ва ҳозирча бу вазифани шу даражада уддалайдиган бошқа восита пайдо бўлгани йўқ. Тўғри, қайси-

дир даражада телевидениснинг келажагига умид билдирилмоқда, бироқ у ҳар қанча такомиллашмасин, қоғоздаги босма сўз ўрнини босолмайди, газета-журнал бажарган вазифани эплай олмайди. Қайси маънодаки, матбуот намуналарини сақлаб қўйиш, ёнда олиб юриш, исталган пайтда унга мурожаат этиш мумкин. Радио ёки ТВнинг тарқалиш доираси, акс эттириш, кўрсатиш имкониятлари юқори бўлса-да, уларни тутиб қолиб бўлмайди.

Айниятни қарангки, газета илк марта бозор янгиликларини акс эттириш мақсадида юзага келган эди, бугун ана шу «парвоз майдони»га яна қайтилмоқда. Газеталарда рекламанинг пайдо бўлиши унинг қиёфаси ва табиатини бутунлай ўзгартириб юборди. Шу ўринда табиий савол туғилади: хўш, ҳозир матбуотда қайси йўналиш етакчилик қилмоқда? Албатта, «етакчилик» деганда қандай мақсадлар кўзда тутилганини кенгроқ изоҳлашга тўғри келади.

Демак, эркин иқтисодиётга ўтилиши билан жамиятнинг ижтимоий қиёфаси ўзгарган экан, унда матбуотнинг ўрни қандай бўлади, деган савол жиддий тадқиқотларни талаб қиласа-да, тузумлар, асрлар синовидан ўтган бир ҳақиқатни ўрни келганда эслаб қўйиш лозим: «инсонни ҳайвондан ажратган» (Алишер Навоий) сўз ҳар қандай шароитда ҳам ўз қудратини ва мавқеини бир хил сақлаб қолаверади. Шунинг учун шўро тузуми шароитида матбуот ёлғон мағқурата хизмат қиласди, энди рекламага зўр бериш керак, деган фикрлар нотўғри, балки хатодир. Одам зоти токи маънавий озуқа олиш эҳтиёжини турар экан, газета-журналларнинг бош вазифаси ана шу мақсадга (эҳтиёжга) хизмат қилиш бўлиб қолаверади. Бинобарин, жамият аъзоларини ягона ғоя атрофида бирлаштириш тараққиёт шарти экан, давлат тасарруфидаги матбуот нашрлари етакчилик қилиб қолаверади.

Хўш, ўз истиқдоли бағрида туриб, порлоқ келажагини излаётган юртимизда фуқароларимизнинг матбуотга муносабати қандай? Шу савол билан исталган кишига мурожаат этсангиз, у ниманидир гапиради, жим қолмайди (ё маъқуллайди, ё танқид қиласди). Хуллас, ҳалқ бу масалада бепарво эмас. Бироқ матбуот сўзининг хонадон-

ларга, одамлар қалбига кириб боришида ўзгачароқ манзара юзага келган (ҳеч ким ўзи билмаган нарса ҳақида фикр билдира олмайди, инчунин, бугунги газета-журналлар ҳақида фикр айтиш учун улар билан таниш бўлиш лозим — бу биринчи муҳим шарт). Демоқнимизки, юртдошларимизнинг бугунги матбуот билан ошнолиги мақтанарли даражада эмас. Бир ҳаётий мисол: долзарб мавзуда мақола зълон қилишли, унда туман ҳаётига доир кўпчилик назаридаги масала қаламга олинган эди. Бу ҳақда туман мутасаддиларини огоҳлантириб қўйиш ҳам ёддан чиқмади, чунки газета тиражлари камайиб кетган, почта хизмати ҳам тезкор эмас, шунинг учун улар бехабар қолмасин, мақолани ўқиб, ўз муносабатини билдирсин, деган андиша бор эди. Орадан бир ойлар ўтиб, йўлимиз шу туманга тушди ва раҳбарларнинг мақола ҳақидаги фикри билан қизиқдим. Афсуски, улар газетани топиша олмаганини изҳор этишли. Мана, муҳокама қилиб кўриладиган факт!

Тўғри, ижтимоий муносабатлар табиати ўзгарайпти. Бозор муносабатлари талаб ва таклиф мезонини қатъий қилиб қўяди. Эҳтимол, ўша туман мутасаддиларини газета ўқишига вақти етмаётгандир ёки матбуот тарқатиш хизмати яхши йўлга қўйилмагандир ёхуд мақола уйқуни очиб юборадиган, излаб топтирадиган даражада «кучли» чиқмагандир. Бироқ нима бўлганда ҳам бундай ғоғилликни оқлаб бўлмайди. Негаки, маданий одамзоднинг маърифатга ошнолиги бугун ёки кеча пайдо бўлган гап эмас. Балки инсоният ўз такомилида ана шу омилга таянди: кимдир ички ёнув дастгоҳини кашф этди-да, одамлар машина-механизмларга эга бўлди, бирор вабога қарши дорини топди — миллионлаб одамлар ўз ҳаётларини сақлаб қолишга эришдилар. Бу таомил бугун ҳам ўзгаргани йўқ! Ҳар қандай янгилик, кашфиёт ахборот алмashiш йўли билан тарқалади.

Айни ўтиш пайтида қайси йўналиш вазиятга тезроқ мослаша олган бўлса, бошқалардан анча олдинлаб кетди. Жумладан, реклама нашрлари бугун матбуот бозорида етакчилик қилаяпти. Шундай нашрлар юзага келдики, энди улар билан ҳисоблашмаслик мумкин бўлмай қолаяпти.

Бундан 6—7 йил олдин йўқ жойдан иш бошлаган шундай нашрлардан бирининг ҳозир тўрт қаватли хусусий биноси (бутун жиҳозлари билан), бир нечта машинаси бор. Улар яна қурилиши чала қолган бир бинони сотиб олиш тараддутида юришибди. Бу нашрни бизнинг ўзбек муштарийларимиз билмасликлари мумкин, чунки у маҳсулотларини рус тилида чоп этади. Нима бўлганда ҳам бизнинг матбуот оламиизда ана шундай ишбилармон, замонавий нашрни мавжудлиги ижобий ҳодиса, нега бизлар уларни тажрибаларидан фойдаланмаймиз? Ҳолбуки, ҳозирги кунда «Труд-7», «Аргументи и факти»га ўхшаган кенг қамровли, ўзбек тилида чоп этилаётган бирорта нашрни топа олмаймиз.

Газеталар тижорати билан шуғулланадиган бир танишимиз одамларда матбуотга чанқоқлик сезиларли даражада ортиб бораётганини айтиб қолди. Улар ўзларини қизиқтирган кўплаб саволлартга босма нашрлар орқали жавоб топишни хоҳлайдилар. Ҳозирча эса бу эҳтиёж тўла қондирилаётгани йўқ. Демак, матбуот «қироли»нинг майдонга чиқиши галда турибди.

2001 йил

СЎЗ АЙТИШ МАСЪУЛИЯТИ

ЗАНЖИРСИМОН ТАЪСИР

Ҳамкаслардан бири анча вақт аччиқ изтироб ичидагиди (бунга узоқ йиллар бўлди). Эмишки, ҳозир (ўшандада) истеъмолда бўлган озиқ-овқат маҳсулотларидан бири тановул қилишга бутунлай яроқсиз, унинг таркибида пистицид миқдори меъёридан минг (!) баравар кўп эмиш. Албатта, бу унинг шахсий кечинмаси эди ва тирсагидан ёф оқизиб ош ейдиган азаматлардан ҳеч бири бу хусусда эътирозини изҳор этмаганди. Хуллас, бунақа куйинишлар ҳавода қолиб кетаверди ва бирор ижтимоий таъсирга эга бўлмади.

Шундай мулоҳазалардан кейин халқимизнинг чиройли бир мақоли эслга келади: «Қарс — икки кўлдан! Ҳа,

Қарсак чиқариш учун икки қўл баравар ҳаракат қилиши керак. Ҳеч бўлмагандан — икки қўл (нақд) бўлиши керак (зоро, қарсак чалиш мавриди келиб қолса, бундай бутунлик асқотиб қолиши мумкин). Дейлик, матбуотда айтиладиган ҳар қандай фикр жамоатчиликка мўлжалланган (аталган) бўлади ва унинг қай даражададир акс таъсири кутилади. Негаки, оммавий ахборот воситаларида милиқнинг ўқидай тўғри фикрлар баён қилинавермайди. (Буни шу воситанинг табиати талаб ҳам қилмайди). Изҳор этилган ҳар бир гап кимнингдир шахсий мулоҳазаси бўлади (шунинг учун ҳам ҳар қандай ахборот маҳсулоти — у икки сатрли хабар бўладими ёки газетанинг йигирмата сонида давом этган туркум мақола бўладими — охирида муаллифнинг исм-шарифи (таяхаллуси), ҳатто унвони, иш жойини ҳавола этиш урф бўлган). Энди тасаввур этинг, сиз муҳтарам жанобга яқинлашасиз-да, ўз меҳрингишни шундай ифодалайсиз: «Сиз — шерсиз, бундай талъат фақат шерларда бўлади!» Табиий, сиз унинг муносабатини кутасиз, у эса ... жим. Бироз алам қиласи, жаҳлингиз чиқали, энди бу сафар ғазаб билан дейсиз: «Сиз — маймунсиз, бундай талъат фақат маймунларда бўлади!» Афсуски, бу гал ҳам у жим, ҳатто қошини учириб ёки лабини қимтиб ҳам қўймайди. «Нима бу, шердан тарқалган маймунифат маҳлуқми?» — ана шундай аччиқ хуласага келасиз-да, ундан узоқлашасиз. Ҳар доим шу ҳолатни эслаганда табингиз тирриқ бўлгани қолади, холос.

Ана шундай вазиятда нима қилиш керак? Саволлар эса кетма-кет қуилиб келаверади: «муҳтарам жаноб» нега пинагини бузмади, балки моҳиятни тушунмагандир ёки ростдан унга ҳамма нарса бир хил туюлар. Эҳтимол, бундай савол-жавобга ўрганмагандир? Нима бўлганда ҳам уни оқлаб бўлмайди. Жумладан, «кўпдан бери газета ўқимайман, нимани ҳам ёзарди?» тарзида ёзғирадиган зотларни ҳам. Унинг газета ўқимасликка ҳаққи йўқ, негаки, шу жамиятда яшяйтими, унда кечётган ўзгаришларга бепарво бўлишга ҳаққи йўқ. Нима гапки, ўзинг яшаётган уйга ўғри тушса-да, сен бошингни кўрпага буркаб, қўшнини ёки милисанни кутиб ётсанг. Ёхуд улуғ ўзгаришлар ичida

яшаётган юртнинг зафарли одимлари ҳеч кимни бепарво қолдирмаслиги табиий-ку. Шу тарздаги лоқайдлик, бепарвоник туфайли пестицилар, гербицилар ҳақилаги қанчалар изтироблар ҳавода қолиб кетган эди.

Фикрларимизнинг буромади шуки, ахборот воситалари билан унинг «истеъмолчи»лари — жамоатчилик ўртасида икки томонлама «борди-келди» бўлмоғи лозим. Бўлмаса, коптокни отасиз, у деворга тегиб қайтмайдида, ҳовузгами, далагами тушиб, йўқ бўлиб кетаверади. Муҳокама майдони пайдо бўлмайди. Жамоатчилик фаоллиги, жамоатчилик фикри юзага келмайди. Матбуотчилар ўз фаолиятларига баҳо бера олмайдилар. Сўзнинг яратувчилик, бунёдкорлик қурдати жамият қурилишида ўз салоҳиятини намойиш эта олмайди.

Одатда, жамоатчиликка ҳавола қилинадиган фикр унинг кайфиятидан, талабидан келиб чиқиб белгиланади. Дейлик, ҳамма баҳор, гул-чечаклар, анвойи бўйлар ҳақила орзу қилиб турганда қиши, қаҳратон совуқ, изғиринлар тўғрисида оғиз очиш ножоиз. Мабодо, шу ҳақда гапириш керак бўлганда ҳам кўпчиликнинг руҳий ҳолатига мослаб, мулоҳазаларимизни қабул қила олишига муҳит яратиб, мавриди келганда гап бошланади. Жамоатчилик фикри билан ҳисоблашилмаса, ўртада жарлик пайдо бўлади, ҳар икки томон ўз йўриғида кун кўраверади...

Сұхбатларимиз асносида гап айланиб, шунга тўхтади. Ўзига ишонган, ҳаётидан мамнун ҳамкаслардан бири: «Жамоатчилик фикри, деб куйиниб юраверманг, жўра. Ҳозир ундан ҳам муҳим ишлар бор», лея асқия қилди. У назарда тутган «муҳим иш»лар менга маълум эди: зиёфатга таклиф қилинган жойга қийналмай етиб бориши, нари борса, дастурхонда тортилиши лозим бўлган таомлар сони уни безовта қиласиди. Агар биз юксак туйғуларни майший ташвишлар билан қоришириб юборсак, ёруғликдан, ёруғ ғоялардан маҳрум бўламиз. Ҳозир бачканга майларни енгиб, ўзни жиддий вазифаларга сафарбар этиш мавриди.

ОТ АРАВАНИНГ ОРТИДАМИ, ОЛДИДА?

Агар одамларнинг ахборот воситаларига қизиқиши ҳақида гап кетадиган бўлса, юзага келган аҳволнинг сабабларини соҳанинг ўзидан ахтарган маъқул.

Истиқолол йилларида ўзбек матбуоти янги рух, янги ғоялар билан бойиди. Мустакилликнинг халқимиз тақдирда ўйнаган буюк миссиясини кўрсатиб беришга бағишланган кўплаб мақолалар, кўрсатув ва эшилтиришлар юзага келди. Айниқса, тарихий мавзуда, иқтисодий ислоҳотларнинг бориши хусусида кўп ва хўб ёзилди. Хуллас, ўтган йиллар изланиш ва янгиланиш босқичи бўлди. Ана шундай ижодий жараёнда кўплаб ютуқлар қатори баъзи камчиликлар ҳам кўзга ташланди. Уларнинг иккитаси ҳақида шахсий мулоҳазаларимизни баён этишга жазм этдик.

Одамлар диққатини тортишнинг энг ўнгай йўли — оқни қора деб ёзиш эмасми? Ҳамманинг кўз олдида кассоб, муттаҳам сифатида ном чиқарган кишини мақтаб ёки, аксинча, ҳалол бир одамни нопокликда айблаб мақола ёссанг, ҳамма ўқийди. Яна маҳорат шунчалар юқорики, ўқиганлар ишонади, бу одамни шунча йилдан бери билмасликларидан афсусланиб, ёзган мухбирга тасаннолар айтишади. Нима бўлади бу, журналистиками? Йўқ, бу — антижурналистика! Негаки, журналистика пайдо бўлиши билан унинг байроғига адолатга, ҳалолликка, тўғриликка хизмат қилиши ёзиг қўйилган, у ана шу эътиқодга содиқ қолди ва шу туфайли умуминсониятнинг маънавий бойликларидан, қадриятларидан бирига айланди.

Ёки хуфёна усуллардан бири — шов-шув (сенсация) чиқариш учун ҳам ғайритабиий усулда ёзиш мумкин. Масалан, газеталардан бири «Космосда қора юлдуз пайдо бўлди», деб шов-шувли хабар тарқатади. Кейинги саҳифаларида (сонларида) олимлар, фолбинлар, турли соҳа кишиларининг фикрини эълон қилиб, маълум муҳит яратади. Кўп гаплар айтилади, кўп муносабатлар ойдинлашади, энг муҳими — газета тиражи ошиб, ўқувчилари кўпаяли. Охирида баҳсни соддагина қилиб шундай якун-

лаб қўяди: «Космос» футбол клубида Пеле фаолиятини бошлади». Бироқ газета фақат олди-қочди, шов-шувлар билан яшай олмайди, унинг вазифаси — турли воситалар билан тафаккурни озиқлантиришdir.

Матбуотда бальзан юқоридаги ҳолларнинг кўзгудаги аксига ўхшаган манзараларга дуч келамиз. Мақсад кимни-дир улуғлаш бўлмаганидек, бошқа бирорни ёмонотлик қилиш ҳам эмас. Шунинг учун матбуотимизнинг умумий тажрибасидан келиб чиқиб, фикр юритамиз.

Бир ҳамкасбимиз бўларди. Сиртдан қарагандা ҳеч нуқсони йўқ: ишхонада тартибли ходим, оиласда намунали эр, меҳрибон ота. Ҳаётда ҳам амал қиладиган эътиқоди аниқ, бир оз художўй, боз устига улфатчиликларни ҳам тарк этмайди. Ёзса, бир қаламкашча мақсадга эришади, газетачиликнинг паст-баландини яхши ўзлаштирган. Ҳатто шундай бўлдики, бир вилоят миқёсидаги корхона фаолиятини ипидан-игнасигача ўрганиб, газетада танқидий мақола билан чиққанда, анча нуфузли ҳуқуқ-тартибот идоралари ҳам бошида шошиб қолишиди. Далиллар салмоқли, гувоҳлар аниқ, таҳлил жойида, мақола баҳор осмонидаги момақалдироқдек акс садо берди. Ҳаммаси шу билан поёнига етган, бир корхона фаолиятига холисона баҳо берилиб, нуқсонлар очиб ташлангани рост бўлганда «окей» бўларди, бироқ пиёла тагидан нимпиёла чиқиб, ишни расво қилди. Албатта, бу хулосага бирданияга келингани йўқ, яна қанча қўшимча текширувлар бўлди, мавзуга қайтиб, иккинчи мақола эълон қилинди. Қанча асаблар қақшади, вақт кетди. Хуллас, маълум бўлдики, мухбир бир буюртма билан иш тутган, олишаётган икки гуруҳдан бирининг маълумотларига ишонган, номига ижодий сафарга бориб, танқид қилинадиган обьект билан чуқур танишмаган. Ўзига «ракиб» томоннинг асосли далилларига қулоқ тутмай, дўқ-пўписа билан муомалада бўлган. Шундай қилиб, мухбирнинг холис позицияда турмаганлиги туфайли, бошқа зарарларни истисно қилганда ҳам, матбуот обрўсига путур етди.

Қизиги шундаки, шу ҳамкасбимиз бундай қилигини яна 2—3 марта такрорлади. Фақат бир томоннинг манфаатини кўзлаб танқидий мақола эълон қилади. У томон

бидан ҳисоблашмайди. Боз устига ўз хатосини тан олмайди, «мен айтганимдек бўлиши керак» деб туриб олади. Мен, ўзимча: «Бу одам ўртада тура олмас экан» деган хulosага келдим. Хўш, «ўртада тура олиш», яъни адолат тарозисини тўғри қўйиш учун нима қилиш керак? Бу савонни «... қандай одам бўлиш керак?» тарзида қўйиш тўғрироқ бўларди. Ўзбекона жавоб берсак: «Зўр одам бўлиш керак», яъни икки томонни ҳам дўсти, ватандоши сифатида тенг тутиб, ўзини енгиб бўлса-да, ҳақиқатни ҳимоя қилиши керак! Бу юмуш оғирми? Оғир, жуда оғир!

Шундан кейин ўша ҳамкасбимнинг юриш-туришига зидан разм сола бошладим. Рисоладагидек одам. Бир сафар лифтда дуч келиб қолдик, учинчи қаватга чиққунча тўрт марта Аллоҳни йўқлади. Кузатишлиларим давомида сездимки, унда ҳамма нарса бисёр эди, фақат кенг масштаб, улкан қалб етишмас экан. Ҳамма нарсага, одамларга ҳам ўз манфаати нуқтаи назаридан ёндашар, баҳо берар экан. Унга ёқсан одам — яхши, ёқмагани — ёмон! У ана шу темир қафасдан чиқиб кетолмас экан. Шунда маълум бир ҳақиқатни эсладим: катта журналистикани катта шахслар яратади.

Гап шахслар ҳақида кетар экан, бошқа касб эгаларини камситмаган ҳолда шу ўринда бир дўстимиизнинг жайдари фалсафасини келтириб ўтишни лозим топдим. У дейдики, бирор юрга ҳар қандай касб эгасини четдан таклиф қилиш мумкин, бироқ журналистни четдан келтириб бўлмайди. Ўша ҳалқ, миллат руҳини акс эттириши учун бу соҳанинг бўлажак вакили шу заминда улғайиши, илдиз отиши лозим. Туғилганидан қулоғига шу юрг шовқинлари кирсин, кўз очиб шу жой манзараларини кўрсин, шу тупроқ анъаналари, урф-одатлари руҳида улғайисин... Шундан кейин у миллий журналист, қаламкаш бўлади. Менинг ҳам шу гапга ишонгим келади.

БУГУННИНГ СЎЗИ

Баён қилмоқчи бўлган иккинчи мулоҳазамиз ҳам шу фикрларнинг давомига ўхшайди. Демак, журналистикада кўп нарсани қалам (микрофон) тутган кўл эгасининг

кимлиги, шахсий «мен»и ҳал қилар экан. Шу ўринда мен бу соҳа кишиларини лакмус қоғозига ўхшатдим — қандай муҳитга кирса, ўша муҳит руҳига қараб ўзгариши, аниқроғи, ўша муҳитдаги ўзгаришни ўзига сингдириб, акс эттириши керак. Муаллақ ҳеч нарса барқарор эмас. Ҳаводаги пуфакни, денгиздаги оппоқ қайиқчани тасаввур қилинг, уларнинг бошига қандай шўришлар тушади. Худди шундай, сўз ҳам, муносабат ҳам муаллақ ҳолда яшай олмайди. Ҳусусан, матбуот сўзи мустаҳкам занжир билан ижтимоий заминга боғланган бўлиши керак.

Агар менинг тишим оғриётган бўлса, бу фожия эмас, у менинг шахсий дардим. Мабодо, кўпчиликнинг тиши оғриёттан бўлса, бу ижтимоий муаммо. Мабодо, мен айнан шу муаммо ҳақида сўз айтишга жаҳд қилдимми, демак, менинг сўзим барча тиши оғриётгандарга аталган бўлиши лозим. Боз устига, мен тишим оғриётганини нари борса, энг яқин одамимга шипшип айтишим мумкин, буни томга чиқиб жар солиш шарт эмас. Мабодо, тиш оғриғи ҳақида оммавий ёзилаётган ёки гапирилаётган экан, яъни матбуот мавзусига айланган экан, унда шу дардга чалингандар ўзларига наф олишлари лозим.

Энди, қаранг. Ҳозир газеталарни варақлассангиз, чиройли иборалар билан ёзилган лавҳаларга, кўнгил очар қатраларга кетма-кет дуч бўласиз. Улар ўзларидек чиройли рукнларда бўлади: «Ўқинг, қизиқ», «Ажабо», «Ҳордик лаҳзаларида». Ёки радио-телевидениеда ширали овоз, ёқимли афт-ангор билан шундай мавзулар ҳақида гап қилинадики, куни билан ўтириб тинглассангиз ҳам тўймайсиз. Фақат охирида битта савол ҳаммасини чирпирак қилиб юборади: эшитган-кўрганларимнинг бугунги ҳаётимга қанчалик дахли бор, менга нима берди?

Матбуот — бугунги куннинг сўзи, овози, қиёфаси. Демак, эрта учун бугунги куннинг тарихи. Шундай экан, ҳар бир сатрда, ҳар бир нафасда бугунги кун ҳарорати уфуриб туриши керак эмасми? Рости, кўплаб мақолалар, чиқишлиарни бундан ўн йил олдин эълон қилганда ҳам ҳеч нарса ютқазмасди, бундан ўн йил кейин эълон қилса ҳам ҳеч нарса ўзгартмайди. Шубҳасиз, ҳар бир унсурдан ижтимоий мазмун қидиравериш тўғри эмас, бироқ замон-

дошларимизнинг кайфияти, ўй-хаёллари бутун борлиги билан акс этиши керак бўлган шароитда асосий ургу чучмал мавзуларга қаратилса, буни тўғри деб бўлмайди. Нафсиамрини айтганда, матбуот ижтимоий табиати билан фан ёки санъатдан устун туради, унинг вазифаси — айнан шу кунга хизмат қилиш. Демак, муаллақ мавзуларга зўр бериш, ружу қўйиш қайсиdir маънода бугунги кун воқелигидан ўзини четга олиб қочиш, кўриб-кўрмасликка олиш, аниги, бепарво бўлиш билан баравар. Қолаверса, бундай маҳсулот салмоғининг кўпайиб кетиши жамоатчиликнинг қизиқишига ҳам таъсир этади ва бошида таъкидланган «занжирсимон муносабат»ни сусайтиради...

Ўз мустақиллигини дунёга дадил кўрсатаётган юртимизда улуғ мақсадларга илҳомлантирадиган ёниқ сўзга зарурат бисёр. Зоро, сўз қандай ишга йўлланиши билангина қимматлидир. Улкан ёзувчилардан бири таъкидлайдики, сўз — шамолга қараб учадиган ўйинчоқ пуфак эмас. У иш қуроли: у маълум даражадаги оғирликни кўтариб турмоги лозим. Ўзгалар кайфиятини қанчалик ром этиши ва ўзгартиришига қарабгина биз сўзнинг аҳамияти ва кучини баҳолашимиз мумкин (В. Короленко).

Матбуотимиз айни кунларда жаҳон андозаларини кўзлаб дадил изланмоқда. Бугун журналистикамиз халқимизнинг бунёдкор табиатини, истиқололга садоқатини, эртани кунга ишончини ёрқин бўёқларда акс эттирмоқда. Биз баён этган мулоҳазалар эса кечаги кун тажрибасининг ҳосилалари эди. Албатта, ҳозирги янгиланиш, улғайиш даври кўнтилда ишонч уйғотади ва ёқимли хulosалар чиқаришга изн беради.

2002 йил

ИСТЕЬДОДНИНГ КУЧИ ёки камарбасталик масъулияти

Шарқнинг улуғ шоирларидан бири Абдураҳмон Жомийнинг шундай байти бор:

Асло мансаб билан буюкмас одам,
Мансаб одам билан муҳтарам.

Гарчи мазкур сўзлар муҳокама мавзуимизни айнан ифодаламаса-да, фикримизни аниқлаштириш мақсадида истисно тариқасида унинг бир қиррасидан фойдаланмоқчимиз. Демак, мансаб, унинг барча даражалари буюклик мезони эмас, балки мансаб одам билан қадр топади. Мутафаккир шоир бу ўринда яна бир марта «Инсон — олам гултожи» деган ақидани тасдиқлаяпти ва «Одам мансаби (балки касби) билан мақтанмасин, одам эканлиги билан мақтансин, фахрлансин» деб панд бераялти. Таассуфки, ҳали гулзорни кўрмай, «дунёни гулга кўмиб ташладик» деб бонг урилса ёки ҳали қирга чиқмай тоғни эгаллаганлик даъвоси билан чиқилса, борингки, кимлардир Сўзнинг таъмини тогишга улгурмай, соҳанинг азобларини юрагидан ўткармай, фақат ташқи ялтироқликка маҳлиё бўлиб, «Биз... журналистлар» деб тўтиқушдек тақрорлайверса ҳам одамнинг энсаси қотар экан.

Назаримизда, бирор касб эгаси бўлиш (ҳозирча бу тушунчанинг бошланғич маъносида, яъни «диплом эгаси бўлиш») билан бошқа касбдагиларга писанда қилиб, уларнинг қаршисида керилиб, «Биз...» деб гапиришнинг ўзи тарбиясизлик, жамоатчилик олдида одобсизлик. Агар хотирамиз чалғитмаса, биз бирор ўринда оммавий тарзда (минбардан туриб) «Биз агрономлар», «Биз юристлар» ёки «Биз дәхқонлар» тарзидаги «камтарона эътироф»нинг (аслида гердайишнинг) шоҳиди бўлмадик. Бироқ жамиятда мавқеи ёки зарурати (ижтимоий масъулияти) асло бирбиридан кам бўлмаган касб кишиларининг хизматига бел боғлаган соҳа одамлари, бир томондан, вазифасини суистеъмол қилиб, иккинчи томондан, камтарлик қилиш, одоб сақлаш ўрнига ўзига бино қўйиб, манманлик билан «Биз...» деб турса, касб одобини, ўзининг энг оддий бурчиники биринчи қадамда унутса, ундан жамият нима кутади ёки у жамиятта нима беради?

«Камтарона эътироф»ларга қулоқ тутайлик: «Ҳозирги шароитда биз журналистларнинг масъулияти ўн чандон ош-

ган», «Эндиликла биз журналистлар фақат она тилини эмас, чет тилларни ҳам билишимиз керак», «Биз журналистлар ҳаётга яқинроқ туришимиз...» ва бошқа «биз...», «биз»лар... Бу ҳиссис, сохта эътирофларни тинглаган иқтисадчи, муҳандис ёки қурувчи: «Шунга шунчами, ахир ўз ички ишингни ўзинг эплайвермайсанми? Нима қиласан ялтоқланиб», демайдими? Ёки таги пуч, чучмал мuloҳазаларни тинглаб ҳафсаласи пир бўлгач, «дунёда журналистилек жўн нарса йўқ экан», деган саёз холосага бориши ҳам тайин-ку.

... Экранда ёқимтой чехра пайдо бўлади, титрда таниш ёзув — «журналист». У деярли чойхонадаги сұхбатлар дарражасидаги гапларни такрорлаб ёки ўзи ҳам тўла тушуммаган ёхуд чуқур ҳис этмаган мавзулардан ул-булни «шоҳалаб» ғойиб бўлади. Яна ўша аянчили холоса: «Дунёда журналистилек жўн нарса йўқ экан...»

Кейинги пайтда қалам аҳли қаторида бошқа ҳамкасларини ёзғирадиган, уларни у ёки бу мавзуда етарли ижод қилмаётганликда айблайтган назоратчилар кўпайиб кетди. Улар бундай фикрларини тор доираларда ёки ҳамкаслар даврасида эмас, тўғридан-тўғри микрофондан ёки газета саҳифалари орқали изҳор қилишмоқда. Яна бир савол туғилади: хўш, журналистнинг у ёки бу мавзуда чала ёзаётганининг ёхуд ёзмаётганининг жамиятдаги бошқа касб эгалари учун нима аҳамияти бор? Балки бу ҳам «фақат биз ишлайпмиз (ёзаяпмиз, бир-биримизни танқид қилаяпмиз)» қабилидаги сохта тасаввур учундир. Ўша зот жамоатчилик олдида ҳисоб беришга киришдими, гапни «мен (фalon-фalon) мавзуларда ёзмаяпман, бунинг учун мен хижолатдаман, чунки мен журналист сифатида жамият олдидаги мавқеим — шу куннинг нафасини матбуотга олиб чиқиши...ни эплай олмаяпман» сингари ўз-ўзини танқиддан бошласа, инсофдан бўларди. Чунки матбуот, умуман, журналистика соғ ижодий соҳа ва бу соҳада фақат ижодий фаолият билан намуна бўлиш (ва таъбир жоиз бўлса, шу орқали таъбеҳ бериш) мумкин.

Хўш, бугунги кун журналистдан (биз ҳам бу сўзнинг жарангига маҳлиё бўлибми, қайта-қайти ишлатишга маж-

бур бўляяпмиз) нимани талаб қиласяпти ва у замон сўроғига нечоғлиқ жавоб бераяпти? Айнан шу ўринда бир ҳақиқатни эслаб ўтиш жоиз бўларди.

Қалам — муқаддас қурол. Қалам тутган қўлнинг холис, беминнат хизмати билан ўткинчи дамлар сурати абадийлик касб этади, ёзув орқали ҳаётимиз тарихга муҳрланади, шу воситада одамлар ахборот алмашадилар ва ҳоказо. Шубҳасиз, кўп нарсани қаламкашнинг касбга лаёқати, маданияти ҳал қиласи. Одамлар унга холислик-нохолислик, поклик-нопоклик мезонларидан келиб чиқиб баҳо берадилар. Шу туфайли ҳар бир давлатда конституцион тузумга садоқатли ва касб маҳорати юксак журналистларни вояга етказишила ҳеч бир нарса аялмайди. Гарчи зиммамиизда шундай бурч турса-да, қалбимиизда мустақил она юртимиз камоли йўлида сидқидилдан хизмат қилиш орзуси жўш урса-да, фақат касб маҳорати ва умуминсоний миқёсларда фикр юритишда даврдан орқада қолаяпмиз.

Шу мезондан (аҳволдан) келиб чиқиб хулоса қиласи-ган бўлсак, исм-шарифига жарангдор сўзни тиркаб олиш билан ўзига бино қўйган ҳамкасбимизнинг болаларча чучмал истагини ҳам тушуниш мумкин. Яхшиси, дунёда эзгуликка хизмат қиласман, умуминсоний ғояларни улуғлайман, деб яшаётган кишилар эътиқодининг ифодасини ўз хизматларимиз билан шарафлаб, бу унвонга бошқалар иқори сифатида мушарраф бўлишга интилайлик. Бизнинг зиммамиизга ҳам давр, замона етарлича масъулият юкламоқда. Мавриди билан шуларнинг иккитасига эътибор қаратмоқчи эдик.

Аввало, бу сўз (ва касб) атрофидаги англашилмовчиликларга аниқлик киритиш лозим. Дейлик, маҳсус ўрта маълумотли тиббиёт ходими — фельдшер, олий маълумотлиси врач дейилади. Демак, кимни ким деб аташнинг ҳам талаби, чегараси бор. Шунингдек, ветеринария врачи соҳаси яқин бўлса-да, соғлиқни сақлаш ходими билан бир хил даражада турмайди. Ёки агроном иқтисодчи бўлиб ишлай олмайди. Таажжуб, «журналист» сўзи эса бу даргоҳнинг эшигини очиб кирган ҳар қандай зотга нисбатан

қўлланаверади. Ҳолбуки, «ҳаваскор мухбир», «мухбир», «шарҳловчи» сингари шу соҳага дахлдор касб номлари ҳам мавжуд. Бинобарин, бу сўзнинг (журналистнинг) мавқеини сақлаш учун маълум тартибларни жорий этиш лозимлиги аниқ бўлмоқда.

Маълумки, бу касб эгалари хабар берадилар, баён этадилар, ҳукм (тасдиқ ёки инкор маъносига) чиқарадилар. Бу босқичларнинг ҳар бирида унинг инсоний хислатлари муҳим (балки етакчи) мавқеда туради. Шундай экан, соҳада кимнинг фаолият кўрсатаётгани жуда муҳим. Бу ўринда журналистга қўйиладиган маънавий талабларни такрорлаш зарурати йўқ, бироқ бир нарса аниқки, ҳозирги шароитда баъзи ҳамкасларимизнинг «файрат»лари туфайли касбнинг обрўсига путур етган. Одамлар билан мулоқотларда (уларнинг бу мавзуда ёлғон гапиришдан манфатдорлиги йўқ) «фалон мухбир»нинг машинасига тўртта шина сўрагани ёки хўжалик раҳбаридан нимадир ундириш учун уни бир ҳафта пойлагани сингари «афсонавий» гапларни эшитамиз. Мухбир қаҳрамони қулоғидаги тилла зиракни «тортинмай олади»-да, ўз қулоғига тақиб қўяди ёки бошқаси: «Мен қўйналмай ижод қилишим учун алоҳида уйим бўлиши керак», деб эркаланди. Ҳар қандай ҳолда ҳам бафрикенглик ва сахийлик туфайли улар муддаоларига эришадилар... Балки бу гаплар бир оз бепардалроқ, эришроқ туюлиши мумкин, аммо шунақа ҳолатларнинг болалаб кетаётгани рост ва шундай ишларни қилганлар ҳам, қилмаганлар ҳам умумий тавқи лаънатга қолиб кетаяпти-да. Хуллас, жаноби журналистнинг моддий таъминланишини изга солиш, бу борадаги файриахлоқий кўринишларга чек қўйиш вақти этишди.

Энди эса энг асосий гапга ўтсак. Мустақил юртимизнинг ҳар бир қадами оламшумул воқеаларга бой бўлмоқда. Биз чинакам янги, дунё билан бўйлашадиган юрт барпо этмоқдамиз. Бундай тарихий вазифанинг қувончи ҳам, ташвиши ҳам етарли. Минг афсуски, ана шундай долғали шароитда миллий журналистикамиз ўз имкониятини тўла намоён эта олмаяпти. Албатта, бу — шахсий фикр ва уни изҳор этишда етарли асосларимиз мавжуд. Муҳокамамизнинг бошида биз бир қарашга зарба бермоқчимиз.

Кўпчилик ҳақиқий журналистика деганда шов-шувлар излаб топиш, кимнидир бадном қилиш, бировнинг пешонасини фурра қилиш, хуллас, жамиятда шаклланган ижтимоий фикрга қарши бориб, сохта қаҳрамонлик кўрсатиш деб тушунали. Ҳақиқий журналистиканинг мезони — ҳаёт ҳақиқатига хизмат қилиш, умуминсоний ғояларга садоқатдир. Ўзбек журналистикасида истиқдол йиллари янгича руҳ пайдо бўлди ва изланишлар давом этмоқда. Улуғвор ўзгаришларнинг қийинчилклари-ю ғалабаларини яққол кўрсатиб берадиган таҳлилий мақолалар, замондошларимиз ички дунёсини тўла акс эттирадиган очерклар, тезкор, ҳаммабоп жанрлардаги мақолалар эса навбатда турибди. Одамлар кечачётган жараёнлардан тўла хабардор бўлсагина эртанги кунга янги куч-ғайрат билан қадам қўяди, жамиятда чалғишилар, эсанкирашлар бўлмайди. Ислоҳотларнинг туб илдизи ва моҳияти, амалий қадамлари ҳақида пайсалга солмай кўпчиликка ҳикоя қилиб берган маъқул. Ҳозирги тезкор ахборот қувватидан кўра оҳанрабороқ кучни топиб бўлмайди. Хуллас, бу борада хизматлар етарли. Ана шундай оламшумул юмушларга камарбаста бўлиб, ҳалқимиз кўнглидаги гапни топиб айтсак, жонажон юртимизнинг юксалишига ўз хизматимиз билан муносиб ҳиссамизни қўшсак, шундагина исм-шарифимиизга тиркалган сўзнинг обрўсига муносиб бўламиз. Чунки бу соҳа кишиларига шундан бошқа қисмат йўқ.

2001 йил

**«ТАЛАБАДАН ПРОФЕССОР КЎП»,
дейди у Лиль олий журналистика
мактаби ҳақида**

Франциянинг Ўзбекистондаги элчинонаси ташаббуси билан Оммавий ахборот воситаларини демократиялаш ва қўллаб-кувватлаш жамғармаси Журналистларни қайта тайёрлаш ҳалқаро маркази ҳамкорлигига пойтахтда фаолият кўрсатаётган таҳририятлар ходимларидан бир гурухи (асосан, газеталар масъул котиблари) иштирокида семинар

бўлиб ўтди. Унинг очилишида гарчи элчихонанинг илмий-техника ҳамкорлиги бўйича атташесининг қатнашиши кўзда тутилган бўлса-да, элчи жаноб Жак-Андрс Костининг шахсан ўзи келиб, тадбирга оқ йўл тилади. «Ўзбекистон билан Франциянинг алоқалари ҳар томонлама гуриллаб ривожланиб бормоқда, — дейди у, — Францияда Ўзбекистонни жуда яхши билишади ва эъзозлашади. Журналистлар иштирокида бўладиган бу галги мулоқотимиз ҳам ана шу ҳамкорликнинг бир қиррасидир. Юрtingиз барча соҳада жаҳон андозаларига интилмоқда. Жумладан, ОАВ ҳам ўз нуфузи ва қиёфасини эртароқ топиб олиши лозим. Шу маънода бугунгидек мулоқотлар жуда асқотади, деб ўйлайман. Биз дўстлармиз, дўстлар ҳамиша бир-бирига нисбатан самимий бўлади».

Шундан кейин Франциядан ташриф буюрган меҳмон — Лилль олий журналистика мактаби профессори жаноб Ив Сешега сўз берилади. Нотиқ юртимизга нисбатан ўз эҳтиромини изҳор этар экан, унинг бу биринчи ташрифи бошланажак доимий маданий алоқаларга пойдевор бўлишига умид билдириди.

Ҳафта давомида машгулотлар профессор Ив Сеше мутасаддилигига ўтди. Унда газетада хабар (информация)-ни эълон қилишининг самарали йўллари, хабарни саҳифада ўнгай жойлаштириши, муштариини ўрганиш усуллари, инфография, чет элларда журналистика мавзуларида маърузалар бўлди. Дунёнинг кўплаб мамлакатларида ижодий-амалий сафарда бўлиб, кўплаб таҳририятлар тажрибаларини ўрганган олимнинг мулоҳазалари янги маълумотларга бойлиги билан эътиборли эди. У фикрларини республикамиз матбуоти ҳақидаги ўз тасаввурларига қиёслаб баён этди. Албатта, бизнинг матбуотимиз янги шароитларда самарали изланишлар олиб бораётгани билан характерли. Шундай пайтда тажрибали мутахассиснинг хуросалари анча қимматлидир.

Ив Сеше машгулотлар давомида таҳриятларда ҳам бўлди. Жумладан, у «Хуррият» газетаси таҳририятига ташриф буюди, газета таҳламларини вараклаб, ўз муносабатини билдириди. Шунингдек, у бизнинг саволларимизга жавоб беришга бажонидил рози бўлди.

* * *

— Жаноб профессор, аввало, гапни сиз фаолият кўрсатётган ўқув даргоҳидан бошласасак.

— Лиъль олий журналистика мактаби дунёда эътироф этилган икки йирик йўналиш — Европа (Франция) ва Америка услубидаги ўқув юртларининг энг етакчиларидан ҳисобланади. Айтишим мумкинки, француз журналистикаси ана шу мактаб анъаналари асосида ташкил топган. Унинг очилганига 80 йил тулди, шу даврда 3000 дан зиёд мутахассис тайёрланди. Улар дунёning 80 га яқин мамлакатида фаолият кўрсатяпти.

— Бу билим масканининг бошқалардан қандай фарқи бор?

— Ўқиш 2 йил бўлиб, олий маълумотли мутахассислар қабул қилинади. Улар ўз ихтисосликлари (масалан, агроном, ўқитувчи ёки врач) бўйича ишлаш жараёнида журналистик қобилиятларини намойиш этган кишилар бўлади.

— Ўқиши тартиби қандай?

— Ҳар йили 80 нафар талаба қабул қилинади. Уларнинг 54 нафари бўлажак ОАВ ходимлари сифатида газета, радио, ТВ журналистикаси билан шугуулланадилар ва битириб чиққач, шу соҳада муқим ишлайдилар. Қолган 16 нафари эса олимлар, тадқиқотчилар бўлиб, улар ўз соҳаларини тарқ этмаган ҳолда журналист бўлиб етишадилар. Албатта, бу гурӯҳларнинг ўзига хос дастури мавжуд.

— Бу мактаб бирданига шу тарзда ташкил топганми?

— Йўқ, бундай тартибга ўтилганига 30 йил бўлди. Олдин, 50 йил давомида 4 йиллик таълим амалда эди. Мен ҳам шу усулда ўқиганман, таажжубки, охирги битириувчилардан бўлганман. Кейин тажриба жараёнида янги усуларга ўтиб ишлаш ғояси туғилган ва собиқ талабалар жамғарма тузиб, 2 йиллик таълимни жорий қилганлар.

— Демак, ўқиши пуллик экан-да?

— Ҳа, олий мактабни ташкил этганлар акция чиқарганлар, ўқишини хоҳловчилар шу акциялардан сотиб олишади.

— Таълим (ўқиши) жараёни қандай?

— Олий мактабда доимий ишлайдиган 4 нафар ходим бор. Улар фаолиятни мувофиқлаштириб туради. Бильакс, таълим жараёнига домлаликка 250 ўқитувчи (профессор) жалб қилинган. Улар шу мактабнинг собиқ талабалари.

— Таълимда назария устунми, амалиёт?

— Шак-шубҳасиз — амалиёт.

— Бу мақсад қандай рӯёбга чиқади?

— Мисол билан тушунтирсам, масалан, «Мақола қандай ёзилади?» деган мавзу жами 15 ҳафта давомида ўқитилади. Машгулотларни ҳар ҳафта бир профессор — жами 15 профессор олиб боради. Улар ўзлари фаолият кўрсатган 15 матбуот нашри тажрибасидан таълим беради.

— Бу мактабда дарс бериш, профессор бўлиш осонми?

— Албаттa, ўз талаблари бор...

— Шахсий фаолиятингиз асосида тушунтириб бера олазизми?

— Мен 4 йиллик курс (университет)ни битириб (айтдим, охирги битирувчиларданман, деб), кўп йил матбуот, радио, ТВда ишладим. Бизда журналистнинг қобилияти ўзи газета ташкил этиб (эшиттириш ёки кўрсатув очиб), уни оёққа қўйиб олиш билан белгиланади. 1976 йилда З та газета ташкил қилдим ва улар яхши самара берди. Шундан кейин Лилль олий журналистика мактабига таклиф қилиндим ва матбуот кафедрасини бошқариб келяпман.

— Хорижий мамлакатларда...

— Дунёнинг 50 га яқин мамлакатида бўлиб, янги газеталар ташкил қилишда қатнашдим. Биринчи марта Руминияга таклиф қилишди, у ерда «Бухарест тонги» газетасини ташкил этдик. Узоқ хорижга илк сафарим эса 1992 йилда Вьетнамда бўлди. Бу юртда биринчи хорижий мутахассис сифатида ташриф буюрганман.

— Профессорлик юмушини қандай амалга оширасиз?

— Ҳар йили 3 ой машгулотда бўламан. 50 нафар талаба бўлса, уларни 4 гуруҳга бўламан ва ҳар бири билан 3 ҳафта шуғулланаман.

— Қолган пайтлар-чи?

— Янги газеталар ташкил қилишда ёрдамлашаман, маслаҳат бераман. Энг асосийси — ғоя йигаман. Бунинг учун ёшлар, ўсмирлар билан кўпроқ мулоқотда бўламан, чунки бу ёшда одамнинг фантазияси кучли бўлади, ўзи сезмаган ҳолда янги кашфиёт (ғоя)лар топади... Қолган пайтда эркинман, менга шуниси ёқади.

— Рус журналистикаси мактабига муносабатингиз қандай?

— (*Ўйланиб қолади*). Албатта, шафқатсиз бўлишни хоҳламайман, лекин дунё кўрган киши сифатида ўз муносабатимни айта оламан. Рус журналистикаси бой анъаналарга, тарихга эга, лекин кейинги пайтда (совет ҳокимиятида) журналистикадан кўра ташвиқот қуролига айланиб қолган эди. Бунинг сабаблари тушунарли, у тоталитар мафкуранинг хизматкори эди. Ўқитиш жараённида амалиётга кам эътибор берилади, қурувчи фишт теришни билмаса, қандай терувчи бўлиши мумкин? Талабалар газета чиқаришни билишмасли. Кейин эса журналистик этика доим амалда бўлмаган. Уларда матбуот маданияти жуда юқори, бироқ техникаси кучли эмас.

— «Юманите»нинг аҳволи қандай?

— Уни оппозициядаги TF-1 канали қўллаб-қувватлаб туради. Обунаси ўн йил олдин 300 минг дона эди, ҳозир 60 мингга тушиб қолган.

— Умуман, Франциядаги матбуот олами ҳақида маълумот берсангиз.

— Мамлакатда 30 мингдан ортиқ журнал (газета), магазин (журнал) нашр этилади. Ҳаммаси эркин, хусусий, фақат Конституция талабларига амал қиласи. «La Mond» («Дунё») энг нуфузли газета, ярим миллион нусхада чоп этилади. Кўп газеталар бепул тарқатилади. 600 минг нусхада тарқаладиган «Metro», «20 minut» сингари нашрлар шулар жумласидан. Улар реклама ҳисобидан яшайди...

— Францияда журналистлар тайёрлашда фақат битта тизим борми?

— Йўқ, мамлакатдаги 6 университетда журналистика факультетлари бор, уларга қабул қилиш одатдагидек. Ижтимоий сўров натижалари кўрсатадики, 13 ёшгача бўлган

болаларнинг ҳар уч нафаридан бири (33%) журналист бўлишни орзу қилган. Лекин ишлаб кетиш, айниқса, танилиш оғир.

— Сизларда ҳам тармоқ газеталар борми?

— (*Ҳайрон қолади*) Нима у? Европада ОАВ, асосан, янгилик тарқатишга хизмат қилади. Янгилик тезкор, тўғри, ҳақиқий, Конституция талабларига мос бўлиши шарт.

* * *

Меҳмон билан сұхбатимиз ҳамкасларнинг ҳангомасига хос очиқ, самимий бўлди. У ҳар бир эътирофида Ўзбекистонни буюк келажак кутаётганини, бунинг учун барча асослар мавжудлигини тез-тез такрорлади.

Амалий машғулотлар жараёнида эса дунёда матбуот нафақат мавзу ёки мағке жиҳатидан, балки ташқи кўриниши билан ҳам жуда олдинлаб кетганини ҳис қилдик. Газетани безаш борасида ҳам қандайдир қасбий мантиқ мавжудлигини тушуниб бордик-у, бироқ уни идрок этиш осон эмас зди. Биз бу юмушнинг арифметикаси билан шуғулланиб юрган бўлсак, профессор Ив Сеше унинг алгебраси, балки алгоритми ҳақида фикр юритди, шуниси билан машғулотлар қизиқарли ўтди.

2004 йил, декабрь

ИБН АРАБШОҲНИНГ ИСТЕҲЗОЛИ ЭЪТИРОФИ

Суҳбатдошимиз — Убайдулла УВАТОВ, тарих фанлари доктори, Тошкент ислом университети исломшунослик илмий-тадқиқот марказининг бош илмий ходими.

Араб, форс ва рус тилларини мукаммал билади, 15 дан ортиқ китоб ва рисолалари чоп этилган. Миср, Ироқ, Ливияда узоқ йиллар хизмат сафарида бўлган. Дунёнинг ўндан ортиқ мамлакатида турли илмий анжуманларда маъруза билан қатнашган.

Суҳбатимизга туртки шу бўлдики, яқинда Ибн Арабшоҳ қаламига мансуб «Амир Темур тарихи»ни қайта ўқиб чиқишимга тўғри келди. Мутолаа жараёнида олдин унча билинмаган кўплаб янги қирралар намоён бўлди. Айниқса, услуби анча оғир асар таржимаси ниҳоятда муваффақиятли амалга оширилганига яна бир карра амин бўлдим. Унга илова қилинган 1400 дан ортиқ изоҳлар, исмлар ва жойлар кўрсаткичи битта мукаммал тадқиқот даражасида. Колаверса, китоб бу мавзуда ўзига хос асар. Муаллифнинг қаҳрамонига муносабати тардитъакс тарзида Амир Темурни янада улуғлашга хизмат қилади. Гарчи Ибн Арабшоҳ қора бўёқ чаплашда ниҳоятда «сахий» бўлса-да, ўзи билган барча ёмон сўзларни қўлласа-да, Шахснинг бетимсол талъати ҳар қандай чанг-тўзон, губордан ғолиб кела-веради. Бу эса бобокалонимиз шавкатига ишончни янада мустаҳкамлади.

Албатта, бошқа миллат маданияти намунасини ҳалқига туҳфа этиш ўзига хос маънавий жасорат. «Тарих»нинг таржимаси сезиларли воқеа бўлиши билан бирга мамлакатимизда энди юзага келаётган темуршуносликка қўшилган муносиб ҳисса ҳамдир. Таржиманинг 1974 йилда амалга оширилиб, 1992 йилда китоб сифатида чоп этилиши — 18 йиллик танаффус эса кўп нарсалар ҳақида сўзсиз ҳикоя қилади.

— Ҳурматли Убайдулла ака, сизда Ибн Арабшоҳнинг «Амир Темур тарихи» асарини таржима қилиш фикри қандай пайдо бўлган?

— Мен дастлаб Қашқадарё вилояти Фузор туманидаги «Мудофаа» мактабида пионер вожатий бўлдим, сўнгра қишлоқ совети ҳудудидаги кутубхонада ишладим, чунки икки йил ўқишга киролмадим, бал етмаганди. Ниҳоят, 1958 йилда Тошкентдаги Ўрта Осиё давлат университети (ҳозирги Ўзбекистон Миллий университети)нинг шарқ факультети, араб бўлимига ўқишга киришга муваффақ бўлдим. 60-йиллардан бошлаб собиқ СССР раҳбарлари хорижий мамлакатлар, хусусан, араб мамлакатлари билан иқтисодий, савдо-сотик алоқаларини ўрнатишга эътибор қаратиб, бир қадар ишларни бошлаган эди. Хуллас, 1952 йилдаги инқилоб натижасида Мисрда давлат тепасига янги раҳбарлар келиб (хусусан, президент Жамол Абдул Носир), тараққиёт йўлини тутиб, янги иншотлар қуриш учун ғоятда зарур бўлган Асвон тўғонини қуришга бел боғлаган ва шу ҳақда СССР билан битим тузиб, мана шу улкан қурилиш бўйича мутахассислар жўнатилган эди. Табиийки, араб тили таржимонларига ҳам зарурат ошган. Таржимонлар турли шаҳарлардан эди. Мен тўртинчи курсни битиргач, ҳозир таниқли шарқшunos, тарих фанлари доктори Аҳаджон Ҳасанов билан Мисрга араб тили таржимони сифатида жўнатилдик.

Қоҳирада яшадик, Мисрда ҳаво жуда иссиқ (Африка-ку!) бўлгани учун ишга жуда барвақт, эрталаб соат 5 да бориб (геологлар, топографлар, геодезистлар билан дала-да ишлашга тўғри келганди), соат 13 да уйда бўлардик. Куннинг қолган қисми бўшмиз. Вақтдан унумли фойдаланиш (кинога бориш, шаҳар айланиш кабилар малол келиб қолганди бизга) учун Қоҳирадаги «Дор ул-кутуб» («Китоблар уйи») номли ғоятда бой бўлган кутубхонага тегишли рухсатномаларни олиб, расмий равишда аъзо бўлдим. Ҳар куни ишдан кейин бу китоблар дунёсига бориб, ўзимизни қизиқтирадиган тарихий-библиографик асарлар, китоблар, каталог ва фикристлар билан танишардим. Энг муҳими, бу кутубхонада замонавий нашрлар билан бирга қимматли қўлёзмалар (айниқса, араб тилида) ҳам бўлиб, бизлар ақлимиз етганча улар билан ҳам «ошно» бўла бошладик.

Бахтимизга «Дор ул-кутуб»да ватандошимиз, исломий қўлёзмалар бўйича йирик олим доктор Насрулло Мубашшир ат-Тарозий ломла ҳам ишлар экан. Бир қанча Шарқ ва Farb тилларини мукаммал билган бу зукко олим ва ажойиб инсон ушбу кутубхонада «Нодир қўлёзмалар» бўлимини бошқарар эканлар. Домла билан танишгач, ишларимиз йўлга тушиб кетди. Замона зайли билан Мисрга бориб қолган ат-Тарозий домлада, бизларни кўргач, ватан соғинчи бир қадар кетгандек бўлди. Фоятда меҳрларини тўкиб, биз учун том маънода маслаҳатгўй, ҳақиқий мураббийга айланди. Илмда ҳали фўр бўлган бизларнинг бу соҳада йўлга тушишимизда ўз бегараз хизматларини аямадилар. Хусусан, мен домланинг маслаҳатлари билан XV аср араб тарихчиси Ибн Арабшоҳнинг Соҳибқирон Амир Темур бобомиз ҳаёти ва фаолиятига бағишланган «Амир Темур тарихи» асари билан танишиб, бу асарга ошиқ бўлиб, боғланиб қолдим. Гарчанд, маълум сабабларга кўра, Ибн Арабшоҳ Амир Темур бобомизнинг фаолиятига танқидий руҳда ёндашган бўлса-да, лекин бу асарда Соҳибқироннинг ҳаёт йўллари, шахсияти, унинг сийрати ва суврати, ажойиб инсоний фазилатлари, давлат арбоби ва лашкарбоши сифатидаги беназир салоҳияти ҳақида шу қадар маълумотлар келтирилганки, Амир Темурга бағишланган бошқа бирорта ҳам асарда бунчалик аниқ ва батафсил маълумотларни учратмайсиз.

Тарихий манба сифатида Ибн Арабшоҳнинг бу асари беқиёс аҳамиятга эгалиги аллақачон олимлар томонидан ўз баҳосини олган. Шу боис қатор Farb ва Шарқ тилларига таржима ҳам бўлган.

— Шу ўринда Ибн Арабшоҳ асарининг аслиятда ва таржималарда номланиши юзасидан изоҳ бериб ўтсангиз.

— Чиндан ҳам Ибн Арабшоҳ асарининг қўлёзма нусхаларида «Ажойиб ал-мақдур фи навоиб Таймур» («Темур келтирган ёмонликларда тақдир ажойиботлари»), «Ажойиб ал-мақдур фи тарих Таймур» («Темур тарихида тақдир ажойиботлари»), «Ажойиб ал-мақдур фи ахбори Таймур» («Темур ҳақидаги хабарларда тақдир ажойиботлари») каби номлар билан аталган. Бошқа тилларга қилинган таржи-

маларида эса «Темур тарихи», «Амир Темур тарихи» номлари билан аталган. Фикримизча, асар дастлаб муаллиф томонидан берилган ном билан аталган: «Темур кулфатларида тақдир ажойиботлари». Бу ўринда бир масалага алоҳида эътибор бериш керак бўлади.

Ибн Арабшоҳ бу асарини бошдан охиригача қофияланган саж услубида ёзиб, у бу услугга катта аҳамият берган. Услуб учун кам ишлатиладиган архаик сўзларни, ҳаттоки араб тилининг қонун-қоидаларини бузишдан ҳам тап тортмаган. Баъзан шундай тасаввур ҳосил бўладики, қофия муаллиф учун биринчи ўринда бўлиб, ҳамма нарсадан устун турди, унга «асир» бўлиб қолган. Қофия учун ҳеч нарсадан қайтмайди. Мана шу ақидадан келиб чиқиб, Ибн Арабшоҳ асарининг номидаги «ажойиб»га қофия қилиб «навоиб»ни ишлатган. Шу туфайли (муаллиф вафотидан) кейин кўчирилган нусхаларида, замонавий нашрларида ҳам хаттот ва ноширлар асар мазмунидан, ундаги хабарлардан келиб чиқиб «навоиб»ни «ахбор» (хабарлар) ёки «тарих» сўзлари билан алмаштириб, «тузатиш» киритганлар. Бизнингча ҳам бу тўғри эди. Асар, асосан, Соҳибқироннинг ҳаёти ва қилган ишлари ҳамда фаолиятини ёритгани учун биз ҳамиша «Амир Темур тарихи» номи билан нашр этганимиз. Farb tillariiga (француз, инглиз, лотин) қилинган таржималарида ҳам Ибн Арабшоҳ асари «Темур тарихи» номи билан аталган. Бу ном асарнинг асл мазмун-моҳиятини тўлиқ ифода қиласди.

— Демак, сизга бу асар билан танишиш имконияти бир улуғ инсоннинг илтифоти туфайли мусассар бўлган экан. Тарозий домла билан яна илмий-ижодий ҳамкорликда бўлдингизми, умуман, бу зот ҳақида нималарни айтишни хоҳлайсиз?

— Насрулло Мубашшир ат-Тарозий домла билан Мисрда турган вақтимда, албатта, учрашувларимиз, ўша пайтдаги «сиёсий» сабабларга кўра, гарчанд жуда қўнгилдагидек бемалол бўлмаса-да, бардавом эди. Домла юрти Ўзбекистон ҳақида кўп сўрардилар, киндик қони томган жойларни кўришига жуда муштоқ эдилар. Лекин собиқ тузум давридаги тартибларга кўра, ўша пайтда она юртга келиш насиб этмади. Фақат Ўзбекистон мустақилликка

эришгач, домла биринчи марта қадрдан юртига келишга мушарраф бўлдилар. Дастребки келишлари 1996 йилда, Соҳибқирон Амир Темур ҳазратлари таваллудининг 660 йиллик юбилейлари муносабати билан бўлган эди. Домла катта олим сифатида бу юбилейга ажойиб совға билан келдилар, Миср пойтахти Қоҳирада араб тилида Узбекистон Республикаси элчихонаси томонидан «Амир Темур ва Темурийлар ҳақида Миср кутубхонасида сақланаётган манбъ ва қўлланмалар фиҳристи» номли ўзлари бир неча йил давомида тайёрлаган қимматли асарларини олиб келдилар. 450 саҳифадан иборат ушбу фиҳристда Амир Темур бобомиз ва унинг авлодларига оид Шарқ тилларида битилган деярли барча манбалар номма-ном, муҳим тасифлари билан келтирилган. Айниқса, Амир Темур ва Темурийлар даври тадқиқотчиси ва олимлари учун жуда муҳим бўлган бу фиҳристнинг қиммати бекиёсdir.

Шундан кейин ҳам домла ат-Тарозий бир неча марта Ўзбекистонга келдилар. 1998 йилда Имом ал-Бухорий ҳазратларининг 1225 йиллик юбилейида ҳам ажойиб маъруза билан қатнашган эдилар. Домла юртимиёндан (Ўзбекистон ҳудудидан) чиққан кўплаб алломалар, уларнинг ҳаёти ва асарлари ҳақида муҳим, ноёб маълумотларни тўплаб, маҳсус китоб битиш орзусида юрганлигидан ҳам хабардорман. Ат-Тарозий домла шарқ тилларидаги қўлёзмалар бўйича йирик мутахассис, Қоҳирадаги бир нечта университетларнинг профессори, Анқарадаги Ота Турк тил, тарих ва маданият академиясининг аъзоси эдилар.

Том маънода юртпарвар, миллатпарвар, буюк меросимизнинг фидойи, жонкуяр тарғиботчиси, ажойиб инсон сифатида ҳам ат-Тарозий домланинг порлоқ хотиралари менинг қалбимда бир умр муҳрланиб қолган. (Ат-Тарозий домла 2002 йилда, Қоҳирада вафот этганлар).

— Ибн Арабшоҳ асари билан Дамашқдаги Аз-Зоҳирий кутубхонасида танишган экансиз. Шу кутубхона, у ердаги китобхонлигингиз ҳақида хотираларни бир эслаб ўтсантиз. Сиз таржима учун танлаб олган нусха бошқа нусхаларга нисбатан қанчалик мукаммал экан?

— Ибн Арабшоҳ асарининг қўлёзмаси билан домла ат-Тарозийнинг маслаҳатлари туфайли Қоҳирада «Дор ул-

кутуб»да танишганман. Қўлёзма жуда яхши сақланган. Чиройли настаълиқ хатида кўчирилган. Бу қўлёzmанинг микрофильмини кейинроқ тарих фанлари доктори Аҳаджон Хасанов дўстимиз ёрдамида олишга мусассар бўлган эдим. Лекин Ибн Арабшоҳ асарининг нафақат тил ва услуби, балки мазмунини тушуниш ҳам ниҳоятда оғир эди. Асар матнини тушуниш учун нафақат араб тилини билиш, балки жуда кўп воқеалар, шахслар ва тарихий маълумотларни ҳам билиш зарур эди. Ана шу сабабларга кўра қўлёzmани дастлабки ўқиганимда жуда кам даражада тушунчага эга бўлдим. Кейинроқ қайта-қайта ўқиш ва ҳар хил китоблар, қомусларни кўриш натижасида мазмунини бир қадар тушунишга муваффақ бўлдим, кейинчалик асарни маълум даражада идрок этиш насиб этди. Бунинг учун бошқа нусхаларни ҳам ўрганишга тўғри келди.

— Академик И.Ю. Крачковский Ибн Арабшоҳнинг мазкур асарининг илмий асосда бажарилган мукаммал таржимаси йўқлигига унинг бадиий нағислиги айбордорdir, леган экан. Асарни ўзбекчага таржима қилиш қандай кечди?

— Юқорида бу саволга маълум даражада жавоб берган бўлсам-да, яна айтиш керакки, ҳақиқатан ҳам Ибн Арабшоҳ асарининг тили ва услубининг ғоятда мураккаблиги унинг бошқа тилларга таржимасига маълум даражада «тўсиқ» бўлиб келган. Чунки араб тилини яхши билган билан бу асарни таржима қилишга кўп олимлар журъат қилолмаганлар. Таржимани бошлаб қўйиб, охирига етказолмаганлар ҳам бўлган. Бу асарни таржима қилиш учун араб адабиётидан (айниқса, ўрта асрларга мансуб), ислом дини тарихидан яхши хабардор бўлиш талаб қилинарди, асарда Қуръоний оятлар ва пайғамбар алайҳиссалом ҳадислари ва уларга иқтибосларнинг кўплигини ҳам айтиш ўринили. Тарихда ўтган кўплаб машҳур шахсларга, уларнинг фаолиятларига ҳам кўп ишоралар борки, буларни шарҳлаш таржимондан ҳар томонлама катта билимни талаб қиласарди.

Мана шу нуқтаи назардан Ибн Арабшоҳ асарининг ўзбек тилига таржимаси жараённида марҳум устозим, мукаммал билимга эга бўлган Абдуфаттоҳ Расулов домла-

нинг хизматлари бекиёс бўлган. Афсуски, бу асарнинг таржимасига кўп меҳнатлари сингган домламга асарнинг ўзбекча нашрини кўриш насиб этмади. Мен ҳар доим аллома устозим Абдуфаттоҳ Расуловни миннатдорчилик туйғуси билан хотирлаб юришни шогирдлик бурчим деб ҳисоблайман.

— «Ажойиб ал-мақдур» XVII асрдан бошлаб француз, лотин, турк, инглиз тилларига таржима қилинган экан. Бу таржималар қиёсий ўрганилганми? Масалан, сиз ўз таржимангизни туркча таржима билан солиштириб чиқсан-мисиз?

— Ибн Арабшоҳнинг асари Соҳибқирон Амир Темурнинг ҳаёти ва фаолиятига тўлиғича бағишлиланган араб тилида ёзилган яккаю ягона ёзма манбадир. Ибн Арабшоҳ узоқ йиллар Самарқандда яшаганлиги, Амир Темур ҳазратларини шахсан кўрганлиги ва воқеалардан яхши хабардор бўлганлиги, боз устига бу асарни ўз юргани Сурияга қайтгандан кейин ёзганлиги учун ҳам муаллиф сифатида бирон-бир ҳукмдор ёки гуруҳнинг манфаатларини ҳимоя қилмаган. У эркин ва ўз хотиридаги воқеаларни хоҳлаганича талқин қилиб ифода этган.

Муаллиф маълум сабабларга кўра Амир Темур ва унинг фаолиятига танқидий ёндаштан бўлса-да, лекин ўз асарида Соҳибқироннинг ҳаёти, шахси ва қилган ишлари, маданий ҳаёт ҳақида шунчалик кўп ва хилма-хил маълумотларни келтирганки, ўша даврга оид ёзилган бирорта манбада ҳам бу тарздаги кўп маълумотларни учратмайсиз. Шу боис асар XVIII аср ўрталаридан зътиборан турли тилларга таржима қилина бошланди. Лекин таржималардан биронтасида зарур бўлган изоҳлар ва шарҳлар берилмаган. Айрим (масалан, инглиз ва турк тилларига қилинган) таржималар эса гоятда қониқарсиз амалга оширилган. Бу ҳақда академик И.Ю. Крачковский бундан қарийб 70 йил олдин, 1936 йилда батафсил баён қилган. Шу боис буюк арабшунос Ибн Арабшоҳ асарининг юқори савияда бажарилган (изоҳлар билан) таржимаси зарурлиги ҳақида орзумандлик билан ёзган эди.

Албатта, «Ажойиб ал-мақдур»нинг ўзбек тилига таржимаси устида ишлаётган пайтимда барча (француз, ло-

тин, инглиз, турк) тилларига қилинган таржималар билан яқиндан танишиб чиққанман, кўп ўринларини қиёсий ўрганганман. Лекин улардан унумли фойдаланишга эҳтиёж бўлмади. Бу таржималарни қиёсий ўрганиш учун ҳам етарли материал («хом ашё») йўқ эди. Ҳатто сиз эслаган туркча таржима, айтиш мумкинки, асар мазмунининг қисқа баёнидангина иборат. Ундан фойдаланиш умуман мантиқсиз эди...

— Маълумки, бобокалонимиз Амир Темур ҳазратлари ҳақида турли муносабат билан юзлаб асарлар яратилган. Ибн Арабшоҳнинг китоби улар қаторида қандай ўрин эгаллади.

— Амир Темур ҳазратларининг ҳаёти ва фаолиятига бағишланиб турли йўналишла ёзилган асарлар ҳақиқатан ҳам жуда кўп. Лекин шулар билан бир қаторда Ибн Арабшоҳнинг «Амир Темур тарихи» асари тўлиғича Амир Темур ҳаёти ва фаолияти, агар кенгроқ маънода олсак, ўша давр сиёсий, ижтимоий, иқтисодий, айниқса, маданий ҳаётига доир қимматли маълумотлар мужассам бўлган беназир манбадир. Масалан, Соҳибқироннинг суврати — ташқи қиёфаси ва сийрати — ички дунёси, унинг инсоний фазилатлари хусусидаги муфассал маълумотларнинг ўзи бир олам, ўз қаҳрамонига — Амир Темурга нисбатан бир қадар танқидий руҳда ёзилган асарда шу тарздаги ижобий маълумотларнинг келтирилганлигини ҳам муносаб баҳолаб, эътибордан четга қўймаслик керак. Бу асарда келтирилган хилма-хил маълумотларнинг нафақат тарихчилар, балки турли соҳа олимлари учун ҳам муҳим жиҳатлари фоятда бисёр.

«Амир Темур тарихи»да ўша давр маданий-маънавий ҳаётига доир, шунингдек, турли соҳа илм аҳллари — муфассирлар, муҳадислар, фақиҳлар, мунажжимлар, мусиқашунослар, таниқли шатранж усталари, ўз касбida мөҳир бўлган наққошлар ва оддий ҳунарманду косиблар ҳақида шу даражада аниқ ва ранг-баранг маълумотлар мавжудки, булар ҳаммаси Ибн Арабшоҳ асарини ҳақли равищда Амир Темур ва Темурийлар даврига доир асосий манбалардан бири эканлигини кўрсатади.

Айни вақтда айтиш керакки, Амир Темур ва Темурийлар даври тарихини холисона, илмий асосда тўлиқ ўрганиш учун нафақат Ибн Арабшоҳ асарини, балки ўша даврга оид барча манбалардаги маълумотларни қиёсий ўрганиб хulosалар чиқариш жуда муҳимлигини ҳам ҳеч қаҷон унутмаслик керак.

— «Ажойиб ал-мақдур» баъзан муаллифнинг эҳтироси туфайли Шарқ ҳангомаларига ўхшаб кетади (жумладан, Темурнинг болалиги, қўй воқеаси сингарилар). Бироқ инглиз шарқшуноси X.A. Гиббнинг эътироф этишича, Темур ҳақида ёзилган «Ажойиб ал-мақдур» асари Ибн Арабшоҳ номини узоқ вақт Европада достон қилди. Демак, Европада ва баъзи бошқа элларда Соҳибқирон бобомиз ҳақида бир ёқлама тасаввур пайдо қилди. Сиз ҳозир ана шу тасаввур нечоғлик ўзгарди, деб ўйлайсиз?

— Дарҳақиқат, Ибн Арабшоҳ асарини ўрганган кўп-лаб тадқиқотчиларнинг фикрича ҳам бу асарга бир ёқлама баҳо бериш қийин. Муаллифнинг ҳаёт йўлига назар солинса, кўп масалалар қисман ойдинлашади. Ўн икки ёшлик Ибн Арабшоҳ Амир Темур томонидан 1401 йили ўз она юрти Дамашқдан Самарқандга келтирилиб, то 1408 йилгача бу шаҳарда яшаган. У Самарқандда сарой аҳлига яқин тоифалар жумласига кирган. Бу ерда у шаҳардаги катта илм даргоҳларидан бири бўлган Илику Темур мадрасасида ўша даврнинг машҳур олимлари Сайид Шариф Мұҳаммад ал-Журжоний, Шамсиддин Мұҳаммад ал-Жазарий кабилардан таълим олди. У турк (эски ўзбек) ва форс тилларини ҳам мукаммал ўрганди, Амир Темур ҳақидаги асари у Самарқанддан қайтиб кетгандан кейин, қарийб ўттиз йил ўтгач (1436—1437 йилларда) ёзилганини фикри кейинроқ пайдо бўлган. Орадан кўп йиллар ўтганлиги боис ҳам асарда чалкаш, ривоятга ўхшаб талқин қилинган маълумотлар, ҳақиқий воқеликдан четта чиқиши ҳоллари талайтина. Бундан ташқари, асарда муаллифнинг Амир Темурнинг шахсига нисбатан ишлатган айрим ҳақоратомуз, кескин иборалари унинг ўз қаҳрамонига бир қадар салбий муносабатини ҳам билдиради.

Мана шундай муносабатда бўлган муаллиф ўз асарида беихтиёр Соҳибқироннинг буюк даҳоси, мислсиз ақл-заковати, юксак ҳарбий салоҳияти, ҳар қандай масалада узоқни кўзлаб донишмандлик билан иш тутиши ва бошқа хислатлари ва фазилатларини тан олиб, шунчалик кўп маълумотлар келтирганки, шубҳасиз, бу фактлар Соҳибқирон ҳазратларининг инсон сифатида ҳам, салтанат соҳиби ва лашкарбоши сифатида ҳам нақадар буюк бўлганлигига далолатdir.

Амир Темурнинг ҳаёти ва фаолияти ҳақида Шарқ муаллифларидан Европа тилларига таржима қилинган биринчи асар ҳам Ибн Арабшоҳнинг тарихидир. Бу асар дастлаб 1658 йилда француз тилига таржима қилинган, бинобарин, европаликлар Амир Темур бобомиз ҳақидаги тўлиқроқ маълумотни Ибн Арабшоҳ асаридан олган. Инглиз шарқшуноси X.A. Гиббнинг фикрига келсак, Ибн Арабшоҳнинг номи «Европада достон бўлишида» ҳам айнан Амир Темур бобомизнинг ҳиссаси бор. Чунки европаликлар Ибн Арабшоҳга эмас, биринчи навбатда, Амир Темур ҳаёти ва фаолиятига қизиққан. Шу билан бирга Ибн Арабшоҳ асарини ўқиган европаликларда, албатта, Соҳибқирон ҳақида муайян тасаввур пайдо бўлган, лекин уни бирёклама дейиш ҳам унчалик ҳақиқатга тўғри келмайди. Чунки айнан шу асар орқали Европа халқлари Соҳибқироннинг инсоний фазилатлари, давлат арбоби ва ҳарбий лашкарбоши сифатидаги юксак салоҳиятидан воқиф бўлганлар.

Ибн Арабшоҳ асарининг таъсири остидаги тасаввурлар кейинроқ бошқа асарлар ёки таржималарнинг пайдо бўлиши натижасида бир қадар тарихий ҳақиқатга яқинлаша борган дейиш мумкин. Айни вақтда айтиш керакки, тарихий шахс сифатида Амир Темурнинг фаолияти собиқ шўро тузуми даврида ҳам бир томонлама, асосан, салбий баҳолангандиги ҳеч кимга сир эмас. Айрим олимларимизнинг (масалан, марҳум академик И. Мўминов) Амир Темур ҳақидаги ёзма манбаларга таяниб яратган холисона, илмий тадқиқотлари ҳам қанчалик танқидга учрагани ҳамон ёдимиизда.

— Ибн Арабшоҳ араб тилидан ташқари турк ва форс тилларини яхши билган, кўплаб асарларни (жумладан, Абулайс Самарқандийнинг «Тафсир»ини форсчадан назм билан туркчага) таржима қилган, ҳатто турк тили грамматикасига оид маҳсус асар ҳам ёзган экан. Кўп қиррали истеъдод соҳиби Ибн Арабшоҳнинг Шарқ, қолаверса, жаҳон маънавий-маданий дунёсидаги мавқеи ҳақида нима дейиш мумкин?

— Ибн Арабшоҳнинг қаламига мансуб ўндан ортиқ асарлар борлиги ҳақида манбаларда аниқ маълумотлар келтирилган. Унинг асосий асари шубҳасиз «Амир Темур тарихи» номли китобдир. Ундан ташқари ҳам муаллифнинг турли мавзуларга бағишлиланган асарларининг аксар қисми бизгача етиб келган бўлиб, уларнинг қўллэзма нусхалари турли мамлакатлардаги кутубхоналарда сақланади, кўпларининг замонавий нашрлари ҳам мавжуд. У тарих, тил ва адабиёт, одоб-ахлоққа оид асарлар ёзиш билан бирга турк ва форс тилларини ҳам мукаммал билганилиги боис унинг ижодида таржимонлик фаолияти ҳам катта ўрин эгаллайди. Муаллифнинг бу соҳадаги фаолияти, айниқса, турк сultonи Муҳаммад I нинг шахсий котиби сифатида хизмати пайтида кенг кўлам ёйди.

Мана шу пайтда у XIII асрда яшаган таниқли адаб Жалолиддин Муҳаммад Авғийнинг «Жавомиъ ал-ҳикойот ва лавомиъ ар-ривойот» («Танланган ҳикоятлар ва ёрқин ривоятлар») номли антологиясини бир неча жилда форс тилидан туркчага таржима қилди. X асрда яшаган самарқандлик машҳур фәқиҳ ва муфассир Абул Лайс ас-Самарқандийнинг Куръони каримга бағишлиланган «Баҳр ал-урум» номли тафсирини ҳам форс тилидан назмий услубда туркчага ағдарган. Умуман айтганда, Ибн Арабшоҳ XV асрнинг машҳур тарихчиси ва адаби сифатида нафақат Шарқ мамлакатларида, балки Ғарб оламида ҳам катта шуҳратга эга.

Шуларга биноан комил ишонч билан айтиш мумкинки, Ибн Арабшоҳ жаҳон илмий-маънавий дунёсида ўз ўрнига эга бўлган йирик сиймолардан биридир. У қолдирган хилма-хил мавзулардаги асарларни чуқур ўрганиб, ўзбек тилига таржима қилиш фойдадан холи бўлмайди.

— «Амир Темур тарихи» чоп этилган 1992 йилдан бери кўп нарса ўзгарди. Куръони каримнинг ўзбекча мазмуни таржимаси қайта-қайта нашр этилди. «Амир Темур тарихи»нинг янада тўлдирилган, мукаммаллаштирилган нашри пайдо бўладими?

— Юқорида айтилган фикрларимдан аёнки, менда Ибн Арабшоҳнинг «Амир Темур тарихи» асарига қизиқиш бундан қирқ йилдан кўпроқ вақт илгари пайдо бўлиб, ўшанда бу асарни ўзбек тилига таржима қилиш орзуси туфилган эди. Сўнгра, ўн йиллардан кейин асар таржимасини тегишли изоҳлари билан тутатиб, ундаги маълумотлар маълум даражада илмий тадқиқ этилди ва, ниҳоят, 1974 йили, яъни бундан роппа-роса ўттиз йил муқаддам шу мавзу бўйича фан номзоди илмий даражасини олиш учун диссертация ёқланган эди. Шундан кейин «Амир Темур тарихи»нинг ўзбекча таржимасини нашр этиш учун кўп ҳаракатлар қилдим. Лекин собиқ тузумнинг мафкуравий қолипларига Амир Темур ҳақидаги бирорта асар (гарчанд унга нисбатан танқидий руҳда ёзилган бўлса-да) мос келмас эди. Мен мурожаат қилган бир нечта нашриётларнинг мутасаддилари қўлёзмамни кўриб, «Катта иш қилибсиз, зўр манба экан, лекин Амир Темур ҳақидаги асарни нашр эта олмаймиз-да», дея афсусу армон билан турли-туман важ кўрсатган бўлардилар. Шукрлар бўлсинки, мустақиллигимиз шарофати билан ўтмиш мероси, тарихга, юртимиздан чиққан буюк шахслар, уларнинг ҳаёти ва фаолиятларига холисона, адолат билан баҳо бериш қарор топа бошлади. Бинобарин, Ибн Арабшоҳнинг «Амир Темур тарихи» асарини нашр этиш имконияти ҳам туфилди ва 1992 йил апрель ойида асарнинг таржимаси ва тадқиқоти ўша пайтда (1974 йилда) қандай ёзилган бўлса, шундайлигича, ҳеч бир ўзгартиришсиз, икки жилда чоп этилди.

Мавриди келганда айтиш керакки, истиқдол йилларида тарихга муносабат тубдан ўзгарди, мозийни илмий асосда объектив ёритиш учун катта йўллар очилди. Шу ақидадан келиб чиқиб, «Амир Темур тарихи»ни, айниқса, унинг тадқиқот қисмини қайтадан, тарихий воқеаликка замонавий руҳда ёндошиш мезонларига биноан кўриб

чиқиши жуда зарур. Мана шу мулоҳазаларга хулоса қилсанак, Ибн Арабшоҳ асарини янгитдан обдон кўриб чиқиб, тўлдирилган, мукаммал нашрини тайёрлаш фоятда муҳим. Чунки Ибн Арабшоҳнинг бу асари бой ва кўдна тарихи-мизнинг ёрқин саҳифаларидан бўлмиш Амир Темур ва Темурийлар даврини ёритишда асосий манбалардан бири сифатида бекиёс аҳамиятта эгалир.

2004 йил, март

ОЛИМ АДАШСА, ОЛАМ АДАШАДИ

Биз, ҳақиқатан, буюк маънавий мулк меросхўрларимиз. Бу ҳолни кўплаб шлмий тадқиқот маскаларида, олий ўқув куртларида ва бошқа маънавият жабҳаларида фаолият кўрсататётган минглаб илм аҳлини кўз олдимизга келтириб, яна бир бор тасдиқлашимиз мумкин. Ўнта бўлса, ўрни бошқа, деганларидек, ана шу алломалар сафида сухбатдошимиз — Тошкент ислом университетининг жаҳон динларини қиёсий ўрганиши кафедраси мудири, тарих фанлари доктори, профессор Аҳаджон ҲАСАНОВнинг ҳам муносаб мавқеи бор. У киши билан мулоқотимиз илмда комилликка эришиши хусусида бўлди.

— Аҳаджон ака, инсон фарзандига ато этилган касблар силсиласида олимликнинг мақоми, даражаси қандай?

— Бу ҳақда Шарқ ва Фарбда яшаб, ижод этиб ўтган донишманд уламоларнинг кўплаб ҳикматли сўзлари мавжуд. Аммо мен шу ўринда Тошкент ислом университетининг профессори сифатида масаланинг бир жиҳатига урғу беришни истардим.

Атеизм ҳукмрон бўлган собиқ совет тузуми замонида илм ва дин (айниқса, ислом дини) бир-бирига зид қўйилди. Ҳозирги кўпгина қотиб қолган ақидалардан воз кечажётган давримизда ҳолат батамом бошқача бўлгани янада ойдинлашди. Демоқчиманки, аксинча, ислом дини доимо илмни қадрлаб келган экан. Куръони каримда «илм» ва шу ўзак билан боғлиқ сўзлар 750 марта зикр этилган.

Ҳадислардан олимлик ҳақида кўп мисоллар келтириш мумкин: «Илм истаб Чингача боргин» (VII асрда Арабистондан Хитойга боришни тасаввур қилинг!), «Олимлар пайғамбарларнинг ворислари» ва ҳоказо. Фараз қилинг, агар ўрта аср мусулмон Уйғониш даври олимлари бўлмаганда жаҳоннинг бугунги ҳолати, хусусан, Фарбнинг тараққиёти батамом бошқача манзара касб этарди. Негаки, узоққа бормайлик, ҳатто қадимги юонон фалсафаси билан ҳам Фарб дунёси бевосита эмас, балки билвосита, яъни араб-мусулмон адабиёти орқали таниши. Бошқачасига айтганда, улар Аристотель ва Платон ҳақида юонон тилидан ластлаб араб, ундан сўнг арабчадан лотинга ағдарилиган адабиёт орқали маълумот олдилар.

Олим доимо олам ҳақида, унинг хотиржамлиги ҳақида ўйлади. Олим адашса, олам адашали, дейдилар. Айтишларича, 1945 йил августда Япониянинг Хиросима ва Нагасаки шаҳарларига атом бомбалари ташланганини эшигтгач, уларни ихтиро қилган олим бир зумда эс-хушини йўқотган экан.

Бизнинг юртимиизда азалдан олимлар ҳокимларнинг энг яқин маслаҳатчилари бўлган. Керак бўлса, Улуғбек мисолида давлатни бошқарганлар ҳам. Ҳуллас, олимликнинг мақоми ва вазифаси юксак деб ҳисоблайман.

— Узоқ йиллар хорижда ишлагансиз. Мусофиричилик йилларида илмга интилиш, илмга суюниш саодатини қайтарзда ҳис этгансиз?

— Ҳа, Мисрда 4 йил, Ливияда 3 йил ишладим. Сурия, Ливан, Саудия Арабистони, Туркия, Руминияда қисқа муддатли сафарларда бўлдим. Салкам 40 йил ўтган бўлсада, Мисрда яшаган пайтимни яхши эслайман. Иқтисодий масалалар бўйича маслаҳатчининг референт-таржимони, ҳали уйланмаган, бўйдоқ йигит эдим. Бир томондан қарасангиз, бошлиқнинг энг яқин кишиси сифатида идорада обрўйим баланд эди. Бошқа томондан — ягона араб тили таржимони бўлганим учун ходимлар (асосан, руслар) ишдан сўнг (соат 15⁰⁰ гача ишлардик) кимдир бозор, кимдир дўкон, яна кимдир кинога судрарди.

Йўқ, бу нарса Тошкент давлат университети ўқитувчиси шаънига тўғри келмайди, ледим-да, Миср миллий

кутубхонасига обуна бўлиб олдим. Ҳар куни ишдан сўнг у ерга бориб, қулёзмалар ва китоблар оламига фарқ бўла бошладим. Дарвоҳе, мактабдаги устозим, йирик тилшунос олим Қаюм ака Каримовга «Кутадгу билиг» ва дўстим Убайдулла Уватовга Ибн Арабшоҳнинг Амир Темур ҳақидаги нодир қўлёзмаларининг тўлиқ микрофильмини айнан шу кутубхонадан олиб берганман. Ишхонадагилар «Тузуккина одам эдинг, айнидинг», деб мендан норози бўлдилар ҳам. Мен уларга, «Илм билан шугууланялман, ёмонми?», десам жавоб бера олишмасди. Қисқаси, Мисрдан теплоходда қайтдим. Хоҳлаганча юқ олиш ҳуқуқим бор эди. 160 кг багажимнинг қоқ ярми китоблар бўлиби. Айни ана шу китобларни Одесса божхонасидан ўтказиш қийин кечди.

2000 йили қиблатоҳим — отам билан ҳаж зиёратига бордик. Умра амалини бажартган биринчи кунимииздаёқ «Масжидул-ҳарам» атрофида китоб дўконларини айланиб, 200 Саудия риёлидан ортиқ маблағга (60 АҚШ доллари-таңг) олтита китоб сотиб олдим. Отам: «Ҳа, болам-а, шу ерда ҳам, шу-у-нча гулга китоб олдингми-а?», дедилар. «Ҳа, отажон, бу керакли китоблар, улар бебаҳо» десам, «Майли, шу ердаки шундай қиляпсан, Аллоҳ ўзи сени қўлласин», деб дуо қилдилар.

Мусоғирчиликни бошдан кечирган киши яхши билади: чет давлатларда узоқ муддат яшаш-ишилаш, бу — ўзига хос бир дард. У осон кечмайди. Аммо саволни жуда тўғри қўйдингиз: мусоғирчилик йилларида илмга иктилиш, илмга суюниш нафақат дарднинг давоси, балки бу — ҳақиқатан катта баҳт-саодат!

— Ўзингизнинг олимлик даражасига эришишингиз (фан номзодлиги, фан докторлигини ҳимоя қилиш) босқичларини эсласангиз.

— Айни Миср кутубхонасига қатнаган кезларим номзодлик диссертацияси устида бош қотирдим. Ибн Арабшоҳдан бошқа 20 га яқин XIV—XV аср Миср тарихчиларининг кўп жилдлик, асосан, қўлёзма асаларидан Амир Темурга оид парчаларни (жами 600 бетдан ортиқ) микрофильмга олдим.

1969 йил ёзида Тошкентга қайтгач, мавзуни тасдиқлаш ва бевосита тадқиқот билан шуғулланиш учун бир неча илмий муассасаса раҳбарларига мурожаат қилдим. Аммо мен вазиятдан бехабар эканман — Амир Темур билан боғлиқ мавзу устида ишлашни менга лутфан «маслаҳат» беришмади. 1971 йили «бир оз аччиқ қилган бўлиб» Москвага, СССР ФА Шарқшунослик институти аспирантурасига ўқишга кирдим. Амир Темурга қарши фитнанинг айни учоғи шу институт эканини англагач, аспирантура муддатидан ярим йил йўқотиб, узоққа кетмаган ҳолда, ўша даврдан, аммо бошқа мавзу олдим: «XIV—XV асрларда Миср мамлук сultonлигининг ижтиёмий-сиёсий тузуми». Мисрдан кўтариб келган 80 кг китобларим асқотди.

Шу ўринда марҳум раҳбарим Н.А. Ивановни мамнуният билан эслайман. Москва шарқшунослари орасида «Иванов стили» деган тушунча мавжуд эди. Менинг ўша йиллари Москвада чоп этилган 2—3 мақолаларимда қисман шу стиль шаклланганини эътироф этишди. Бу, ишонинг, осон бўлгани йўқ; раҳбарим битта сўзнинг ёнига «ст.» (яъни стиль) деб белги қўярди-да, 4—5 марта гагача қайтарарди, аммо бирор марта ўзи тўғрилаб қўймасди. Бу мен учун ажойиб мактаб бўлди! Номзодликни 1975 йил апрелда Москвада ёқладим.

Докторликка келсак, у нисбатан осонроқ кечди, дейиш мумкин. Шуни қайд этиш жоизки, жамики арабшунос ва умуман, шарқшунослар, албаттга, ислом дини ҳақида тафаккур қиласидар. Шундай экан, беихтиёр исломдан олдинги араб жамиятининг тарихи, яъни Жоҳилия даври ҳақида ҳам тааммул қиласидар, ўйлайдилар. Халифа Умар ибн ал-Хаттоб «жоҳилиятни билмасдан исломни идрок этиб бўлмайди», деган эканлар. Аммо на Ўзбекистонда ва на собиқ иттилоғда бирор олим бу мавзуда комплекс тадқиқот олиб бормаган. Ливияда уч йил ишлаб қайтгач, 1986 йилдан эътиборан камина Тошдунинг шарқ факультетида Жоҳилия тарихи маҳсус курсини олиб бордим. Дастлаб маърузалар матни, сўнг назарий тадқиқотга айланган «Қадимти Арабистон тарихи ва уни ўрганиш муаммолари» докторлик диссертациясини 1994

йилда Ўзбекистон ФА Шарқшунослик институтида ёқладим. Ҳимоя пайтида ҳозир бўлган Мисрнинг Ўзбекистондаги элчиси сўз сўраб, тадқиқотга ажойиб баҳо берди. Ҳимоядан сўнг Бирлашган Араб Амирликларидан бир нашриёт ўз журналини менинг унвонимга бепул жўнатиб, мақолаларим билан қатнашишни таклиф этди.

— Сиз айнан олимлик йўлини танлаб адашмаганимиз? Илм билан шуғулланиш сизга нималар берди?

— Ҳа, адашмаганиман. Буни изоҳлаш қийин эмас. Гап шундаки, мен талабалик йилларим холам ва поччамнинг кўлларида турганман. Аллоҳ раҳмат қиласин, икковлари ҳам саховатли, бағрикенг, ажойиб инсонлар эдилар. Поччам билан ота-боладек эдик, холамни эса Ҳури опа деб атардим. Ана шу маҳаллада ҳамма қатори икки олим, ТошДУнинг икки доценти ҳам яшарди. Улар яашаш шароитлари, юриш-туришлари, муомалалари, хуллас, кўп жиҳатлари билан бошқалардан ажralиб туришарди. Мен уларга ҳавас қиласардим ва ўзимга ўзим аҳд қилгандим, албатта, мен ҳам шуларга ўхшаб доцент бўламан, деб. Худога шукр, ўша ниятимга етиб, ўтдим ҳам.

Илм билан шуғулланишнинг ўз хусусиятлари бор. Баъзилар мия чарчаб қолади, унга дам бериб туриш керак, деб ўйлайдилар. Мен ундан фикрда эмасман. Инсоннинг ҳамма аъзолари «чарчаши» мумкин, аммо мия чарчамайди. Аксинча, унга «дам» берилса, «занглаб» қолиши мумкин. Тинимсиз изланиш, ўз устида ишлаш, соҳа бўйича воқеа-ҳодиса, янги адабиётлардан воқиф бўлиб туриш — олимнинг ҳаёт тарзи, умр мазмунига айланиб қолади.

Илм билан шуғулланиш менга бир қанча асарлар ижод қилиш, шогирдлар етиштириш, жамиятда фаол мавқега эга бўлиш ва, ниҳоят, бу дунёда ризолик ва шукроналик билан яашаш имкониятини берди.

— Сиз айни пайтда умр мазмуни, ҳаёт йўли юзасидан хуносалар чиқарадиган ёшдасиз. Изингиздан келаётган ёшларга нималар деган бўлардингиз?

— Илму заҳмат йўлини танлаётган ёшларга нима ҳам дейиш мумкин? Албатта, бу борада тайёр тавсия ёки рецепти йўқ. Қанча олим бўлса, шунча йўл бор.

Мен, масалан, мактабда, университетда, аспирантура-да устозларимдан максимал билим олдим. Ўрта мактабда менга сабоқ берган она тили, рус тили, тарих, чет тили ўқитувчиларини фахрий профессор, ҳатто академиклар деб атаган бўлардим. Университетдаги устозларим Л.М. Мақсадов, Г.Б. Никольская ва бошқалар жаҳон ан-дозаларидағи олимлар эди. Фарб олий ўқув юртларида бекорга ихтиёрий ва мажбурий предметлар қўйилмаган. Талабалар у ёки бу предмет ва домлани танлаш ҳуқуқига эга. Ўқитувчи сабоқ берали (русча «преподаёт»), талаба эса уни қабул қилиб олади (арабча-ўзбекчада — толиб, талаб қилувчи). Умуман, ҳар бир ўқитувчининг «зўр» томони бўлади. Ана шундан унумли фойдаланиш керак. Бу — биринчидан.

Иккинчидан, илмий иш, бу — барча бошқа соҳалар каби қунт ва аниқ режа асосида бажариладиган меҳнат фаолияти. Бир-икки ойда диссертацияни ёзиб ташлайман, ярим йилда ёклайман, деганлар илмий иш билан шуғулланмагани маъкул. Аспирантурага кирмасдан ёки тадқиқотчи сифатида кафедрада тасдиқланмасдан олдин, иложи бўлса, талабалик йилларидаёқ илмий йўналиш аниқланиб олинмоғи лозим.

Ҳозир информацион технологиялар мисли кўрилмаган даражада ривожланаётган пайтда, албатта, фан иқтисодий тараққиёт билан мувозий равишда боради, аниқ фанларнинг аҳамияти катта бўлиб қолаверади. Аммо, асосан, пул-кредит муносабатлари, банк операциялари ҳисобига охирги пайтларда кескин ривожланган Жануби-шарқий Осиё давлатлари мисоли шуни кўрсатдики, мустаҳкам иқтисодий барқарорликка фақат бу йўл билан эришиб бўлмайди. Табиий захиралар ва бевосита ишлаб чиқаришга асосланган иқтисодга эга жамиятлар узок барқарор ривожланишида бўладиларки, бунинг ёрқин мисоли Хитойдир. Ўзбекистон ҳам ана шундай имкониятларга эга давлат. Демак, Ўзбекистонда ҳам яқин келажакла илмий форя ривожланган мамлакатлардаги каби юксак қадр-қимматга эга бўлади.

Бевосита ўз илмий соҳамга қайтсан, яқин келажакда Ўзбекистонда барча гуманитар йўналишларда илмий изла-

нишларнинг аҳамияти катта бўлади, зеро биз ўтиш давридамиз. Бу эса қотиб қолган стереотиплардан воз кечиш, янги концепцияларни илгари сурини тақозо этади.

2005 йил, июнь

ОШО ҲАҚИҚАТЛАРИ

Ошо — Багван Шри Раджниш ҳозирги замон ҳинд фалсафа мактабининг вакилларидан бири. Багван Шри Раджниш номига тақалган «Ошо» нисбаси «океанга монанд», «мурувватли» сингари маъноларни билдирад экан. Унинг «Философия Переннес» («Боқий фалсафа») китобида (Москва, «Нирвана», 2002) Ҳиндистоннинг Пуна шаҳридаги коммунада 1978 йил 21 декабрдан 1979 йил 10 январгача ўтказган сұхбатлари жамланган. У тингловчиларнинг саволлари ва унга Устознинг жавобларидан иборат.

Ҳозирги замонда жуда кўп рекордлар қаторида бир натижа ҳам қайд этилган: олимларнинг кўплиги жиҳатидан Ҳиндистон дунёда биринчи ўринда турад экан! Бу маълумотни ўқигач, табиий савол тугилади: бунча кўп олим нима иш қиласи? Ундан кўра қўши ҳайдаб дехқончилик қиласа бўлмайдими, аҳолининг «моддий фаровонлигини муттасил яхшиланиб боришига» ҳисса қўшган бўларди? Агар сиз Ошонинг китобини ўқисангиз, бутунлай тескари хulosага келасиз: олимнинг хизмати одамзод учун дехқондан кам наф бермас экан. Бундай тўхтамга олиб келадиган сабаблар эса китобдан кўп топилади. У ақи ва қалбга «тўйимли» озуқа беради.

Тўғри, китобда ўткир муаммолар, қизиқарли ҳикоялар қаламга олинмаган. У (номидан кўриниб турибди) азалий мавзулардан баҳс юритади. Ўзи, ҳозир қайси мавзу жуда ҳаммабоп ёки, иккинчидан, биз бу қадим дунёning жами сир-асрорига тушуниб етдикми? Ошо ана шу қадим ва оқсоқ дунё сир-асрорлари ҳақида фикр юритали, ҳамма кўриб, билиб юрган нарсалар ҳақида ҳали ҳеч ким кўрмаган, англамаган сирларни очади.

Суҳбатларда қадимги юонон файласуфи(ва математиги) Пифагорнинг «Олтин шеърлар»и эпиграф ва далил қилиб олинади. Ошо Пифагорга — ўша тўғри бурчакли учбурчак ҳақидаги машҳур теореманинг муаллифига жуда юқори ихлос билан қарайди ва уни одамзод тарихида биринчи марта иложсиз нарсаларга ечим топмоқчи бўлган ва буни эплаган инсон деб таърифлайди. Пифагор шахсида Шарқ ва Фарб, эркак ва аёл, оқ ва қора бирлашиб кетган эди, дейди Ошо. Ўз мезонларидан келиб чиқиб, Пифагорни шоир, олим ва зоҳид (мистик) деб таърифлайди. «Пифагор дунёга жуда эрта келиб қолган эди, — деб ёзади у, — унинг ташрифига ҳали одамзод тайёр эмас эди».

Лекин суҳбатлар асносида файласуф муаллимининг соясида қолиб кетмайди, балки ҳар қандай мавзуга ёндошганда ўз ҳукмини билдиради. Унинг фикрлари ҳақиқий фалсафа илмини чуқур ўрганганд, христиан, ислом ва будда таълимотини ўз дунёқарашида уйғунлаштира олган, кенг қамровли тафаккур, чуқур билим ва мушоҳадали олимнинг борлиқقا муносабатидир. Услубнинг ентилиги, қиёсларнинг ёрқинлиги, мисолларнинг ҳаётийлиги мурракаб фалсафий қоидаларни тушуниб олишни осонлаштиради. Енгил ва завқли мутолаа кишини таниш йўллар орқали нотаниш манзилларга олиб боради, нарсаларнинг ҳозиргача идрок этилмаган хоссалари очилиб бораверади ва охирида шу таниш дунёда бутунлай янги, кўрилмаган оламни кашф этгандек сезади одам ўзини.

Қайд этилганидек, мазкур суҳбатлар ўтган асрнинг сўнгги чорагида — 1978-79 йилларда бўлиб ўтган ва янги минг йиллик остонасида Ошо огоҳ этадики, одамзоднинг шу 25 йилликдаги феъл-атвори келаси минг йилларнинг табиатини белгилаб беради. Инсон зурриёди ҳозирги цивилизация давомида жуда кўп бемаза ишлар қилди, уч минг йилда 5 мингдан зиёд қирғин-барот урушлар содир бўлиб, миллионлаб одамлар завол топди. Табиатга зуғум ўтказилиб, унинг мөъёrlари издан чиқди. Тупроқнинг ҳосилдорлиги кескин камайиб кетди. Одамлар бир-бирларига нисбатан ёвузлашиб қолдилар. Агар янги минг йиллик арафасида инсоният ўз ёмон қилиқларидан иложи

борича холи бўлмас экан, Пифагоргача 2,5 минг йил олдин юз берган фалокат — Атлантида қуруқлигининг сув остида қолиши (ҳозир унинг ўрнида Атлантика океани пайдо бўлган эмиш) сингари кўргулик юз бериши мумкин.

Хуллас, китобда жамланган суҳбатларга мавзу бўлган саволлар ранг-баранг. Уларнинг ҳар бири ҳақида батафсил фикр юритиш мумкин. Биз бу ўринда кўпчилик учун қизиқарли бўлган «ИНСОН» тушунчасига Ошонинг қарашларини келтириб ўтишни танладик. Зеро, Ошонинг фикрлари ҳам мутлақ ҳақиқатни қамраб ола олмайди, у ҳам олим сифатида маълум мактаб вакили ва аниқ бир оқимга мансуб (масалан, «Либос ахлоққа хос эмас» деган фикрни турлича шарҳлаш мумкин). Ана шундай ўзига хос ёндошувлардан хабардор бўлиш эса ҳар бир ўкувчидаги борлиқни янада мукаммалроқ идрок этишда янги уфқлар очиши мумкин. (Агар инсон борлиқни тўла идрок эта олганда эди, суҳбатдошининг ошқозонида қандай жараён кечаетганини кўриб турарди. Билиш — шу йўлдаги саъй-ҳаракат, холос).

Суҳбатлари асносида Ошо инсониятнинг жуда кўп намояндаларини тилга олади: аввало, Пифагор, шу қаторда Исо, Мұхаммад (с.а.в.), Будда, Конфуций, Мулла Насрилдин, Фарҳод ва Ширин, Патанжали, Фрейд, Дельгадо... Уларни турлича истифода этади: биридан мисол келтиради, бошқасини ибрат қилиб кўрсатади. Умуман эса инсон мўъжизасини дунё мавжудлигининг икки шарти: тун — кун, ибтидо — интиҳо ва ҳоказо учрашган, кесишиган тутун сифатида таърифлайди: «Инсон — икки қонуниятнинг учрашуви демакдир: зарурат қонуни, куч қонуни». Одатдаги турмуш тарзи зарурат қонуни билан бошқарилса, одамнинг бу даражадан юқорига интилиши куч қонунига мансуб бўлади. Заруратлар миянинг чап ярим шарида мужассамлашган бўлиб, ўнг қўл унга бўйсунади, унинг фаолиятига мантиқ билан иш тутиш, ҳисоб-китоб, илм-фан, арифметика сингари аниқ фаолият турлари мансубдир. Интиуция, руҳий қувват, медитация, севғи, шеърият сингари туйғулар миянинг ўнг ярим шаридан қўзғалиш олади, чап қўл воситасида воқе бўла-

ди ва куч қонуни билан бошқарилади. Инсонда ана шу икки қутб ёнма-ён яшар экан, ҳар доим улар уйғунликда фаолият кўрсатавермайди. Мия шарлари бир-биридан бехабар қолиб кетиши мумкин бўлганидек, куч қонуни кўплаб инсонларда умуман амал қилмайди. Худди шу ҳолатдан келиб чиқиб, инсон вужудида тана — рух, ер — осмон, қуллик — эркинлик, аён — ноаён, ошкор — сир... учрашган чиқади. Уларнинг биринчи тарафи зарурат қонуни асосида амал қиласверади: одам истаса-истамаса тана эҳтиёжи билан яшайди: муттасил ерга интилади; қуллик кайфияти ўраб олган; аён нарсалар билан кифояланади, камёб нарсаларни билишга ҳафсала қиласвермайди...

Ошо бутун мулоҳазалари давомида ана шу икки қутбли ўлчамни маҳкам ушлаб олади ва барча фикр-хуносаларини шу тизимга боғлайди: ақл — зарурат қонуни ашёси. Куч қонуни ашёси эса интиуция. Ақл ҳосиласи — фан (илм), интиуция эса динни юзага келтирган. Фан кашфиётлар қилишга ожиз, унинг хуроса-натижалари ниҳояти амалиётда асқотади. Ҳақиқий кашфиётлар интиуциянинг маҳсули, кашфиётлар илоҳийдир. Ялакат хуроса эса — нажот диннадир. (Ошонинг бу хуросаси иккинчи тараф (фан)ни инкор этмайди, бу унинг принципига зид («агар юқори тушунчалар билан ишласанг, қўйилдаги тушунчалар эргашади»), аксинча, ҳозиргача фан ва дин ўртасида ихтилоф солиб келганларни қаттиқ қоралайди. У айтмоқчи бўлган фикр — дин фан (илм)дан юқори туради!).

Ҳақиқатнинг ҳам Ошо наздида ўз таърифи бор ва «тана ҳақиқати зарурат қонунига, қалб ҳақиқати эса куч қонунига хос». «Инсон, — дейди у, — ана шу икки абадийлик ўртасига тортилган арқон, дин эса дорбозлик санъатидир».

Инсонни вертикал ҳолда икки қутб туташуви, деб талқин қилган файласуф унинг горизонтал ҳусусиятлари (бу иборалар шартли бўлиб, уларни биз Қўлладик)ни ҳам кўрсатиб ўтади. Ошонинг фикрича, одам уч ўлчамли мавжудотдир. У умри давомида шу ўлчамларнинг бири ёки иккиси доирасида қолиб кетиши мумкин. Бундай ҳолда унинг ҳаёти мукаммал бўлмайди. Агар одам уч ўлчамни

ҳам қамраб ололса, ҳаёти тўқис бўлади. Биринчи ўлчов аниқ маълум, у моддий кўринишга эга. Уни ўлчаш мумкин: бу математика олами, фан олами. Иккинчиси — ички ўлчам, аниқ кўринмайди, мавҳум, губорли, сирли. Бу тонг гира-ширасига ўхшайди — кундуз ҳам эмас, кеча ҳам эмас, уларнинг ўртаси. У моддийлик ва руҳоният орасида яшайди. Бу — шеърият, санъат олами. Учинчи ўлчам — бутунлай кўзга кўринмас. Уни ҳали ҳеч ким кўрмаган ва кўрмайди ҳам, чунки у қаровчининг моҳиятидир. У ҳар доим гувоҳ, лекин унга гувоҳ ўтилмайди. Уни ҳеч қачон ташқаридан изламанг, у сизнинг ичингиздадир. У фақат кузатади, бироқ кузатилмайди. Бу — зоҳидлик олами. Демак, мукаммал одам — ҳам олим, ҳам шоир, ҳам зоҳид (мистик). Пифагор мукаммал одам бўлган, у авлиё эди.

Тингловчилардан бирининг: «Сизнинг мақсадингиз — бизнинг психологик ўсишимизни эмас, маънавий (руҳий) ўсишимизни таъминлаш. Бу иккаласининг қандай фарқи бор?» деган саволига жавоб берар экан, файласуф инсон ҳақидаги тасаввурларни кентгайтиради. «Одам — уч қаватли бино: тана, ақл ва рух, — деб гап бошлайди Ошо, — тана фақат бадандан иборат. Ақл ақлга хос ва танага хос таркибдан тузилган. Рух эса уч бирликни ҳам қамраб олади. Юқоридаги пастни ушлаб туради», аксинча эмас — паст юқорини бошқара олмайди. Бу, файласуфнинг таъкидлашича, эсда сақлаб қолиш керак бўладиган энг муҳим қонунлардан бири. Агар юқорини инкишоф этсангиз, паст ўз-ўзидан эргашади. Агар пастни бошқарганингизда юқори унга бўйсунмаган бўларди. «Шунинг учун мен сизнинг ақлий (психологик) ўсишингизни эмас, руҳий юксалишингиизни кўзлаялман. Агар ақлингиз билан ишлаганимда руҳий дунёнгиз назоратсиз қоларди. Farb нуқул ақлга зўр бериб, хатога йўл қўйиб келди. Бу жиҳатдан инсон руҳини тарбиялашта сафарбар этилган Шарқ услуби жуда илғор».

Ошо тасаввуридаги мукаммал инсон тимсолини тавсифлар экан, унинг даврида бундай зотлар йўқлигидан афсусланади. Бу ҳолнинг юзага келишида жуда кўп сабабларни кўрсатади. Хусусан, унинг дин арбобларига эътирози кучли. Агар диндаги одамларни диндорлар, деб ата-

сак, дин тартибларини жорий қилиш, назорат этиш ва шу воситада тирикчилик ўтказадиган кишиларни дин амалдорлари (әрбоблари) деб аташ түгри бўларди. Демак, олим диндорларга эмас, дин амалдорларига таъна қиласди: «Поплар ҳар доим золим бўлғанлар». «Коҳинлар ва сиёсатчилар инсоният устидан ҳукмронлик қилиш мақсадида мудҳиш келишувга эришдилар: улар одамни кўркувга гирифтор қилдилар».

Хуллас, ҳокимият васваси (ҳукмронлик иштиёқини Ошо қаттиқ қоралайди, ҳамма ҳокимиятдан маҳрум қилинган аёлларнинг «тарбияловчилик» вазифасига ўтиб олганини ҳам ҳокимиятга интилиш жазаваси, деб атайди ва бундай аёлларни нафрлатлади), манфаат аралашгач, турли ярамас ислоҳотлар туфайли инсоннинг эркинлигига путур етди. Инсонни бу баҳтдан мосуво этиш Яратганинг иродасига қарши исёндир, дейди Ошо, негаки у она қорнидан ёргуғ оламга қўл-оёғи озод ҳолда ташриф буюради. Турли тақиқларга дучор бўлган инсон фарзанди мустақил фикрлаш қобилиятидан ҳам маҳрум бўла бошлиди ва оқибатда гомосипиенус (одам) тимсоли гомомеханикус (гуманоид)га айланаб борди.

Гуманоид шундай мавжудотки, унга ўзини исташ (излаш) тақиқланган ва у қўлсиз-оёқсиз мундига айланган. Шу туфайли у ҳар доим ўзига йўл кўрсатувчи бирор одам излайди. Гуманоид нима қилиш-қилмасликни кўрсатиб турувчи қаттиқкўл (мустабид) одамга муҳтоҷ. У масъулиятдан қочади, миясини ишлатишдан кўрқади ва шунинг учун қул ҳолатида мутеъ бўлишни яхши кўради. Фикрлаш — гуманоид учун азоб, бу унга ортиқча ташвиш келтиради. У ҳеч бир қарор қабул қилолмайди, у хато қилиб қўйишдан кўрқади. Гуманоид шундай одамки, у ҳеч қачон йўргагини тарқ этолмайди ва у доим отасини излаб, унга кўз тикиб ўтиради. Гуманоид бирор нарса рўй беришидан ўлгудек кўрқади, унга ҳар ишда кафолат керак. Бирор унга йўл кўрсатиб турса, у шу издан кетса кифоя. У фолбинга, ромчига бориб, толеъини билмоқчи бўлади, мабодо, айтилганлар тўгри чиқмаса ўзи эмас, фолбин адашган бўлиб чиқади.

Гуманоид — ўз-ўзини англашдан йирок, ўзи кимлиги ҳақида тасаввурга ҳам эга эмас. Унинг тасаввурлари ўз қобиги даражасида бўлиб, улар ҳам бошқа гуманоидлардан юққан. Гуманоид шахсий майлларини сафарбар қилишга қобил эмас, у исташ, яшашга қобил эмас. Бу қарамлик ҳодисаси, у ўз эркини йўқотган. Гуманоид — руҳан щикаста одам. Ер юзидаги жуда кўп инсонлар руҳан щикаста.

«Дунё бундай одамларга тўлиб кетган, — деб афсусланган экан Ошо, — улар одам эмас, улар одамзод наслидан эмас, улар қўй бўлиб қолишган. Гуманоид — қўй, гуманоидлар — чорва подаси. Сиз қўй подасини кўрганмисиз? Бир-бирига қапишиб олиб, қалтираганча сурилади. Ҳаммаси қўрқув ичиди. Гуманоиднинг асосий кишини — бу қўрқув кишани. Сиз бошданоқ минглаб қўрқувлар билан заҳарланган эдингиз: дўзах хавфи, одобсизлик хавфи, омадсизлик хавфи... Буларнинг ҳаммаси сизни қўрқитди, сиз қўрқоқ бўлиб қолдингиз».

Файласуф бундай ҳолнинг юзага келишини атрофлича изоҳлайди. Айниқса, одамзоднинг мувозанатни йўқотиб, бир томонга оқиши кўп салбий ҳолатларга олиб келганини таъкидлайди. Масалан, фан ва дин бир умр бир-бирига душман бўлиб келди, бир-бирига қарши курашди. Ҳолбуки, улар ҳамкорликда бўлганида, аввало, ташвишлар камайган, кейин эса кўплаб муаммолар ўз ечимини топган бўларди. Аслида, зоҳирий (ташқи) билимлар фан (илем), деб аталса, ботиний (ички) билимлар диндир. (Нарсаларнинг ташқи хусусиятини ўрганганди олим кишиси — олим, нарса ва воқеликнинг ички моҳиятини ўрганганди олим эса ҳаким деб юритилган). Ташқи хусусият ва ички моҳиятни ажратиб текшириб бўлмаганидек, фан ва динни ҳам ажратиб бўлмайди. Фан динга фақат ёрдам бериши мумкин; дин эса фан учун ботиний билимларга асос тайёрлаб беради.

Файласуф ўтган йиллар сабогини сарҳисоб қилас экан, янги минг йиллик арафасида ўз шиорини шундай изҳор этади: «Менинг одамзодга мурожаатим шундай: бир-бираидан ажратилмаган, бирлашган, комил одамни яратинг».

Ошо таърифича, янги одам — гомоновус ҳаммабоп бўлиши лозим. У барча тўсиқлар — ирқ, дин, ранг, жимога кўйилган чекловларни четлаб ўтади. Янги одам Фарбга ҳам, Шарққа ҳам мансуб эмас, у Ерни ўзининг ягона уйи, деб билади. Янги одам зоҳиран ва ботинан бой бўлади, унинг шахсида ички ва ташқи бойлик уйғуналашиб кетади, улар бир-бирини рад этмайди. Бу зот фан ютуқлари орқали ташқаридан, диний билимлар воситасида эса ичдан бой бўлади...

«Боқий фалсафа» китобида ҳар ким ўзича ўйлаб кўрадиган, мағзини чақадиган маънолар кўп. Муаллифнинг ўзи таъкидлаганидек, «Ўтмишдан воз кечиш эски кийимни ташлаш каби жўн нарса эмас, балки бадандаги терини шилиб олишдек оғриқли юмуш». Демак, одамзод ўтмиш хатоларидан аста-секин холос бўлиб, минг йиллар давомида порлоқ орзулар манзилини кўзлаб яшайверади-да.

2005 йил

РУМИЙ ЎТГАН ЙЎЛ

Муazzам Шарқ кўплаб буюк даҳоларга бешик бўлган. Бу мўътабар зотларнинг исмларини шунчаки қайд қилиб ўтганда ҳам саҳифалар тўлиб кетиши шубҳасиз. «Нур — Шарқдандир» деган эътироф ана шундандир. Шарқнинг улуғ фарзандлари қаторида Жалолиддин Муҳаммад Румий Балхийнинг алоҳида ўрни бор.

Тоза палакларда туп ёзган Жалолиддинни тақдир етарлича сийлаган. У кўз очган хонадан теварак-атрофда машхур, узоқ-яқиндан кўплаб маърифат талабларнинг орзу-сидаги даргоҳ эди. Умр йўллари уни даврининг буюк инсонлари билан юзма-юз қилди. Воизликлда юксак мақомга эришиб, сўз сеҳрини шеъриятда тўла намойиш этди. Руҳий ва моддий дунё синоатларини ўз тафаккурида қайта кашф қилиб, олам асрорини инкишоф этишнинг янги йўлини асослади: Мавлононинг қарашларини муридлар тартибга солиб, тасаввуфда янги тариқат — «Мавлавия» сулукини тақдим этдилар. Гарчи бир пайтлар «Хеч

қачон ўзимда шеъриятга майл сезмаганман ва менинг на-
заримда ундан баттар машғулот йўқ», деган бўлса-да,
оташин илҳом қанотида ўтли мисралар яратди. Мисралар-
ки, тафаккурнинг теран қатламларидан баҳс юритарди:
унинг бир байтига 20 варақ шарҳ ёзилган.

Жалолиддин Румий моддий оламдан руҳ дунёсига кўта-
рила олган, тил билан ифодалаб бўлмайдиган борлиқни
кўра оладиган, ҳис қила биладиган ва мавҳум тушунча-
ларнинг суратини чизишга қодир даражага етган эди.
Инсоният учун ато этилган бу Инсоннинг ҳаёт йўлига
разм солиш кўплаб саволларга жавоб берса, ажаб эмас.

0-15 ғурун

Хоразмшоҳлар салтанатининг муҳим нуқталаридан бири,
Хитой ва Ҳиндистондан, Эрон ва Мовароуннаҳрдан ке-
ладиган карвон йўллари тугашадиган Балх ўша пайтда гул-
лаб-яшнаган шаҳар эди. Шаҳарнинг яна бир ифтихори —
унда машҳур олим ва воиз Муҳаммад ибн Ҳусайн ал-Ха-
тибий — Баҳовуддин Валал яшар эди. Унинг тушига пай-
ғамбаримиз Муҳаммад (с.а.в) кириб, олим иқтидорининг
эътирофи сифатида уни Султонул Уламо (олимлар султо-
ни) деб аташни амр этган эдилар. Султонул Уламо ислом
илоҳиётшунослиги, Куръон тафсири ва ҳадислар шарҳи-
дан мадрасада дарс берар, унинг «Ал-Маориф» китоби
жуда машҳур эди. Онаси Муҳаммад Хоразмшоҳ (Султон-
шоҳ Маҳмуд (1172—1193) бўлиши мумкин)нинг қизи
эканлигиданми ёки машҳурлиги боисми, саройга яқин
бўлган.

Ана шу оиласда ҳижрий 604 йил рабиул-аввал ойининг
6-сида, мелодий 1207 йил 30 сентябрда Жалолиддин Ру-
мий таваллуд топган.

Бу пайтлар Хоразмшоҳлар салтанатида парокандалик
белги бера бошлаган давр эди. Жумладан, Аловиддин Му-
ҳаммад Хоразмшоҳнинг онаси, ақдли ва қатъиятли Тур-
кон хотун атрофида уюшган ҳарбий зодагонлар илм-маъ-
рифат вакилларига қарши фитна қўзғашга уринишаётган
эди.

Табаррук оиласа түғилган Жалолиддин тарбияси илмурфон нури билан чулғаб олингани шубҳасиз. Хокисор, меҳрибон она — Мўмина хотун гўдак бошида парвона, фақат унинг бошқаларникига ўхшамаган қилиқларини шарҳлашга ожизлик қиласди. Бир қуни 4—5 ёшларида том четида ўтириб, фалакка парвоз қилишни хоҳлади, қўлларини ёзиб, бир зум ўзини бўшлиқда ҳис қиласди. Унинг бу ҳолатини руҳоний алломалар: «Ўшандада ҳақиқатан Жалолиддин кўкка парвоз қилган», деб изоҳлашса, моддиянчилар: «У пастга қулаб, ҳушидан кетди», деб таъкидлайдилар. Нима бўлганда ҳам боланинг вужудида ердан кўтарилиш — жами инсонлар пойандада бўлган тупроқдан баландда туриш, самога интилиш туйғуси барқ уради ва бу ҳис тобора кучайиб борди. Кейинчалик илҳоми жўш урганда чарх уриб рақсга тушар, шунда, эҳтимол, бир зум ўзини озод сезарди. Рубоийларидан бирида мана бундай деб ёзиши ҳам бежиз эмас:

Мен зарраман, қюёшлик ойим сенсан,
Бемор ғамингману давойим сенсан.
Учмоққа қанот йўқ, vale учтаймен,
Сомон бўлибман, оҳанрабойим сенсан.

Саройда эса фитна аяж оларди. Ниҳоят, диний масалаларда бир-бирига ашаддий рақиб бўлган Султонул Уламо билан ақидапараст мутаассиб Фахриддин Розий бутунлай душманга айланди. Аъёнлар Розийнинг тарафида бўлишди, унинг фатволарини қўллаб-кувватлашди. Бу ҳол оғир кўргуликларга олиб келли. Хусусан, ифво туфайли машҳур шайх Маждиддин Бағдодий фожиали қатл этилди (1209). Султонул Уламо ва Маждиддин Бағдодий бир пайтда Нажмиддин Кубро даргоҳига қадам қўйиб, мурид бўлишган, муборак хирқани ҳам шайхнинг қўлидан кийишган эди.

Ҳадидан ошаётган Мұҳаммад Хоразмшоҳ муқаллас ақидаларни ҳам писанд қилмай қўя бошлади. Бағдод халифаси Носирга мактуб йўллаб, пойттахт масжидларида ўз номига хутба ўқитишни талаб қиласди. Бу бутун халифаликни ўз тасарруфига киритишга шаъма эди. Ҳолбуки,

Аббосийларнинг то қиёматгача тахтга ўтириши Мұхаммад алайҳиссалом томонидан иноят қилинганди.

Айни пайтларда Чингизхон галалари чигирткадек яқинлашиб келар, Хоразмшоҳлар давлатининг шарқий чегараси ҳисобланмиш Ўтрор остоналарида турарди. Мўғуллар 450 мусулмон савдогарни элчи сифатида йўлладилар. Ҳиссиятга берилган ва келажакни кўра билмаган Хоразмшоҳ жами савдогарларни қиличдан ўtkазишга амр қилди, 500 туядаги қимматбаҳо буюмларни Ўтрор ҳокими Иланчик шоҳга тортиқ қилди.

Тушида сарвари коинот — Мұхаммад алайҳиссаломни кўриб, шарафланган Баҳовуддин Валад — Султонул Уламо кетма-кет содир этилган уч катта гуноҳ — шайхнинг ўлдирилиши, халифага таҳдид солингани, элчи савдогарларнинг қатли ом этилишларини тафаккур кўзгусига солиб кўрди ва салтанатга мислсиз бало яқинлашиб келаётганини ҳис қилди. Уламо ва шайхлар ҳам муқаррар қойим бўлажак илоҳий жазо ҳақида каромат қила бошладилар. Бу жазо эса тенгсиз қулратга эга бўлган Чингизхон қўшинидан келиши ҳам сир эмас эди.

Хуллас, бошланиб кетган буҳрон олдида ўзини ожиз сезган Султонул Уламо Хуросонни тарқ этишга аҳд қилди. Оила аъзолари, муридлари қуршовида кўч-кўронини ортиб, Балхдан чиқишиди.

Манбаларда бу сафар йўлининг ниҳоятда оғир ва узок бўлгани қайд этилган. Олдинда мусоғир манзиллар, бегона юртлар — мавҳум тақдир кутиб турар, пешонага ёзилганини тасаввур қилишга ақл ожиз эди. Номаъумлик сари йўл олган карvon Балхдан чиққач, Мовароуннаҳр мулкини азимат қиласи, Амудан ўтиб, Термизда, ундан сўнг Самарқанд манзил қуради. Ҳусусан, ички низоларни бостиришга жадал киришиб кетган Мұхаммад Хоразмшоҳ 1212 йилда Самарқанд ҳукмдори Султон Усмон билан жанг қилиб, шаҳарни эгаллаганда уламо оиласи билан шу ерда эди. Уларнинг Самарқандда қанча яшагани аниқ эмас, бироқ болалик хотиралари Жалолиддин қалбини мангу тарқ этмаганини улкан ижодида бу шаҳар номини бот-бот эслаб турганидан, ҳатто «Маънавий маснавий»даги бир ҳикоят Самарқанд билан боғлиқ-

лигидан билиш мумкин. Ўша ҳикоятда васф этилишича, ишқ дардига чалинган бемор қизнинг ошиғи самарқандлик заргар йигит бўлиб чиқади. Буни табиб томир уришидан аниқлайди. Колаверса, Жалолиддин улғайтач, Лоранда шаҳрида савдогар Шарафиддин Лоло Самарқандий хонадонига куёв бўлди, эҳтимол бундай ечим юртдошлиари меҳрини юрагида жойлаб яшаётган отанинг иродаси билан амалга ошгандир.

Мовароуннаҳр ҳудудларида ҳам бухрон бошланганига ақли етган ва осойишталик бўлмаслигини сезган карвон Амудан қайтиб ўтган кўринади ва дастлаб Бағдодда, сўнгра ҳаж амалини адo этиш учун Маккаю мукаррамада бўлишади. Дамашқда бироз муддат яшашади.

Бу пайтда Кичик Осиёнинг сиёсий харитаси ранг-баранг, олакуроқ бўлиб, Хоразмшоҳлар, Бағдод халифалиги билан ёнма-ён унинг марказида Салжуқийлар бошлиқ Рум сultonлиги (1077—1307) Кунё (қадимги Икониум)-ни пойтахт қилиб, шиддат билан ривожланаётган эди. Салжуқийлар, айниқса, Аловиддин Қайқубод I (1219—36) ва Фиёсиддин Қайхисрав II (1236—45) ҳукмронлиги даврида шу ҳудудда етакчи мавқе кашф этганди. Умид осойишта ва фаровон туркий сultonлардан эди-ю, фақат уларнинг муносабати аниқ эмасди.

Хурросон таҳлика ичida қолганди. Балхдан чиқсан карвон ҳам ором билмасди. Ҳатто арининг ҳам уяси бузилмасин экан. Улар Ҳижоз ва Шом бўйлаб йўл тортишарди. Шунда закий инсонлар отасининг изидан эргашиб бораётган Жалолиддинни кўрсатиб, «Уммоннинг денгиз ортидан боришини кўрин!» деган экан. Ўткир назарлар ёш ўғлоннинг келажагини адашмай башорат қилишарди. У ана шу ёшида Куръонни ёд билар, ҳадис илми ва шариат қонунларини ўзлаштирган, араб тили грамматикасию шеър тузилишини тўла ўрганган, улуғ шоирларнинг асарларини мутолаа қилиб, бенуқсон тушунарди.

Мърифати барқ уриб турган ўсмирни улуғ шоир Фаридиддин Аттор ҳам кўргач, идрок этди.

Уларнинг карвони Нишопур шаҳридан ўтиб борарди. Сultonул Уламо эски таниши — севимли шоири Фаридиддин Атторни эслади. Аттор ундан 15 ёш катта, суфий-

лик хирқасини мактабдоши ва оғаси, ўша Хоразмда ўлдирилган шайх Маждиддин Бағодий қўлидан кийган эди. Нишопурда ҳам нотинчлик, маърифатсиз бир зот ҳоким бўлган ва Атторни ҳам куфрда айблаб, баларга қилган экан. Шаҳар четидаги узоқ тоғ бағрида жой олган ғор оғзида икки қария учрашди. Улар уч карра бош эгиб саломлашгач, гулхани ўчиб қолган ўчоқ яқинидаги тошга юзма-юз ўтиришди ва лом-лим демай бир-бирларига тикилиб қолишли. Нигоҳлар кўнгилга назар айлар, борликни кичик унсурлар, қисқа шарҳлар орқали эмас, яхлитликда қабул қиласарди. Бундай пайтда сўз кетмайди. Сўз бу чоқ ожиз ва зерикарли. Улар шу ҳолда узоқ ўтиришди. Ниҳоят, шоир тилга кирди:

— ... бедаво, бесамар жаҳондан кечдим.

Шоир тугаб битган шамга ўхшарди. Унга ачиниш эса жоиз эмас, билъакс шундай зотдан айрилиб қолажак дунёта ачиниш лозим эди. Валад тўлишиб деди:

— Шукр, дийдорингизни кўришга мұяссар бўлдим.

Ҳамроҳлар бу сирли суҳбатни жим кузатишар эди. Шундан сўнг улар узоқ суҳбатлашдилар. Нима ҳақда — Жалолиддин буни билмайди. Ниҳоят, шоир буқчайганча форга кириб кетди ва бир китоб олиб чиқди. Дарвоҷе, бутун мусулмон дунёсини кезиб чиққан, тафаккурнинг энг тоза гавҳарларини ўзида жамлаган «Мантиқ ут-тайр» сингари асар ёзib, дунё асрорини инкишоф этган шоир, чехраларга боқиб кўнгилларни ўқувчи сирдон китобни отасига узатаётib, Жалолиддинга боққан эди. Китоб буюк шоирнинг «Асрорнома» достони эди. Унинг назари эса поёнига етадиган сўз авжини яна янги фалакларда кўришга иштиёқи эди. Ўша бесаранжом лаҳзалардаги бу қисқа учрашув Жалолиддин Румийнинг умр йўлидаги бир ойдин бекат бўлиб қолди.

Шунинг билан Нишопур ҳам ортда қолди. Энди йўл Салжуқийлар тасарруфидаги ерларда давом этарди. Малатия орқали Сивос, Арзинжон, Оқшешир йўлларида қарийб тўрт йиллик умр ўтди. Султонул Уламо мадрасаларда дарс берди, Жалолиддин эса отасидан бутун илмларни ўрганди. Вақтини таҳсил билан ўтказди.

Йўллардан ўтиб боришар экан, саргардон карвонларга, тўда-тўда йўловчиларга дуч келишарди. Улар ўзлари билан дунёнинг турли бурчакларидан хабарлар олиб келарди. Кўналғаларда кечагина Султонул Уламо кўчи ўттан йўлларда мўғул галалари изғиб юргани, шаҳарлар таслим бўлгани, Урганч кунпаякун қилингани ҳақида суҳбатлар бўларди. Ҳа, Хоразмшоҳларнинг офтоби тўлўга етганди. Йўлларда қўрқиб қолган Аббосийларга ёрдамга бораётган Салжуқийларнинг лашқарлари тўп-тўп бўлиб учарди.

Сокин ва баракотли салтанат тобора бағрига чорларди. Энди улар бир йил қишини ўтказиш нияти билан Лоранда (ҳозирги Караман) шаҳрига боришиди (1222). Унинг ҳокими амир Мусо кўнгли тоза, маърифатни қадрловчи туркий ҳукмдор эди, меҳмонларни очиқ чехра билан кутиб олди.

16—36 ғу

Лорандада бир йил эмас, ризқ тортиб етти йил қолиб кетишиди. Ҳоким Султонул Уламо ҳурматига шаҳарда мадраса қурдирди. Жалолиддин ҳам отаси билан бақамти ваъз ўқишига киришиди. Илк марта қалбida шеър завқи борлигини шу ерда туйди ва баъзан ваъзларида ўзининг байтларидан қўшиб ўқий бошлади. Савдогар Шарафиддин Лоло Самарқандийнинг қизи Гавҳар бонуга муносабати эса тарқоқ мисраларни бир илга тизишига ва фавқулодда ўтли сатрлар тузишига ундали. У эҳтиросли қалби билан бу гўзал ойимчани севиб қолди. Тезда тўйлари бўлди. Орадан йил ўтиб, Яратган уларни ўғил фарзанд билан сийлади. Унга бобонинг шарафига Валад деб ном бердилар. Кейинчалик Султон Валад комил инсон бўлиб етишиди. Бобоси ва отасининг ҳаёти ҳақида «Валаднома» достонини ёзди. Отасининг айтганларини сўзма-сўз йигиб, «Фиҳи ма фиҳи» («Ўзи ҳақида ўзи» ёки «Ичиндаги ичиндадир») китобини тузиш билан бирга падарининг таълимотини қувватлантириб, «Мавлавия» сулукини асосладики, ҳозирги кунда унинг тарафдорлари ер юзидаги ўн миллионлаб кишини ташкил этади.

Беш йил бурун арман подшоси Левон II дан тортиб олингган Лоранда кўп миллатли шаҳар эди. Унда туркийлар билан ёнма-ён форслар, юнонлар, арманлар ва бошқа халқлар яшарди. Бўшаб қолган монастир, бутхоналар ёнида масжидлар қурила бошлади. Шундай шароитда Султонул Уламонинг мавқеи ва хизматига эҳтиёж катта эди. Амир Мусо ҳам устозни узокроқ ушлаб туриш пайида эди.

Жалолиддин имкониятдан фойдаланиб, юон ва бошқа тилларни қўшимча равишда ўрганди. Турли динлар ва халқлар тарихи билан қизиқди. Эҳтимол, ана шу таҳсиллар жараёнида унда илк бора жами халқлар бир ота-онадан тарқалгани, барча динларнинг негизи ягоналиги ҳақидаги андишалар пайдо бўлгандир.

Лоранда дунёга тийрак кўз билан боқиб, нигоҳи қадалган уфқни кўзлаб ерда қадам ташлаб бораётган ёш йигит ҳаётида ўчмас из қолдирди. У шу ерда тириклик синоатларига илк бора дуч келди. Илк бора айрилиқ бағрини ўртади: дастлаб касалманд акаси Алоиддин, сўнгра онаси Мўмина хотун ёруғ дунё билан видолашди. Хомуш таҳаллуси билан илк шеърини ёзди. Илк марта инсон вужуди фақат тўқималардан иборат эмаслигини, унинг қайсиdir узвларида тўфон турса, ҳатто мияга ҳам бўйсунмай қолишини ҳис этди; бу дастлабки таассуроти ўзгармай қолди ва бир умр юрак миядан устун, деган ақида билан яшади. У бу ҳисни Гавҳаройимни севиб қолганда туйган эди. Ва, ниҳоят, дунёнинг боқийлиги зурриётларнинг давомийлигига («мен ҳам япроқман, томиримга экилганман») эканлиги саодати шу шаҳарда насиб этди: биринчи фарзанди Лорандада туғилди.

Султонул Уламо (Баҳовуддин Валад) бу ерда етарлича шуҳрат қозонди. Унинг ваъзларининг довруғи узоқ-узоқларга тарапaldi. Албатта, буни пойтаҳт, ҳукмдор билмаслиги мумкин эмас эди. Аниқ далилларга қараганда, Султон Алоиддин Қайқубод уламога маҳсус хат билан мурожаат этиб, уни Кунёга таклиф этади. Жуда кўп ваъдалар беради. «Амри подшо — вожиб» деганларидек, таклифни қабул қилмасликнинг иложи йўқ эди.

Аэбаройи ихлоси ва ҳурматининг буюклигини изҳор этиш учун кутиб олувчилик сафининг бошида султон Алоиддиннинг ўзи туради. Яқинлашгач, уламо тўхтаб, таъзимга бош эгди. Султон яна яқинлашиб, энгашди ва устознинг қўлини ўпмоқчи бўлди. Уламо ҳукмдорга қўли ўрнида ўпиш учун ҳассасини тутди. Бу шаккокликтан султон бағоят дарғазаб бўлди: «Бунча манман бўлмаса бу чол!». Аммо ҳамманинг кўзи унда эди, қаҳрини сездирмай, ҳассага лабини босди. Султонул Уламо унинг кўнглидан кечган гапни сезган эди, устозларга хос босиқлик билан муридларга ўқдек таъсир қилувчи оҳангда шундай деди:

— Мен такаббур эмасман. Билгинки, таслим бўлиш (бош эгиш) гадолар иши. Султонларга бу муносиб эмас.

Саройга эмас, Олтинпо мадрасасига жойлашиб олган шайх умр фаслининг тўлишган айёмида бутун иқтидорини ишга солиб ваъз ўқирди. Унинг лутфи оҳанрабодек кишиларни ўзига тортарди. Султоннинг талаби билан дамашқлик усталар бино этган улкан масжиди жомега Алоиддин Қайкубод бошилиқ хонадони вакиллари, саройининг жами аъёнларию аркони давлати, қозилар, ҳарбийлар, савдо-тарлар ташриф буяурарди. Ваъзларда Қуръони карим оятлари тафсир қилинар, шу асосда илми шариат, илми урфон, илми ҳидоят — хуллас, жами дунё сирлари ҳақида баҳс борарди. Минглаб китобларни кўрган, кўплаб диёрларни кезган уламонинг чақиндай хотирасида қанчалаб шеърий мисралар, ривоятлар, рақамлар, исм-шарифлар бехато айланар, оддий унсурнинг жузъий бир ҳолатидан бепоён самовий сирларини кафтдагидек кўрсатиб бера оларди. Бир далилнинг кўплаб талқинларини келтиран, бир талқин янги талқинларнинг занжирига уланиб кетаверарди. Нарсалар ва моҳиятлар Султонул Уламо ваъзи орқали жами сирларини намоён қиласарди. Тингловчиларнинг ҳар бири унинг назарида бўлар, уларнинг фақат зоҳирини эмас, ботинини ҳам кўриб туради тўё. Ораворада уларга мурожаат этиб тураг, сўзининг таъсирини текшириб борарди. Баногоҳ сомеълардан бири ҳайратига истеҳзо аралаштириб, «Ваъз айтиш учун соатлаб тайёр-

ланса керак», деган хаёлга борди. Шу ондаёқ уламонинг нигоҳи унда тўхтади, исмини айтиб чақирди-да:

— Куръон сурасидан билганингни ўқи, — деди. Қўлга тушган гуноҳкордек бечора тингловчи аранг бир оятни ўқий олди.

— Мен, — деди Султонул Уламо, — сен айтган шу оятга тайёргарликсиз қанчалаб шарҳ бера оламан...

Султонул Уламо қариб бораёттанини, Кунё унга ер юзидаги сўнгги манзил бўлишини сезар эди. Бир кун юқоридан шаҳарга разм солар экан, ёнида турган ўғли Жалолиддинга:

— Қара, бу ерда уйлар жуда кўп. Уларда набираларим, набираларимнинг набиралари яшайверсин, — деди.

Бу сўзлар мангалик тилак эди. Султонул Уламо 1231 йил 6(23) февралда вафот этади.

Жалолиддин Румий катта ҳаёт йўлининг бошида ёниб турган чироқнинг нури жуда ўткир эди.

Отаси вафотидан кейин Жалолиддин бош мударрис этиб тайинланади. Унинг учун асосий дастуруламал отасининг тажрибалари, панд-насиҳатлари ва «Ал-Маориф» китоби эди. Жалолиддин ваъз учун зарур ҳамма нарсага: илму маърифат, қувваи ҳофиза, хаёл-тасаввур ва нотиқлик малакасига эга эди, фақат унда тажриба, амал этишмасди. Қолаверса, кеча етакдаги талаба билан бугун бошқаларни етаклаши лозим бўлган устоз баробар эмас эди. Кунё мухитида отасининг содик шогирдлари қаторида унга ҳasad қилувчи зотлар ҳам оз эмасди. Улар ёш мударрисни тан олишмас, боз устига етук устоз-шайхлардан ёзма ижозати — шаҳодатномаси йўқлигини пеш қилишарди.

Ана шундай бир шароитда аллақачон мӯғулларга таслим бўлган Термиз шахридан «Кубравия» тариқатининг йирик вакилларидан бири, отасининг содик шогирди Сайд Бурҳониддин этиб келди. Суфийликда «Мұҳаққик» (ҳаққа етган) мақомига эришган шайх Бурҳониддин Термизий устозининг нури дийласини камолга етказиш вазифасини уз олдига мақсад қилиб қўйди ва унинг тарбияси билан жиддий шуғуллана бошлади.

Тасаввуф алломаларининг қайд этишича, бу йўлга кирган киши тўрт мақомни босиб ўтиши лозим: *шариат*,

тариқат, маърифат ва ҳақиқат. Ўзни тоблаш (чиниқтириш) босқичлари эса қўйидагича:

ШАРИАТ — тайёргарлик босқичи, ҳар бир мусулмон учун фарз бўлган амаллар бўлиб, бу ҳали йўлга кириш дегани эмас. Уларни тўла ўзлаштиргандагина иккинчи босқичга ўтиш мумкин. Шариат *амалга* асосланади ва кўпроқ зоҳирий таассуротлар (кўз, қулоқ, оёқ, қўл, юрак) орқали ҳосил қилинганд илмга суюнади. Шариатнинг белгиси *тафаккур*, раҳнамо *ақлдир* ва у кишини *олимга* айлантириш билан кифояланади. Шариатда камолга еттан кишини *отга* қиёслаш мумкин ва энди отни бошқарадиган чавандозга зарурат сезилади.

ТАРИҚАТ (йўл) тасаввуфнинг амалий қисми бўлиб, суфийларнинг руҳий-психологик машқлари, ўз-ўзини чиниқтириш ва тарбиялаш тадбир-усулларининг иккинчи босқичидир. Тариқатда *ботиний* кечинмалар (туйғу, сезги, ҳис, руҳ, қалб)га суюнилади ва у муридни МАЪРИФАТ-га мұяссар этади. Бу манзилларни *муҳаббат* раҳнамолигига тўла ўттан мурид (муродга интилувчи) мурод (Аллоҳнинг васли)га эришишда ҳақ йўлга — *тасаввуфга* еттан бўлади.

Тариқат мақомлари қўйидагилар:

Тавба — қайтиш, олий ахлоқий сифатларга қайтиш.

Вараъ — парҳез, тақво (тил, кўз, қалбни тийиш).

Зуҳд — ҳазар қилиш (ҳалол ва ҳаромни фарқлаш, бойликни рад этиш).

Фақр — Аллоҳга бандалик йўлида тупроқдек ном-нишонсиз бўлиш.

Сабр (сабр — иймоннинг ярмидир).

Таваккул — Аллоҳга суюниш.

Ризо — нафс розилигидан чиқиб, ҳақ розилигига кириш.

Шу ерда тариқат тугаб, камолга етишнинг сўнгги босқичи — ҲАҚИҚАТ, яъни ҳақиқий ҳаёт бошланади. Бу дарражадаги суфий ориф деб аталади. Уни чавандозга менгзайдилар. Уч босқични 1) олов ёндиришини эшитганман; 2) олов ёндиришини кўрдим; 3) оловда ёниб кўрдим — тарзида мисол билан ҳам тушуниралилар.

Шайх Бурҳониддин Термизий шогирди билан узоқ сұхбати давомида сездики, у мақомот босқичларидан тұлаүтиб, ҳол мартабасига етибди. Үнда «шими қол» камолға етган, тил билан ифодаласа бўладиган зоҳирий илмларда бенуқсон. Фақат инсондаги сўз билан тушунтириб бўлмайдиган гаройиб руҳий кечинмалар, фавқулодда феъл-атвор, хислатлар — «шими қол» даражасида тамкинга эришмаган, инсондаги тараб, сурур, ҳазинлик, шодлик, ҳам, завқшавқ, яйраш, соқинч, хумор каби тушунчаларни ҳисқилиш ва шарҳлашда юксак даражага чиқа олмаган. Бу мақомга етишда эса обрўли оиласда улғайған ва етарлича эъзоз кўрган Жалолиддиндаги гурур, кибр ҳалақит берарди. Шайх дастлаб унинг ана шу жиҳатини бартараф этмоқчи бўлди.

Сайд ёш уламога хирқа кийдириб, белини ридо камари билан бойлади. Шу онлаёқ Жалолиддиннинг соқолини қиртишлаб, қошларини юлб, сочини қиришди. Пир унинг бошига дарвешлар қалпоги — сарпўш кийдириди. Шу лаҳзадан бошлаб у барча имтиёздан мосуво бўлган, Сайд Бурҳониддин Мұҳаққиқнинг муриди эди. Мурид дегани ўз инон-ихтиёрини пирга топширган солик. У ҳамма нарсада шайхга сўзсиз итоат этиши шарт.

Пир шогирдини аяб ўтиrmади. Унга шаҳардаги ҳожатхоналарни тозалашни буюрди. Чарм челакларда муттасил ахлат ташир, тозаланган ҳандақлар эрталабгача баҳор сувлари билан тўлиб тураверарди. Ҳаммомда уч карра чўмилиб, тонггача «Ал-Маориф» китобини ўқир эди. У озибтўзиг кетган, бадбўй ҳиддан оғзига туз сололмасди. Ёмгиirlар камайгач, пир чорлаб, шундай деди:

— Сен юмушни тугатдинг. Фақат унуматгинки, юракни тозалаш ҳожатхона тозалашдан қийинроқ.

Жалолиддинни иккинчи сабоқ кутарди. У икки мурид билан шаҳардан садақа йиғиши керак эди. Тиланчилик қилиш биринчи юмушдан минг бора оғир эди. Баъзан секинроқ тозалаганимда бу азобда қолмасмидим, деб афсусланарди. Садақа сўраб юриб, одамларнинг қанақатигини ўз кўзи билан кўрди. Илм аҳлиниң заҳархандаси, қашшоқ одамларнинг сахийлиги, бой хонадонлар хизматкорларининг такаббурлиги унга турлича таъсир этарди.

Кўплаб зоҳидларга ўхшаб унинг пири очликни ҳикматлар эшигининг қалити деб биларди. Тамадди қилишга куруқ нондан бошқаси бўлмас, баъзан бир бўлак шўртак шолғом билан сийланарди.

Ниҳоят, шайх Жалолиддинни етаклаб бозорга тушди ва қассоблар растасидан ўтаётганда ичак-човоқлар солинган, пашшалар ғужғон ўйнаётган тоғорага ишора қиласди. Мурид сўёсиз тушунди, шартта ётиб, қуйқани ялади.

Синовлар яна давом этди. Очликни енгиш учун қорнита тош боғлаб олди. Отасининг китобини 101 марта ўқиб чиқувди, энди чўккалаб, бир оёғини йиғиб, унисини чўзиб, Куръон тиловатига киришди. Ҳар бир оят оҳанг ва садо воситасида тасаввурида қолмагунча ўқишга мажбур қилинарди.

Пир амри маъруфларида илоҳий тушунчаларни шарҳлар, мавхум тимсоллар воситасида бўлажак буюк шоирни моддий оламдан руҳоният дунёсига етакларди. Масалан, ҳайвонлар ва ўзини ўйлаб яшовчи одамларни бир деб тушунирарди ва бу бирликни уларнинг юмуши фақат насл қолдириш экани билан исботларди. Устози уни маърифат дунёсига етакларкан, кўпинча сўфий шоирлар Ҳаким Санойй ва Фаридиддин Атторга мурожаат қилишини сезиб етди. Ёмгиридан ювилган осмондек тиниқ зеҳнида муҳрланган бу зотлар кейинчалик, шеърият уммонида чарх урган чоғларида, севимли тимсолларга айланиб қолди.

Пир муриднинг иродасини тоблаб, уни ўз-ўзини енгиш сари етаклар, диққатини бир нуқтага йиғиб, ботинни кўришга ўргатарди. Соликнинг қурб, муҳаббат, шавқ, унс, мушоҳида, муҳоҳида, мукошифа мақомларидан шитоб билан пояма-поя илгарилашини мамнун қузатарди, унинг энг чигал кечинма ва ҳолатларни қўлда тутгандек тасвирлай олиш қобилиятига ҳайрон қоларди. Тасаввурга жон бағишилаган тимсоллар шайхнинг хаёлига ҳам келмасди.

Булар синов даври поёнига етиб бораётгани аломати эди. Ҳадемай, у соч олдирганига минг бир кун ҳам тўлди. Жами таассуротларни ёлғиз қолиб кечириш — синаб кўриш, узлатга чекиниш фурсати етишган эди.

Пир ҳужра тайёрлаб, унга бир кўза сув ва арпа нон киритиб қўйишни тайинлади. Муридни бошлаб борди-да,

ичкарига киритиб, ҳужра эшигини ташқаридан шуваб ташлаттириди. Узлат қирқ кун давом этди. Мұхлат тугагач, ҳужрага биринчи бўлиб пир қадам қўйди. Жалолиддин аста шивирларди:

Нарса йўқум хорижи олам эрур,
Ҳар не истарсан ўзингда жам эрур.

Шайх бу сўзлардан қаттиқ мутаассир бўлди. Муриднинг тилидан «ўзини топган ва ўзини унуган» кишининг икрори янгарарди. Муддао ҳам шу эди!

Мурид шайхнинг кўнглидан кечган Куръоннинг «Сизга бу бир сабоқdir, сиз эса билмассиз» оятига жавоб қилган эди. Шайхнинг кўнглини илғай олган мурид ориф саналарди.

Шайх Бурҳониддин Термизий Кунёда тўққиз йил қолиб кетди. Бу орада шогирд илмини такомилига етказиши мақсадида Ҳалабда бўлиб, Ҳалавия мадрасасида Муҳиддин ибн ал-Арабий, Камолиддин ибн ал-Адам каби улуғ мударрислар билан суҳбатлар қурди. Дамашқдаги машҳур Мақдасия мадрасасида мураккаб илоҳий-дунёвий масалалар юзасидан муҳокамалар юритди. Энди у ҳар жиҳатдан камолга етган, рақиблар ҳам зътиroz билдира олмайдиган даражага эришган эди.

Таҳсилдан қайтган Жалолиддин Кунёда катта тантаналар билан кутиб олинди. Устози Саид Бурҳониддин устидаги бош мударрислик хирқасини ечиб, ишонч билан унта топшириди. У буюк воиз ва илоҳиётчи олим бўлиб этишганди.

Муриднинг даражаси пирни қаноатлантиради. Кўнгли баҳузур устоз қониқиш билан юрганига қайтишни хоҳларди. Жалолиддин эса унга отасидек ўрганиб қолган, шунинг учун кетишга ижозатни пайсалга соларди. Ҳа, Саид Бурҳониддин Жалолиддинга отасидек қадрдан эди, бироқ отасидан фарқ қиласарди. Отаси вазмин, мушоҳадаси теран, сирли зот эди. Пир эса очиқ табиатли, бир оз жазаваси голиб келадиган феъли бор эди. Баъзан намозда бошқаларни унтиб, соатлаб саждадан бош кўтармасди. Султонул Уламо расмий диндорларга ўхшаб, шароб ичишни ҳаммага, жумладан, суфийларга ҳам ҳаром деса, Саид

Бурҳониддин бир гал «Кўтарганга — ҳалол, кўтармаганга — ҳаром», деган эди. Одамларнинг фикрини ўқишида ҳам пир Султонул Уламодан қолишмасди. Муриллар билан оқшом пайти гулхан атрофида сұхбатлашиб ўтиришарди. Бирдан:

— Зиёга кабоб келтиринглар, — деб қолди.

Орқароқда ўтирган Зиё қўрадаги чўғни кўриб, кўнгли суст кетган эди, шайх буни илгади.

Жалолиддин пирсиз ўзини ёлғиз сезарди. Таҳсилда юрган пайлари фаришталардек мулойим завжаси Гавҳар хотун тўсатдан дунёни тарк этган, унинг йўлларига кўз тикиб, нолимай-нетмай тупроққа кириб кетган эди. Ҳар оқшомги сұхбатларда ҳам дилига таскин олар, ҳам кун бўйи туғилган ўйларни баҳам кўриб, шуурини нурлантиради. Қариб, умри поёнига етиб бораётган шайх эса Қайсарига кетишга шошиларди. Ахийри рухсат беришдан бошқа илож қолмади. Кўп ўтмай шайхнинг вафот эттани ҳақида хабар келди.

Ҳам устоз, ҳам дўстдан айрилгач, оламни тарк этган отаси, Гавҳарнинг фироғи қанчалик оғир бўлмасин, ҳаммасини унутишга маҳбур эди, чунки Жалолиддин мансуб бўлган мақоматнинг талаби ҳаммасини одатдаги ҳол сифатида қабул қилишни талаб этарди. Фам-андуҳ чекиш, куйиниш шаккоклик ҳисобланарди.

Илму урфон ва савқи табиий билан лиммо-лим тўлган қалб одамларни оҳанрабодек ўзига тортарди. Унинг ваъзларини эшитиш, сұхбатида бўлиш учун узоқ-узоқлардан одамлар уммонга интилган дарёдек оқиб келишарди. Мавлоно Жалолиддиннинг шуҳрати чегаралардан ўтиб, оламни тутиб борарди. Гарчи атрофида кўплаб муриллари, шогирдлари бўлса-да, у ўзини ёлғиз ҳисобларди. Негадир бутун фазилатлари билан унинг талабига жавоб берадиган кишини тополмасди. У бир дўсти аниш (яқин ҳамсуҳбат)га муштоқ эди.

Баъзан шаҳардан ташқарига чиқиб, оддий одамларнинг киштикорини кузатар, дабдаба ва сохталиклардан холи бу ҳаёт унинг зериккан кўнглига завқ бағишлиарди. Энг оддий турмуш икир-чикирларини кузатиб, магарки илмда камолга етган бўлса-да, юпун либос ичидаги дилдиратан

вужудни тўла тушуниш учун бу салоҳияти камлик қилишини ҳис этарди. Унинг наздидаги Инсон барibir ечилмас жумбоқ, очилмас сир бўлиб қолаётган эди. Бир-икки сафар ахийлар жамоасининг йигинларига ҳам қатнашди. У ерда жорий қилинган тартиблар, аъзоларнинг феъл-атвори мадраса воизининг тасаввурларини янада чалкаштириб юборди. У юқорига ўрлагани сари кўпроқ манзарани кўрар, бироқ ҳаммасини тўла идрок этиб бўлмасди. Мавлоно Жалолиддин тақдирдан унинг губорли тасаввурларини ойдинлаштиришга ёрдам берадиган, уни яна ҳам юксалтириб, олам ва одам сирларини саҳифама-саҳифа намоён этишга қодир мўъжизани кутарди. Унга кўп нарса аён эди, аммо қалбини кемирган ҳақиқат дунё юзини кўрмай пин-хонлигича қолиб кетишдан хавфсирад, изтироб чекарди.

37-40 йил ва КЕЙИН

Кунё мавлоно Жалолиддин туфайли илму урфон бағрида яшарди. Хос жойларда муқаддас Қуръон оятлари тиловат қилинар, одамлар тўп-тўп бўлиб, муборак ҳадисларнинг мағзини чақишга интиларди. Ўзаро баҳсларда турли фикрлар изҳор қилинар, табиийки, томонлар ўз ҳақлигини исботлаш учун соатлаб мунозара қилишарди.

Бу галги баҳсга пайғамбаримиз Мұҳаммад саллоллоҳи алайҳи вассалламнинг икки ҳадиси сабаб бўлганди. Сарвари коинот лутф қилибдиларки, «Аллоҳ, аввало, оқ гавҳар яратди». Яна бир ҳадисда эса «Аллоҳнинг аввал яратгани ақлдир» дейилмиш. Демак, оқ гавҳар ақлми, ақлга баробарми? деган савол устидаги мунозара ўн беш кундан бери давом этарди.

Ўша куни Жалолиддинни пахта савдогарлари ўз маблагларига бунёд этган мадрасада баҳсга таклиф қилишган эди. Олатда, бундай тортишувлар аксар ҳолларда моҳиятдан узоқлашиб, ўз билимдонлигини, шу орқали худбинлигини намойиш қилишга ўхшаган даҳанаки жангга айланиб кетади. Айниқса, одамлар тирикчилиги начорлашиб, ҳаётий саволларга ечим кутиб турганда, уламоларнинг бундай мунозараларга илмини, умрини сарфлаши жоизмикан? Жалолиддин шундай қарама-қарши ҳислар қур-

шовида шогирдлари билан мадрасадан қайтар экан, муюлишда бир дарвеш шартта келиб, хачиригининг жиловини ушлади-да, кўзларига тик қараб, сўради:

— Айтгил, ким устун — Муҳаммад пайғамбарми ёки Боязид Бистомий?

Бу журъатли зот

Шамсиддин Муҳаммад Табризий

эди. Уни Шамс Табризий ҳам деб аташарди. Ёшлигидан суфийлик, тасаввуф илми сирларини замонасининг машҳур устодларидан ўрганган эди. Илм олиш, довруқли суфийларни кўриш учун тинимсиз дунё кезарди. Шунинг учунми унга «Парранда» лақабини беришганди. Унинг маънавий парвози кучли бўлганидан ҳам шундай аталган, дейди баъзи олимлар.

(Мавзудан бир оз четга чиқиб, маълум қиласизки, Китоб туманидаги Хўжаиспорос қишлоғи қабристонида шайх Шамсиддин Парранда дағн этилган, деган маълумотни эшитганмиз. Ул зот ҳақида «Шайх намозининг фарзини Маккада ўқиса, суннатини Китобда адо этаркан», деган ривоят юради. Мазкур далил бу табаррук зотнинг ҳам бизнинг ўлкамизда бўлганини тасдиқласа, ажаб эмас).

Ўз сафарлари давомида Жалолиддиннинг довруғини Дамашқда эшитган шайх 1244 йилнинг 26 нояброда Кунёга келган ва шаҳардати қандолатфурушлар карvonсаройига тушган эди. Ниҳоят, мавридини топиб, жиловидан тушди ва тинимсиз кезинишлари давомида пишигтан бошёрап саволни ўртага ташлади. Албатта, Жалолиддинда бу саволга жавоб тайёр эди, бироқ Шамс ҳам анои эмас, қандай мантиқ билан у бундай сўроқ қўймоқда, унинг «ўқи» нимадан иборат? Албатта, даражага етишган инсон билан Аллоҳнинг вакилини тенглаштириб бўлмасди, Жалолиддин иккilanмай:

— Албатта, Муҳаммад алайҳиссалом, — деди. Бу жавобни Шамс кутган эди, энди иккинчи саволи билан тузоқни ошкор қилди:

— Маъқул. Унда нега Муҳаммад (с.а.в.): «Юрагимни занг босиб, Эгамнинг олдида ҳар куни етмиш карра тав-

ба қиласмен», дейди-ю, Боязид: «Мен қусурлардан холи бўлдим, жисмимда Худодан бошқа ҳеч нарса қолмади», деб жар солади?

Савол жиддий исбот талаб қиласарди.

Боязид Бистомий IX асрда яшаган машхур тасаввуф алломаларидан бўлиб, мурид(солик)ни фанога ва ундан кейин бақога ҳаяжонли, сершовқин, руҳий кечинмаларни ғалаёнлар билан олиб боришга мойил йўл тарафдорларидан эди. Муҳаббат ҳақида гапиргандা, Бистомий уқтиришича, ваҳдад ва фано шундай бир руҳий ҳолатда рўй берадики, солик, худди шароб ичган одамдек, ўзини унтулади. (Шамсиддин Табризий ҳам шу йўл тарафдори эди. Жалолиддин Румий ҳам шу йўлдан кетади).

Суфийлар дунёсида Бистомий юқори нуфузга эга бўлиб, «Султонул орифин» унвонига сазовор бўлган эди.

Савол берган зот билимларнинг нисбийлигига ишонарди. Гарчи инкор этиб бўлмайдиган ҳақиқат устида муҳокама кетаётган бўлса-да, аниқ нуқтада мантиқ у томонда эди.

Жалолиддин зарба еган одамдек ҳушёр тортди, нотаниш кишининг кўзига узоқ тикилиб қолди. Йўловчи бу қарашлардан сұхбатдошининг юрак мусаффолигини пайқади. Жалолиддин мунозаранинг балогатидан паст тушмай, шундай жавоб берди:

— Мұхаммад (с.а.в.) ҳар куни етмиш мақомни босиб ўтарди ва ҳар гал тавба-тазарру этарди. Боязид эса бир пояда туриб, жазава ичилада ўша сўзларни айтмиш.

Бу саволга ҳеч ким бундай жўяли жавоб беролмаганди. Мавлононинг юрак мусаффолигидан ва тамкини жавобидан маст бўлган Шамсиддин ҳушдан кетиб, ерга йиқилди.

Бошқа бирон-бир икки зотнинг учрашувига ўхшамаган бу дийдорлашув инсоният тарихида ўчмас из қолдирди. Бу икки инсон тўё бири узук, бири кўз эди-ю, дунёнинг икки буржига улоқтириб юборилган, фалаклар айланиши, вақтлар кесишуви билан шу пайтда шу жойда учрашган эди. Агар икки инсон бир-бирини топиб, бири иккинчисида ўзини кўрса, бир-бирини англаб, бир-бирини севса, бу дунёдаги энг ажойиб ҳодисалардан бўлади.

Эҳтимол, бундай учрашув ўша одамларнинг шахсий ҳаётидагина мўъжиза саналиб қолар, бироқ бугун дуч келган икки зот ҳис ва идрокнинг, ақл ва эҳтироснинг, илҳом ва туйғунинг — хуллас, бир-бирини тўлдирувчи юзлаб икки унсурнинг ўзини ўзида жамлаган икки дарё эди. (Бугунги кунда Кунёда «Икки дарё учрашуви» — «Маржа ал-баҳрайн» деган кўча бор эмиш). Уларнинг учрашуви инсоният учун Инсонни яратди — кейинчалик Жалолиддин Румий даҳоси шундай мақомга эришди, бутун олам аҳли тафаккури ўзгача қиёфа кашф этди, фақат тафаккур эмас, одамларнинг яшаш тарзи ҳам ўзгариб кетди.

ЧЛОУР

Жалолиддин Румий билан Шамсиддин Табризийнинг илк сұхбати узлуксиз уч ой давом этди. Дунё кезган, бе-ҳисоб синоатларни бошдан ўтказган Шамсиддиннинг сұхбатлари Жалолиддинни бутунлай ўзига сеҳрлаб олди. Унинг ҳикояларини тинглар, муҳокамаларига қулоқ тутар экан, ҳозиргача ўзи излаган нарсани топганга ўхшади. Жалолиддин илму урфонда тенгсиз эди. Бироқ унинг юраги ҳали жунбушга тушмаган эди. Ҳолбуки, дунё асрорини англашда ақлдан ҳам юқори кўтарилиш, жазава, ҳаяжонга берилиш (аудация беатафика) кишида башорат қилиб бўлмайдиган ҳолатлар ато этар экан. Шамсиддин Табризий назарида, комил инсон — ўз-ўзини англаган ва ўз-ўзини унутган инсон. У ёш дўстини пояма-поя шу мақомга олиб чиқди. У Жалолиддинни шоирга айлантириди.

Жалолиддиннинг содиқ шогирдларидан бири, ахийлар жамоаси оқсоқолининг ўғли Ҳисомиддин устознинг хуш дақиқасини топиб, «Ваъзларингизда ифодаланган гўзал маъноларни худди Саноий ёки Атторга ўхшаб, достон қилиб ёzsангиз бўлмайдими?» деди. Мавлоно шу зумда ғаладондан тоза қоғоз чиқарди-да, ўз қўли билан 18 байт маснавий ёзди ва қоғозни Ҳисомиддинга узатди. Бу «Найтаронаси» бўлиб, шундай бошланарди:

Тингла, най андоқ ҳикоятлар қилур,
Айрилиқлардан шикоятлар қилур.

Шеър 35 байтдан иборат (Ж. Камол таржимасида, русчада А. Гребнов таржимасида 40 байт). Қолганларини эса айтиб турди. Ҳисомиддин пайма-пай ёзиб олаверди. Машхур «Маснавий» китобининг ёзилиши, умуман, буюк ижод шу тарзда бошланди.

Жалолиддин қалбida ишқ илк бора чечак ёзган йигитлик йилларида паришон ғазаллар ёзган, лекин уларни тўпламаганди. Ҳатто у дастлаб шеъриятга ҳуши йўқлигини таъкидлаган эди. Мана, умрининг тўлишган палласида у шеър билан учрашди. Зоро, у шеърнинг орқасидан қувламади, балки шеър уни ўзига чорлади. Дастлабки таронадан сўнг

Ҳисомиддин Ҳасан Чалабий

қўлида қоғоз ва давот билан шоирнинг изидан соядек эргашиб юрди. Унинг фидойилиги билан неча минг шоҳ сатрлар бутун инсониятнинг маънавий ҳазинасига айланди.

«Маснавий» («Маънавий маснавий») 25700 байтга яқин фундаментал асар бўлиб, анъанавий Шарқ достонлари йўлида ёзилган. Undagi кўплаб ҳикоятларда най, тўти, кўза, май, дарвиш, сўфи, bemor, oшиқ, deҳқон сингари тимсоллар асосида шоирнинг дунёқарashi акс этган. Маълумки, буюк сўз санъаткорлари энг эзгу инсоний ғояларни тараннум этганлар, таъсирили воқеалар билан инсон шуурига яхши амалларни сингдиришга ҳаракат қилганлар. Жалолиддин Румий қарашлари исломий ақидалардан келиб чиқсан эди. «Маснавий»да муқаддас Куръонга тез-тез мурожаат қилиб турилади. Мутахассисларнинг таъкидлашича, унда 760 ўринда оятлардан айнан форсийга таржима қилиниб келтирилади. 745 ҳолатда пайғамбаримизнинг 703 ҳадисларидан фойдаланилган. Бу асар жуда катта обрў қозонди, барча давраларда эътироф этилди. Яратилганига икки юз йилдан кейин уни машхур шоир ва суфий Нуриддин Абдураҳмон Жомий «Форсий Куръон» деб атали.

Жалолиддин илоҳий илҳом оғушида ижод қиласарди. У Шамс билан учрашгач, бутун дунёни унутди. Ваъз айтмай кўйди. Муриллар, шогирдлар ҳам кўзига кўринмасди.

Бу ҳолдан ташвишга тушган муҳлислар Шамснинг жонига қасд қилишгacha бордилар. Таҳликага тушган Шамс 1246 йил 11 марта ҳеч кимга сездирилмасдан Кунёдан қочди. Бу айрилиқ Жалолиддинга баттар таъсир этди. Устозининг забун ҳолидан афсусланган шогирдлар Шамсни излашга киришилар. Султон Валад уни Шомдан топиб келди. Яна дилкаш сұхбатлар бошланиб кетди. Бироқ Жалолиддин ўзига қайтмади. Муриллар такрор жунбушга келдилар. Кўп ўтмай, Шамс Табризий бутунлай йўқолди ва қайтиб кўзга кўринмади. Жалолиддин «Қуёшим ботди» деб фарёд кўтарди, қайтиб мадрасага ҳам, минбарга ҳам чиқмади. Ҳижрондан қалби яраланганд шоир кўплаб газаллар яратди, тасаввифий шеърлар битди. Бу ўтли ижод маҳсулли «Девони Шамси Табризий»да жамланди. У 54000 байт гўзал шеърлардан тўқилган.

Жалолиддиннинг бисотида ҳамма нарса бор эди: садо-қатли муриллар, фидойи шогирдлар, султонлар унинг қабулига навбатда туарди, одамлар сұхбатига ошиқарди. Аммо унинг юрак тубини бир дард тешгудек бўларди, — бу суюкли дўстнинг фироги эди. У аламзада дилига малҳам истар, ҳижрон азобини унуглишни хоҳларди. Ич-ичида бир мунгли наво ёруғликка йўл излаб чўкиб ётарди. Бир куни бозордан ўтиб, заргарлар растасига яқинлашди. Усталар қўлида ишлайтган болғалардан шундай садо таралар эдики, бу оҳанг у излаб юрган, тополмаётган ва бугун топган мусиқасига ўхшарди. Оҳанг уни ўзига асир этди, бутун вужудида сел бўлиб оқди. Қўлларини ёзди-да, чарх уриб айланди. Бу ҳаракат унга мислсиз ҳаловат бағишлиди ва яна айланниб, чарх ура бошлади. Усталар бошларини кўтариб қараганларида узун яктагининг этаклари ҳавога тўлган, салласининг печи бошига чулғанган одамнинг зарб билан рақс этаётганини кўрдилар. Уларнинг бошлиғи заргар

Салоҳиддин Фаридун Зарқуба

мавлонони таниди-да, усталарни яна ҳам жадалроқ ишлайверишга даъват этди. Рақс этувчи ўзини унуглини, у ер

ва само ўртасида чарх уради. Ниҳоят, у тұхтади, чехраси мамнун эди. Гүё умр бўйи истаган оромини шу лаҳзада топган эди.

Шу дамдан бошлаб Салоҳиддин унинг яқин кишисига айланди. Шамснинг соғинчи ҳам чекинди, шоир «Күёш ботиб, ой чиқди» дея таскин топди. Шу билан инсонлар қалбига ҳақ нурини олиб киришнинг яна бир усули ҳам инкишоф этилди. Энди давраларда ваъз, шеър билан бирга рақс ҳам ижро этиладиган бўлди. Кейинчалик бу ҳолат суфийлар ҳаётида барқарор ўрин олди ва «Зикри самоъ» номи билан таомилга кирди.

* * *

Мавлоно ва Салоҳиддин икки танда бир жондек ўн йил бир-бирларига масту мафтун бўлиб юришди. Шамс Табризий Жалолиддинга бир оловни юқтириб кетганди, агар Салоҳиддин бўлмаганда, у шу оловда куйиб кетиши мумкин эди. Салоҳиддин оловнинг тафтини ўзига олди, шуylаси эса Жалолиддинда қолди. Висол билан мунаввар бўлган қалб ила Мавлоно гўзал мисралар тизди. Унинг хуш кайфияти шеър бўлиб қоғозга тўкиларди. Шундай қилиб, «Маснавий» устида жадал ишлади, унинг биринчи китоби тугаб қолган эди. Кўпдан туз тотмаган Жалолиддин тонгга яқин бир бурда нон еди. Шу луқма тафаккур мавжини лойқалек босди. Шоир Ҳисомиддиндан қаламни кўйиб туришни сўради. Шу ҳолда роса беш йил илҳом тутқич бермади. Нафсни жиловлай олмаганлик азобини шунча йил тортишга тўғри келди. Хуллас, олти китобдан иборат мислсиз улуғ асар ана шундай қийноқлар ва жасорат билан ўн беш йилда дунёга келди. «Маснавий»ни шарҳлаб ёки тушунтириб бўлмайди, — дейишади, — бунинг учун «Маснавий»дек китоб ёзиш керак. Уни факат ўқимоқ лозим».

Бу орада Салоҳиддин қартайиб, тўшакда узоқ ётиб қолди. Мавлоно унинг ўлишини истамасди. Охири илтижо қилди: «Ижозат бер, бу дунёни тарқ этай, азобдан қутулай». Нақадар оғир бўлмасин, Салоҳиддиннинг бирор тилагини рад этмаганди, видолашиб чиқиб кетди. Салоҳиддинни доира ва най тароналари билан, ҳофизлар кўшиқ

куйлаб дафн этишди — марҳумнинг васияти шундай булган экан.

Энди Мавлоононинг атрофида парвонадек Ҳисомиддин Чалабий қолган эди. Фарзанд Султон Валад ҳам содиқ мурид, ҳам муносиб ворис эди. Кейинчалик ҳам отасининг меросини ихлос билан тўплади. Унинг саъй-ҳаракати билан Жалолиддин Румийнинг 2703 ғазал, 1790 рубоийсизни жамлатан тўплам — «Девони кабир» юзага келди. Насрий асарларини ҳам алоҳида китобга йиғди. Мавлоонинг нури дехқон йигит Юнус Имро қалбига-да зиё соғди. Султон Валад ва Юнус Имро янги халқона ва анъанавий турк шеъриятининг икки қаноти бўлиб улғайдилар.

АБДАДИЯТ

Мавлоно Муҳаммад Жалолиддин Румий ҳижрий 672 йил жумодул охирнинг 5 ида, милодий 1273 йил 12(17) декабрь куни вафот этган. Унинг жанозасига туркийлар ва юнонлар, арманлар ва яҳудийлар, мусулмонлар ва христианлар баробар иштирок этишади. Негаки, «Биз дунёга одамларни ажратиш учун эмас, бирлаштириш учун келганимиз», деб маълум қилган шоир ва воиз жами инсонлар бир авлоддан тарқалганини, динларнинг асоси ягона эканини умр бўйи таъкид ва ташвиқ қилиб ўтди. Унинг учун бутун инсониятнинг баҳти, бутун оламнинг гўзаллиги ягона истак эди. Шу туфайли у жами одамзоднинг фахрига айланди.

Жалолиддин Румий шахси — ўта нодир ҳодиса. Бу ноҳирликнинг қамровини шартли равишда энг жён соддалик ва энг мураккаб комиллик ораси, деб белгилаш мумкин, яъни оддий мантиқ шуки, бир қўлда таёқнинг икки учини ушлаб бўлмайди ёки бир вақтда танганинг икки тарафини кўриш мумкин эмас. Бироқ Жалолиддин Румий иқтидори истисно тариқасида бу ҳолатларни рад этар, у бир қўлда таёқнинг икки учини ушлай олар, бир вақтда танганинг икки тарафини кўриш даражасида эди. Тасаввурни ойдинлаштириш учун иккита одми мисол келтирамиз.

«Маснавий»дан бир байт:

Эшаги бор эрса тўқим йўқ эди,
Топди тўқим, эшагин бўри еди.

Румийта хос талқин:

«Мен Худонинг бандасиман» дегувчилардан «Мен Худоман» (Анал — Худо) дегувчилар художўйроқдирлар. «Мен Худонинг бандасиман» деганлар бағоят такаббур бўлиб, гарчи бошларини эгиб бўлсалар да, ўзларини Худо билан ёнма-ён қўядилар, қайсиdir даражада ўзларига мавқе талаб қиласдилар. «Мен Худоман» деганлар эса ўз фуурларини синлириб, Худо билан бирикиб кетганликларини (яъни «мен — йўқман, Худо — бор») таъкидлайдилар».

«Ваҳдати вужуд» — Жалолиддин Румий ва бошқа суфий шоирлар улуғлатан гоялардан эди. Бу ягоналик фақат Яратган билан узвийликда эмас, балки негиз — моя — халқ ялакатлиқда ҳам ўз моҳиятини намоён этар эди. Замонлар оша Аллоҳнинг бандалари — одамларни тоифаларга ажратиб, уларга турли муносабатлар шакланиб келган бир шароитда бойлар ва камбагалларни бир кўзда кўриш, бинобарин, давлатмандлару ҳукмдорларга маддоҳлик қилишдан тийилиш ҳам бир маънавий камоплот намунаси эди. Румий севган шоирлардан бири — Фаридиддин Аттор қарийб беш юз минг мисра шеърий мерос қолдирди, бироқ бир сатрида ҳам хушомадгўйлик қилиб, қаламини булғамади. Шу фазилати билан ҳам бу ўлмас мерос яна бир шуҳратга дохил бўлди. Румий ўз буюк салафининг йўлини қувватлаш билан бирга карам ва марҳаматнинг, жасорат ва ҳимматнинг янги намуналарини намойиш этди.

... Юнон бола Сирянус очлик тазиيқида дўконга ўғриликка тушди ва ваҳимадан дўкондорни ўлдириб қўйди. Уни ўлимта ҳукм этдилар. Беихтиёр қатл майдонига келиб қолган мавлонога оломон иккига бўлинниб йўл беради. Ҳамма ундан ёрдам сўрарди. Жалолиддин тўнини ечиб, боши кундага қўйилган боланинг устига ташлади. Жаллод болтасини ишга солишта журъат этолмади. Бу ҳақда сulton Fiёсиддин Қайқубодга хабар берганларида, кулни озод

қилиб юборишни буюрди. «Бир одамнинг хуни нима бўлибди, мавлоно қиёматда бизнинг жами гуноҳларимизни сўраб олишга вакил қилингандар», деган экан қўшимча қилиб ҳукмдор.

Қаранг, фалак чархи қанча нағозишлар кўрсатди. Тахт илинжида ўз отасига қарши борган ва уни маҳв этган Фиёсидин кибру ҳавога ортиқ берилди. Муқаррар ёв — мўғулларни писанд қилмади. Ниҳоят, 1243 йил июнда Кўсатоқ водийсида Салжуқийларнинг қора байроқли қўшини билан мўғулларнинг қизил байроқли қўшини тўқнашди. Салжуқийларнинг энг номдор лашкарбошиси биринчи зарбадан ҳалок бўлгач, руҳан ожиз кишиларда бўлганидек, кибру ҳаво ўрнини бир зумда қўрқув эгаллади, парокандалик бошланди. Ана шундай таҳликали дақиқаларда ҳалқ подшолардан, қурол тутган ҳарбийлардан эмас, суфий шайхлардан, воиз ва зоҳидлардан нажот кутади. Зеро, улар жамиятнинг шундай табақаси эдиларки, эътиқодлари сабаб ҳар қандай фалокатга, очлик ва қашшоқликка тайёр, бироқ тан кулфатини руҳ мағлубияти билан алмаштиргмаган эдилар.

Салтанат мўғуллар оёғи остида топталди, мамлакатни бошқариш жилови кўлдан кетди. Бало чигирткадек сокин ва фаровон Кунёга яқинлашиб келарди. Бу мудҳиш кўчки тўзал чаманзорни маҳв этишига тараф йўқ эди. Шаҳарни ваҳима қоплаган, хотинлар эрларидан мўғуллар беномус қилмасдан ўз қўли билан ўлдирилишни сўрарди. Эркаклар муқаррар ўлим, ҳунармандлар саҳроларда гўрга киргунча давом этадиган меҳнат азобидан қўрқишаради.

Тун зулмати чўккач, Жалолиддин Халқабагўш дарвозасидан билдиримай чиқди-да, водийга тушиб кетди. У тун бўйи Қазанвиран тепалигида ёлғиз қолди. Агар мўғуллар бостириб келса, у биринчи шаҳид бўларди. Эрталаб соғсаломат қайтгач, Жалолиддинни кўрган шаҳар аҳли ҳайратдан ёқа ушлади. Ва шу билан мўғуллар Кунёга қайтиб қадам қўймади! (Кавказда уларга қарши исён кўтаришган. Зудлик билан ортга қайтишга мажбур бўлишганди). Мазкур омонликни ҳамма мавлононинг кароматига йўйди. Бу бежиз эмас эди.

Айни пайтда вазири вузаролар, амиру уламолар султон Иzzатдин бошчилигига жанг майдонини тарк айлаб, пойтахтни қисмат ҳукмiga ҳавола этиб кетган эдилар (1256). Кейинчалик Иzzатдин Кайковус II маҳрамлари билан мадрасага ташриф буюрганда, мавлоно, ҳеч нарсанни сезмагандек, шогирдлари билан суҳбатни давом этти-раверди. Султон дурадгорлар, сартарошлар, кўнчилар орасида бир пас ўтиргач, кокисорлик билан бош эгиб сўрайди:

— Мавлоно ҳазратлари мени уз панду мубораклари билан сарафroz этсалар!

— Сенга нечун насиҳат айлай, — дейди шоир, — сен чўпон бўлиш ўрнига бўри бўлдинг. Асраб-авайлаш ўрнига талон-тарож этдинг. Аллоҳ сени султон қилди, сен эса иблиси лаъин измини тутдинг!

Ривоят қилишларича, султон бу сўзларни эшишиб, йиғ-лаб чиқиб кетган эмиш.

Машхур воиз, оташнафас шоир сифатида танилган, ҳар қандай шароитда ҳақиқатнинг юзига тик қараб, юракда борини айта оладиган ва шунга қўра ҳалқ меҳри билан чулғаб олинган мавлоно ҳукмдорларнинг юзига ҳам тик боқиб, ўз муносабатини изҳор эта оларди.

Бу фазилат мавлоно Жалолиддин Румийнинг олмос-дек кўп қиррали шахсиятининг бир белгиси, холос. Бугунги кунда жаҳон афкор оммаси ул зоти шарифни жуда кўплаб сифатлари боис улуғламоқда, ҳаёти ва фаолияти билан қизиқиб, унинг мўъжизаларига тобора яқинроқ бўлаётир. Зоро, бир вақтлар «Саноий ва Аттор ҳижрондан сўзлашмишлар. Бизнинг васфимиз эса висол ҳақида. Мана, моҳият» леб лутф қилган шоир инсониятга ҳамон эзгулик, ҳаётсеварлик ғояларини юқтириб келмоқда. Унга талпинишнинг, уни эъзозлашнинг сири ҳам шунда бўлса керак. Зоро, ҳали одамзод нурга, ёруғликка интилишдан тўхтагани йўқ.

Ҳа, Жалолиддин Румий — такрорланмас мўъжиза. Бундай буюкликка қай йўсинда эришганини ҳикоямиз давомида бир қур кўздан кечирдик. Шу қисқа саёҳатимиз орқали унинг қанчалаб қийиноклар, ранжу маломатлар ке-чирганини ҳис қилиш қийин эмас. Унга уюстирилган туҳматлар, фитналар, ҳасадгўйларнинг разолати ҳақида

сўзлаш мавриди эмасдир, билъакс, биз Румий талъатига мафтун бўлар эканмиз, у мақсадни жуда буюк олганини, унинг нигоҳи Ҳаққа қаратилганини таъкидлаш жоизdir. Ана шу буюк аъмол учун, бетимсол висол учун қолган ҳамма нарса абас эди. Ҳатто шеъриятдек соҳир мўъжиза ҳам Румий учун мақсад эмас, улуғ орзуга етишиш йўлида восита бўлиб қолди. Аксарият ўзининг бутун қобилиятини ва, албатта, умидини шеъриятга бағишлайди. Шеър орқали орзулари рўёбга чиқишини, обрў, мансаб, бойликка эга бўлишини истайди. Мавлоно Румий эса бу даражадан устун туради. У шоирликни орзу қилмади, балки у кўзлаган ёруғ манзил уни шоирга айлантирди. Таассуфки, унга илтифот қилган толеъ фақат уни сарафроз этибгина қолмади, балки Румий дунёнинг энг улуғ шоирларидан бирига айланди. Унинг беназирлиги, бетимсоллиги ҳам шунда. Гўё дараҳтдаги мевага ҳамма кўл чўзади-ю, мева эса ўзи истаган кишига «Мени ол!» деб илтифот қиласди. Жалолиддин Румий ана шу даражада шарафланган зотдир.

Унинг боқий ижоди ҳамон инсоният хизматида. У васф этган, одамларга илингган эзгу туйғулар, панд-насиҳатлар ҳамон оҳорини йўқоттани йўқ. Румийнинг йиллар қаърини тешиб ўтувчи нигоҳи билан бугуннинг энг сўнгги муаммоларига ҳам жавоб топиш мумкин. «Менинг болаларим китоб ўқимайди, менинг болаларим компьютер ўйнайди», дейли баҳтиёр ота мўйловини силаб. Агар Румий назари билан виждонга тик боқиб баҳоласак, ўша отани ва ўғилларни нима кутаётганини билиб олиш қийин эмас. «Китоб ўқисам, ишим орқага кетади», дейди замонавий тадбиркор. У ўз сўзи билан тадбиркорлиги ва «иши»ни олдинга силжитган омади нима ҳисобидан эканини фош қилиб қўяяпти. Ахир азалий қадриятлар эскиргани йўқ ва эскирмайди ҳам — китоб одамни ҳаромдан қайтаради, ҳалолликка ундайди-да.

Боқий Сўзнинг, Жалолиддин Румий сингари мўътабар инсонлар ҳаётининг моҳияти шунда эмасми?! 800 ёшнинг ҳалқаро миқёсда тўй қилиниши шу ҳақиқатнинг оддий исботидир.

2007 йил, апрель-май

МУНДАРИЖА

Қалбимдаги «Соҳибқирон» қўшиғи

Қуёшни елкалаган чўққига боқиб	5
Кўприк	18
Қадрдон йўллар чорлайди	21
Маҳак тоши	25
Қорачикқа жойлашиар қуёш	30
Кўзлар кўп, қарашлар кам	36
Мангур устувор ҳақиқат	40
Халқимиз юрагидаги ёдгорлик	49
Истиқдол баҳш этган илҳом тұхфаси	57
Ўзини излаётган Оқсарой	62
Махсус қомусга эҳтиёж бор	67
Чақинли лаҳзалар	71
Сўзимдан англа ўзимни	77
Қалб ва қанотлар	89

Мансубият

Мудроқ қояларнинг уйғоқ юраги	99
Аррапофотда қутлуғ из бор	111
Тоғларта тикилган эътиқод	113
Икки минг беш юз қадам	125
Ватан эгалариникидир	135
Юртдошлар (ҳикоя)	142
Нега хомушсан, ўғлим?	151
Эр ва ер	158
Абадий яшил ўрмон	166
Бағри чўғли қадрдон	171
Шаҳодат	177

Машъала учқунлари

Санъат соҳталикни кечирмайди	189
Давр садоси	194
Қўшиқ билан ўйнашманг	200
Ҳаётсеварлик	209
Кишлоқнинг назмий нафаси	214
Тўртинчи фидирак	218
Матбуот қироли ким?	222
Сўз айтиш масъулияти	225
Истеъоддининг кучи	232
Талабадан профессор кўп	237
Ибн Арабшоҳнинг истеҳзоли эътирофи	243
Олим адашса, олам адашади	255
Ошо ҳақиқатлари	261
Румий ўтган йўл	268

**С 33 Сатторий, Ҳаким
Маҳақ тоши / Ҳ. Сатторий. — Тошкент: «O'zbekiston», 2008. — 296 6.**

ISBN 978-9943-01-216-5

ББК 84(5Ў)6

Ҳаким САТТОРИЙ

МАҲАҚ ТОШИ

**Бадиий муҳаррир Ҳ. Мехмонов
Техник муҳаррир Т. Харитонова
Компьютерда тайёровчи Ф. Тугушева**

**Босишга руҳсат этилди 24.06.2008. Қоғоз бичими 84x108'/₃₂.
«Таймс» гарнитурада оғсет усулида босилди.
Шартли б.т. 15,54. Нашр т. 14,59. 3000 нусхала чоп этилди.
Баҳоси шартнома асосида. Буюртма № 08-71.**

**Ўзбекистон Матбуот ва ахборот агентлигининг
«Ўзбекистон» нашриёт-матбаа ижодий ўйи.
100129, Тошкент, Навоий, 30**